







Presented to the Library  
OF THE  
University of Toronto.  
BY

*G. R. R. Cockburn M. A.*

*Toronto*

*March 29 1890*







22  
✓816  
1854

Virgil

P. VIRGILII MARONIS)

OPERA OMNIA.

---

OXONII,  
JOHANNES HENRICUS PARKER:  
ET LONDINI, 377, STRAND.

M DCCC LIV.

~~590~~  
29/3/1890

## EDITORIS MONITUM.

IN hac editione textum Heynianum secuti sumus, nisi paucis in locis ubi Philippi Wagner emendationes admisimus. Brevem chronologiam addidimus, ex Henrici Fynes Clinton *Fastis Hellenicis*, et Christiani Gottlieb Heyne poëtæ *Vita per Annos digesta*, confectam.

*Oxonii,*  
*Jan. 1848.*



P. VIRGILII MARONIS  
B U C O L I C O N  
L I B E R.

~~~~~

ECLOGA I. TITYRUS.

MELIBŒUS. TITYRUS.

MEL. TITYRE, tu patulæ recubans sub tegmine fagi  
Silvestrem tenui Musam meditaris avena :  
Nos patriæ fines et dulcia linquimus arva ;  
Nos patriam fugimus : tu, Tityre, lentus in umbra  
Formosam resonare doces Amaryllida silvas.

TIT. O Melibœe, deus nobis hæc otia fecit :  
Namque erit ille mihi semper deus ; illius aram  
Sæpe tener nostris ab ovilibus imbuet agnus.  
Ille meas errare boves, ut cernis, et ipsum  
Ludere, quæ vellem, calamo permisit agresti.

10

MEL. Non equidem invideo ; miror magis : undique totis  
Usque adeo turbatur agris. En, ipse capellas  
Protenus æger ago ; hanc etiam vix, Tityre, duco.  
Hic inter densas corulos modo namque gemellos,  
Spem gregis, ah ! silice in nuda connixa reliquit.  
Sæpe malum hoc nobis, si mens non læva fuisset,  
De cœlo tactas memini prædicere quercus.  
[Sæpe sinistra cava prædixit ab ilice cornix.]  
Sed tamen, iste deus qui sit, da, Tityre, nobis.

TIT. Urbem, quam dicunt Romam, Melibœe, putavi 20  
Stultus ego huic nostræ similem, quo sæpe solemus  
Pastores ovium teneros depellere fetus.  
Sic canibus catulos similes, sic matribus hædos

Noram ; sic parvis componere magna solebam.  
 Verum hæc tantum alias inter caput extulit urbes,  
 Quantum lenta solent inter viburna cupressi.

MEL. Et quæ tanta fuit Romam tibi causa videndi ?

TIT. Libertas ; quæ sera, tamen respexit inertem,  
 Candidior postquam tondenti barba cadebat ;  
 Respexit tamen, et longo post tempore venit, 30  
 Postquam nos Amaryllis habet, Galatea reliquit.  
 Namque, fatebor enim, dum me Galatea tenebat,  
 Nec spes libertatis erat, nec cura peculi.  
 Quamvis multa meis exiret victima sæptis,  
 Pinguis et ingrata premeretur caseus urbi:  
 Non unquam gravis ære domum mihi dextra redibat.

MEL. Mirabar, quid mæsta deos, Amarylli, vocares,  
 Cui pendere sua patereris in arbore poma ;  
 Tityrus hinc aberat. Ipsæ te, Tityre, pinus,  
 Ipsi te fontes, ipsa hæc arbusta vocabant. 40

TIT. Quid facerem ? neque servitio me exire licebat,  
 Nec tam præsentem alibi cognoscere divos.  
 Hic illum vidi juvenem, Melibœe, quot annis  
 Bis senos cui nostra dies altaria fumant.  
 Hic mihi responsum primus dedit ille petenti :  
 "Pascite, ut ante, boves, pueri ; submittite tauros."

MEL. Fortunate senex, ergo tua rura manebunt !  
 Et tibi magna satis, quamvis lapis omnia nudus  
 Limosoque palus obducatur pascua junco.  
 Non insueta graves tentabunt pabula fetas ; 50  
 Nec mala vicini pecoris contagia lædent.  
 Fortunate senex, hic inter flumina nota  
 Et fontes sacros frigus captabis opacum.  
 Hinc tibi, quæ semper vicino ab limite sæpes  
 Hyblæis apibus florem depasta salicti,  
 Sæpe levi somnum suadebit inire susurro :  
 Hinc alta sub rupe canet frondator ad auras ;  
 Nec tamen interea rauca, tua cura, palumbes,  
 Nec gemere aëria cessabit turtur ab ulmo.

TIT. Ante leves ergo pascentur in æthere cervi,  
 Et freta destituent nudos in litore pisces ;  
 Ante, pererratis amborum finibus, exsul  
 Aut Ararim Parthus bibet, aut Germania Tigrim,  
 Quam nostro illius labatur pectore vultus.

60

MEL. At nos hinc alii sitientes ibimus Afros,  
 Pars Scythiam et rapidum Cretæ veniemus Oaxcm,  
 Et penitus toto divisos orbe Britannos.

En unquam patrios longo post tempore fines,  
 Pauperis et tuguri congestum cespite culmen,  
 Post aliquot, mea regna videns, mirabor aristas ?

70

Impius hæc tam culta novalia miles habebit ?

Barbarus has segetes ? en, quo discordia cives

Produxit miseros ! en, queis consevimus agros !

Insere nunc, Melibœe, piros, pone ordine vites :

Ite meæ, felix quondam pecus, ite capellæ.

Non ego vos posthac, viridi projectus in antro,

Dumosa pendere procul de rupe videbo ;

Carmina nulla canam ; non, me pascente, capellæ,

Florentem cytisum et salices carpētis amaras.

TIT. Hic tamen hanc mecum poteras requiescere noctem 80

Fronde super viridi ; sunt nobis mitia poma,

Castanæe molles, et pressi copia lactis ;

Et jam summa procul villarum culmina fumant,

Majoresque cadunt altis de montibus umbræ.

## ECLOGA II. ALEXIS.

FORMOSUM pastor Corydon ardebat Alexin,  
 Delicias domini ; nec, quid speraret, habebat.  
 Tantum inter densas, umbrosa cacumina, fagos  
 Assidue veniebat ; ibi hæc incondita solus  
 Montibus et silvis studio jactabat inani :

“ O crudelis Alexi, nihil mea carmina curas ?

Nil nostri miserere ? Mori me denique coges.

Nunc etiam pecudes umbras et frigora captant ;

Nunc virides etiam occultant spineta lacertos ;

Thestylis et rapido fessis messoribus æstu  
Allia serpyllumque herbas contundit olentes :  
At mecum raucis, tua dum vestigia lustro,  
Sole sub ardenti resonant arbusta cicadis.  
Nonne fuit satius, tristes Amaryllidis iras  
Atque superba pati fastidia ? nonne Menalcan ?  
Quamvis ille niger, quamvis tu candidus esses.  
O formose puer, nimium ne crede colori !  
Alba ligustra cadunt, vaccinia nigra leguntur.  
Despectus tibi sum, nec qui sim quæris, Alexi ;  
Quam dives pecoris, nivei quam lactis abundans. 20  
Mille meæ Siculis errant in montibus agnæ ;  
Lac mihi non æstate novum, non frigore deficit.  
Canto, quæ solitus, si quando armenta vocabat,  
Amphion Diræus in Actæo Aracyntho.  
Nec sum adeo informis ; nuper me in litore vidi,  
Quum placidum ventis staret mare ; non ego Daphnin,  
Judice te, metuam, si nunquam fallat imago.  
O tantum libeat mecum tibi sordida rura  
Atque humiles habitare casas, et figere cervos,  
Hædorumque gregem viridi compellere hibisco ! 30  
Mecum una in silvis imitabere Pana canendo ;  
Pan primus calamos cera conjungere plures  
Instituit ; Pan curat oves oviumque magistros.  
Nec te pœniteat calamo trivisse labellum :  
Hæc eadem ut sciret, quid non faciebat Amyntas ?  
Est mihi disparibus septem compacta cicutis  
Fistula, Damœtas dono mihi quam dedit olim,  
Et dixit moriens : ‘ Te nunc habet ista secundum.’  
Dixit Damœtas : invidit stultus Amyntas.  
Præterea duo nec tuta mihi valle reperti 40  
Capreoli, sparsis etiam nunc peilibus albo,  
Bina die siccant ovis ubera ; quos tibi servo.  
Jam pridem a me illos abducere Thestylis orat ;  
Et faciet, quoniam sordent tibi munera nostra.  
Huc ades, o formose puer : tibi lilia plenis,



Ecce, ferunt Nymphæ calathis ; tibi candida Nais,  
 Pallentes violas et summa papavera carpens,  
 Narcissum et florem jungit bene olentis anethi ;  
 Tum, casia atque aliis intexens suavibus herbis,  
 Mollia luteola pingit vaccinia caltha. 50  
 Ipse ego cana legam tenera lanugine mala,  
 Castaneasque nuces, mea quas Amaryllis amabat.  
 Addam cerea pruna ; honos erit huic quoque pomo ;  
 Et vos, o lauri, carpam, et te, proxima myrte ;  
 Sic positæ quoniam suaves miscetis odores.  
 Rusticus es, Corydon, nec munera curat Alexis ;  
 Nec, si muneribus certes, concedat Iolas.  
 Heu, heu, quid volui misero mihi ? floribus Austrum  
 Perditus et liquidis immisi fontibus apros.  
 Quem fugis, ah demens ? habitarunt di quoque silvas, 60  
 Dardaniusque Paris. Pallas, quas condidit, arces  
 Ipsa colat : nobis placeant ante omnia silvæ.  
 Torva læna lupum sequitur, lupus ipse capellam ;  
 Florentem cytisum sequitur lasciva capella ;  
 Te Corydon, o Alexi ; trahit sua quemque voluptas.  
 Aspice, aratra jugo referunt suspensa juvenci,  
 Et sol crescentes decedens duplicat umbras :  
 Me tamen urit amor ; quis enim modus adsit amori ?  
 Ah Corydon, Corydon, quæ te dementia cepit !  
 Semiputata tibi frondosa vitis in ulmo est. 70  
 Quin tu aliquid saltem potius, quorum indiget usus,  
 Viminibus mollique paras detexere junco.  
 Invenies alium, si te hic fastidit, Alexin."

## ECLOGA III. PALÆMON.

MENALCAS. DAMÆTAS. PALÆMON.

MEN. Dic mihi, Damœta, eujum pecus ? an Melibœi ?

DAM. Non, verum Ægonis ; nuper mihi tradidit Ægon.

MEN. Infelix o semper, oves, pecus ! ipse Neæram  
 Dum fovet, ac, ne me sibi præferat illa, veretur,  
 Hic alienus oves custos bis mulget in hora ;

Et succus pecori et lac subducitur agnis.

DAM. Parcius ista viris tamen objicienda memento.  
Novimus et qui te, transversa tuentibus hircis,  
Et quo, sed faciles Nymphæ risere, sacello.

MEN. Tum, credo, quum me arbustum videre Miconis 10  
Atque mala vites incidere falce novellas.

DAM. Aut hic ad veteres fagos quum Daphnidis arcum  
Fregisti et calamos; quæ tu, perverse Menalca,  
Et, quum vidisti puero donata, dolebas,  
Et, si non aliqua nocuisses, mortuus esses.

MEN. Quid domini faciant, audent quum talia fures!  
Non ego te vidi Damonis, pessime, caprum  
Excipere insidiis, multum latrante Lycisca?  
Et quum clamarem: "Quo nunc se proripit ille?  
Tityre, coge pecus," tu post carecta latebas. 20

DAM. An mihi cantando victus, non redderet ille,  
Quem mea carminibus meruisset fistula, caprum?  
Si nescis, meus ille caper fuit; et mihi Damon  
Ipse fatebatur, sed reddere posse negabat.

MEN. Cantando tu illum? aut unquam tibi fistula cera  
Juncta fuit? non tu in triviis, indocte, solebas  
Stridenti miserum stipula disperdere carmen?

DAM. Vis ergo inter nos, quid possit uterque, vicissim  
Experiamur? ego hanc vitulam (ne forte recuses,  
Bis venit ad mulctram, binos alit ubere fetus) 30  
Depono; tu dic, mecum quo pignore certas.

MEN. De grege non ausim quidquam deponere tecum;  
Est mihi namque domi pater, est injusta noverca;  
Bisque die numerant ambo pecus, alter et hædos.  
Verum, id quod multo tute ipse fatebere majus,  
Insanire libet quoniam tibi, pocula ponam  
Fagina, cælatum divini opus Alcimedontis,  
Lenta quibus torno facili superaddita vitis  
Diffusos hedera vestit pallente corymbos.  
In medio duo signa, Conon, et quis fuit alter, 40  
Descripsit radio totum qui gentibus orbem,

Tempora quæ messor, quæ curvus arator haberet ?  
Necdum illis labra admovi, sed condita servo.

DAM. Et nobis idem Alcimedon duo pocula fecit,  
Et molli circum est ansas amplexus acantho,  
Orpheaque in medio posuit silvasque sequentes ;  
Necdum illis labra admovi, sed condita servo.  
Si ad vitulam spectas, nihil est, quod pocula laudes.

MEN. Nunquam hodie effugies ; veniam, quocumque vocaris.  
Audiat hæc tantum, vel qui venit, ecce, Palæmon ; 50  
Efficiam, posthac ne quemquam voce lacesas.

DAM. Quin age, si quid habes : in me mora non erit ulla,  
Nec quemquam fugio ; tantum, vicine Palæmon,  
Sensibus hæc imis, res est non parva, reponas.

PAL. Dicite, quandoquidem in molli consedimus herba ;  
Et nunc omnis ager, nunc omnis parturit arbos,  
Nunc frondent silvæ, nunc formosissimus annus.  
Incipe, Damœta ; tu deinde sequere, Menalca.  
Alternis dicetis, amant alterna Camœnæ.

DAM. Ab Jove principium, Musæ ; Jovis omnia plena ; 60  
Ille colit terras, illi mea carmina curæ.

MEN. Et me Phœbus amat ; Phœbo sua semper apud me  
Munera sunt, lauri, et suave rubens hyacinthus.

DAM. Malo me Galatea petit, lasciva puella,  
Et fugit ad salices, et se cupit ante videri.

MEN. At mihi sese offert ultro meus ignis, Amyntas,  
Notior ut jam sit canibus non Delia nostris.

DAM. Parta meæ Veneri sunt munera ; namque notavi  
Ipse locum, aëriæ quo congressere palumbes.

MEN. Quod potui, puero silvestri ex arbore lecta 70  
Aurea mala decem misi ; cras altera mittam.

DAM. O quoties, et quæ nobis Galatea locuta est !  
Partem aliquam, venti, divum referatis ad aures !

MEN. Quid prodest, quod me ipse animo non spernis.  
Amynta,

Si, dum tu sectaris apros, ego retia servo ?

DAM. Phyllida mitte mihi, meus est natalis, Iolla :

Quum faciam vitula pro frugibus, ipse venito.

MEX. Phyllida amo ante alias; nam me discedere fleuit,  
Et, "Longum formose vale, vale," inquit, Iolla.

DAM. Triste lupus stabulis, maturis frugibus imbres, 80  
Arboribus venti, nobis Amaryllidis iræ.

MEX. Dulce satis humor, depulsis arbutus hædis,  
Lenta salix feto pecori, mihi solus Amyntas.

DAM. Pollio amat nostram, quamvis est rustica, Musam; Pierides, vitulam lectori pascite vestro.

MEX. Pollio et ipse facit nova carmina : pascite taurum,  
Jam cornu petat et pedibus qui spargat arenam.

DAM. Qui te, Pollio, amat, veniat, quo te quoque gaudet ;  
Mella fluent illi, ferat et rubus asper amomum.

MEX. Qui Bavium non odit, amet tua carmina, Mævi; 90  
Atque idem jungat vulpes et mulgeat hircos.

DAM. Qui legitis flores et humi nascentia fraga,  
Frigidus, o pueri, fugite hinc, latet anguis in herba.

MEN. Parcite, oves, nimum procedere ; non bene ripæ  
Creditur ; ipse aries etiam nunc vellera siccet.

DAM. Tityre, pascentes a flumine reice capellas:  
Ipse, ubi tempus erit, omnes in fonte lavabo.

MEX. Cogite oves, pueri; si lac præceperit æstus,  
Ut nuper, frustra pressabimus ubera palmis.

Дам. Heu, heu, quam pingui macer est mihi taurus in  
 ervo ! 100

Idem amor exitium pecori pecorisque magistro.

MEX. His certe neque amor causa est; vix ossibus hærent;  
Nescio quis teneros oculus mihi fascinat agnos.

DAM. Dic, quibus in terris, et eris mihi magnus Apollo,  
Tres pateat cœli spatium non amplius ulnas.

MEX. Dic quibus in terris inscripti nomina regum  
Nascantur flores ; et Phyllida solus habeto.

PAL. Non nostrum inter vos tantas componere lites;  
[Et vitula tu dignus, et hic: et quisquis amores

Aut metuet dulces aut experietur amaros.] 110  
Claudite jam rivos, pueri; sat prata biberunt

**Claudite jam rivos, pueri ; sat prata biberunt**

## ECLOGA IV. POLLIO.

SICELIDES Musæ, paullo majora canamus ;  
 Non omnes arbusta juvant humilesque myricæ.  
 Si canimus silvas, silvæ sint consule dignæ.  
 Ultima Cumæi venit jam carminis ætas ;  
 Magnus ab integro sæclorum nascitur ordo.  
 Jam redit et Virgo, redeunt Saturnia regna ;  
 Jam nova progenies cœlo demittitur alto.  
 Tu modo nascenti puero quo ferrea primum  
 Desinet ac toto surget gens aurea mundo,  
 Casta, fave, Lucina : tuus jam regnat Apollo.  
 Teque adeo decus hoc ævi, te consule, inibit,  
 Pollio, et incipient magni procedere menses ;  
 Te duce, si qua manent, sceleris vestigia nostri  
 Irrita perpetua solvent formidine terras.  
 Ille deum vitam accipiet, divisque videbit  
 Permixtos heroas, et ipse videbitur illis,  
 Pacatumque reget patriis virtutibus orbem.  
 At tibi prima, puer, nullo munuscula cultu  
 Errantes hederas passim cum baccare tellus  
 Mixtaque ridenti colocasia fundet acantho.  
 Ipsæ lacte domum referent distenta capellæ  
 Ubera, nec magnos metuent armenta leones.  
 Ipsa tibi blandos fundent cunabula flores.  
 Occidet et serpens, et fallax herba veneni  
 Occidet ; Assyrium vulgo nascetur amomum.  
 At simul heroum laudes et facta parentis  
 Jam legere et quæ sit poteris cognoscere virtus :  
 Molli paulatim flavescent campus arista,  
 Incultisque rubens pendebit sentibus uva,  
 Et duræ quercus sudabunt roscida mella.  
 Pauca tamen suberunt priscae vestigia fraudis,  
 Quæ tentare Thetim ratibus, quæ cingere muris  
 Oppida, quæ jubeant telluri infindere sulcos.  
 Alter erit tum Tiphys, et altera quæ vehat Argo

10

20

30

Delectos heroas ; erunt etiam altera bella,  
 Atque iterum ad Trojam magnus mittetur Achilles.  
 Hinc, ubi jam firmata virum te fecerit ætas,  
 Cedet et ipse mari vector ; nec nautica pinus  
 Mutabit merces : omnis feret omnia tellus :  
 Non rastros patietur humus, non vinea falcem ; 40  
 Robustus quoque jam tauris juga solvet arator ;  
 Nec varios discet mentiri lana colores,  
 Ipse sed in pratis aries jam suave rubenti  
 Murice, jam croceo mutabit vellera luto ;  
 Sponte sua sandyx pascentes vestiet agnos.  
 "Talia sæcla," suis dixerunt, "currite," fusis  
 Concordes stabili fatorum numine Parcæ.  
 Aggredere o magnos, aderit jam tempus, honores,  
 Cara deum suboles, magnum Jovis incrementum !  
 Aspice convexo nutantem pondere mundum, 50  
 Terrasque, tractusque maris, cœlumque profundum ;  
 Aspice, venturo lætantur ut omnia sæclo.  
 O mihi tam longæ mane pars ultima vitæ,  
 Spiritus et, quantum sat erit tua dicere facta.  
 Non me carminibus vincet nec Thracius Orpheus,  
 Nec Linus ; huic mater quamvis atque huic pater adsit,  
 Orphci Calliopea, Lino formosus Apollo.  
 Pan etiam Arcadia mecum si iudice certet,  
 Pan etiam Arcadia dicat se iudice victum.  
 Incipe, parve puer, risu cognoscere matrem ; 60  
 Matri longa decem tulerunt fastidia menses  
 Incipe, parve puer ; cui non risere parentes,  
 Nec deus hunc mensa, dea nec dignata cubili est.

## ECLOGA V. DAPHNIS.

MENALCAS. MOPSUS.

MEN. CUR non, Mopse, boni quoniam convenimus ambo,  
 Tu calamos inflare leves, ego dicere versus,

Hic corulis mixtas inter considimus ulmos ?

MOP. Tu major ; tibi me est æquum parere, Menalca,  
Sive sub incertas Zephyris mutantibus umbras,  
Sive antro potius succedimus. Aspice, ut antrum  
Silvestris raris sparsit labrusca racemis.

MEN. Montibus in nostris solus tibi certet Amyntas.

MOP. Quid, si idem certet Phœbum superare canendo ?

MEN. Incipe, Mopse, prior, si quos aut Phyllidis ignes, 10  
Aut Alconis habes laudes, aut jurgia Codri.  
Incipe ; pascentes servabit Tityrus hædos.

MOP. Immo hæc, in viridi nuper quæ cortice fagi  
Carmina descripsi et modulans alterna notavi,  
Experiar ; tu deinde jubeto certet Amyntas.

MEN. Lenta salix quantum pallenti cedit olivæ,  
Puniceis humilis quantum salinca rosetis :  
Judicio nostro tantum tibi cedit Amyntas.

MOP. Sed tu desine plura, puer ; successimus antro.  
Exstinctum Nymphæ crudeli funere Daphnin 20  
Flebant ; vos coruli testes et flumina Nymphis ;  
Quum complexa sui corpus miserabile nati  
Atque deos atque astra vocat crudelia mater.

Non ulli pastos illis egere diebus  
Frigida, Daphni, boves ad flumina ; nulla neque amnem  
Libavit quadrupes, nec graminis attigit herbam.  
Daphni, tuum Pœnos etiam ingemuisse leones  
Interitum, montesque feri silvæque loquuntur.  
Daphnis et Armenias curru subjungere tigres  
Instituit ; Daphnis thiasos inducere Bacchi, 30  
Et foliis lentas intexere mollibus hastas.

Vitis ut arboribus decori est, ut vitibus uvæ,  
Ut gregibus tauri, segetes ut pinguibus arvis :  
Tu decus omne tuis. Postquam te fata tulerunt,  
Ipsa Pales agros atque ipse reliquit Apollo.  
Grandia sæpe quibus mandavimus hordea sulcis,  
Infelix lolium et steriles nascuntur avenæ ;  
Pro molli viola, pro purpureo narcisso

Carduus et spinis surgit paliurus acutis.  
 Spargite humum foliis, inducite fontibus umbras, 40  
 Pastores, mandat fieri sibi talia Daphnis;  
 Et tumulum facite, et tumulo superaddite carmen:  
 Daphnis ego in silvis, hinc usque ad sidera notus,  
 Formosi pecoris custos, formosior ipse.

MEN. Tale tuum carmen nobis, divine poëta,  
 Quale sopor fessis in gramine, quale per æstum  
 Dulcis aquæ saliente sitim restinguere rivo;  
 Nec calamis solum æquiparas, sed voce magistrum.  
 Fortunate puer, tu nunc eris alter ab illo.  
 Nos tamen hæc quocumque modo tibi nostra vicissim 50  
 Dicemus, Daphninque tuum tollemus ad astra;  
 Daphnin ad astra feremus: amavit nos quoque Daphnis.

MOR. An quidquam nobis tali sit munere majus?  
 Et puer ipse fuit cantari dignus, et ista  
 Jam pridem Stimicon laudavit carmina nobis.

MEN. Candidus insuetum miratur limen Olympi  
 Sub pedibusque videt nubes et sidera Daphnis.  
 Ergo alacris silvas et cetera rura voluptas  
 Panaque pastoresque tenet Dryadasque puellas:  
 Nec lupo insidias pecori, nec retia cervis 60  
 Ulla dolum meditantur; amat bonus otia Daphnis.  
 Ipsi lætitia voces ad sidera jactant  
 Intonsi montes; ipsæ jam carmina rupes,  
 Ipsa sonant arbusta: "deus, deus ille, Menalca."  
 Sis bonus o felixque tuis! en quatuor aras:  
 Ecce duas tibi, Daphni, duas altaria Phœbo.  
 Pocula bina novo spumantia lacte quotannis,  
 Craterasque duo statuam tibi pinguis olivi;  
 Et multo in primis hilarans convivia Baccho, 70  
 Ante focum, si frigus erit, si messis, in umbra,  
 Vina novum fundam calathis Ariusia nectar.  
 Cantabunt mihi Damœtas et Lyctius Ægon;  
 Saltantes Satyros imitabitur Alphesibœus.  
 Hæc tibi semper erunt, et quum solemnia vota



Reddemus Nymphis, et quum lustrabimus agros.  
 Dum juga montis aper, fluvios dum piscis amabit,  
 Dumque thymo pascentur apes, dum rore cicadæ,  
 Semper honos nomenque tuum laudesque manebunt.  
 Ut Baccho Cererique, tibi sic vota quotannis  
 Agricolæ facient; damnabis tu quoque votis.

80

MOP. Quæ tibi, quæ tali reddam pro carmine dona?  
 Nam neque me tantum venientis sibilus austri,  
 Nec percussa juvant fluctu tam litora, nec quæ  
 Saxosas inter decurrunt flumina valles.

MEN. Hac te nos fragili donabimus ante cicuta.  
 Hæc nos, Formosum Corydon ardebat Alexin:  
 Hæc eadem docuit, Cujum pecus? an Melibœi?

MOP. At tu sume pedom, quod, me quum sæpe rogaret,  
 Non tulit Antigenes, et erat tum dignus amari,  
 Formosum paribus nodis atque ære, Menalca.

90

## ECLOGA VI. SILENUS.

PRIMA Syracosio dignata est ludere versu  
 Nostra, neque erubuit silvas habitare, Thalia.  
 Quum canerem reges et prælia, Cynthius aurem  
 Vellit, et admonuit: "Pastorem, Tityre, pingues  
 Pascere oportet oves, deductum dicere carmen."  
 Nunc ego (namque super tibi erunt, qui dicere laudes,  
 Vare, tuas cupiant, et tristia condere bella,)  
 Agrestem tenui meditabor arundine Musam.  
 Non injussa cano. Si quis tamen hæc quoque, si quis  
 Captus amorè leget, te nostræ, Vare, myricæ,  
 Te nemus omne canet; nec Phœbo gratior ulla est,  
 Quam sibi quæ Vari præscripsit pagina nomen.

10

Pergite, Pierides. Chromis et Mnasyllus in antro  
 Silenum pueri somno videre jacentem,  
 Inflatum hesterno venas, ut semper, Iaccho:  
 Serta procul tantum capiti delapsa jacebant,  
 Et gravis attrita pendebat cantharus ansa.

Aggressi, nam sæpe senex spe carminis ambo  
Luserat, injiciunt ipsis ex vincula sertis.

Addit se sociam timidisque supervenit Ægle,—

20

Ægle, Naiadum pulcherrima; jamque videnti  
Sanguineis frontem moris et tempora pingit.

Ille dolum ridens, “Quo vincula necetitis?” inquit.

“Solvite me, pueri; satis est potuisse videri.

Carmina, quæ vultis, cognoscite; carmina vobis,  
Huic aliud mercedis erit.” Simul incipit ipse.

Tum vero in numerum Faunosque ferasque videres

Ludere, tum rigidas motare cacumina quercus.

Nec tantum Phœbo gaudet Parnasia rupes;

Nec tantum Rhodope mirantur et Ismarus Orphea.

30

Namque canebat, uti magnum per inane coacta

Semina terrarumque animæque marisque fuissent

Et liquidi simul ignis: ut his exordia primis

Omnia, et ipse tener mundi concreverit orbis;

Tum durare solum et discludere Nerea ponto

Cœperit, et rerum paulatim sumere formas;

Jamque novum terræ stupeant lucescere solem,

Altius atque cadant submotis nubibus imbres;

Incipiant silvæ quum primum surgere, quumque

Rara per ignotos errent animalia montes.

40

Hinc lapides Pyrrhæ jactos, Saturnia regna,

Caucasiasque refert volucres, furtumque Promethei.

His adjungit, Hylan nautæ quo fonte relictum

Clamassent, ut litus, “Hyla, Hyla,” omne sonaret;

Et fortunatam, si nunquam armenta fuissent,

Pasiphaën nivei solatur amore juveni.

Ah virgo infelix, quæ te dementia cepit!

Præetides implerunt falsis mugitibus agros;

At non tam turpes pecudum tamen ulla secuta est

Concubitus, quamvis collo timuisset aratrum,

50

Et sæpe in levi quæsisset cornua fronte.

Ah virgo infelix, tu nunc in montibus erras:

Ille, latus niveum molli fultus hyacintho,

Illice sub nigra pallentes ruminat herbas,  
 Aut aliquam in magno sequitur grege. Claudite, Nymphæ,  
 Dictææ Nymphæ, nemorum jam claudite saltus,  
 Si qua forte ferant oculis sese obvia nostris  
 Errabunda bovis vestigia : forsitan illum,  
 Aut herba captum viridi, aut armenta secutum,  
 Perducant aliquæ stabula ad Gortynia vaccæ. 60  
 Tum canit Hesperidum miratam mala puellam :  
 Tum Phaëthontiadas musco circumdat amaræ  
 Corticis, atque solo proceras erigit alnos :  
 Tum canit, errantem Pernessi ad flumina Gallum  
 Aonas in montes ut duxerit una sororum ;  
 Utque viro Phœbi chorus assurrexerit omnis ;  
 Ut Linus hæc illi divino carmine pastor,  
 Floribus atque apio crines ornatus amaro,  
 Dixerit : “ Hos tibi dant calamos, en, accipe, Musæ,  
 Ascræo quos ante seni, quibus ille solebat 70  
 Cantando rigidas deducere montibus ornos.”  
 His tibi Gryneï nemoris dicatur origo,  
 Ne quis sit lucus, quo se plus jactet Apollo.  
 Quid loquar, ut Scyllam Nisi, quam fama secuta est,  
 Candida succinctam latrantibus inguina monstris  
 Dulichias vexasse rates, et gurgite in alto  
 Ah ! timidos nautas canibus lacerasse marinis ;  
 Aut ut mutatos Terei narraverit artus,  
 Quas illi Philomela dapes, quæ dona pararit,  
 Quo cursu deserta petiverit, et quibus ante 80  
 Infelix sua tecta supervolitaverit alis ?

Omnia, quæ, Phœbo quondam meditante, beatus  
 Audiit Eurotas, jussitque ediscere lauros,  
 Ille canit ; pulsæ referunt ad sidera valles :  
 Cogere donec oves stabulis numerumque referri  
 Jussit et invito processit Vesper Olympos.

## ECLOGA VII. MELIBŒUS.

MELIBŒUS. CORYDON. THYRSIS.

MEL. Forte sub arguta consederat ilice Daphnis,  
 Compulerantque greges Corydon et Thyrsis in unum,  
 Thyrsis oves, Corydon distentas lacte capellas,  
 Ambo florentes ætatibus, Arcades ambo,  
 Et cantare pares, et respondere parati.  
 Huc mihi, dum teneras defendo a frigore myrtos,  
 Vir gregis ipse caper deerraverat: atque ego Daphnin  
 Aspicio. Ille ubi me contra videt: "Ocius," inquit,  
 "Huc ades, o Melibœe: caper tibi salvus et hædi;  
 Et si quid cessare potes, requiesce sub umbra." 10  
 Huc ipsi potum venient per prata juvenci;  
 Hic virides tenera prætexit arundine ripas  
 Mincius, eque sacra resonant examina quercu.  
 Quid facerem? neque ego Alcippen, nec Phyllida habebam,  
 Depulsos a lacte domi quæ clauderet agnos;  
 Et certamen erat Corydon cum Thyrside magnum.  
 Posthabui tamen illorum mea seria ludo.

Alternis igitur contendere versibus ambo  
 Cœpere; alternos Musæ meminisse volebant.  
 Hos Corydon, illos referebat in ordine Thyrsis. 20

COR. Nymphæ, noster amor, Libethrides, aut mihi carmen,  
 Quale meo Codro, concedite; proxima Phœbi  
 Versibus ille facit; aut si non possumus omnes,  
 Hic arguta sacra pendebit fistula pinu.

THY. Pastores, hederæ crescentem ornate poëtam,  
 Arcades, invidia rumpantur ut ilia Codro;  
 Aut si ultra placitum laudarit, baccare frontem  
 Cingite, ne vati noceat mala lingua futuro.

COR. Sætosi caput hoc apri tibi, Delia, parvus  
 Et ramosa Micon vivacis cornua cervi. 30  
 Si proprium hoc fuerit, levi de marmore tota  
 Puniceo stabis suras evincta cothurno.

THY. Sinum lactis et hæc te liba, Priape, quotannis

Expectare sat est ; custos es pauperis horti.  
Nunc te marmoreum pro tempore fecimus ; at tu,  
Si fetura gregem suppleverit, aureus esto.

COR. Nerine Galatea, thymo mihi dulcior Hyblæ,  
Candidior cyncis, hedera formosior alba,  
Quum primum pasti repetent præsepia tauri,  
Si qua tui Corydonis habet te cura, venito. 40

THY. Immo ego Sardois videar tibi amarior herbis,  
Horridior rusco, projecta vilior alga,  
Si mihi non hæc lux toto jam longior anno est.  
Ite domum pasti, si quis pudor, ite juvenci.

COR. Muscosi fontes, et somno mollior herba,  
Et quæ vos rara viridis tegit arbutus umbra,  
Solstitium pecori defendite ; jam venit æstas  
Torrida, jam læto turgent in palmitæ gemmæ.

THY. Hic focus, et tædæ pingues, hic plurimus ignis  
Semper, et assidua postes fuligine nigri : 50  
Hic tantum boreæ curamus frigora, quantum  
Aut numerum lupus, aut torrentia flumina ripas.

COR. Stant et juniperi, et castaneæ hirsutæ ;  
Strata jacent passim sua quaque sub arbore poma ;  
Omnia nunc rident : at, si formosus Alexis  
Montibus his abeat, videas et flumina sicca.

THY. Aret ager ; vitio moriens sitit aëris herba ;  
Liber pampineas invidit collibus umbras :  
Phyllidis adventu nostræ nemus omne virebit ;  
Jupiter et læto descendet plurimus imbri. 60

COR. Populus Alcidæ gratissima, vitis Iaccho,  
Formosæ myrtus Veneri, sua laurea Phœbo :  
Phyllis amat corulos ; illas dum Phyllis amabit,  
Nec myrtus vincet corulos, nec laurea Phœbi.

THY. Fraxinus in silvis pulcherrima, pinus in hortis,  
Populus in fluviis, abies in montibus altis :  
Sæpius at si me, Lycida formose, revisas,  
Fraxinus in silvis cedat tibi, pinus in hortis.

MEL. Hæc memini, et victum frustra contendere Thyrsin.  
[Ex illo Corydon Corydon est tempore nobis.] 70

## ECLOGA VIII. PHARMACEUTRIA.

DAMON. ALPHESIBŒUS.

PASTORUM Musam Damonis et Alphesibœi,  
 Immemor herbarum quos est mirata juvenca  
 Certantes, quorum stupefactæ carmine lynces,  
 Et mutata suos requierunt flumina cursus ;  
 Damonis Musam dicemus et Alphesibœi.

Tu mihi, seu magni superas jam saxa Timavi,  
 Sive oram Illyrici legis æquoris ; en erit unquam  
 Ille dies, mihi quum liceat tua dicere facta ?  
 En erit, ut liceat totum mihi ferre per orbem  
 Sola Sophocleo tua carmina digna cothurno ? 10  
 A te principium, tibi desinet ; accipe jussis  
 Carmina cœpta tuis ; atque hanc sine tempora circum  
 Inter victrices hederam tibi serpere lauros.

Frigidæ vix cœlo noctis decesserat umbra,  
 Quum ros in tenera pecori gratissimus herba,  
 Incumbens tereti Damon sic cœpit olivæ :

DAM. "Nascere, præque diem veniens age, Lucifer, alnum ;  
 Conjugis indigno Nisæ deceptus amore  
 Dum queror, et divos, quanquam nil testibus illis  
 Profeci, extrema moriens tamen alloquor hora. 20

Incipe Mænalios mecum, mea tibia, versus.  
 Mænalus argutumque nemus pinosque loquentes  
 Semper habet : semper pastorum ille audit amores,  
 Panaque, qui primus calamos non passus inertes.  
 Incipe Mænalios mecum, mea tibia, versus.

Mopso Nisa datur ; quid non speremus amantes ?  
 Jungentur jam gryphes equis ; ævoque sequenti  
 Cum canibus timidi venient ad pocula damæ.  
 Mopse, novas incide faces ; tibi ducitur uxor ;  
 Sparge, marite, nuces ; tibi descript Hesperus Œtam. 30  
 Incipe Mænalios mecum, mea tibia, versus.  
 O digno conjuncta viro, dum despicias omnes

Dumque tibi est odio mea fistula, dumque capellæ,  
Hirsutumque supercilium, promissaque barba,  
Nec curare deum credis mortalia quemquam !

Incipe Mænalios mecum, mea tibia, versus.

Sepibus in nostris parvam te roscida mala  
(Dux ego vester eram) vidi cum matre legentem.

Alter ab undecimo tum me jam ceperat annus ;

Jam fragiles poteram a terra contingere ramos. 40

Ut vidi, ut perii, ut me malus abstulit error !

Incipe Mænalios mecum, mea tibia, versus.

Nunc scio, quid sit Amor ; duris in cotibus illum

Aut Tmaros, aut Rhodope, aut extremi Garamantes

Nec generis nostri puerum nec sanguinis edunt.

Incipe Mænalios mecum, mea tibia, versus.

Sævus Amor docuit natorum sanguine matrem

Commaculare manus ; crudelis tu quoque, mater.

Crudelis mater magis, an puer improbus ille ?

Improbus ille puer ; crudelis tu quoque, mater. 50

Incipe Mænalios mecum, mea tibia, versus.

Nunc et oves ultro fugiat lupus : aurca duræ

Mala ferant quercus ; narcisso floreat alnus :

Pinguia corticibus sudent electra myricæ ;

Certent et cynis ululæ ; sit Tityrus Orpheus ;

Orpheus in silvis, inter delphinas Arion.

Incipe Mænalios mecum, mea tibia, versus.

Omnia vel medium fiant mare. Vivite silvæ ;

Præceps aërii specula de montis in undas

Deferar ; extremum hoc munus morientis habeto. 60

Desine Mænalios, jam desine, tibia, versus."

Hæc Damon : vos, quæ responderit Alphesibœus,

Dicite, Pierides ; non omnia possumus omnes.

ALPH. "Effer aquam, et molli cinge hæc altaria vitta,

Verbenasque adole pingues et mascula thura.

Conjugis ut magicis sanos avertere sacris

Experiar sensus ; nihil hic nisi carmina desunt.

Ducite ab urbe domum, mea carmina, ducite Daphnin.

Carmina vel cœlo possunt deducere lunam ;  
Carminibus Circe socios mutavit Ulixi ; 70  
Frigidus in pratis cantando rumpitur anguis.  
Ducite ab urbe domum, mea carmina, ducite Daphnin.  
Terna tibi hæc primum triplici diversa colore  
Licia circumdo, terque hæc altaria circum  
Effigiem duco ; numero deus impare gaudet.  
Ducite ab urbe domum, mea carmina, ducite Daphnin.  
Necte tribus nodis ternos, Amarylli, colores ;  
Necte, Amarylli, modo ; et, Veneris, dic, vincula necto.  
Ducite ab urbe domum, mea carmina, ducite Daphnin.  
Limus ut hic durescit, et hæc ut cera liquescit 80  
Uno eodemque igni : sic nostro Daphnis amore.  
Sparge molam, et fragiles incende bitumine lauros :  
Daphnis me malus urit, ego hanc in Daphnide laurum.  
Ducite ab urbe domum, mea carmina, ducite Daphnin.  
Talis amor Daphnin, qualis quum fessa juvenum  
Per nemora atque altos quærendo bucula lucos  
Propter aquæ rivum viridi procumbit in ulva,  
Perdita, nec seræ meminit decedere nocti—  
Talis amor teneat, nec sit mihi cura mederi.  
Ducite ab urbe domum, mea carmina, ducite Daphnin. 90  
Has olim exuvias mihi perfidus ille reliquit  
Pignora cara sui, quæ nunc ego limine in ipso,  
Terra, tibi mando ; debent hæc pignora Daphnin.  
Ducite ab urbe domum, mea carmina, ducite Daphnin.  
Has herbas atque hæc Ponto mihi lecta venena  
Ipse dedit Mœris ; nascuntur plurima Ponto.  
His ego sæpe lupum fieri et se condere silvis  
Mœrin, sæpe animas imis excire sepulcris,  
Atque satas alio vidi traducere messes.  
Ducite ab urbe domum, mea carmina, ducite Daphnin. 100  
Fer cineres, Amarylli, foras, rivoque fluenti  
Transque caput jace, nec respexeris. His ego Daphnin  
Aggrediar ; nihil ille deos, nil carmina curat.  
Ducite ab urbe domum, mea carmina, ducite Daphnin.



Aspice ; corripuit tremulis altaria flammis  
 Sponte sua, dum ferre moror, cinis ipse. Bonum sit !  
 Nescio quid certe est ; et Hylax in limine latrat.  
 Credimus ? an, qui amant, ipsi sibi somnia fingunt ?  
 Parcite, ab urbe venit, jam parcite, carmina, Daphnis."

## ECLOGA IX. MÆRIS.

LYC. Quo te, Mæri, pedes ? an, quo via ducit, in urbem ?

MÆR. O Lycida, vivi pervenimus, advena nostri  
 (Quod nunquam veriti sumus,) ut possessor agelli  
 Diceret : " Hæc mea sunt ; veteres migrate coloni."  
 Nunc victi, tristes, quoniam Fors omnia versat,  
 Hos illi (quod nec bene vertat) mittimus hædos.

LYC. Certe equidem audieram, qua se subducere colles  
 Incipiunt, mollique jugum demittere clivo,  
 Usque ad aquam et veteres, jam fracta cacumina, fagos,  
 Omnia carminibus vestrum servasse Menalcan. 10

MÆR. Audieras, et fama fuit ; sed carmina tantum  
 Nostra valent, Lycida, tela inter Martia, quantum  
 Chaonias dicunt, aquila veniente, columbas.  
 Quod nisi me quacumque novas incidere lites  
 Ante sinistra cava monuisset ab ilice cornix :  
 Nec tuus hic Mæris, nec viveret ipse Menalcas.

LYC. Heu, cadit in quemquam tantum scelus ? heu, tua nobis  
 Pæne simul tecum solatia rapta, Menalca ?  
 Quis caneret Nymphas ? quis humum florentibus herbis  
 Spargeret, aut viridi fontes induceret umbra ? 20  
 Vel quæ sublegrî tacitus tibi carmina nuper  
 Quum te ad delicias ferres, Amaryllida, nostras ?  
 " Tityre, dum redeo, brevis est via, pasce capellas,  
 Et potum pastas age, Tityre, et inter agendum  
 Occursare capro, cornu ferit ille, caveto ?"

MÆR. Immo hæc, quæ Varo nec dum perfecta canebat :  
 " Vare, tuum nomen, superet modo Mantua nobis,  
 Mantua væ miseræ nimium vicina Cremonæ,  
 Cantantes sublime ferent ad sidera cygni."

LYC. Sic tua Cyrneas fugiant examina taxos ; 30  
 Sic cytiso pastæ distendant ubera vaccae :  
 Incipe, si quid habes. Et me fecere poëtam  
 Pierides ; sunt et mihi carmina ; me quoque dicunt  
 Vatem pastores ; sed non ego credulus illis.  
 Nam neque adhuc Vario videor nec dicere Cinna  
 Digna, sed argutos inter strepere anser olores.

MÆR. Id quidem ago, et tacitus, Lycida, mecum ipse voluto,  
 Si valeam meminisse ; neque est ignobile carmen.  
 “ Huc ades, o Galatea ; quis est nam ludus in undis ?  
 Hic ver purpureum ; varios hic flumina circum 40  
 Fundit humus flores ; hic candida populus antro  
 Imminet, et lentæ texunt umbracula vites.  
 Huc ades ; insani feriant sine litora fluctus.”

LYC. Quid, quæ te pura solum sub nocte canentem  
 Audieram ? numeros memini, si verba tenerem.

MÆR. “ Daphni, quid antiquos signorum suspicis ortus ?  
 Ecce Dionæi processit Cæsaris astrum,  
 Astrum, quo segetes gauderent frugibus, et quo  
 Duceret apricis in collibus uva colorem.  
 Insere, Daphni, piros ; carpent tua poma nepotes.” 50  
 Omnia fert ætas, animum quoque : sæpe ego longos  
 Cantando puerum memini me condere soles :  
 Nunc oblita mihi tot carmina. Vox quoque Mœrin  
 Jam fugit ipsa ; lupi Mœrin videre priores.  
 Sed tamen ista satis referet tibi sæpe Menalcas.

LYC. Causando nostros in longum ducis amores.  
 Et nunc omne tibi stratum silet æquor ; et omnes,  
 Aspice, ventosi ceciderunt murmuris auræ.  
 Hinc adeo media est nobis via ; namque sepulcrum  
 Incipit apparere Bianoris. Hic ubi densas 60  
 Agricolæ stringunt frondes, hic, Mœri, canamus ;  
 Hic hædos depone : tamen veniemus in urbem.  
 Aut si, nox pluviam ne colligat ante, veremur,  
 Cantantes licet usque (minus via lædat) eamus.  
 Cantantes ut eamus, ego hoc te fasce levabo.

MÆR. Desine plura, puer, et, quod nunc instat, agamus  
Carmina tum melius, quum venerit ipse, canemus.

## ECLOGA X. GALLUS.

EXTREMUM hunc, Arethusa, mihi concede laborem.  
Pauca meo Gallo, sed quæ legat ipsa Lycoris,  
Carmina sunt dicenda. Neget quis carmina Gallo?  
Sic tibi, quum fluctus subterlabere Sicanos,  
Doris amara suam non intermisceat undam.  
Incipe; sollicitos Galli dicamus amores,  
Dum tenera attendent simæ virgulta capellæ.  
Non canimus surdis; respondent omnia silvæ.

Quæ nemora, aut qui vos saltus habuere, puellæ  
Naiðes, indigno quum Gallus amore periret? 10  
Nam neque Parnasi vobis juga, nam neque Pindi  
Ulla moram fecere, neque Aonie Aganippe.  
Illum etiam lauri, etiam flevare myricæ;  
Pinifer illum etiam sola sub rupe jacentem  
Mænalus et gelidi fleverunt saxa Lycæi;  
Stant et oves circum, nostri nec pœnitent illas;  
Nec te pœniteat pecoris, divine poëta:  
Et formosus oves ad flumina pavit Adonis.  
Venit et upilio; tardi venere bubulci;  
Uvidus hiberna venit de glande Menalcas. 20  
Omnes, "Unde amor iste," rogant, "tibi?" Venit Apollo;  
"Galle, quid insanis?" inquit; "tua cura Lycoris  
Perque nives alium perque horrida castra secuta est."  
Venit et agresti capitis Silvanus honore,  
Florentes ferulas et grandia lilia quassans.  
Pan, deus Arcadiæ, venit, quem vidimus ipsi  
Sanguineis ebuli baccis minioque rubentem.  
"Ecquis erit modus?" inquit. "Amor non talia curat.  
Nec lacrimis crudelis Amor, nec graminia rivis,  
Nec cytiso saturantur apes, nec fronde capellæ."  
Tristis at ille: "Tamen cantabitis, Arcades," inquit,

"Montibus hæc vestris ; soli cantare periti  
 Arcades. O mihi tum quam molliter ossa quiescant,  
 Vestra meos olim si fistula dicat amores !  
 Atque utinam ex vobis unus, vestrique fuisset  
 Aut custos gregis, aut maturæ viuitor uvæ !  
 Certe sive mihi Phyllis, sive esset Amyntas,  
 Seu quicumque furor, (quid tum, si fuscus Amyntas ?  
 Et nigræ violæ sunt, et vaccinia nigra)  
 Mecum inter salices lenta sub vite jaceret ; 40  
 Serta mihi Phyllis legeret, cantaret Amyntas.  
 Hic gelidi fontes, hic mollia prata, Lycori,  
 Illic nemus ; hic ipso tecum consumerer ævo.  
 Nunc insanus amor duri me Martis in armis  
 Tela inter media atque adversos detinet hostes :  
 Tu procul a patria (nec sit mihi credere tantum !)  
 Alpinas, ah dura ! nives et frigora Rheni  
 Me sine sola vides. Ah te ne frigora lædant !  
 Ah tibi ne teneras glacies secet aspera plantas !  
 Ibo, et, Chalcidico quæ sunt mihi condita versu 50  
 Carmina, pastoris Siculi modulabor avena.  
 Certum est in silvis, inter spelæa ferarum,  
 Malle pati, tenerisque meos incidere amores  
 Arboribus ; crescent illæ, crescetis, amores.  
 Interea mixtis lustrabo Mænala Nymphis,  
 Aut acres venabor apros ; non me ulla vetabunt  
 Frigora Parthenios canibus circumdare saltus.  
 Jam mihi per rupes videor lucosque sonantes  
 Ire ; libet Partho torquere Cydonia cornu  
 Spicula ; tamquam hæc sint nostri medicina furoris, 60  
 Aut deus ille malis hominum mitescere discat.  
 Jam neque Hamadryades rursum nec carmina nobis  
 Ipsa placent ; ipsæ rursum concedite silvæ.  
 Non illum nostri possunt mutare labores,  
 Nec si frigoribus mediis Hebrumque bibamus,  
 Sithoniasque nives hiemis subeamus aquosæ,  
 Nec si, quum moriens alta liber aret in ulmo.

Æthiopum versemus oves sub sidere Cancri.  
Omnia vincit Amor; et nos cedamus Amori."

Hæc sat erit, divæ, vestrum cecinisse poëtam, 70  
Dum sedet et gracili fiscellam texit hibisco,  
Pierides; vos hæc facietis maxima Gallo,  
Gallo, cujus amor tantum mihi crescit in horas,  
Quantum vere novo viridis se subjicit alnus.  
Surgamus; solet esse gravis cantantibus umbra,  
Juniperi gravis umbra; nocent et frugibus umbræ.  
Ite domum saturæ, venit Hesperus, ite capellæ.

P. VIRGILII MARONIS  
G E O R G I C O N  
LIBER PRIMUS.

AD C. CILNIUM MECENATEM.



QUID faciat lætas segetes, quo sidere terram  
Vertere, Mæcnas, ulmisque adjungere vites  
Conveniat : quæ cura boum, qui cultus habendo  
Sit pecori ; apibus quanta experientia parcis ;  
Hinc canere incipiam. Vos, o clarissima mundi  
Lumina, labentem cœlo quæ ducitis annum,  
Liber et alma Ceres, vestro si munere tellus  
Chaoniam pingui glandem mutavit arista,  
Poculaque inventis Acheloïa miscuit uvis ;  
Et vos, agrestum præsentia numina, Fauni,  
Ferte simul Faunique pedem Dryadesque puellæ :  
Munera vestra cano : tuque o, cui prima frementem  
Fudit equum magno tellus percussa tridenti,  
Neptune : et cultor nemorum, cui pinguis Cææ  
Ter centum nivei tondent dumeta juvenci :  
Ipse nemus linquens patrium saltusque Lycæi,  
Pan, ovium custos, tua si tibi Mænala curæ,  
Adsis, o Tegeæe, favens ; oleæque Minerva  
Inventrix ; unciue puer monstrator aratri ;  
Et teneram ab radice ferens, Silvane, cupressum :  
Dique deæque omnes, studium quibus arva tueri,  
Quique novas alitis non ullo semine fruges,  
Quique satis largum cœlo demittitis imbrem :  
Tuque adeo, quem mox quæ sint habitura deorum

10

20

Concilia, incertum est ; urbesne invisere, Cæsar,  
 Terrarumque velis curam, et te maximus orbis  
 Auctorem frugum tempestatumque potentem  
 Accipiat, cingens materna tempora myrto ;  
 An deus immensi venias maris, ac tua nautæ  
 Numina sola colant, tibi serviat ultima Thule, 30  
 Teque sibi generum Tethys emat omnibus undis ;  
 Anne novum tardis sidus te mensibus addas,  
 Qua locus Erigonen inter Chelasque sequentes  
 Panditur ; ipse tibi jam brachia contrahit ardens  
 Scorprios, et cœli justa plus parte reliquit :  
 Quidquid eris (nam te nec sperent Tartara regem,  
 Nec tibi regnandi veniat tam dira cupido,  
 Quamvis Elysios miretur Græcia campos,  
 Nec repetita sequi curet Proserpina matrem)  
 Da facilem cursum, atque audacibus annue cœptis 40  
 Ignarosque viæ mecum miseratus agrestes  
 Ingredere, et votis jam nunc assuesce vocari.

Vere novo, gelidus canis quum montibus humor  
 Liquitur, et zephyro putris se gleba resolvit,  
 Depresso incipiat jam tum mihi taurus aratro  
 Ingemere, et sulco attritus splendescere vomer.  
 Illa seges demum votis respondet avari  
 Agricolaë, bis quæ solem, bis frigora sensit ;  
 Illius immensæ ruperunt horrea messes.

At prius ignotum ferro quam scindimus æquor, 50  
 Ventos et varium cœli prædiscere morem  
 Cura sit, ac patrios cultusque habitusque locorum,  
 Et quid quæque ferat regio, et quid quæque recuset.  
 Hic segetes, illic veniunt felicius uvæ ;  
 Arborei fetus alibi atque injussa virescunt  
 Gramina. Nonne vides, croceos ut Tmolus odores,  
 India mittit ebur, molles sua thura Sabæi ;  
 At Chalybes nudi ferrum, virosaque Pontus  
 Castorea, Eliadum palmas Epiros equarum ?  
 Continuo has leges æternaque foedera certis 60

Imposuit natura locis, quo tempore primum  
 Deucalion vacuum lapides jactavit in orbem,  
 Unde homines nati, durum genus. Ergo age, terræ  
 Pingue solum primis extemplo a mensibus anni  
 Fortes invertant tauri, glebasque jacentes  
 Pulverulenta coquat maturis solibus æstas :  
 At si non fuerit tellus fecunda, sub ipsum  
 Arcturum tenui sat erit suspendere sulco ;  
 Illic, officiant lætis ne frugibus herbæ,  
 Hic, sterilem exiguus ne deserat humor arenam. 70

Alternis idem tonsas cessare novalis  
 Et segnem patiere situ durescere campum ;  
 Aut ibi flava seres mutato sidere farra,  
 Unde prius lætum siliqua quassante legumen,  
 Aut tenues fetus viciæ tristisque lupini  
 Sustuleris fragiles calamos silvamque sonantem.  
 Urit enim lini campum seges, urit avenæ ;  
 Urunt Lethæo perfusa papavera somno.  
 Sed tamen alternis facilis labor, arida tantum  
 Ne saturare fimo pingui pudeat sola, neve 80  
 Effetos cinerem immundum jactare per agros.  
 Sic quoque mutatis requiescunt fetibus arva ;  
 Nec nulla interea est inaratæ gratia terræ.  
 Sæpe etiam steriles incendere profuit agros,  
 Atque levem stipulam crepitantibus urere flammis :  
 Sive inde occultas vires et pabula terræ  
 Pinguia concipiunt ; sive illis omne per ignem  
 Excoquitur vitium, atque exudat inutilis humor ;  
 Seu plures calor ille vias et cæca relaxat  
 Spiramenta, novas veniat qua sucus in herbas ; 90  
 Seu durat magis et venas astringit hiantes,  
 Ne tenues pluviae, rapidive potentia solis  
 Acrior, aut boreæ penetrabile frigus adurat.  
 Multum adeo, rastris glebas qui frangit inertes  
 Vimineasque trahit crates, juvat arva ; neque illum  
 Flava Ceres alto nequid quam spectat Olympo ;



Et qui, proscisso quæ suscitât æquore terga,  
Rursus in obliquum verso perrumpit aratro,  
Exercetque frequens tellurem, atque imperat arvis.

Humida solstitia atque hiemes orate serenas, 100

Agricolæ ; hiberno lætissima pulvere farra,  
Lætus ager ; nullo tantum se Mysia cultu  
Jactat, et ipsa suas mirantur Gargara messes.

Quid dicam, jacto qui semine cominus arva  
Insequitur cumulosque ruit male pinguis arenæ ?

Deinde satis fluvium inducit rivosque sequentes,  
Et, quum exustus ager morientibus æstuat herbis,  
Ecce supercilio clivosi tramitis undam

Elicit ? illa cadens raucum per levia murmur  
Saxa ciet, scatebrisque arentia temperat arva. 110

Quid, qui, ne gravidis procumbat culmus aristis,  
Luxuriem segetum tenera depascit in herba,  
Quum primum sulcos æquant sata ? quique paludis  
Collectum humorem bibula deducit arena ?

Præsertim incertis si mensibus amnis abundans  
Exit, et obducto late tenet omnia limo,  
Unde cavæ tepido sudant humore lacunæ.

Nec tamen, hæc quum sint hominumque boumque labores  
Versando terram experti, nihil improbus anser,

Strymoniaque grues, et amaris intuba fibris 120

Officiunt, aut umbra nocet. Pater ipse colendi  
Haud facilem esse viam voluit, primusque per artem  
Movit agros, curis acuens mortalia corda,

Nec torpere gravi passus sua regna veterno.

Ante Jovem nulli subigebant arva coloni ;  
Ne signare quidem aut partiri limite campum  
Fas erat : in medium quærebant, ipsaque tellus  
Omnia liberius, nullo poscente, ferebat.

Ille malum virus serpentibus addidit atris,  
Prædarique lupos jussit, pontumque moveri ; 130

Mellaque decussit foliis, ignemque removit,  
Et passim rivis currentia vina repressit,

Ut varias usus meditando extunderet artes  
Paulatim, et sulcis frumenti quæreretur herbam  
Ut silicis venis abstrusum excuderet ignem.  
Tunc alios primum fluvii sensere cavatas ;  
Navita tum stellis numeros et nomina fecit,  
Pleiadas, Hyadas, claramque Lycaonis Arcton ;  
Tum laqueis captare feras et fallere visco  
Inventum, et magnos canibus circumdare saltus ; 140  
Atque alius latum funda jam verberat amnem,  
Alta petens pelagoque alius trahit humida lina :  
Tum ferri rigor, atque argutæ lamina serræ ;  
Nam primi cuneis scindebant fissile lignum :  
Tum variæ venere artes ; labor omnia vicit  
Improbis et duris urgens in rebus egestas.  
Prima Ceres ferro mortales vertere terram  
Instituit, quum jam glandes atque arbuta sacrae  
Deficerent silvæ, et victum Dodona negaret.  
Mox et frumentis labor additus, ut mala culmos 150  
Esset robigo, segnisque horreret in arvis  
Carduus : intereunt segetes ; subit aspera silva,  
Lappæque tribulique, interque nitentia culta  
Infelix lolium et steriles dominantur avenæ.  
Quod nisi et assiduis terram insectabere rastris,  
Et sonitu terrebis aves, et ruris opaci  
Falce premeas umbras, votisque vocaveris imbrem ;  
Heu ! magnum alterius frustra spectabis acervum,  
Concussa que famem in silvis solabere quercu.  
Dicendum et, quæ sint duris agrestibus arma, 160  
Queis sine nec potuere seri nec surgere messes :  
Vomis et inflexi primum grave robur aratri,  
Tarda que Eleusinæ matris volventia plaustra,  
Tribula que traheæque et iniquo pondere rastri ;  
Virgea præterea Celei vilisque supellex,  
Arbuteæ crates et mystica vannus Iacchi :  
Omnia quæ multo ante memor provisâ repones,  
Si te digna manet divini gloria ruris.

Continuo in silvis magna vi flexa domatur  
In burim et curvi formam accipit ulmus aratri ; 170  
Huic a stirpe pedes temo protentus in octo ;  
Binæ aures, duplici aptantur dentalia dorso.  
Cæditur et tilia ante jugo levis, altaque fagus,  
Stivaque, quæ currus a tergo torqueat imos ;  
Et suspensa focis explorat robora fumus.

Possum multa tibi veterum præcepta referre,  
Ni refugis, tenuesque piget cognoscere curas.  
Area cum primis ingenti æquanda cylindro  
Et vertenda manu et creta solidanda tenaci,  
Ne subeant herbæ, neu pulvere victa fatiscat ; 180  
Tum variæ illudant pestes : sæpe exiguus mus  
Sub terris posuitque domos atque horrea fecit ;  
Aut oculis capti fodere cubilia talpæ ;

Inventusque cavis bufo, et quæ plurima terræ  
Monstra ferunt ; populatque ingentem farris acervum  
Curculio, atque inopi metuens formica senectæ.  
Contemplator item, quum se nux plurima silvis  
Induet in florem et ramos curvabit olentes ;  
Si superant fetus, pariter frumenta sequentur,  
Magnaque cum magno veniet tritura calore ; 190  
At si luxuria foliorum exuberat umbra,

Nequidquam pingues palea teret area culmos.  
Semina vidi equidem multos medicare serentes,  
Et nitro prius et nigra perfundere amurca,  
Grandior ut fetus siliquis fallacibus esset,  
Et quamvis igni exiguo properata maderent.  
Vidi lecta diu et multo spectata labore

Degenerare tamen, ni vis humana quotannis  
Maxima quæque manu legeret ; sic omnia fatis  
In pejus ruere, ac retro sublapsa referri ; 200  
Non aliter quam qui adverso vix flumine lembum  
Remigiis subigit, si brachia forte remisit,  
Atque illum in præceps pronò rapit alveus amni.

Præterea tam sunt Arcturi sidera nobis

Hædorumque dies servandi et lucidus Anguis,  
 Quam quibus in patriam ventosa per æquora vectis  
 Pontus et ostriferi fauces tentantur Abydi.  
 Libra die somnique pares ubi fecerit horas,  
 Et medium luci atque umbris jam dividit orbem,  
 Exercete, viri, tauros ; serite hordea campis 210  
 Usque sub extremum brumæ intractabilis imbrem :  
 Nec non et lini segetem et Cereale papaver  
 Tempus humo tegere, et jamdudum incumbere aratris,  
 Dum sicca tellure licet, dum nubila pendent.  
 Vere fabis satio ; tum te quoque, Medica, putres  
 Accipiunt sulci, et milio venit annua cura,  
 Candidus auratis aperit quum cornibus annum  
 Taurus, et adverso cedens Canis occidit astro.  
 At si triticeam in messem robustaque farra  
 Exercebis humum, solisque instabis aristis, 220  
 Ante tibi Eoæ Atlantides abscondantur,  
 Gnosciaque ardentis decedat stella Coronæ,  
 Debita quam sulcis committas semina, quamque  
 Invitæ properes anni spem credere terræ.  
 Multi ante occasum Maiæ cœpere ; sed illos  
 Expectata seges vanis elusit aristis.  
 Si vero viciamque seres vilemque faselum,  
 Nec Pelusiæ curam aspernabere lentis,  
 Haud obscura cadens mittet tibi signa Bootes ;  
 Incipe, et ad medias sementem extende pruinas. 230  
 Idcirco certis dimensum partibus orbem  
 Per duodena regit mundi Sol aureus astra.  
 Quinque tenent cœlum zonæ : quarum una corusco  
 Semper sole rubens et torrida semper ab igni ;  
 Quam circum extremæ dextra lævæque trahuntur,  
 Cærulea glacie concretæ atque imbribus atris :  
 Has inter mediamque duæ mortalibus ægris  
 Munere concessæ divum ; via secta per ambas,  
 Obliquus qua se signorum verteret ordo.  
 Mundus, ut ad Scythiam Rhipæasque arduus arces 240

Consurgit, premitur Libyæ devexus in austros.  
 Hic vertex nobis semper sublimis ; at illum  
 Sub pedibus Styx atra videt Manesque profundi.  
 Maximus hic flexu sinuoso elabitur anguis  
 Circum perque duas in morem fluminis Arctos,  
 Arctos oceani metuentes æquore tingi :  
 Illic, ut perhibent, aut intempesta silet nox,  
 Semper et obtenta densantur nocte tenebræ :  
 Aut redit a nobis Aurora, diemque reducit ;  
 Nosque ubi primus equis Oriens afflavit anhelis,  
 Illic sera rubens accendit lumina Vesper.

250

Hinc tempestates dubio prædiscere cælo  
 Possumus, hinc messisque diem tempusque serendi ;  
 Et quando infidum remis impellere marmor  
 Conveniat ; quando armatas deducere classes,  
 Aut tempestivam silvis evertere pinum.

Nec frustra signorum obitus speculamur et ortus,  
 Temporibusque parem diversis quatuor annum.  
 Frigidus agricolam si quando continet imber,  
 Multa, forent quæ mox cælo properanda sereno,  
 Maturare datur ; durum procudit arator  
 Vomeris obtusi dentem ; cavat arbore lintres ;  
 Aut pecori signum, aut numeros impressit acervis.

260

Exacuunt alii vallos furcasque bicornes,  
 Atque Amerina parant lentæ retinacula viti.  
 Nunc facilis rubea texatur fiscina virga ;  
 Nunc torrete igni fruges, nunc frangite saxo.  
 Quippe etiam festis quædam exercere diebus  
 Fas et jura sinunt : rivos deducere nulla

Religio vetuit, segeti prætereundum sepem,  
 Insidias avibus moliri, incendere vepres,

270

•Balantumque gregem fluvio mersare salubri.  
 Sæpe oleo tardi costas agitator aselli  
 Vilibus aut onerat pomis ; lapidemque revertens  
 Incusum aut atræ massam picis urbe reportat.

Ipsa dies alios alio dedit ordine Luna

Felices operum. Quintam fuge ; pallidus Orcus  
 Eumenidesque satæ ; tum partu Terra nefando  
 Cœumque Iapetumque creat, sævumque Typhœa,  
 Et conjuratos cœlum rescindere fratres.

280

Ter sunt conati imponere Pelio Ossam  
 Scilicet, atque Ossæ frondosum involvere Olympum :  
 Ter Pater extractos disjecit fulmine montes.  
 Septima post decimam felix, et ponere vitem,  
 Et pressos domitare boves, et licia telæ  
 Addere. Nona fugæ melior, contraria furtis.

Multa adeo gelida melius se nocte dedere,  
 Aut quum sole novo terras irrorat Eous.

Nocte leves melius stipulæ, nocte arida prata  
 Tondentur ; noctes lentus non deficit humor.

290

Et quidam seros hiberni ad luminis ignes

Pervigilat, ferroque faces inspicat acuto ;

Interea longum cantu solata laborem

Arguto conjux percurrit pectine telas ;

Aut dulcis musti Vulcano decoquit humorem

Et foliis undam trepidi despumat aheni.

At rubicunda Ceres medio succiditur æstu ;

Et medio tostas æstu terit area fruges.

Nudus ara, sere nudus ; hiems ignava colono.

Frigoribus parto agricolæ plerumque fruuntur,

300

Mutuaque inter se læti convivia curant.

Invitat genialis hiems curasque resolvit :

Ceu pressæ quum jam portum tetigere carinæ,

Puppibus et læti nautæ imposuere coronas.

Sed tamen et quernas glandes tum stringere tempus,

Et lauri baccas, oleamque, cruentaue myrta ;

Tum gruibus pedicas et retia ponere cervis,

Auritosque sequi lepores ; tum figere damas,

Stuppea torquentem Balearis verbera fundæ :

Quum nix alta jacet, glaciem quum flumina trudunt. 310

Quid tempestates auctumni et sidera dicam ?

Atque, ubi jam breviorque dies et mollior æstas,

Quæ vigilanda viris ? vel quum ruit imbriferum ver,  
Spicea jam campis quum messis inhorruit, et quum  
Frumenta in viridi stipula lactentia turgent ?

Sæpe ego, quum flavis messorum induceret arvis  
Agricola, et fragili jam stringeret hordea culmo,  
Omnia ventorum concurrere prælia vidi ;

Quæ gravidam late segetem ab radicibus imis  
Sublime expulsam eruerent : ita turbine nigro

320

Ferret hiems culmumque levem stipulasque volantes.

Sæpe etiam immensum cœlo venit agmen aquarum,

Et fœdam glomerant tempestatem imbribus atris

Collectæ ex alto nubes ; ruit arduus æther,

Et pluvia ingenti sata læta boumque labores

Diluit ; implentur fossæ, et cava flumina crescunt

Cum sonitu, fervetque fretis spirantibus æquor.

Ipse Pater, media nimborum in nocte, corusca

Fulmina molitur dextra : quo maxima motu

Terra tremit ; fugere feræ, et mortalia corda

330

Per gentes humilis stravit pavor : ille flagranti

Aut Atho, aut Rhodopen, aut alta Ceraunia telo

Dejicit ; ingeminant austri et densissimus imber ;

Nunc nemora ingenti vento, nunc litora plangunt.

Hoc metuens, cœli menses et sidera serva ;

Frigida Saturni sese quo stella receptet ;

Quos ignis cœli Cyllenius erret in orbes.

In primis venerare deos, atque annua magnæ

Sacra refer Cereri lætis operatus in herbis,

Extremæ sub casum hiemis, jam vere sereno.

340

Tum pingues agni, et tum mollissima vina ;

Tum somni dulces, densæque in montibus umbræ.

Cuncta tibi Cererem pubes agrestis adoret ;

Cui tu lacte favos et miti dilue Baccho,

Terque novas circum felix eat hostia fruges ;

Omnis quam chorus et socii comitentur ovantes,

Et Cererem clamore vocent in tecta. Neque ante

Falcem maturis quisquam supponat aristis,

Quam Cereri, torta redimitus tempora quercu,  
Det motus inkompositos et carmina dicat.

350

Atque hæc ut certis possimus discere signis,  
Æstusque, pluviasque, et agentes frigora ventos :  
Ipse Pater statuit, quid menstrua Luna moneret ;  
Quo signo caderent austri ; quid sæpe videntes  
Agricolæ propius stabulis armenta tenerent.  
Continuo, ventis surgentibus, aut freta ponti  
Incipiunt agitata tumescere, et aridus altis  
Montibus audiri fragor ; aut resonantia longe  
Litora misceri, et nemorum increbrescere murmur.

360

Jam sibi tum curvis male temperat unda carinis,  
Quum medio celeres revolant ex æquore mergi,  
Clamoremque ferunt ad litora ; quumque marinæ  
In sicco ludunt fulicæ, notasque paludes  
Deserit, atque altam supra volat ardea nubem.  
Sæpe etiam stellas, vento imminente, videbis  
Præcipites cœlo labi, noctisque per umbram  
Flammæ longos a tergo albescere tractus ;  
Sæpe levem paleam et frondes volitare caducas,  
Aut summa nantes in aqua colludere plumas.  
At Boreæ de parte trucis quum fulminat, et quum  
Eurique Zephyrique tonat domus : omnia plenis  
Rura natant fossis, atque omnis navita ponto  
Humida vela legit. Nunquam imprudentibus imber  
Obfuit. Aut illum surgentem vallibus imis  
Aëriæ fugere grues ; aut bucula cœlum  
Suspiciens patulis captavit naribus auras ;  
Aut arguta lacus circumvolitavit hirundo ;  
Et veterem in limo ranæ cecinere querelam.  
Sæpius et tectis penetratilibus extulit ova  
Angustum formica terens iter ; et bibit ingens  
Arcus ; et e pastu decedens agmine magno  
Corvorum increpuit densis exercitus alis.  
Jam varias pelagi volucres, et quæ Asia circum  
Dulcibus in stagnis rimantur prata Caystri,

370

380



Certatim largos humeris infundere rores,  
Nunc caput objectare fretis, nunc currere in undas,  
Et studio incassum videas gestire lavandi.

Tum cornix plena pluviam vocat improba voce,  
Et sola in sicca secum spatiatur arena.

Ne nocturna quidem carpentes pensa puellæ  
Nescivere hiemem, testa quum ardente viderent  
Scintillare oleum et putres concreescere fungos. 390

Nec minus ex imbri soles et aperta serena  
Prospicere et certis poteris cognoscere signis :  
Nam neque tum stellis acies obtusa videtur,  
Nec fratris radiis obnoxia surgere Luna,  
Tenuia nec lanæ per cælum vellera ferri ;  
Non tepidum ad solem pennas in litore pandunt  
Dilectæ Thetidi alcyones ; non ore solutos  
Immundi meminere sues jactare maniplos : 400

At nebulae magis ima petunt campoque recumbunt ;  
Solis et occasum servans de culmine summo  
Nequidquam seros exercet noctua cantus.  
Apparet liquido sublimis in aëre Nisus,  
Et pro purpureo pœnas dat Scylla capille.  
Quacumque illa levem fugiens secat æthera pennis,  
Ecce inimicus, atrox, magno stridore per auras  
Insequitur Nisus : qua se fert Nisus ad auras,  
Illa levem fugiens raptim secat æthera pennis.

Tum liquidas corvi presso ter gutture voces  
Aut quater ingeminant ; et sæpe cubilibus altis, 410  
Nescio qua præter solitum dulcedine læti,

Inter se foliis strepitant ; juvat imbribus actis  
Progeniem parvam dulcesque revisere nidos :  
Haud equidem credo, quia sit divinitus illis  
Ingenium, aut rerum fato prudentia major :  
Verum, ubi tempestas et cœli mobilis humor  
Mutavere vias, et Jupiter uvidus austris  
Denset, erant quæ rara modo, et, quæ densa, relaxat ;  
Vertuntur species animorum, et pectora motus 420

Nunc alios, alios, dum nubila ventus agebat,  
Concipiunt. Hinc ille avium concentus in agris,  
Et lætæ pecudes, et ovantes gutture corvi.

Si vero solem ad rapidum lunasque sequentes  
Ordine respicies, nunquam te crastina fallet  
Hora, neque insidiis noctis capiere serenæ.

Luna, revertentes quum primum colligit ignes,  
Si nigrum obscuro comprehenderit aëra cornu,  
Maximus agricolis pelagoque parabitur imber.

At si virgineum suffuderit ore ruborem,  
Ventus erit ; vento semper rubet aurea Phœbe.

Sin ortu quarto, namque is certissimus auctor,  
Pura, neque obtusis per cælum cornibus ibit :

Totus et ille dies, et qui nascentur ab illo  
Exactum ad mensem, pluvia ventisque carebunt ;  
Votaque servati solvent in litore nautæ

Glauco et Panopeæ et Inoo Melicertæ.

Sol quoque et exoriens, et quum se condit in undas,  
Signa dabit ; solem certissima signa sequuntur,

Et quæ mane refert, et quæ surgentibus astris.

Ille ubi nascentem maculis variaverit ortum

Conditus in nubem, medioque refugerit orbe :

Suspecti tibi sint imbres ; namque urget ab alto  
Arboribusque satisque notus pecorique sinister.

Aut ubi sub lucem densa inter nubila sese

Diversi rumpent radii, aut ubi pallida surget

Tithoni croceum linquens Aurora cubile ;

Heu, male tum mites defendet pampinus uvas :

Tam multa in tectis crepitans salit horrida grando.

Hoc etiam, emenso quum jam decedet Olympo,

Profuerit meminisse magis : nam sæpe videmus

Ipsius in vultu varios errare colores ;

Cæruleus pluviam denuntiat, igneus euros.

Sin maculæ incipient rutilo immiscerier igni,

Omnia tunc pariter vento nimbisque videbis

Fervere : non illa quisquam me nocte per altum

430

440

450

Ire, neque a terra moneat convellere funem.  
 At si, quum refcretque diem condetque relatum,  
 Lucidus orbis erit ; frustra terrebere nimbis,  
 Et claro silvas cernes aquilone moveri. 460  
 Denique, quid vesper serus vehat, unde serenas  
 Ventus agat nubes, quid cogitet humidus auster,  
 Sol tibi signa dabit. Solem quis dicere falsum  
 Audeat ? ille etiam cæcos instare tumultus  
 Sæpe monet, fraudemque et operta tumescere bella.  
 Ille etiam extincto miseratus Cæsare Romam :  
 Quum caput obscura nitidum ferrugine textit,  
 Impiaque æternam timuerunt sæcula noctem.  
 Tempore quamquam illo tellus quoque, et æquora ponti,  
 Obscenique canes, importunæque volucres 470  
 Signa dabant. Quoties Cyclopum effervere in agros  
 Vidimus undantem ruptis fornacibus Ætnam,  
 Flammarumque globos liquefactaque volvere saxa !  
 Armorum sonitum toto Germania cælo  
 Audiit ; insolitis tremuerunt motibus Alpes.  
 Vox quoque per lucos vulgo exaudita silentes  
 Ingens ; et simulacra modis pallentia miris  
 Visa sub obscurum noctis ; pecudesque locutæ ;  
 Infandum ! sistunt amnes, terræque dehiscunt,  
 Et mæstum illacrimat templis ebur, æraque sudant. 480  
 Proluit insano contorquens vertice silvas  
 Fluviorum rex Eridanus, camposque per omnes  
 Cum stabulis armenta tulit. Nec tempore eodem  
 Tristibus aut extis fibræ apparere minaces,  
 Aut puteis manare cruor cessavit ; et altæ  
 Per noctem resonare lupis ululantibus urbes.  
 Non alias cælo ceciderunt plura sereno  
 Fulgura ; nec diri toties arsere cometæ.  
 Ergo inter sese paribus concurrere telis  
 Romanas acies iterum videre Philippi ; 490  
 Nec fuit indignum superis, bis sanguine nostro  
 Emathiam et latos Hæmi pinguescere campos.

Scilicet et tempus veniet, quum finibus illis  
Agricola, incurvo terram molitus aratro,  
Exesa inveniet scabra robigine pila,  
Aut gravibus rastris galeas pulsabit inanes,  
Grandiaque effossis mirabitur ossa sepulcris.  
Di patrii Indigetes, et Romule, Vestaque mater,  
Quæ Tuscum Tiberim et Romana Palatia servas,  
Hunc saltem everso juvenem succurrere sæclo 500  
Ne prohibete. Satis jam pridem sanguine nostro  
Laomedontæ luimus perjuria Trojæ.  
Jam pridem nobis cœli te regia, Cæsar,  
Invidet, atque hominum queritur curare triumphos :  
Quippe ubi fas versum atque nefas : tot bella per orbem,  
Tam multæ scelerum facies ; non ullus aratro  
Dignus honos ; squalent abductis arva colonis,  
Et curvæ rigidum falces conflantur in ensem.  
Hinc movet Euphrates, illinc Germania bellum ;  
Vicinæ ruptis inter se legibus urbes 510  
Arma ferunt ; sævit toto Mars impius orbe :  
Ut quum carceribus sese effudere quadrigæ,  
Addunt in spatia, et frustra retinacula tendens  
Fertur equis auriga, neque audit currus habenas.

P. VIRGILII MARONIS

G E O R G I C O N

LIBER SECUNDUS.

HACTENUS arborum cultus et sidera cœli ;  
Nunc te, Bacche, canam, nec non silvestria tecum  
Virgulta, et prolem tarde crescentis olivæ.  
Huc, pater o Lenæe ; tuis hic omnia plena  
Muneribus ; tibi pampineo gravidus auctumno  
Floret ager, spumat plenis vindemia labris ;  
Huc, pater o Lenæe, veni ; nudataque musto  
Tinge novo mecum dereptis crura cothurnis.

Principio arboribus varia est natura creandis : ✓

Namque aliæ, nullis hominum cogentibus, ipsæ  
Sponte sua veniunt, camposque et flumina late  
Curva tenent : ut molle siler, lentæque genestæ,  
Populus, et glauca canentia fronde salicta.

10

Pars autem posito surgunt de semine : ut altæ  
Castaneæ, nemorumque Jovi quæ maxima frondet  
Æsculus, atque habitæ Graiis oracula quercus.

✓ Pullulat ab radice aliis densissima silva :

Ut cerasis ulmisque ; etiam Parnasia laurus

Parva sub ingenti matris se subjicit umbra.

Hos natura modos primum dedit ; his genus omne  
Silvarum fruticumque viret nemorumque sacrorum.

20

Sunt alii, quos ipse via sibi reperit usus.

Hic plantas tenero abscindens de corpore matrum

Deposuit sulcis ; hic stirpes obruit arvo,

Quadrifidasque sudes, et acuto robore vallos ;

Silvarumque aliæ pressos propaginis arcus  
Exspectant et viva sua plantaria terra.  
Nil radice egent aliæ ; summumque putator  
Haud dubitat terræ referens mandare cacumen,  
Quin et caudicibus sectis, mirabile dictu,  
Truditur e sicco radix oleagina ligno.  
Et sæpe alterius ramos impune videmus  
Vertere in alterius ; mutatamque insita mala  
Ferre pirum, et prunis lapidosa rubescere corna.

30

Quare agite o, proprios generatim discite cultus,  
Agricolæ, fructusque feros mollite colendo ;  
Neu segnes jaceant terræ. Juvat Ismara Baccho  
Conserere, atque olea magnum vestire Taburnum.  
Tuque ades, inceptumque una decurre laborem,  
O decus, o famæ merito pars maxima nostræ,  
Mæcenas, pelagoque volans da vela patenti.  
Non ego cuncta meis amplecti versibus opto ;  
Non, mihi si linguæ centum sint, oraue centum,  
Ferreæ vox : ades, et primi lege litoris oram.  
In manibus terræ : non hic te carmine ficto  
Atque per ambages et longa exorsa tenebo.

40

Sponte sua quæ se tollunt in luminis oras,  
Infecunda quidem, sed læta et fortia surgunt ;  
Quippe solo natura subest. Tamen hæc quoque si quis  
Inserat, aut scrobibus mandet mutata subactis,  
Exuerint silvestrem animum ; cultuque frequenti  
In quascumque voces artes haud tarda sequentur.  
Nec non et sterilis, quæ stirpibus exit ab imis,  
Hoc faciet, vacuos si sit digesta per agros :  
Nunc altæ frondes et rami matris opacant,  
Crescentique adimunt fetus, uruntque ferentem.  
Jam, quæ seminibus jactis se sustulit arbor,  
Tarda venit, seris factura nepotibus umbram ;  
Pomaque degenerant sucos oblita priores ;  
Et turpes avibus prædam fert uva racemos.

50

60

Scilicet omnibus est labor impendendus, et omnes

Cogendæ in sulcum, ac multa mercede domandæ.  
 Sed truncis oleæ melius, propagine vites  
 Respondent, solido Paphiæ de robore myrtus ;  
 ✓ Plantis et duræ coruli nascuntur, et ingens  
 Fraxinus, Herculeæque arbos umbrosa coronæ,  
 Chaoniiue patris glandes ; etiam ardua palma ✓  
 Nascitur, et casus abies visura marinos.  
 ✓ Inseritur vero et fetu nucis arbutus horrida ;  
 Et steriles platani malos gessere valentes ; 70  
 Castaneæ fagus, ornusque incanuit albo  
 Flore piri, glandemque sues frégere sub ulmis.  
 Nec modus inserere atque oculos imponere simplex.  
 Nam, qua se medio trudent de cortice gemmae,  
 Et tenues rumpunt tunicas, angustus in ipso  
 Fit nodo sinus : huc aliena ex arbore germen  
 Includunt, udoque docent inolescere libro.  
 Aut rursum enodes trunci resecantur, et alte  
 Finditur in solidum cuneis via ; deinde feraces  
 Plantæ immittuntur : nec longum tempus, et ingens 80  
 Exiit ad cælum ramis felicibus arbos,  
 Miraturque novas frondes et non sua poma.  
 Præterea genus haud unum, nec fortibus ulmis,  
 Nec salici lotoque, neque Idæis cyparissis.  
 Nec pingues unam in faciem nascuntur olivæ,  
 Orchades, et radii, et amara pausia bacca,  
 Pomaque, et Alcinoï silvæ ; nec surculus idem  
 Crustumis Syriisque piris, gravibusque volemis.  
 Non eadem arboribus pendet vindemia nostris,  
 Quam Methymnæo carpit de palmite Lesbos ; 90  
 Sunt Thasiæ vites, sunt et Mareotides albæ,  
 Pinguibus hæ terris habiles, levioribus illæ ;  
 Et passo Psithia utilior, tenuisque Lageos,  
 Tentatura pedes olim, vincturaque linguam ;  
 Purpureæ, preciaque ; et quo te carmine dicam,  
 Rhætica ? nec cellis ideo contende Falernis.  
 Sunt et Aminææ vites, firmissima vina,

Tmolus et assurgit quibus et rex ipse Phanæus ;  
 Argitisque minor, cui non certaverit ulla.  
 Aut tantum fluere, aut totidem durare per annos. 100  
 Non ego te, dis et mensis accepta secundis,  
 Transierim, Rhodia, et tumidis, Bumaste, racemis.  
 Sed neque, quam multæ species, nec, nomina quæ sint,  
 Est numerus ; neque enim numero comprehendere refert :  
 Quem qui scire velit, Libyci velit æquoris idem  
 Discere quam multæ zephyro turbentur arenæ ;  
 Aut, ubi navigiis violentior incidit eurus,  
 Nosse, quot Ionii veniant ad litora fluctus.

Nec vero terræ ferre omnes omnia possunt.  
 Fluminibus salices, crassisque paludibus alni 110  
 Nascuntur, steriles saxosis montibus orni ;  
 Litora myrtetis lætissima ; denique apertos  
 Bacchus amat colles, aquilonem et frigora taxi.  
 Aspice et extremis domitum cultoribus orbem,  
 Eoasque domus Arabum, pictosque Gelonos.  
 Divisæ arboribus patriæ : sola India nigrum  
 Fert ebum ; solis est thurea virga Sabæis.  
 Quid tibi odorato referam sudantia ligno  
 Balsamaque, et baccas semper frondentis acanthi ?  
 Quid nemora Æthiopum, molli canentia lana ? 120  
 Velleraque ut foliis depectant tenuiã Seres ?  
 Aut quos Oceano propior gerit India lucos,  
 Extremi sinus orbis ? ubi aëra vincere summum  
 Arboris haud ullæ jactu potuere sagittæ.  
 Et gens illa quidem sumtis non tarda pharetris.  
 Media fert tristes sucos tardumque saporem  
 Felicis mali ; quo non præsentius ullum,  
 Pocula si quando sævæ infecere novercæ,  
 [Miscueruntque herbas et non innoxia verba,]  
 Auxilium venit, ac membris agit atra venena. 130  
 Ipsa ingens arbor, faciemque simillima lauro ;  
 Et, si non alium late jactaret odorem,  
 Laurus erat ; folia haud ullis labentia ventis ;



Flos ad prima tenax ; animas et olentia Medi  
Ora foveat illo, et senibus medicantur anhelis.

Sed neque Medorum, silvæ ditissima, terra,  
Nec pulcher Ganges, atque auro turbidus Hermus,  
Laudibus Italiæ certent ; non Bactra, neque Indi,  
Totaque thuriferis Panchaïa pinguis arenis.  
Hæc loca non tauri spirantes naribus ignem 140

Invertere, satis immanis dentibus hydri ;  
Nec galeis densisque virum seges horruit hastis :  
Sed gravidæ fruges et Bacchi Massicus humor  
Implevere ; tenent oleæ armentaque læta.  
Hinc bellator equus campo sese arduus infert ;  
Hinc albi, Clitumne, greges, et maxima taurus  
Victima, sæpe tuo perfusi flumine sacro,  
Romanos ad templa deûm duxere triumphos.

Hic ver assiduum, atque alienis mensibus ætas ;  
Bis gravidæ pecudes, bis pomis utilis arbos. 150  
At rabidæ tigres absunt et sæva leonum

Semina ; nec miseros fallunt aconita legentes ;  
Nec rapit immensos orbes per humum, neque tanto  
Squameus in spiram tractu se colligit anguis.

Adde tot egregias urbes, operumque laborem,  
Tot congesta manu præruptis oppida saxis,  
Fluminaque antiquos subterlabentia muros.  
An mare, quod supra, memorem, quodque alluit infra ?

Anne lacus tantos ? te, Lari maxime, teque,  
Fluctibus et fremitu assurgens, Benace, marino ? 160

An memorem portus, Lucrinoque addita claustra,  
Atque indignatum magnis stridoribus æquor,  
Julia qua ponto longe sonat unda refuso,  
Tyrrhenusque fretis immittitur æstus Avernis ?

Hæc eadem argenti rivos ærisque metalla  
Ostendit venis, atque auro plurima fluxit.  
Hæc genus acre virûm, Marsos pubemque Sabellam,  
Assuetumque malo Ligurem, Volscosque verutos  
Extulit ; hæc Decios, Marios, magnosque Camillos,

Scipiadas duros bello, et te, maxime Cæsar, 170  
 Qui nunc extremis Asiæ jam victor in oris  
 Imbellem avertis Romanis arcibus Indum.  
 Salve, magna parens frugum, Saturnia tellus,  
 Magna virûm : tibi res antiquæ laudis et artis  
 Ingredior, sanctos ausus recludere fontes,  
 Ascræumque cano Romana per oppida carmen.  
 Nunc locus arborum ingeniis : quæ robora cuique,  
 Quis color, et quæ sit rebus natura ferendis.  
 Difficiles primum terræ, collesque maligni,  
 Tenuis ubi argilla, et dumosis calculus arvis, 180  
 Palladia gaudent silva vivacis olivæ.  
 Indicio est, tractu surgens oleaster codem  
 Plurimus, et strati baccis silvestribus agri.  
 At quæ pinguis hûmus, dulcique uligine læta,  
 Quique frequens herbis et fertilis ubere campus,  
 Qualem sæpe cava montis convalle solemus  
 Despicere : huc summis liquuntur rupibus amnes,  
 Felicemque trahunt limum : quique editus austro,  
 Et filicem curvis invisam pascit aratris ;  
 Hic tibi prævalidas olim multoque fluentes 190  
 Sufficiet Baccho vites ; hic fertilis uvæ,  
 Hic laticis, qualem pateris libamus et auro,  
 Inflavit quum pinguis ebur Tyrrhenus ad aras,  
 Lancibus et pandis fumantia reddimus exta.  
 Sin armenta magis studium vitulosque tueri,  
 Aut fetus ovium, aut urentes culta capellas :  
 Saltus, et saturi petito longinqua Tarenti,  
 Et qualem infelix amisit Mantua campum,  
 Pascentem niveos herboso flumine cycnos.  
 Non liquidi gregibus fontes, non gramina deerunt ; 200  
 Et, quantum longis carpent armenta diebus,  
 Exigua tantum gelidus ros nocte reponet.  
 Nigra fere et presso pinguis sub vomere terra,  
 Et cui putre solum, namque hoc imitamur arando,  
 Optima frumentis : non ullo ex æquore cernes

Plura domum tardis decedere plaustra juvencis :

Aut unde iratus silvam devexit arator,

Et nemora evertit multos ignava per annos,

Antiquasque domos avium cum stirpibus imis

Eruit : illæ altum nidis petiere relictis ; 210

At rudis enituit impulso vomere campus.

Nam jejuna quidem clivosi glarea ruris

Vix humiles apibus casias roremque ministrat ;

Et tophus scaber, et nigris exesa chelydris

Creta, negant alios æque serpentibus agros

Dulcem ferre cibum, et curvas præbere latebras.

Quæ tenuem exhalat nebulam fumosque volucres,

Et bibit humorem, et, quum vult, ex se ipsa remittit,

Quæque suo viridi semper se gramine vestit,

Nec scabie et salsa lædit robigine ferrum : 220

Illæ tibi lætis intexet vitibus ulmos ;

Illæ ferax oleo est ; illam experiere colendo

Et facilem pecori et patientem vomeris unci.

Talem dives arat Capua, et vicina Vesevo

Ora jugo, et vacuis Clanius non æquus Acerris.

Nunc, quo quamque modo possis cognoscere, dicam.

Rara sit an supra morem si densa requiras :

Altera frumentis quoniam favet, altera Baccho ;

Densa magis Cereri, rarissima quæque Lyæo :

Ante locum capies oculis, alteque jubebis 230

In solido puteum demitti, omnemque repones

Rursus humum, et pedibus summas æquabis arenas.

Si deerunt, rarum pecorique et vitibus almis

Aptius uber erit ; sin in sua posse negabunt

Ire loca, et scrobibus superabit terra repletis : ✓

Spissus ager ; glebas cunctantes crassaque terga

Exspecta, et validis terram proscinde juvencis.

Salsa autem tellus, et quæ perhibetur amara,

Frugibus infelix, (ea nec mansuescit arando,

Nec Baccho genus, aut pomis sua nomina servat,) 240

Tale dabit specimen : tu spisso vimine qualos,

Colaue prælorum fumosis deripe tectis ;  
 Huc ager ille malus, dulcesque a fontibus undæ  
 Ad plenum calcentur : aqua eluctabitur omnis  
 Scilicet, et grandes ibunt per vimina guttæ ;  
 At sapor indicium faciet manifestus, et ora  
 Tristia tentantum sensu torquebit amaror.  
 Pinguis item quæ sit tellus, hoc denique pacto  
 Discimus : haud unquam manibus jactata fatiscit,  
 Sed picis in morem ad digitos lentescit habendo. 250  
 Humida majores herbas alit, ipsaque justo  
 Lætior. Ah nimium ne sit mihi fertilis illa,  
 Neu se prævalidam primis ostendat aristis !  
 Quæ gravis est, ipso tacitam se pondere prodit,  
 Quæque levis. Promptum est oculis prædiscere nigram, L  
 Et quis cui color. At sceleratum exquirere frigus  
 Difficile est : picæ tantum, taxique nocentes  
 Interdum, aut hederæ pandunt vestigia nigræ.

His animadversis, terram multo ante memento  
 Excoquere, et magnos scrobibus concidere montes, 260  
 Ante supinatas aquiloni ostendere glebas,  
 Quam lætum infodias vitis genus. Optima putri  
 Arva solo : id venti curant, gelidæque pruinae,  
 Et labefacta movehs robustus jugera fossor.  
 At si quos haud ulla viros vigilantia fugit,  
 A te locum similem exquirunt, ubi prima paretur  
 Arboribus seges, et quo mox digesta feratur ;  
 Mutatam ignorent subito ne semina matrem.  
 Quin etiam cœli regionem in cortice signant :  
 Ut, quo quæque modo steterit, qua parte calores 270  
 Austrinos tulerit, quæ terga obverterit axi,  
 Restituant : adeo in teneris consuescere multum est.  
 Collibus an plano melius sit ponere vitem,  
 Quære prius : si pinguis agros metabere campi,  
 Densa sere ; in denso non segnior ubere Bacchus.  
 Sin tumultis acclive solum collesque sapinos,  
 Indulge ordinibus ; nec secius omnis in unguem.

Arboribus positis secto via limite quadret.  
 Ut sæpe ingenti bello quum longa cohortes  
 Explicuit legio, et campo stetit agmen aperto, 280  
 Directæque acies, ac late fluctuat omnis  
 Ære renidenti tellus, nec dum horrida miscent  
 Prœlia, sed dubiùs mediis Mars errat in armis:  
 Omnia sint paribus numeris dimensa viarum;  
 Non animum modo uti pascat prospectus inanem,  
 Sed quia non aliter vires dabit omnibus æquas  
 Terra, neque in vacuum poterunt se extendere rami.

Forsitan et, scrobibus quæ sint fastigia, quæras.  
 Ausim vel tenui vitem committere sulco;  
 Altior ac penitus terræ defigitur arbor: 290  
 Æsculus in primis, quæ, quantum vertice ad auras  
 Ætherias, tantum radice in Tartara tendit.  
 Ergo non hiemes illam, non flabra, neque imbres  
 Convellunt; immota manet, multosque nepotes  
 Multa virum volvens durando sæcula vincit.  
 Tum fortis, late ramos et brachia tendens  
 Huc illuc, media ipsa ingentem sustinet umbram.

Neve tibi ad solem vergant vineta cadentem;  
 Neve inter vites corulum sere; neve flagella  
 Summa pete aut summa destringe ex arbore plantas; 300  
 Tantus amor terræ; neu ferro læde retuso  
 Semina; neve oleæ silvestris insere truncos.  
 Nam sæpe incautis pastoribus excidit ignis,  
 Qui, furtim pingui primum sub cortice tectus,  
 Robora comprehendit, frondesque elapsus in altas  
 Ingentem cœlo sonitum dedit; inde secutus  
 Per ramos victor perque alta cacumina regnat,  
 Et totum involvit flammis nemus, et ruit atram  
 Ad cœlum picea crassus caligine nubem:  
 Præsertim si tempestas a vertice silvis 310  
 Incubuit, glomeratque ferens incendia ventus.  
 Hoc ubi, non a stirpe valent, cæsæque reverti

Possunt, atque ima similes revirescere terra :

Infelix superat foliis oleaster amaris.

Nec tibi tam prudens quisquam persuadeat auctor,  
Tellurem borea rigidam spirante moveri.

Rura gelu tum claudit hiems ; nec semine jacto  
Concretam patitur radicem affigere terræ.

Optima vinetis satio, quum vere rubenti  
Candida venit avis, longis invisâ colubris ; 320

Prima vel auctumni sub frigora, quum rapidus Sol  
Nondum hiemem contingit equis, jam præterit æstas.

Ver adeo frondi nemorum, ver utile silvis ;  
Vere tument terræ et genitalia semina poscunt.

Tum pater omnipotens fecundis inibribus Æther  
Conjugis in gremium lætæ descendit, et omnes

Magnus alit, magno commixtus corpore, fetus.

Avia tum resonant avibus virgulta canoris,  
Et Venerem certis repetunt armenta diebus :

Parturit almus ager, zephyrique tepentibus auris 330  
Laxant arva sinus ; superat tener omnibus humor :

Inque novos soles audent se germina tuto  
Credere, nec metuit surgentes pampinus austros,

Aut actum cœlo magnis aquilonibus imbrem :  
Sed trudit gemmas, et frondes explicat omnes.

Non alios prima crescentis origine mundi

Illuxisse dies, aliumve habuisse tenorem

Crediderim : ver illud erat ; ver magnus agebat  
Orbis, et hibernis parcebant flatibus euri,

Quum primæ lucem pecudes hausere, virûmque 340  
Ferreâ progenies duris caput extulit arvis,

Immissæque feræ silvis et sidera cœlo.

Nec res hunc teneræ possent perferre laborem,

Si non tanta quies iret frigusque caloremque

Inter, et exciperet cœli indulgentia terras.

Quod superest, quæcumque premes virgulta per agros,  
Sparge fimo pingui, et multa memor occide terra ;  
Aut lapidem bibulum, aut squalentes infode conchas ;

Inter enim labentur aquæ, tenuisque subibit  
 Halitus, atque animos tollent sata. Jamque reperti, 350  
 Qui saxo super atque ingentis pondere testæ  
 Urgerent : hoc effusos munimen ad imbres ;  
 Hoc, ubi hiulca siti findit canis æstifer arva.

Seminibus positis, superest deducere terram  
 Sæpius ad capita et duros jactare bidentes,  
 Aut presso exercere solum sub vomere, et ipsa  
 Flectere luctantes inter vineta juvencos :  
 Tum leves calamos, et rasæ hastilia virgæ  
 Fraxineasque aptare sudes furcasque bicornes,  
 Viribus eniti quarum, et contemnere ventos 360  
 Assuescant, summasque sequi tabulata per ulmos.

Ac, dum prima novis adolescit frondibus ætas,  
 Parcendum teneris ; et, dum se lætus ad auras  
 Palmes agit, laxis per purum immissus habenis,  
 Ipsa acie nondum falcis tentanda, sed uncis  
 Carpendæ manibus frōndes, interque legendæ.  
 Inde ubi jam validis amplexæ stirpibus ulmos  
 Exierint, tum stringe comas, tum brachia tonde :  
 Ante reformidant ferrum ; tum denique dura  
 Exerce imperia, et ramos compesce fluentes. 370

Texendæ sepes etiam, et pecus omne tenendum,  
 Præcipue dum frons tenera imprudensque laborum :  
 Cui, super indignas hiemes solemque potentem,  
 Silvestres uri assidue capræque sequaces  
 Illudunt, pascuntur oves avidæque juvencæ.  
 Frigora nec tantum cana concreta pruina,  
 Aut gravis incumbens scopulis arentibus æstas,  
 Quantum illi nocuere greges, durique venenum  
 Dentis, et admorso signata in stirpe cicatrix.  
 Non aliam ob culpam Baccho caper omnibus aris 380  
 Cæditur, et veteres ineunt proscenia ludi,  
 Præmiaque ingeniis pagos et compita circum  
 Thesidæ posuere ; atque inter pocula læti  
 Mollibus in pratis unctos saluere per utres.

Nec non Ausonii, Troja gens missa, coloni  
 Versibus incomtis ludunt risuque soluto,  
 Oraque corticibus sumunt horrenda cavatis ;  
 Et te, Bacche, vocant per carmina læta, tibi que  
 Oscilla ex alta suspendunt mollia pinu.

Hinc omnis largo pubescit vinea fetu ;  
 Complentur vallesque cavæ saltusque profundi,  
 Et quocumque deus circum caput egit honestum.  
 Ergo rite suum Baccho dicemus honorem  
 Carminibus patriis, lancesque et liba feremus ;  
 Et ductus cornu stabit sacer hircus ad aram,  
 Pinguiaque in veribus torrebimus exta columnis.

390

Est etiam ille labor curandis vitibus alter,  
 Cui nunquam exhausti satis est : namque omne quotannis  
 Terque quaterque solum scindendum, glebaque versis  
 Æternum frangenda bidentibus ; omne levandum  
 Fronde nemus ; redit agricolis labor actus in orbem,  
 Atque in se sua per vestigia volvitur annus.

400

Ac jam olim, seras posuit quum vinea frondes,  
 Frigidus et silvis aquilo decussit honorem ;  
 Jam tum acer curas venientem extendit in annum  
 Rusticus, et curvo Saturni dente relictam  
 Persequitur vitem attondens, fingitque putando.  
 Primus humum fodito, primus devecta cremato  
 Sarmenta, et vallos primus sub tecta referto ;  
 Postremus metito. Bis vitibus ingruit umbra ;  
 Bis segetem densis obducunt sentibus herbæ ;  
 Durus uterque labor. Laudato ingentia rura,  
 Exiguum colito. Nec non etiam aspera rusci  
 Vimina per silvam, et ripis fluvialis arundo  
 Cæditur, incultique exercet cura salicti.

410

Jam vinctæ vites, jam falcem arbusta reponunt,  
 Jam canit extremos effectus vinitor antes :  
 Sollicitanda tamen tellus, pulvisque movendus ;  
 Et jam maturis metuendus Jupiter uvis.

Contra non ulla est oleis cultura, neque illæ

420



Procurvam expectant falcem rastrosque tenaces,  
 Quum semel hæserunt arvis aurasque tulerunt.  
 Ipsa satis tellus, quum dente recluditur unco,  
 Sufficit humorem, et gravidas, cum vomere, fruges.  
 Hoc pinguem et placitam Paci nutritor olivam.

Poma quoque, ut primum truncos sensere valentes  
 Et vires habuere suas, ad sidera raptim  
 Vi propria nituntur, opisque haud indiga nostræ.  
 Nec minus interea fetu nemus omne gravescit,  
 Sanguineisque inculta rubent aviaria baccis ;  
 Tondentur cytisi, tædas silva alta ministrat,  
 Pascunturque ignes nocturni et lumina fundunt :

430

Et dubitant homines serere atque impendere curam ?  
 Quid majora sequar ? salices humilesque genestæ,  
 Aut illæ pecori frondem aut pastoribus umbras  
 Sufficiunt, sepemque satis, et pabula melli.  
 Et juvat undantem buxo spectare Cytorum,  
 Naryciæque picis lucos ; juvat arva videre  
 Non rastris, hominum non ulli obnoxia curæ.

Ipsæ Caucasio steriles in vertice silvæ,  
 Quas animosi euri assidue franguntque feruntque,  
 Dant alios aliæ fetus : dant utile lignum  
 Navigiis pinos, domibus cedrumque cupressosque.  
 Hinc radios trivere rotis, hinc tympana plaustri  
 Agricolæ, et pandas ratibus posuere carinas :

440

Viminibus salices fecundæ, frondibus ulmi,  
 At myrtus validis hastilibus, et bona bello  
 Cornus ; Ituræos taxi torquentur in arcus.  
 Nec tiliæ leves aut torno rasile buxum

Non formam accipiunt ferroque cavantur acuto.  
 Nec non et torrentem undam levis innatat alnus,  
 Missa Pado ; nec non et apes examina condunt  
 Corticibusque cavis vitiosæque ilicis alveo.

450

Quid memorandum æque Baccheia dona tulerunt ?  
 Bacchus et ad culpam causas dedit ; ille furentes

Centauros leto domuit, Rhætumque Pholumque  
Et magno Hylæum Lapithis cratere minantem.

O fortunatos nimium, sua si bona norint,  
Agrícolas, quibus ipsa, procul discordibus armis,  
Fundit humo facilem victum justissima tellus !

460

Si non ingentem foribus domus alta superbis  
Mane salutantum totis vomit ædibus undam ;

Nec varios inhiant pulchra testudine postes,

Illusaque auro vestes, Ephyreïaque æra ;

Alba neque Assyrio fucatur lana veneno,

Nec casia liquidi corrumpitur usus olivi :

At secura quies et nescia fallere vita

Dives opum variarum ; at latis otia fundis

Speluncæ vivique lacus ; at frigida Tempe

Mugitusque boum mollesque sub arbore somni

470

Non absunt ; illic saltus ac lustra ferarum ;

Et patiens operum exiguoque assueta juvenus ;

Sacra deûm, sanctique patres ; extrema per illos

Justitia excedens terris vestigia fecit.

Me vero primum dulces ante omnia Musæ,

Quarum sacra fero ingenti percussus amore,

Accipiant, cœlique vias et sidera monstrent ;

Defectus solis varios, lunæque labores ;

Unde tremor terris ; qua vi maria alta tumescant,

Objicibus ruptis, rursusque in se ipsa residant ;

480

Quid tantum oceano properent se tingere soles

Hiberni, vel quæ tardis mora noctibus obstet.

Sin, has ne possim naturæ accedere partes,

Frigidus obstiterit circum præcordia sanguis :

Rura mihi et rigui placeant in vallibus amnes ;

Flumina amem silvasque inglorius. O, ubi campi

Spercheosque, et virginibus bacchata Lacœnis

Taygeta ! o, qui me gelidis in vallibus Hæmi

Sistat, et ingenti ramorum protegat umbra !

Felix, qui potuit rerum cognoscere causas,

490

Atque metus omnes et inexorabile fatum  
 Subjecit pedibus strepitumque Acherontis avari !  
 Fortunatus et ille, deos qui novit agrestes  
 Panaque Silvanumque senem Nymphasque sorores !  
 Illum non populi fascēs, non purpura regum  
 Flexit, et infidos agitans discordia fratres ;  
 Aut conjurato descendens Dacus ab Histro ;  
 Non res Romanæ perituraque regna ; neque ille  
 Aut doluit miserans inopem aut invidit habenti.  
 Quos rami fructus, quos ipsa volentia rura  
 Sponte tulere sua, carpsit ; nec ferrea jura  
 Insanumque forum aut populi tabularia vidit.  
 Sollicitant alii remis freta cæca, ruuntque  
 In ferrum, penetrant aulas et limina regum ;  
 Hic petit excidiis urbem miserosque penates,  
 Ut gemma bibat, et Sarrano dormiat ostro ;  
 Condit opes alius, defossoque incubat auro ;  
 Hic stupet attonitus rostris ; hunc plausus hiantem  
 Per cuneos geminatus enim plebisque patrumque  
 Corripuit ; gaudent perfusi sanguine fratrum,  
 Exsilioque domos et dulcia limina mutant,  
 Atque alio patriam quærunt sub sole jacentem.  
 Agricola incurvo terram dimovit aratro :  
 Hinc anni labor ; hinc patriam parvosque nepotes  
 Sustinet ; hinc armenta boum meritosque juvencos.  
 Nec requies, quin aut pomis exuberet annus,  
 Aut fetu pecorum, aut Cerealis mergite culmi,  
 Proventuque oneret sulcos, atque horrea vincat.  
 Venit hiems : teritur Sicyonia bacca trapetis ;  
 Glande sues læti redeunt ; dant arbuta silvæ ;  
 Et varios ponit fetus auctumnus, et alte  
 Mitis in apricis coquitur vindemia saxis.  
 Interea dulces pendent circum oscula nati ;  
 Casta pudicitiam servat domus ; ubera vaccæ  
 Lactea demittunt : pinguesque in gramine læto  
 Inter se adversis luctantur cornibus hædi.

Ipsæ dies agitat festos ; fususque per herbam,  
Ignis ubi in medio, et socii cratera coronant,  
Te libans, Lenæe, vocat ; pecorisque magistris  
Velocis jaculi certamina ponit in ulmo,  
Corporaque agresti nudant prædura palæstra.  
Hanc olim veteres vitam coluere Sabini ;  
Hanc Remus et frater ; sic fortis Etruria crevit ;  
Scilicet et rerum facta est pulcherrima Roma,  
Septemque una sibi muro circumdedit arces.  
Ante etiam sceptrum Dictæi regis, et ante  
Impia quam cæsis gens est epulata juvencis,  
Aureus hanc vitam in terris Saturnus agebat.  
Necdum etiam audierant inflari classica, necdum  
Impositos duris crepitare incudibus enses.

530

540

Sed nos immensum spatiis confecimus æquor,  
Et jam tempus equum fumantia solvere colla.

P. VIRGILII MARONIS

G E O R G I C O N

LIBER TERTIUS.



TE quoque, magna Pales, et te memorande canemus  
Pastor ab Amphryso ; vos, silvæ amnesque Lycæi.  
Cetera, quæ vacuas tenuissent carmine mentes,  
Omnia jam vulgata. Quis aut Eurysthea durum,  
Aut illaudati nescit Busiridis aras ?  
Cui non dictus Hylas puer, et Latonia Delos,  
Hippodameque, humeroque Pelops insignis eburno,  
Acer equis ? Tentanda via est, qua me quoque possim  
Tollere humo, victorque virûm volitare per ora.  
Primus ego in patriam mecum, modo vita supersit, 10  
Aonio rediens deducam vertice Musas ;  
Primus Idumæas referam tibi, Mantua, palmas ;  
Et viridi in campo templum de marmore ponam  
Propter aquam, tardis ingens ubi flexibus errat  
Mincius et tenera prætexit arundine ripas.  
In medio mihi Cæsar erit, templumque tenebit.  
Illi victor ego et Tyrio conspectus in ostro  
Centum quadrijugos agitabo ad flumina currus.  
Cuncta mihi, Alpheum linquens lucosque Molorchi,  
Cursibus et crudo decernet Græcia cestu : 20  
Ipse, caput tonsæ foliis ornatus olivæ,  
Dona feram. Jam nunc solemnes ducere pompas  
Ad delubra jurat, cæsosque videre juvencos ;  
Vel scena ut versis discedat frontibus, utque  
Purpurea intexti tollant aulæa Britanni.  
In foribus pugnam ex auro solidoque elephanto

Gangaridum faciam, victorisque arma Quirini ;  
 Atque hic undantem bello magnumque fluentem  
 Nilum, ac navali surgentes ære columnas.  
 Addam urbes Asiæ domitas pulsumque Niphaten, 30  
 Fidentemque fuga Parthum versisque sagittis,  
 Et duo rapta manu diverso ex hoste tropæa,  
 Bisque triumphatas utroque ab litore gentes.  
 Stabunt et Parii lapides, spirantia signa,  
 Assaraci proles, demissæque ab Jove gentis  
 Nomina, Trosque parens, et Trojæ Cynthius auctor.  
 Invidia infelix Furias annemque severum  
 Cocyti metuet, tortosque Ixionis angues,  
 Immanemque rotam, et non exsuperabile saxum.  
 Interea Dryadum silvas saltusque sequamur 40  
 Intactos, tua, Mæcenas, haud mollia jussa :  
 Te sine nil altum mens inchoat. En age, segnes  
 Rumpe moras ; vocat ingenti clamore Cithæron,  
 Taygetique canes, domitrixque Epidaurus equorum ;  
 Et vox assensu nemorum ingeminata remugit.  
 Mox tamen ardentes accingar dicere pugnas  
 Cæsar, et nomen fama tot ferre per annos,  
 Tithoni prima quot abest ab origine Cæsar.  
 Seu quis, Olympiæ miratus præmia palmæ,  
 Pascit equos, seu quis fortes ad aratra juvencos ; 50  
 Corpora præcipue matrum legat. Optima torvæ  
 Forma bovis, cui turpe caput, cui plurima cervix,  
 Et crurum tenuis a mento palearia pendent ;  
 Tum longo nullus lateri modus ; omnia magna ;  
 Pes etiam, et camuris hirtæ sub cornibus aures.  
 Nec mihi displiceat maculis insignis et albo,  
 Aut juga detrectans, interdumque aspera cornu,  
 Et faciem tauro propior ; quæque ardua tota,  
 Et gradiens ima verrit vestigia cauda.  
 Ætas Lucinam justosque pati hymenæos 60  
 Desinit ante decem, post quatuor incipit annos ;  
 Cetera nec feturæ habilis, nec fortis aratris.

Interea, superat gregibus dum læta juventas,  
Solve mares ; mitte in Venerem pecuaria primus,  
Atque aliam ex alia generando suffice prolem.  
Optima quæque dies miseris mortalibus ævi  
Prima fugit ; subeunt morbi tristisque senectus ;  
Et labor et duræ rapit inclementia mortis.  
Semper erunt, quarum mutari corpora malis ;  
Semper enim refice, ac, ne post amissa requiras,  
Anteveni, et subolem armento sortire quotannis.

70

Nec non et pecori est idem dilectus equino.  
Tu modo, quos in spem statues submittere gentis,  
Præcipuum jam inde a teneris impende laborem.  
Continuo pecoris generosi pullus in arvis  
Altius ingreditur, et mollia crura reponit.  
Primus et ire viam, et fluvios tentare minaces  
Audet, et ignoto sese committere ponti,  
Nec vanos horret strepitus. Illi ardua cervix,  
Argutumque caput, brevis alvus, obesaque terga ;  
Luxuriatque toris animosum pectus. Honesti  
Spadices, glaucique ; color deterimus albis  
Et gilvo. Tum, si qua sonum procul arma dedere,  
Stare loco nescit, micat auribus, et tremit artus,  
Collectumque fremens volvit sub naribus ignem.  
Densa juba, et dextro jactata recumbit in armo :  
At duplex agitur per lumbos spina ; cavatque  
Tellurem et solido graviter sonat ungula cornu.  
Talis Amyclæi domitus Pollucis habenis  
Cyllarus, et quorum Graii meminere poëtæ,  
Martis equi bijuges, et magni currus Achilli :  
Talis et ipse jubam cervice effudit equina  
Conjugis adventu pernix Saturnus, et altum  
Pelion hinnitu fugiens implevit acuto.

80

90

Hunc quoque, ubi aut morbo gravis aut jam segnior annis  
Deficit, abde domo, nec turpi ignosce senectæ.  
Frigidus in Venerem senior, frustra que laborem  
Ingratum trahit ; et, si quando ad prælia ventum est,

Ut quondam in stipulis magnus sine viribus ignis,  
 Incassum furit. Ergo animos ævumque notabis 100  
 Præcipue ; hinc alias artes, prolemque parentum,  
 Et quis cuique dolor victo, quæ gloria palinæ.  
 Nonne vides, quum præcipiti certamine campum  
 Corripuere, ruuntque effusi carcere currus,  
 Quum spes arrectæ juvenum, exsultantiaque haurit  
 Corda pavor pulsans ; illi instant verbere torto,  
 Et proni dant lora ; volat vi fervidus axis ;  
 Jamque humiles, jamque elati sublime videntur  
 Aëra per vacuum ferri, atque assurgere in auras ;  
 Nec mora, nec requies ; at fulvæ nimbus arenæ 110  
 Tollitur ; humescunt spumis flatuque sequentum :  
 Tantus amor laudum, tantæ est victoria curæ.  
 Primus Erichthonius currus et quatuor ausus  
 Jungere equos, rapidusque rotis insistere victor.  
 Frena Pelethronii Lapithæ gyrosque dedere  
 Impositi dorso, atque equitem docuere sub armis  
 Insultare solo, et gressus glomerare superbos.  
 Æquus uterque labor ; æque juvenemque magistri  
 Exquirunt calidumque animis et cursibus acrem ;  
 Quamvis sæpe fuga versos ille egerit hostes, 120  
 Et patriam Epirum referat fortesque Mycenæ,  
 Neptunique ipsa deducat origine gentem.

His animadversis instant sub tempus, et omnes  
 Impendunt curas denso distendere pingui,  
 Quem legere ducem, et pecori dixere maritum ;  
 Pubentesque secant herbas, fluviosque ministrant.  
 Farraque, ne blando nequeat superesse labori,  
 Invalidique patrum referant jejunia nati.  
 Ipsa autem macie tenuant armenta volentes,  
 Atque, ubi concubitus primos jam nota voluptas 130  
 Sollicitat, frondesque negant et fontibus arcent.  
 Sæpe etiam cursu quatiunt, et sole fatigant,  
 Quum graviter tunsis gemit area frugibus, et quum  
 Surgentem ad zephyrum paleæ jactantur inanes



Hoc faciunt, nimio ne luxu obtusior usus  
 Sit genitali arvo, et sulcos oblimet inertes ;  
 Sed rapiat sitiens Venerem, interiusque recondat.

Rursus cura patrum cadere, et succedere matrum  
 Incipit. Exactis gravidæ quum mensibus errant,  
 Non illas gravibus quisquam juga ducere plaustris, 140  
 Non saltu superare viam sit passus, et acri  
 Carpere prata fuga, fluviosque innare rapaces :  
 Saltibus in vacuis pascant, et plena secundum  
 Flumina, muscus ubi et viridissima gramine ripa,  
 Speluncæque tegant, et saxea procubet umbra.  
 Est lucos Silari circa ilicibusque virentem  
 Plurimus Alburnum volitans, cui nomen asilo  
 Romanum est, œstrum Graii vertere vocantes ;  
 Asper, acerba sonans ; quo tota exterrita silvis  
 Diffugiunt armenta, furit mugitibus æther 150  
 Concussus, silvæque et sicci ripa Tanagri.  
 Hoc quondam monstro horribiles exercuit iras  
 Inachiae Juno pestem meditata juvencæ.  
 Hunc quoque, nam mediis fervoribus acrior instat,  
 Arcebis grvido pecori, armentaque pasces,  
 Sole recens orto, aut noctem ducentibus astris.

Post partum cura in vitulos traducitur omnis :  
 Continuoque notas et nomina gentis inurunt,  
 Et quos aut pecori malint submittere habendo,  
 Aut aris servare sacros, aut scindere terram, 160  
 Et campum horrentem fractis invertere glebis :  
 Cetera pascuntur virides armenta per herbas.  
 Tu quos ad studium atque usum formabis agrestem,  
 Jam vitulos hortare, viamque insiste domandi,  
 Dum faciles animi juvenum, dum mobilis ætas.  
 Ac primum laxos tenui de vimine circlos  
 Cervici subnecte ; dehinc, ubi libera colla  
 Servitio assuerint, ipsis e torquibus aptos  
 Junge pares, et coge gradum conferre juvencos ;  
 Atque illis jam sæpe rotæ ducantur inanes 170

Per terram, et summo vestigia pulvere signent :  
 Post valido nitens sub pondere faginus axis  
 Instrepat, et junctos temo trahat æreus orbes.  
 Interea pubi indomitæ non gramina tantum,  
 Nec vescas salicum frondes ulvamque palustrem,  
 Sed frumenta manu carpes sata. Nec tibi fetæ,  
 More patrum, nivea implebunt mulctraria vaccæ,  
 Sed tota in dulces consument ubera natos.

Sin ad bella magis studium turmasque feroces,  
 Aut Alphea rotis prælabi flumina Pisæ,  
 Et Jovis in luco currus agitare volantes ;  
 Primus equi labor est animos atque arma videre  
 Bellantum, litnosque pati, tractuque gementem  
 Ferre rotam, et stabulo frenos audire sonantes ;  
 Tum magis atque magis blandis gaudere magistri  
 Laudibus, et plausæ sonitum cervicis amare.  
 Atque hæc jam primo depulsus ab ubere matris  
 Audeat, inque vicem det mollibus ora capistris  
 Invalidus, etiamque tremens, etiam inscius ævi.  
 At tribus exactis, ubi quarta accesserit æstas,  
 Carpere mox gyrum incipiat, gradibusque sonare  
 Compositis, sinuetque alterna volumina crurum,  
 Sitque laboranti similis ; tum cursibus auras,  
 Tum vocet, ac per aperta volans, ceu liber habenis,  
 Æquora, vix summa vestigia ponat arena :  
 Qualis hyperboreis aquilo quum densus ab oris  
 Incubuit, Scythiæque hiemes atque arida differt  
 Nubila : tum segetes altæ campique natantes  
 Lenibus horrescunt flabris, summæque sonorem  
 Dant silvæ, longique urgent ad litora fluctus ;  
 Ille volat, simul arva fuga simul æquora verrens.  
 Hic vel ad Eleï metas et maxima campi  
 Sudabit spatia, et spumas aget ore cruentas ;  
 Belgica vel molli melius feret esseda collo.  
 Tum demum crassa magnum farragine corpus  
 Crescere jam domitis sinito ; namque ante domandum

180

190

200

Ingentes tollent animos, prensique negabunt  
Verbera lenta pati et duris parere lupatis.

Sed non ulla magis vires industria firmat,  
Quam Venerem et cæci stimulos avertere amoris, 210  
Sive boum sive est cui gratior usus equorum.  
Atque ideo tauros procul atque in sola relegant  
Pascua, post montem oppositum et trans flumina lata,  
Aut intus clausos satura ad præsepia servant.  
Carpit enim vires paulatim uritque videndo  
Femina ; nec nemorum patitur ineminisse, nec herbæ.  
Dulcibus illa quidem illecebris et sæpe superbos  
Cornibus inter se subigit decernere amantes.  
Pascitur in magna Sila formosa juvenca :  
Illi alternantes multa vi prælia miscent 220  
Vulneribus crebris ; lavit ater corpora sanguis,  
Versaque in obnixos urgentur cornua vasto  
Cum gemitu ; reboant silvæque et longus Olympus.  
Nec mos bellantes una stabulare ; sed alter  
Victus abit, longeque ignotis exsulat oris ;  
Multa gemens ignominiam plagasque superbi  
Victoris, tum, quos amisit inultus, amores,  
Et stabula aspectans regnis excessit avitis.  
Ergo omni cura vires exercet, et inter  
Dura jacet pernox instrato saxa cubili, 230  
Frondebis hirsutis et carice pastus acuta ;  
Et tentat sese, atque irasci in cornua discit,  
Arboris obnixus trunco, ventosque lacessit  
Ictibus, et sparsa ad pugnam proludit arena.  
Post, ubi collectum robur viresque reffectæ,  
Signa movet, præcepsque oblitum fertur in hostem :  
Fluctus uti medio cœpit quum albescere ponto,  
Longius ex altoque sinum trahit ; utque, volutus  
Ad terras, immane sonat per saxa, neque ipso  
Monte minor procumbit ; at ima exæstuat unda 240  
Verticibus, nigramque alte subjectat arenam.

Omne adeo genus in terris hominumque ferarumque.

Et genus æquoreum, pecudes, pictæque volucres,  
 In furias ignemque ruunt; amor omnibus idem.  
 Tempore non alio catulorum oblita læna  
 Sævior erravit campis; nec funera vulgo  
 Tam multa informes ursi stragemque dedere  
 Per silvas: tum sævus aper, tum pessima tigris;  
 Heu! male tum Libyæ solis erratur in agris.  
 Nonne vides, ut tota tremor portentet equorum 250  
 Corpora, si tantum notas odor attulit auras?  
 Ac neque eos jam frena virum, neque verbera sæva,  
 Non scopuli rupesque cavæ, atque objecta retardant  
 Flumina, correptos unda torquentia montes.  
 Ipse ruit dentesque Sabellicus exacuit sus,  
 Et pede prosubigit terram, fricat arbore costas,  
 Atque hinc atque illinc humerosque ad vulnera durat.  
 Quid juvenis, magnum cui versat in ossibus ignem  
 Durus amor? Nempe abruptis turbata procellis  
 Nocte natat cæca serus freta; quem super ingens 260  
 Porta tonat cœli, et scopulis illisa reclamant  
 Æquora; nec miseri possunt revocare parentes,  
 Nec moritura super crudeli funere virgo.  
 Quid lynces Bacchi variæ, et genus acre luporum  
 Atque canum? quid, quæ imbelles dant prælia cervi?  
 Scilicet ante omnes furor est insignis equarum;  
 Et mentem Venus ipsa dedit, quo tempore Glauci  
 Potniades malis membra absumsere quadrigæ.  
 Illas ducit amor trans Gargara, transque sonantem  
 Ascanium; superant montes, et flumina tranant. 270  
 Continuoque, avidis ubi subdita flamma medullis,  
 Vere magis, quia vere calor redit ossibus, illæ  
 Ore omnes versæ in zephyrum stant rupibus altis,  
 Exceptantque leves auras; et sæpe sine ullis  
 Conjugiis vento gravidæ, mirabile dictu,  
 Saxa per et scopulos et depressas convalles  
 Diffugiunt, non, Eure, tuos, neque Solis ad ortus,  
 In Boream Caurumque, aut unde nigerrimus Auster

Nascitur, et pluvio contristat frigore cœlum.  
 Hic demum, hippomanes vero quod nomine dicunt 280  
 Pastores, lentum destillat ab inguine virus,  
 Hippomanes, quod sæpe malæ legere novercæ,  
 Miscueruntque herbas et non innoxia verba.

Sed fugit interea, fugit irreparabile tempus,  
 Singula dum capti circumvectamur amore.  
 Hoc satis armentis; superat pars altera curæ,  
 Lanigeros agitare greges hirtasque capellas.  
 Hic labor; hinc laudem fortes sperate coloni.  
 Nec sum animi dubius, verbis ea vincere magnum  
 Quam sit, et angustis hunc addere rebus honorem. 290  
 Sed me Parnasi deserta per ardua dulcis  
 Raptat amor; juvat ire jugis, qua nulla priorum  
 Castaliam molli devertitur orbita clivo.

Nunc, veneranda Pales, magno nunc ore sonandum.  
 Incipiens stabulis edico in mollibus herbam  
 Carpere oves, dum mox frondosa reducitur æstas;  
 Et multa duram stipula filicumque manipulis  
 Sternere subter humum, glaciesne frigida lædat  
 Molle pecus, scabiemque ferat turpesque podagras.  
 Post hinc digressus jubeo frondentia capris 300  
 Arbuta sufficere, et fluvios præbere recentes:  
 Et stabula a ventis hiberno opponere soli  
 Ad medium conversa diem, quum frigidus olim  
 Jam cadit extremoque irrorat Aquarius anno.  
 Hæ quoque non cura nobis levioze tuendæ;  
 Nec minor usus erit; quamvis Milesia magno  
 Vellera mutantur Tyrios incocta rubres.  
 Densior hinc suboles, hinc largi copia lactis:  
 Quam magis exhausto spumaverit ubere mulctra;  
 Læta magis pressis manabunt flumina mammis. 310  
 Nec minus interea barbas incanaque menta  
 Cinyphii tondent hirci sætasque comantes  
 Usum in castrorum, et miseris velamina nautis.  
 Pascuntur vero silvas et summa Lycæi,

Horrentesque rubos, et amantes ardua dumos:  
 Atque ipsæ memores redeunt in tecta, suosque  
 Ducunt, et gravido superant vix ubere limen.  
 Ergo omni studio glaciem ventosque nivales,  
 Quo minor est illis curæ mortalis egestas,  
 Avertes, victumque feres et virgea lætus  
 Pabula; nec tota claudes fœnilia bruma. 320  
 At vero, zephyris quum læta vocantibus æstas  
 In saltus utrumque gregem atque in pascua mittet,  
 Luciferi primo cum sidere frigida rura  
 Carpamus, dum mane novum, dum gramina canent,  
 Et ros in tenera pecori gratissimus herba.  
 Inde, ubi quarta sitim cœli collegerit hora,  
 Et cantu querulæ rumpent arbusta cicadæ,  
 Ad puteos aut alta greges ad stagna jubeto  
 Currentem ilignis potare canalibus undam: 330  
 Æstibus at mediis umbrosam exquirere vallem,  
 Sicubi magna Jovis antiquo robore quercus  
 Ingentes tendat ramos; aut sicubi nigrum  
 Illicibus crebris sacra nemus accubet umbra.  
 Tum tenues dare rursus aquas, et pascere rursus  
 Solis ad occasum, quum frigidus aëra vesper  
 Temperat, et saltus reficit jam roscida luna,  
 Litoraue alcyonen resonant, acalanthida dumi.  
 Quid tibi pastores Libyæ, quid pascua versu  
 Prosequar, et raris habitata mapalia tectis? 340  
 Sæpe diem noctemque, et totum ex ordine mensem  
 Pascitur itque pecus longa in deserta sine ullis  
 Hospitiis: tantum campi jacet. Omnia secum  
 Armentarius Afer agit, tectumque Laremque  
 Armaque Amyclæumque canem Cressamque pharetram:  
 Non secus ac patriis acer Romanus in armis  
 Injusto sub fasce viam quum carpit, et hosti  
 Ante expectatum positus stat in agmine castris.  
 At non, qua Scythiæ gentes Mæotiaque unda,  
 Turbidus et torquens flaventes Hister arenas, 350

Quaque redit medium Rhodope porrecta sub axem.  
 Illic clausa tenent stabulis armenta; neque ullæ  
 Aut herbæ campo apparent aut arbore frondes;  
 Sed jacet aggeribus niveis informis et alto  
 Terra gelu late, septemque assurgit in ulnas:  
 Semper hiems, semper spirantes frigora Cauri.  
 Tum Sol pallentes haud unquam discutit umbras:  
 Nec quum invectus equis altum petit æthera; nec quum  
 Præcipitem oceani rubro lavit æquore currum.  
 Concrescunt subitæ currenti in flumine crustæ, 360  
 Undaque jam tergo ferratos sustinet orbes,  
 Puppibus illa prius, patulis nunc hospita plaustris.  
 Æraque dissiliunt vulgo, vestesque rigescunt  
 Indutæ, cæduntque securibus humida vina,  
 Et totæ solidam in glaciem vertere lacunæ,  
 Stiriæque impexis induruit horrida barbis.  
 Interea toto non secius aëre ningit;  
 Intereunt pecudes, stant circumfusa pruinis  
 Corpora magna boum, confertoque agmine cervi  
 Torpent mole nova, et summis vix cornibus exstant. 370  
 Hos non immissis canibus, non cassibus ullis,  
 Puniceæve agitant pavidos formidine pinnae:  
 Sed frustra oppositum trudentes pectore montem  
 Cominus obtruncant ferro, graviterque rudentes  
 Cædunt, et magno læti clamore reportant.  
 Ipsi in defossis specubus securo sub alta  
 Otia agunt terræ, congestaque robora totasque  
 Advolvere focis ulmos, ignique dedere.  
 Hic noctem ludo ducunt, et pocula læti  
 Fermento atque acidis imitantur vitea sorbis. 380  
 Talis hyperboreo septem subjecta trioni  
 Gens effrena virum Rhipæo tunditur euro,  
 Et pecudum fulvis velatur corpora sætis.  
 Si tibi lanitium curæ: primum aspera silva  
 Lappæque tribulique absint; fuge pabula læta;  
 Continuoque greges villis lege mollibus albos.

Illum autem, quamvis aries sit candidus ipse,  
 Nigra subest udo tantum cui lingua palato,  
 Rejice, ne maculis infuscet vellera pullis  
 Nascentum ; plenoque alium circumspice campo. 390  
 Munere sic niveo lanæ, si credere dignum est,  
 Pan deus Arcadiæ captam te, Luna, fecellit,  
 In nemora alta vocans ; nec tu aspernata vocantem.

At cui lactis amor, cytisum lotosque frequentes  
 Ipse manu salsasque ferat præsepibus herbas.  
 Hinc et amant fluvios magis, ac magis ubera tendunt,  
 Et salis occultum referunt in lacte saporem.  
 Multi jam excretos prohibent a matribus hædos,  
 Primaque ferratis præfigunt ora capistris. 400  
 Quod surgente die mulserè horisque diurnis,  
 Nocte premunt ; quod jam tenebris et sole cadente,  
 Sub lucem exportans calathis adit oppida pastor ;  
 Aut parco sale contingunt, hiemique reponunt.

Nec tibi cura canum fuerit postrema : sed una  
 Veloces Spartæ catulos acremque Molossum  
 Pasce sero pingui. Nunquam custodibus illis  
 Nocturnum stabulis furem incursusque luporum,  
 Aut impacatos a tergo horrebis Hiberos.  
 Sæpe etiam cursu timidos agitabis onagros,  
 Et canibus leporem, canibus venabere damas : 410  
 Sæpe volutabris pulsos silvestribus apros  
 Latratu turbabis agens, montesque per altos  
 Ingentem clamore premes ad retia cervum.

Disce et odoratam stabulis accendere cedrum,  
 Galbancoque agitare graves nidore chelydros.  
 Sæpe sub immotis præsepibus aut mala tactu  
 Vipera delituit, cœlumque exterrita fugit ;  
 Aut tecto assuetus coluber succedere et umbræ,  
 Pestis acerba boum, pecorique aspergere virus,  
 Fovit humum. Cape saxa manu, cape robora, pastor, 420  
 Tollentemque minas et sibila colla tumentem  
 Dejice ; jamque fuga timidum caput abdidit alte,



Quum medii nexus extremæque agmina caudæ  
 Solvuntur, tardosque trahit sinus ultimus orbes.  
 Est etiam ille malus Calabris in saltibus anguis,  
 Squamea convolvens sublato pectore terga,  
 Atque notis longam maculosus grandibus alvum,  
 Qui, dum amnes ulli rumpuntur fontibus, et dum  
 Vere madent udo terræ ac pluvialibus austris,  
 Stagna colit; ripisque habitans, hic piscibus atram 430  
 Improbus ingluviem ranisque loquacibus explet:  
 Postquam exusta palus, terræque ardore dehiscunt,  
 Exsilit in siccum, et flammantia lumina torquens  
 Sæviti agris, asperque siti atque exterritus æstu.  
 Ne mihi tum molles sub divo carpere somnos,  
 Neu dorso nemoris libeat jacuisse per herbas,  
 Quum positis novus exuviis nitidusque juvena  
 Volvitur, aut catulos tectis aut ova relinquens,  
 Arduus ad solem, et linguis micat ore trisulcis.

Morborum quoque te causas et signa docebo. 440  
 Turpis oves tentat scabies, ubi frigidus imber  
 Altius ad vivum persedit et horrida cano  
 Bruma gelu; vel quum tonsis illotus adhæsit  
 Sudor, et hirsuti secuerunt corpora vepres.  
 Dulcibus idcirco fluviis pecus omne magistri  
 Perfundunt, udisque aries in gurgite villis  
 Mersatur, missusque secundo defluit amni;  
 Aut tonsum tristi contingunt corpus amurca,  
 Et spumas miscent argenti, vivaque sulfura, 450  
 Idæasque pices, et pingues unguine ceras,  
 Scillamque, elleborosque graves, nigrumque bitumen.  
 Non tamen ulla magis præsens fortuna laborum est,  
 Quam si quis ferro potuit rescindere summum  
 Ulceris os. Alitur vitium vivitque tegendo,  
 Dum medicas adhibere manus ad vulnera pastor  
 Abnegat, aut meliora deos sedet omina poscens.  
 Quin etiam, ima dolor balantum lapsus ad ossa  
 Quum furit, atque artus depascitur arida febris,

Profuit incensos æstus avertere, et inter  
Ima ferire pedis salientem sanguine venam; 460  
Bisaltæ quo more solent, acerque Gelonus,  
Quum fugit in Rhodopen, atque in deserta Getarum,  
Et lac concretum cum sanguine potat equino.

Quam procul aut molli succedere sæpius umbræ  
Videris, aut summas carpentem ignavius herbas,  
Extremamque sequi, aut medio procumbere campo  
Pascentem, et seræ solam decedere nocti:  
Continuo culpam ferro compesce, prius quam  
Dira per incautum serpent contagia vulgus.  
Non tam creber agens hiemem ruit æquore turbo, 470  
Quam multæ pecudum pestes: nec singula morbi  
Corpora corripunt, sed tota æstiva repente,  
Spemque gregemque simul, cunctamque ab origine gentem.  
Tum sciat, aërias Alpes et Norica si quis  
Castella in tumulis, et Iapydis arva Timavi,  
Nunc quoque post tanto videat, desertaque regna  
Pastorum, et longe saltus lateque vacantes.

Hic quondam morbo cœli miseranda coorta est  
Tempestas, totoque auctumni incanduit æstu,  
Et genus omne neci pecudum dedit, omne ferarum; 480  
Corruptique lacus; infecit pabula tabo.  
Nec via mortis erat simplex; sed ubi ignea venis  
Omnibus acta sitis miseros adduxerat artus,  
Rursus abundabat fluidus liquor, omniaque in se  
Ossa minutatim morbo collapsa trahebat.  
Sæpe in honore deûm medio stans hostia ad aram,  
Lanea dum nivea circumdatur infula vitta,  
Inter cunctantes cecidit moribunda ministros.  
Aut si quam ferro mactaverat ante sacerdos, 490  
Inde neque impositis ardent altaria fibris,  
Nec responsa potest consultus reddere vates;  
Ac vix suppositi tinguntur sanguine cultri,  
Summaque jejuna sanie infusatur arena.  
Hinc lætis vituli vulgo moriuntur in herbis

Et dulces animas plena ad præsepia reddunt.  
 Hinc canibus blandis rabies venit, et quatit ægros  
 Tussis anghela sues ac faucibus angit obesis.  
 Labitur infelix studiorum atque immemor herbæ,  
 Victor equus, fontesque avertitur, et pede terram  
 Crebra ferit; demissæ aures; incertus ibidem 500  
 Sudor, et ille quidem morituris frigidus; aret  
 Pellis, et ad tactum tractanti dura resistit.  
 Hæc ante exitium primis dant signa diebus.  
 Sin in processu cœpit crudescere morbus:  
 Tum vero ardentes oculi, atque attractus ab alto  
 Spiritus, interdum gemitu gravis; imaque longo  
 Ilia singultu tendunt; it naribus ater  
 Sanguis, et obsessas fauces premit aspera lingua:  
 Profuit inserto latices infundere cornu  
 Lenæos; ea visa salus morientibus una. 510  
 Mox erat hoc ipsum exitio, furiisque relecti  
 Ardebant, ipsique suos, jam morte sub ægra,  
 (Di meliora piis, erroremque hostibus illum!)  
 Discissos nudis laniabant dentibus artus.  
 Ecce autem duro fumans sub vomere taurus  
 Concidit, et mixtum spumis vomit ore cruorem,  
 Extremosque ciet gemitus. It tristis arator,  
 Mærentem abjungens fraterna morte juvencum,  
 Atque opere in medio defixa relinquit aratra.  
 Non umbræ altorum nemorum, non mollia possunt 520  
 Prata movere animum, non qui per saxa volutus  
 Purior electro campum petit amnis: at ima  
 Solvuntur latera, atque oculos stupor urget inertes,  
 Ad terramque fluit devexo pondere cervix.  
 Quid labor aut benefacta juvant? quid vomere terras  
 Invertisse graves? atqui non Massica Bacchi  
 Munera, non illis epulæ nocuere repostæ:  
 Frondibus et victu pascuntur simplicis herbæ;  
 Pocula sunt fontes liquidi atque exercita cursu  
 Flumina; nec somnos abrumpit cura salubres. 530

Tempore non alio dicunt regionibus illis  
Quæsitæ ad sacra boves Junonis, et uris  
Imparibus ductos alta ad donaria currus.  
Ergo ægre rastris terram rimantur, et ipsis  
Unguibus infodiunt fruges, montesque per altos  
Contenta cervice trahunt stridentia plaustra.  
Non lupo insidias explorat ovilia circum,  
Nec gregibus nocturnus obambulat; acrior illum  
Cura domat: timidi damæ cervique fugaces  
Nunc interque canes et circum tecta vagantur. 540  
Jam maris immensi prolem et genus omne natantum,  
Litore in extremo, ceu naufraga corpora, fluctus  
Proluit; insolitæ fugiunt in flumina phocæ.  
Interit et curvis frustra defensa latebris  
Vipera, et attoniti squamis astantibus hydri.  
Ipsis est aer avibus non æquus, et illæ  
Præcipites alta vitam sub nube relinquunt.  
Præterea jam nec mutari pabula refert,  
Quæsitæque nocent artes; cessere magistri,  
Phillyrides Chiron, Amythaoniusque Melampus. 550  
Sævit, et in lucem Stygiis emissa tenebris  
Pallida Tisiphone morbos agit ante metumque,  
Inque dies avidum surgens caput altius effert.  
Balatu pecorum et crebris mugitibus amnes  
Arentesque sonant ripæ collesque supini.  
Jamque catervatim dat stragem, atque aggerat ipsis  
In stabulis turpi dilapsa cadavera tabo,  
Donec humo tegere ac foveis abscondere discunt.  
Nam neque erat coriis usus; nec viscera quisquam  
Aut undis abolere potest aut vincere flamma: 560  
Nec tondere quidem morbo illuvieque peresa  
Vellera, nec telas possunt attingere putres.  
Verum etiam, invisos si quis tentarat amictus,  
Ardentes papulæ atque immundus olentia sudor  
Membra sequebatur, nec longo deinde moranti  
Tempore contactos artus sacer ignis edebat.

P. VIRGILII MARONIS

G E O R G I C O N

LIBER QUARTUS.



PROTENSUS aërii mellis cœlestia dona  
Exsequar : hanc etiam, Mæcenas, aspice partem.  
Admiranda tibi levium spectacula rerum,  
Magnanimosque duces, totiusque ordine gentis  
Mores, et studia, et populos, et prœlia dicam.  
In tenui labor ; at tenuis non gloria, si quem  
Numina læva sinunt, auditque vocatus Apollo.  
Principio sedes apibus statioque petenda,  
Quo neque sit ventis aditus, (nam pabula venti  
Ferre domum prohibent) neque oves hædique petulci 10  
Floribus insultent, aut errans bucula campo  
Decutiat rorem, et surgentes atterat herbas.  
Absint et picti squalentia terga lacerti  
Pinguibus a stabulis, meropesque, aliæque volucres,  
Et manibus Procne pectus signata cruentis.  
Omnia nam late vastant, ipsasque volantes  
Ore ferunt dulcem nidis immitibus escam.  
At liquidi fontes et stagna virentia musco  
Adsint, et tenuis fugiens per gramina rivus,  
Palmaque vestibulum aut ingens oleaster inumbret : 20  
Ut quum prima novi ducent examina reges  
Vere suo, ludetque favis emissa Juventus,  
Vicina invitet decedere ripa calori,  
Obviaque hospitii teneat frondentibus arbos.  
In medium, seu stabit iners, seu profluet humor,

Transversas salices et grandia conjice saxa,  
 Pontibus ut crebris possint consistere, et alas  
 Pandere ad æstivum solem ; si forte morantes  
 Sparserit, aut præceps Neptuno immerserit eurus. 30  
 Hæc circum casiae virides, et olentia late  
 Serpylla, et graviter spirantis copia thymbrae  
 Floreat, irriguumque bibant violaria fontem.  
 Ipsa autem, seu corticibus tibi suta cavatis,  
 Seu lento fuerint alvearia vimine texta,  
 Angustos habeant aditus : nam frigore mella  
 Cogit hiems, eademque calor liquefacta remittit.  
 Utraque vis apibus pariter metuenda ; neque illæ  
 Nequidquam in tectis certatim tenuia cera  
 Spiramenta linunt, fucoque et floribus oras  
 Explent, collectumque hæc ipsa ad munera gluten 40  
 Et visco et Phrygiæ servant pice lentius Idæ.  
 Sæpe etiam effossis, si vera est fama, latebris  
 Sub terra fovere larem, penitusque repertæ  
 Pumicibusque cavis exesæque arboris antro.  
 Tu tamen e levi rimosa cubilia limo  
 Ungue fovens circum, et raras super injice frondes.  
 Neu propius tectis taxum sine ; neve rubentes  
 Ure foco caneros ; altæ neu crede paludi,  
 Aut ubi odor cœni gravis, aut ubi concava pulsu  
 Saxa sonant, vocisque offensa resultat imago. 50  
 Quod superest, ubi pulsam hiemem Sol aureus egit  
 Sub terras, cœlumque æstiva luce reclusit,  
 Illæ continuo saltus silvasque peragrant,  
 Purpureosque metunt flores, et flumina libant  
 Summa leves. Hinc nescio qua dulcedine lætæ  
 Progeniem nidosque foveant ; hinc arte recentes  
 Excudunt ceras, et mella tenacia fingunt.  
 Hinc ubi jam emissum caveis ad sidera cœli  
 Nare per æstatem liquidam suspexeris agmen,  
 Obscuramque trahi vento mirabere nubem, 60  
 Contemplator : aquas dulces et frondea semper

Tecta petunt. Huc tu jussos asperge sapes,  
Trita melisphylla, et cerinthæ ignobile gramen ;  
Tinnitusque cie, et matris quate cymbala circum.  
Ipsæ consident medicatis sedibus ; ipsæ  
Intima more suo sese in cunabula condent.

Sin autem ad pugnam exierint, (nam sæpe duobus  
Regibus incessit magno discordia motu)

Continuoque animos vulgi et trepidantia bello  
Corda licet longe præsciscere : namque morantes  
Martius ille æris rauci canor increpat, et vox  
Auditur fractos sonitus imitata tubarum ;

70

Tum trepidæ inter se coëunt, pennisque coruscant,  
Spiculaque exacuunt rostris, aptantque lacertos,  
Et circa regem atque ipsa ad prætoria densæ  
Miscentur, magnisque vocant clamoribus hostem.

Ergo ubi ver nactæ sudum camposque patentes  
Erumpunt portis, concurritur ; æthere in alto  
Fit sonitus ; magnum mixtæ glomerantur in orbem,  
Præcipitesque cadunt : non densior aëre grando,

80

Nec de concussa tantum pluit ilice glandis :  
Ipsi per medias acies insignibus alis  
Ingentes animos angusto in pectore versant,  
Usque adeo obnixi non cedere, dum gravis aut hos,  
Aut hos versa fuga victor dare terga subegit.

Hi motus animorum atque hæc certamina tanta  
Pulveris exigui jactu compressa quiescunt.

Verum ubi ductores acie revocaveris ambo,  
Deterior qui visus, eum, ne prodigus obsit,  
Dede neci ; melior vacua sine regnet in aula.

90

Alter erit maculis auro squalentibus ardens ;  
Nam duo sunt genera ; hic melior, insignis et ore,  
Et rutilus clarus squamis ; ille horridus alter  
Desidia, latamque trahens inglorius alvum.

Ut binæ regum facies, ita corpora plebis :  
Namque aliæ turpes horrent ; ceu pulvere ab alto  
Quum venit, et sicco terram sputat ore viator

Aridus ; elucent aliaë, et fulgore coruscant  
 Ardentes auro et paribus lita corpora guttis.  
 Hæc potior suboles ; hinc cœli tempore certo 100  
 Dulcia mella premes ; nec tantum dulcia, quantum  
 Et liquida, et durum Bacchi domitura saporem.

At quum incerta volant, cœloque examina ludunt,  
 Contemnuntque favos, et frigida tecta relinquunt,  
 Instabiles animos ludo prohibebis inani :  
 Nec magnus prohibere labor. Tu regibus alas  
 Eripe : non illis quisquam cunctantibus altum  
 Ire iter, aut castris audebit vellere signa.  
 Invitent croceis halantes floribus horti,  
 Et custos furum atque avium cum falce saligna 110  
 Hellespontiaci servet tutela Priapi.  
 Ipse thymum pinosque ferens de montibus altis  
 Tecta serat late circum, cui talia curæ ;  
 Ipse labore manum duro terat ; ipse feraces  
 Figat humo plantas, et amicos irriget imbres.

Atque equidem, extremo ni jam sub fine laborum  
 Vela traham, et terris festinem advertere proram,  
 Forsitan et, pingues hortos quæ cura colendi  
 Ornaret, canerem, biferique rosaria Pæsti ;  
 Quoque modo potis gauderent intuba rivis, 120  
 Et virides apio ripæ, tortusque per herbam  
 Cresceret in ventrem cucumis ; nec sera comantem  
 Narcissum, aut flexi tacuissem vimen acanthi,  
 Pallentesque hederas, et amantes litora myrtos.  
 Namque sub Cēbaliaë memini me turribus arcis,  
 Qua niger humectat flaventia culta Galæsus,  
 Corycium vidisse senem, cui pauca relictī  
 Jugera ruris erant ; nec fertilis illa juvenicis,  
 Nec pecori opportuna seges nec commoda Baccho.  
 Hic rarum tamen in dumis olus albaque circum 130  
 Lilia verbenasque premens vescumque papaver,  
 Regum æquabat opes animis ; seraque revertens  
 Nocte domum dapibus mensas onerabat inemtis.



Primus vere rosam atque auctumno carpere poma,  
 Et, quum tristis hiems etiam nunc frigore saxa  
 Rumperet, et glacie cursus frenaret aquarum,  
 Ille comam mollis jam tondebat hyacinthi,  
 Æstatem increpitans seram zephyrosque morantes.  
 Ergo apibus fetis idem atque examine multo  
 Primus abundare, et spumantia cogere pressis 140  
 Mella favis; illi tiliaë atque uberrima pinus;  
 Quotque in flore novo pomis se fertilis arbos  
 Induerat, totidem auctumno matura tenebat.  
 Ille etiam seras in versum distulit ulmos,  
 Eduramque pirum et spinos jam pruna ferentes,  
 Jamque ministrantem platanum potantibus umbras.  
 Verum hæc ipse equidem, spatiis exclusus iniquis  
 Prætereo, atque aliis post me memoranda relinquo.

Nunc age, naturas apibus quas Jupiter ipse  
 Addidit, expediam, pro qua mercede, canoros 150  
 Curetum sonitus crepitantiaque æra secutæ,  
 Dictæo cœli regem pavere sub antro.  
 Solæ communes natos, consortia tecta  
 Urbis habent, magnisque agitant sub legibus ævum;  
 Et patriam solæ et certos novere penates;  
 Venturæque hiemis memores æstate laborem  
 Experiuntur, et in medium quæsita reponunt.  
 Namque aliæ victu invigilant, et fœdere pacto  
 Exercentur agris; pars intra septa domorum  
 Narcissi lacrimam, et lentum de cortice gluten, 160  
 Prima favis ponunt fundamina, deinde tenaces  
 Suspendunt ceras; aliæ, spem gentis, adultos  
 Educunt fetus; aliæ purissima mella  
 Stipant, et liquido distendunt nectare cellas.  
 Sunt, quibus ad portas cecidit custodia sorti;  
 Inque vicem speculantur aquas et nubila cœli;  
 Aut onera accipiunt venientum, aut agmine facto  
 Ignavum, fucos, pecus a præsepibus arcent.  
 Fervet opus, redolentque thymo fragrantia mella.

Ac veluti lentis Cyclopes fulmina massis  
Quum properant, alii taurinis follibus auras  
Accipiunt redduntque, alii stridentia tingunt  
Æra lacu ; gemit impositis incudibus Ætna ;  
Illi inter sese magna vi brachia tollunt  
In numerum, versantque tenaci forcipe ferrum :  
Non aliter, si parva licet componere magnis,  
Cecropias innatus apes amor urget habendi,  
Munere quamque suo. Grandævis oppida curæ,  
Et munire favos, et dædala fingere tecta :  
At fessæ multa referunt se nocte minores,  
Crura thymo plenæ ; pascuntur et arbuta passim,  
Et glaucas salices casiamque, crocumque rubentem  
Et pinguem tiliam et ferrugineos hyacinthos.  
Omnibus una quies operum, labor omnibus unus.  
Mane ruunt portis ; nusquam mora : rursus easdem  
Vesper ubi e pastu tandem decedere campis  
Admonuit, tum tecta petunt, tum corpora curant :  
Fit sonitus, mussantque oras et limina circum.  
Post, ubi jam thalamis se composuere, siletur  
In noctem, fessosque sopor suus occupat artus.  
Nec vero a stabulis pluvia impendente recedunt  
Longius, aut credunt cœlo adventantibus euris ;  
Sed circum tutæ sub mœnibus urbis aquantur,  
Excursusque breves tentant, et sæpe lapillos,  
Ut cymbæ instabiles fluctu jactante saburram,  
Tollunt : his sese per inania nubila librant.  
Illum adeo placuisse apibus mirabere morem,  
Quod nec concubitu indulgent, nec corpora segnes  
In Venerem solvunt, aut fetus nixibus edunt ;  
Verum ipsæ e foliis natos et suavis herbis  
Ore legunt ; ipsæ regem parvosque Quirites  
Sufficiunt, aulasque et cerea regna refingunt.  
Sæpe etiam duris errando in cotibus alas  
Attrivere, ultroque animam sub fasce dedere ;  
Tantus amor florum et generandi gloria mellis

Ergo ipsas quamvis angusti terminus ævi  
Excipiat, (neque enim plus septima ducitur æstas)  
At genus immortale manet, multosque per annos  
Stat fortuna domus, et avi numerantur avorum.  
Præterea regem non sic Ægyptos et ingens  
Lydia, nec populi Parthorum aut Medus Hydaspes  
Observant. Rege incolumi mens omnibus una est ;  
Amisso, rupere fidem constructaque mella  
Diripuerunt ipsæ, et crates solvere favorum.  
Ille operum custos ; illum admirantur, et omnes  
Circumstant fremitu denso, stipantque frequentes ;  
Et sæpe attollunt humeris, et corpora bello  
Objectant, pulchramque petunt per vulnera mortem.

210

His quidam signis atque hæc exempla secuti,  
Esse apibus partem divinæ mentis et haustus  
Ætherios dixere : deum namque ire per omnes  
Terrasque tractusque maris cælumque profundum ;  
Hinc pecudes, armenta, viros, genus omne ferarum,  
Quemque sibi tenues nascentem arcessere vitas ;  
Scilicet huc reddi deinde ac resoluta referri  
Omnia ; nec morti esse locum, sed viva volare  
Sideris in numerum atque alto succedere cælo.

220

Si quando sedem augustam servataque mella  
Thesauris relines, prius haustu sparsus aquarum  
Ora fove, fumosque manu prætende sequaces.  
Bis gravidos cogunt fetus, duo tempora messis :  
Taygete simul os terris ostendit honestum  
Plias, et oceani spretos pede repulit amnes ;  
Aut eadem sidus fugiens ubi Piscis aquosi  
Tristior hibernas cælo descendit in undas.  
Illis ira modum supra est, læsæque venenum  
Morsibus inspirant, et spicula cæca relinquunt,  
Affixæ venis, animasque in vulnere ponunt.  
Sin duram metues hiemem parcesque futuro  
Contusosque animos et res miserabere fractas ;  
At suffire thymo, cerasque recidere inanes

230

240

Quis dubitet ? nam sæpe favos ignotus adedit  
 Stellio, et lucifugis congesta cubilia blattis,  
 Immunisque sedens aliena ad pabula fucus ;  
 Aut asper crabro imparibus se immiscuit armis,  
 Aut dirum tineæ genus ; aut invisæ Minervæ  
 Laxos in foribus suspendit aranea casses.  
 Quo magis exhaustæ fuerint, hoc acrius omnes  
 Incumbent generis lapsi sarcire ruinas,  
 Complebuntque foros, et floribus horrea texent.

250

Si vero, quoniam casus apibus quoque nostros  
 Vita tulit, tristi languebunt corpora morbo,  
 Quod jam non dubiis poteris cognoscere signis :  
 Continuo est ægris alius color ; horrida vultum  
 Deformat macies ; tum corpora luce carentum  
 Exportant tectis, et tristia funera ducunt ;  
 Aut illæ pedibus connexæ ad limina pendent,  
 Aut intus clausis cunctantur in ædibus, omnes  
 Ignavæque fame et contracto frigore pigræ.  
 Tum sonus auditur gravior, tractimque susurrant,  
 Frigidus ut quondam silvis immurmurat auster ;  
 Ut mare sollicitum stridit refluentibus undis ;  
 Æstuat ut clausis rapidus fornacibus ignis.  
 Hic jam galbaneos suadebo incendere odores,  
 Mellaque arundineis inferre canalibus, ultro  
 Hortantem et fessas ad pabula nota vocantem.  
 Proderit et tunsum gallæ admiscere saporem,  
 Arentesque rosas, aut igni pingua multo  
 Defruta, vel psithia passos de vite racemos,  
 Cecropiumque thymum, et grave olentia centaurea.

260

270

Est etiam flos in pratis, cui nomen amello  
 Fecere agricolæ, facilis quærentibus herba ;  
 Namque uno ingentem tollit de cespite silvam,  
 Aureus ipse ; sed in foliis, quæ plurima circum  
 Funduntur, violæ subluet purpura nigræ,  
 Sæpe deûm nexis ornata torquibus aræ ;  
 Asper in ore sapor ; tonsis in vallibus illum

Pastores et curva legunt prope flumina Mellæ.  
 Hujus odorato radices incoque Baccho,  
 Pabulaque in foribus plenis appone canistris.

280

Sed si quem proles subito defecerit omnis,  
 Nec, genus unde novæ stirpis revocetur, habebit ;  
 Tempus et Arcadii memoranda inventa magistri  
 Pandere, quoque modo cæsis jam sæpe juvencis  
 Insincerus apes tulerit cruor. Altius omnem  
 Expediam prima repetens ab origine famam.

Nam qua Pellæi gens fortunata Canopi  
 Accolit effuso stagnantem flumine Nilum,  
 Et circum pictis vehitur sua rura faselis ;

Quaque pharetrataë vicinia Persidis urget,  
 [Et viridem Ægyptum nigra fecundat arena,  
 Et diversa ruens septem discurrit in ora]

290

Usque coloratis amnis devexus ab Indis :  
 Omnis in hac certam regio jacet arte salutem.  
 Exiguus primum atque ipsos contractus ad usus  
 Eligitur locus : hunc angustique imbrice tecti  
 Parietibusque premunt arctis, et quatuor addunt,  
 Quatuor a ventis, obliqua luce fenestras.

Tum vitulus, bima curvans jam cornua fronte,  
 Quæritur ; huic geminæ nares et spiritus oris  
 Multa reluctanti obsuitur, plagisque peremto  
 Tunsæ per integram solvuntur viscera pellem.

300

Sic positum in clauso linquant, et ramea costis  
 Subjiciunt frágmenta, thymum, casiasque recentes.  
 Hoc geritur, zephyris primum impellentibus undas,  
 Ante novis rubeant quam prata coloribus, ante  
 Garrula quam tignis nidum suspendat hirundo.

Interea teneris tepefactus in ossibus humor  
 Æstuat ; et visenda modis animalia miris,

Trunca pedum primo, mox et stridentia pennis,  
 Miscentur, tenuemque magis magis aëra carpunt ;

310

Donec, ut æstivis effusus nubibus imber,  
 Erupere, aut ut nervo pulsante sagittæ,  
 Prima leves incunt si quando prælia Parthi.

Quis deus hanc, Musæ, qui nobis extudit artem ?  
 Unde nova ingressus hominum experientia cepit ?  
 Pastor Aristæus fugiens Peneïa Tempe,  
 Amissis, ut fama, apibus morboque fameque,  
 Tristis ad extremi sacrum caput adstitit amnis,  
 Multa querens, atque hac affatus voce parentem : 320  
 “ Mater, Cyrene mater, quæ gargitis hujus  
 Ima tenes, quid me præclara stirpe deorum  
 Si modo, quem perhibes, pater est Thymbræus Apollo,  
 Invisum fatis genuisti ? aut quo tibi nostri  
 Pulsus amor ? quid me cælum sperare jubebas ?  
 En etiam hunc ipsum vitæ mortalis honorem,  
 Quem mihi vix frugum et pecudum custodia solers  
 Omnia tentanti extuderat, te matre, relinquo.  
 Quin age, et ipsa manu felices erue silvas ;  
 Fer stabulis inimicum ignem, atque interface messes ; 330  
 Ure sata, et validam in vites molire bipennem :  
 Tanta meæ si te ceperunt tædia laudis.”  
 At mater sonitum thalamo sub fluminis alti  
 Sensit. Eam circum Milesia vellera Nymphæ  
 Carpebant, hyali saturo fucata colore,  
 Drymoque, Xanthoque, Ligeaque, Phyllodoceque,  
 Cæsariem effusæ nitidam per candida colla ;  
 [Nesæ Spioque, Thaliaque, Cymodoceque,]  
 Cydippeque, et flava Lycorias : altera virgo,  
 Altera tum primos Lucinæ experta labores ; 340  
 Clioque et Beroë soror, Oceanitides ambæ,  
 Ambæ auro, pictis incinctæ pellibus ambæ ;  
 Atque Ephyre, atque Opis, et Asia Deïopea,  
 Et tandem positis velox Arethusa sagittis.  
 Inter quas curam Clymene narrabat inanem  
 Vulcani, Martisque dolos et dulcia furta ;  
 Atque Chao densos divûm numerabat amores.  
 Carmine quo captæ dum fuis mollia pensa  
 Devolvunt, iterum maternas imulit aures  
 Luctus Aristæi, vitreisque sedilibus omnes 350

Obstupuere ; sed ante alias Arethusa sorores  
 Prospiciens, summa flavum caput extulit unda ;  
 Et procul : “ O gemitu non frustra exterrita tanto,  
 Cyrene soror, ipse tibi, tua maxima cura,  
 Tristis Aristæus Penei genitoris ad undam  
 Stat lacrimans, et te crudelem nomine dicit.  
 Huic percussa nova mentem formidine mater,  
 “ Duc, age, duc ad nos ; fas illi limina divûm  
 Tangere,” ait ; simul alta jubet discedere late  
 Flumina, qua juvenis gressus inferret. At illum 360  
 Curvata in montis faciem circumstetit unda,  
 Accepitque sinu vasto, misitque sub amnem.  
 Jamque domum mirans genetricis, et humida regna,  
 Speluncisque lacus clausos, lucosque sonantes,  
 Ibat, et, ingenti motu stupefactus aquarum,  
 Omnia sub magna labentia flumina terra  
 Spectabat diversa locis, Phasimque, Lycumque,  
 Et caput, unde altus primum se erumpit Enipeus,  
 Unde pater Tiberinus, et unde Aniena fluenta,  
 Saxosumque sonans Hypanis, Mysusque Caïcus, 370  
 Et gemina auratus taurino cornua vultu  
 Eridanus, quo non alius per pingua culta  
 In mare purpureum violentior effluit amnis.  
 Postquam est in thalami pendentia pumice tecta  
 Perventum, et nati fletus cognovit inanes  
 Cyrene, manibus liquidos dant ordine fontes  
 Germanæ, tonsisque ferunt mantelia villis ;  
 Pars epulis onerant mensas, et plena reponunt  
 Pocula ; Panchæis’ adolescunt ignibus aræ ;  
 Et mater,—“ Cape Mæonii carchesia Bacchi : 380  
 Oceano libemus,”—ait. Simul ipsa precatur  
 Oceanumque patrem rerum, Nymphasque sorores,  
 Centum quæ silvas, centum quæ flumina servant.  
 Ter liquido ardentem perfudit nectare Vestam ;  
 Ter flamma ad summum tecti subjecta reluxit :  
 Omine quo firmans animum, sic incipit ipsa :

“ Est in Carpathio Neptuni gurgite vates,  
Cæruleus Proteus, magnum qui piscibus æquor  
Et juncto bipedum curru metitur equorum.  
Hic nunc Emathiæ portus patriamque revisit 390  
Pallenen : hunc et Nymphæ veneramur, et ipse  
Grandævus Nereus ; novit namque omnia vates,  
Quæ sint, quæ fuerint, quæ mox ventura trahantur.  
Quippe ita Neptuno visum est ; immania cujus  
Armenta et turpes pascit sub gurgite phocas.  
Hic tibi, nate, prius vinclis capiendus, ut omnem  
Expediat morbi causam, eventusque secundet :  
Nam sine vi non ulla dabit præcepta, neque illum  
Orando flectes ; vim duram et vincula capto  
Tende ; doli circum hæc demum frangentur inanes. 400  
Ipsa ego te, medios quum sol accenderit æstus,  
Quum sitiunt herbæ, et pecori jam gratior umbra est,  
In secreta senis ducam, quo fessus ab undis  
Se recipit, facile ut somno aggrediare jacentem.  
Verum ubi correptum manibus vinclisque tenebis,  
Tum variæ eludent species atque ora ferarum.  
Fiet enim subito sus horridus, atraque tigris,  
Squamosusque draco, et fulva cervice læna ;  
Aut acrem flammæ sonitum dabit, atque ita vinclis  
Excidet, aut in aquas tenues dilapsus abibit. 410  
Sed, quanto ille magis formas se vertet in omnes,  
Tanto, nate, magis contende tenacia vincla ;  
Donec talis erit, mutato corpore, qualem  
Videris, incepto tegeret quum lumina somno.”  
Hæc ait, et liquidum ambrosiæ diffundit odorem,  
Quo totum nati corpus perduxit ; at illi  
Dulcis compositis spiravit crinibus aura,  
Atque habilis membris venit vigor. Est specus ingens  
Exesi latere in montis, quo plurima vento  
Cogitur inque sinus scindit sese unda reductos, 420  
Deprensus olim statio tutissima nautis ;  
Intus se vasti Proteus tegit objice saxi.



Hic juvenem in latebris aversum a lumine Nympha  
Collocat ; ipsa procul nebulis obscura resistit.  
Jam rapidus torrens sitientes Sirius Indos  
Ardebat ; cœlo et medium Sol igneus orbem  
Hauserat ; arebant herbæ, et cava flumina siccis  
Faucibus ad limum radii tepefacta coquebant ;  
Quum Proteus consueta petens e fluctibus antra  
Ibat : eum vasti circum gens humida ponti 430  
Exsultans rorem late dispersit amarum.  
Sternunt se somno diversæ in litore phocæ :  
Ipse, velut stabuli custos in montibus olim,  
Vesper ubi e pastu vitulos ad tecta reducit,  
Auditisque lupos acuunt balatibus agni,  
Considit scopulo medius, numerumque recenset.  
Cujus Aristæo quoniam est oblata facultas,  
Vix defessa senem passus componere membra,  
Cum clamore ruit magno, manicisque jacentem  
Occupat. Ille suæ contra non immemor artis, 440  
Omnia transformat sese in miracula rerum,  
Ignemque, horribilemque feram, fluviumque liquentem.  
Verum ubi nulla fugam reperit pellacia, victus  
In sese redit, atque hominis tandem ore locutus :  
“ Nam quis te, juvenum confidentissime, nostras  
Jussit adire domus ? quidve hinc petis ? ” inquit. At ille :  
“ Scis, Proteu, scis ipse ; neque est te fallere quidquam ;  
Sed tu desine velle. Deum præcepta secuti,  
Venimus hinc lapsis quæsitum oracula rebus.”  
Tantum effatus. Ad hæc vates vi denique multa 450  
Ardentes oculos intorsit lumine glauco,  
Et graviter frendens, sic fatis ora resolvit :

“ Non te nullius exercent numinis iræ.  
Magna luis commissa : tibi has miserabilis Orpheus  
Haudquaquam ob meritum pœnas, ni Fata resistant,  
Suscitat, et rapta graviter pro conjuge sævit.  
Illa quidem, dum te fugeret per flumina præceps,  
Immanem ante pedes hydrum, moritura puella,

Servantem ripas alta non vidit in herba.  
 At chorus æqualis Dryadum clamore supremos 460  
 Implерunt montes ; flerunt Rhodopeiæ arces  
 Altaque Pangæa et Rhesi Mavortia tellus,  
 Atque Getæ atque Hebrus et Actias Orithyia.  
 Ipse cava solans ægrum testudine anorem,  
 Te, dulcis conjux, te solo in litore secum,  
 Te veniente die, te decedente canebat.  
 Tænarias etiam fauces, alta ostia Ditis,  
 Et caligantem nigra formidine lucum  
 Ingressus, manesque adiit regemque tremendum,  
 Nesciaque humanis precibus mansuescere corda. 470  
 At cantu commotæ Erebi de sedibus imis  
 Umbræ ibant tenues, simulacraque luce carentum :  
 Quam multa in foliis avium se millia condunt,  
 Vesper ubi aut hibernus agit de montibus imber :  
 Matres atque viri, defunctaque corpora vita  
 Magnanimum heroum, pueri, innuptæque puellæ,  
 Impositique rogis juvenes ante ora parentum ;  
 Quos circum limus niger et deformis arundo  
 Cocyti tardaque palus inamabilis unda  
 Alligat, et novies Styx interfusa coërcet. 480  
 Quin ipsæ stupuere domus atque intima leti  
 Tartara, cæruleosque implexæ crinibus angues  
 Eumenides, tenuitque inhians tria Cerberus ora,  
 Atque Ixionii vento rota constitit orbis.  
 Jamque pedem referens casus evaserat omnes,  
 Redditaque Eurydice superas veniebat ad auras,  
 Pone sequens ; namque hanc dederat Proserpina legem ;  
 Quum subita incautum dementia cepit amantem,  
 Ignoscenda quidem, scirent si ignoscere manes :  
 Restitit, Eurydicenque suam jam luce sub ipsa 490  
 Immemor heu ! victusque animi respexit. Ibi omnis  
 Effusus labor, atque immitis rupta tyranni  
 Fœdera, terque fragor stagnis auditus Avernis.  
 Illa, 'Quis et me,' inquit, 'miseram, et te perdidit, Orpheu ?  
 Quis tantus furor ? en iterum crudelia retro

Fata vocant, conditque natantia lumina somnus.  
 Jamque vale : feror ingenti circumdata nocte,  
 Invalidasque tibi tendens, heu non tua, palmas !  
 Dixit, et ex oculis subito, ceu fumus in auras  
 Commixtus tenues, fugit diversa ; neque illum, 500  
 Prensantem nequidquam umbras, et multa volentem  
 Dicere, præterea vidit ; nec portitor Orci  
 Amplius objectam passus transire paludem.  
 Quid faceret ? quo se, rapta bis conjuge, ferret ?  
 Quo fletu manes, qua numina voce moveret ?  
 Illa quidem Stygia nabat jam frigida cymba.  
 Septem illum totos perhibent ex ordine menses  
 Rupe sub æëria deserti ad Strymonis undam  
 Flevisse, et gelidis hæc evolvisse sub antris, 510  
 Mulcentem tigres, et agentem carmine quercus :  
 Qualis populea mærens Philomela sub umbra  
 Amissos queritur fetus, quos durus arator  
 Observans nido implumes detraxit : at illa  
 Flet noctem, ramoque sedens miserabile carmen  
 Integrat, et mæstis late loca questibus implet.  
 Nulla Venus, non ulli animum flexere hymenæi ;  
 Solus hyperboreas glacies Tanaïmque nivalem,  
 Arvaque Rhipæis nunquam viduata pruinis  
 Lustrabat, raptam Eurydicen atque irrita Ditis  
 Dona querens : spretæ Ciconum quo munere matres, 520  
 Inter sacra deûm nocturnique orgia Bacchi,  
 Dicerptum latos juvenem sparsere per agros.  
 Tum quoque, marmorea caput a cervice revulsum  
 Gurgite quum medio portans Cæagrius Hebrus  
 Volveret, 'Eurydicen' vox ipsa et frigida lingua,  
 Ah miseram Eurydicen ! anima fugiente vocabat ;  
 'Eurydicen' toto referebant flumine ripæ."  
 Hæc Proteus : et se jactu dedit æquor in altum ;  
 Quaque dedit, spumantem undam sub vertice torsit.  
 At non Cyrene ; namque ultro affata timentem : 530  
 "Nate, licet tristes animo deponere curas.  
 Hæc omnis morbi causa ; hinc miserabile Nymphæ,

Cum quibus illa choros lucis agitabat in altis,  
Exitium misere apibus. Tu munera supplex  
Tende, petens pacem, et faciles venerare Napæas :  
Namque dabunt veniam votis, irasque remittent.  
Sed, modus orandi qui sit, prius ordine dicam.  
Quatuor eximios præstanti corpore tauros,  
Qui tibi nunc viridis depascunt summa Lycæi,  
Delige, et intacta totidem cervice juvencas.  
Quatuor his aras alta ad delubra dearum  
Constitue, et sacrum jugulis demitte cruorem ;  
Corporaque ipsa boum frondoso desere luo.  
Post, ubi nona suos aurora ostenderit ortus,  
Inferias Orphei Lethæa papavera mittes ;  
Placatam Eurydicen vitula venerabere cæsa,  
Et nigram mactabis ovem, lucumque revises."

540

Haud mora : continuo matris præcepta facessit.  
Ad delubra venit ; monstratas excitat aras ;  
Quatuor eximios præstanti corpore tauros  
Ducit, et intacta totidem cervice juvencas.  
Post, ubi nona suos aurora induxerat ortus,  
Inferias Orphei mittit, lucumque revisit.  
Hic vero subitum ac dictu mirabile monstrum  
Aspiciunt, liquefacta boum per viscera toto  
Stridere apes utero, et ruptis effervere costis ;  
Immensasque trahi nubes ; jamque arbore summa  
Confluere, et lentis uvam demittere ramis

550

Hæc super arborum cultu pecorumque canebam,  
Et super arboribus, Cæsar dum magnus ad altum  
Fulminat Euphraten bello, victorque volentes  
Per populos dat jura, viamque affectat Olympo.  
Illo Virgilium me tempore dulcis alebat  
Parthenope, studiis florentem ignobilis otî :  
Carmina qui lusi pastorum, audaxque juvena,  
Tityre, te patulæ cecini sub tegmine fagi.

560

P. VIRGILII MARONIS

Æ N E I D O S

LIBER PRIMUS.



*Ille ego, qui quondam gracili modulatus avena  
Carmen, et egressus silvis, vicina cœqi  
Ut quamvis arido parerent arva colono :  
Gratum opus agricolis : at nunc horrentia Martis.*

ARMA virumque cano, Trojæ qui primus ab oris  
Italiam, fato profugus, Lavinia venit  
Litora ; multum ille et terris jactatus et alto  
Vi superûm, sævæ memorem Junonis ob iram ;  
Multa quoque et bello passus, dum conderet urbem,  
Inferretque deos Latio ; genus unde Latinum,  
Albanique patres, atque altæ mœnia Romæ.

Musa, mihi causas memora, quo numine læso,  
Quidve dolens, regina deum tot volvere casus  
Insignem pietate virum, tot adire labores,  
Impulerit. Tantæne animis cœlestibus iræ !

10

Urbs antiqua fuit, Tyrii tenuere coloni,  
Carthago, Italiam contra Tiberinaque longe  
Ostia, dives opum, studiisque asperrima belli ;  
Quam Juno fertur terris magis omnibus unam  
Posthabita coluisse Samo. Hic illius arma,  
Hic currus fuit : hoc regnum dea gentibus esse.  
Si qua fata sinant, jam tum tenditque fovetque.  
Progeniem sed enim Trojano a sanguine duci

Audierat, Tyrias olim quæ verteret arces ;  
 Hinc populum late regem belloque superbum  
 Venturum excidio Libyæ : sic volvere Parcas  
 Id metuens, veterisque memor Saturnia belli,  
 Prima quod ad Trojam pro caris gesserat Argis .  
 Nec dum etiam causæ irarum sævique dolores  
 Exciderant animo : manet alta mente repostum  
 Judicium Paridis, spretæque injuria formæ,  
 Et genus invisum, et rapti Ganymedis honores :  
 His accensa super, jactatos æquore toto  
 Troas, reliquias Danaum atque immitis Achilli,  
 Arcebat longe Latio ; multosque per annos  
 Errabant, acti fatis, maria omnia circum.  
 Tantæ molis erat Romanam condere gentem.

Vix e conspectu Siculæ telluris in altum  
 Vela dabant læti et spumas salis ære ruebant ;  
 Quum Juno, æternum servans sub pectore vulnus,  
 Hæc secum : “ Mene incepto desistere victam,  
 Nec posse Italia Teucrorum avertere regem !  
 Quippe vetor fatis. Pallasne exurere classem  
 Argivum, atque ipsos potuit submergere ponto,  
 Unius ob noxam et furias Ajacis Oilei ?  
 Ipsa, Jovis rapidum jaculata e nubibus ignem,  
 Disjecitque rates, evertitque æquora ventis :  
 Illum, exspirantem transfixo pectore flammæ,  
 Turbine corripuit, scopuloque infixit acuto.  
 Ast ego, quæ divum incedo regina, Jovisque  
 Et soror et conjux, una cum gente tot annos  
 Bella gero. Et quisquam numen Junonis adoret  
 Præterea, aut supplex aris imponat honorem ? ”

Talia flammato secum dea corde volutans,  
 50  
 Nimborum in patriam, loca feta furentibus austris,  
 Æoliam venit. Hic vasto rex Æolus antro  
 Luctantes ventos tempestatesque sonoras  
 Imperio premit, ac vinclis et carcere frenat.  
 Illi indignantes magno cum murmure montis

Circum claustra fremunt : celsa sedet Æolus arce  
 Sceptra tenens, mollitque animos, et temperat iras.  
 Ni faciat, maria ac terras cœlumque profundum  
 Quippe ferant rapidi secum verrantque per auras.  
 Sed pater omnipotens speluncis abdidit atris, 60  
 Hoc metuens ; molemque et montes insuper altos  
 Imposuit, regemque dedit. qui fœdere certo  
 Et premere, et laxas sciret dare jussus habenas.  
 Ad quem tum Juno supplex his vocibus usa est :

“ Æole, namque tibi divum pater atque hominum rex  
 Et mulcere dedit fluctus et tollere vento,  
 Gens inimica mihi Tyrrhenum navigat æquor,  
 Ilium in Italiam portans victosque penates :  
 Incute vim ventis, submersasque obrue puppes ;  
 Aut age diversos et disjice corpora ponto. 70  
 Sunt mihi bis septem præstanti corpore nymphæ ;  
 Quarum, quæ forma pulcherrima, Deïopeam  
 Connubio jungam stabili propriamque dicabo,  
 Omnes ut tecum meritis pro talibus annos  
 Exigat, et pulchra faciat te prole parentem.”

Æolus hæc contra : “ Tuus, o regina, quid optes,  
 Explorare labor ; mihi jussa capessere fas est.  
 Tu mihi, quodcunque hoc regni, tu sceptra Jovemque  
 Concilias ; tu das epulis accumbere divum,  
 Nimborumque facis tempestatumque potentem.” 80

Hæc ubi dicta, cavum conversa cuspide montem  
 Impulit in latus ; ac venti velut agmine facto,  
 Qua data porta, ruunt, et terras turbine perfiant.  
 Incubuerè mari, totumque a sedibus imis  
 Una Eurusque Notusque ruunt creberque procellis  
 Africus, et vastos volvunt ad litora fluctus :  
 Insequitur clamorque virum stridorque rudentum.  
 Eripiunt subito nubes cœlumque diemque  
 Teucrorum ex oculis ; ponto nox incubat atra.  
 Intonuere poli, et crebris micat ignibus æther ; 90  
 Præsentemque viris intentant omnia mortem.

Extemplo Æneæ solvuntur frigore membra ;  
 Ingemit, et duplices tendens ad sidera palmas,  
 Talia voce refert : " O terque quaterque beati,  
 Quois ante ora patrum Trojæ sub mœnibus altis  
 Contigit oppetere ! o Danaum fortissime gentis  
 Tydide, mene Iliacis occumbere campis  
 Non potuisse, tuaque animam hanc effundere dextra !  
 Sævus ubi Æacidæ telo jacet Hector, ubi ingens  
 Sarpedon ; ubi tot Simois correpta sub undis 100  
 Scuta virum galeasque et fortia corpora volvit."

Talia jactanti stridens aquilone procella  
 Velum adversa ferit, fluctusque ad sidera tollit.  
 Franguntur remi ; tum prora avertit, et undis  
 Dat latus ; insequitur cumulo præruptus aquæ mons.  
 Hi summo in fluctu pendent ; his unda dehiscens  
 Terram inter fluctus aperit : furit æstus arenis.  
 Tres notus abreptas in saxa latentia torquet :  
 Saxa vocant Itali, mediis quæ in fluctibus, Aras ;  
 Dorsum immane mari summo. Tres Eurus ab alto 110  
 In brevia et syrtes urget, miserabile visu,  
 Illiditque vadis atque aggere cingit arenæ.  
 Unam, quæ Lycios fidumque vehebat Oronten,  
 Ipsius ante oculos ingens a vertice pontus  
 In puppim ferit ; excutitur pronusque magister  
 Volvitur in caput : ast illam ter fluctus ibidem  
 Torquet agens circum, et rapidus vorat æquore vertex.  
 Apparent rari nantes in gurgite vasto,  
 Arma virum tabulæque et Troïa gaza per undas.  
 Jam validam Ilionei navem, jam fortis Achatæ, 120  
 Et qua vectus Abas, et qua grandævus Aletes,  
 Vicit hiems : laxis laterum compagibus omnes  
 Accipiunt inimicum imbrem, rimisque fatiscunt.

Interea magno misceri murmure pontum,  
 Emissamque hiemem sensit Neptunus, et imis  
 Stagna refusa vadis, graviter commotus ; et alto  
 Prospiciens, summa placidum caput extulit unda.



Disjectam Æneæ toto videt æquore classem,  
 Fluctibus oppressos Troas cœlique ruina ;  
 Nec latuere doli fratrem Junonis et iræ. 130  
 Eurum ad se Zephyrumque vocat ; dehinc talia fatur :  
 "Tantane vos generis tenuit fiducia vestri ?  
 Jam cœlum terramque meo sine numine, Venti,  
 Miscere et tantas audetis tollere moles ?  
 Quos ego—Sed motos præstat componere fluctus.  
 Post mihi non simili pœna commissa luetis.  
 Maturate fugam, regique hæc dicite vestro :  
 Non illi imperium pelagi sævumque tridentem,  
 Sed mihi sorte datum. Tenet ille immania saxa,  
 Vestras, Eure, domos ; illa se jactet in aula 140  
 Æolus, et clauso ventorum carcere regnet."  
 Sic ait, et dicto citius tumida æquora placat,  
 Collectasque fugat nubes, solemque reducit.  
 Cymothoë simul et Triton adnexus acuto  
 Detrudunt naves scopulo ; levat ipse tridenti,  
 Et vastas aperit syrtes, et temperat æquor ;  
 Atque rotis summas levibus perlabitur undas.  
 Ac veluti magno in populo quum sæpe coorta est  
 Seditio, sævitque animis ignobile vulgus ;  
 Jamque faces et saxa volant ; furor arma ministrat : 150  
 Tum, pietate gravem ac meritis si forte virum quem  
 Conspexere, silent, arrectisque auribus adstant ;  
 Iste regit dictis animos, et pectora mulcet :  
 Sic cunctus pelagi cecidit fragor, æquora postquam  
 Prospiciens genitor, cœloque invectus aperto,  
 Flectit equos, curruque volans dat lora secundo.  
 Defessi Æneadæ, quæ proxima, litora cursu  
 Contendunt petere, et Libyæ vertuntur ad oras.  
 Est in secessu longo locus ; insula portum  
 Efficit objectu laterum, quibus omnis ab alto 160  
 Frangitur inque sinus scindit sese unda reductos.  
 Hinc atque hinc vastæ rupes geminique minantur  
 In cœlum scopuli, quorum sub vertice late

Æquora tuta silent ; tum silvis scena coruscis  
 Desuper horrentique atrum nemus imminet umbra.  
 Fronte sub adversa scopulis pendentibus antrum ;  
 Intus aquæ dulces, vivoque sedilia saxo ;  
 Nympharum domus. Hic fessas non vincula naves  
 Ulla tenent ; unco non alligat ancora morsu.  
 Huc septem Æneas collectis navibus omni  
 Ex numero subit ; ac, magno telluris amore  
 Egressi, optata potiuntur Troës arena,  
 Et sale tabentes artus in litore ponunt.  
 Ac primum silici scintillam excudit Achates,  
 Suscepitque ignem foliis, atque arida circum  
 Nutrimenta dedit, rapuitque in fomite flammam.  
 Tum Cererem corruptam undis Cerealiaque arma  
 Expediunt, fessi rerum ; frugesque receptas  
 Et torrere parant flammis et frangere saxo.

170

Æneas scopulum interea conscendit, et omnem  
 Prospectum late pelago petit, Anthea si quem  
 Jactatum vento videat, Phrygiasque biremes,  
 Aut Capyn, aut celsis in puppibus arma Caïci.  
 Navem in conspectu nullam, tres litore cervos  
 Prospicit errantes ; hos tota armenta sequuntur  
 A tergo, et longum per valles pascitur agmen.  
 Constitit hic, arcumque manu celeresque sagittas  
 Corripuit, fidus quæ tela gerebat Achates ;

180

Ductoresque ipsos primum, capita alta ferentes  
 Cornibus arboreis, sternit, tum vulgus ; et omnem  
 Miscet agens telis nemora inter frondea turbam.  
 Nec prius absistit, quam septem ingentia victor  
 Corpora fundat humi, et numerum cum navibus æquet.  
 Hinc portum petit, et socios partitur in omnes.  
 Vina bonus quæ deinde cadis onerarat Acestes  
 Litore Trinacrio, dederatque abeuntibus heros,  
 Dividit, et dictis mærentia pectora mulcet :

190

“ O socii, neque enim ignari sumus ante malorum,  
 O passi graviora, dabit deus his quoque finem.

Vos et Scyllæam rabiem penitusque sonantes 200  
 Accestis scopulos ; vos et Cyclopia saxa  
 Experti. Revocate animos, mæstumque timorem  
 Mittite. Forsan et hæc olim meminisse juvabit.  
 Per varios casus, per tot discrimina rerum  
 Tendimus in Latium, sedes ubi fata quietas  
 Ostendunt : illic fas regna resurgere Trojæ.  
 Durate, et vosmet rebus servate secundis."

Talia voce refert ; curisque ingentibus æger  
 Spem vultu simulat, premit altum corde dolorem.  
 Illi se prædæ accingunt dapibusque futuris : 210  
 Tergora deripiunt costis, et viscera nudant ;  
 Pars in frusta secant, veribusque trementia figunt ;  
 Litore ahena locant alii, flammæque ministrant.  
 Tum victu revocant vires, fusique per herbam  
 Implentur veteris Bacchi pinguisque ferinæ.  
 Postquam exemta fames epulis, mensæque remotæ,  
 Amissos longo socios sermone requirunt,  
 Spemque metumque inter dubii, seu vivere credant,  
 Sive extrema pati, nec jam exaudire vocatos.  
 Præcipue pius Æneas, nunc acris Oronti, 220  
 Nunc Amyci casum gemit et crudelia secum  
 Fata Lyci, fortemque Gyan, fortemque Cloanthum.

Et jam finis erat : quum Jupiter æthere summo  
 Despiciens mare velivolum terrasque jacentes,  
 Litoraue et latos populos, sic vertice cœli  
 Constitit, et Libyæ defixit lumina regnis.  
 Atque illum tales jactantem pectore curas,  
 Tristior et lacrimis oculos suffusa nitentes  
 Alloquitur Venus : " O qui res hominumque deumque  
 Æternis regis imperiis, et fulmine terres, 230  
 Quid meus Æneas in te committere tantum,  
 Quid Troës potuere, quibus, tot funera passis,  
 Cunctus ob Italiam terrarum clauditur orbis ?  
 Certe hinc Romanos olim, volventibus annis,  
 Hinc fore ductores, revocato a sanguine Teucri,

Qui mare, qui terras omni ditione tenerent,  
 Pollicitus: quæ te, genitor, sententia vertit?  
 Hoc equidem occasum Trojæ tristesque ruinas  
 Solabar, fatis contraria fata rependens.  
 Nunc eadem fortuna viros tot casibus actos 240  
 Insequitur. Quem das finem, rex magne, laborum?  
 Antenor potuit, mediis elapsus Achivis,  
 Illyricos penetrare sinus atque intima tutus  
 Regna Liburnorum, et fontem superare Timavi,  
 Unde per ora novem vasto cum murmure montis  
 It mare proruptum, et pelago premit arva sonanti.  
 Hic tamen ille urbem Patavi sedesque locavit  
 Teucrorum, et genti nomen dedit, armaque fixit  
 Troïa; nunc placida compostus pace quiescit:  
 Nos, tua progenies, cœli quibus annuis arcem, 250  
 Navibus infandum! amissis, unius ob iram  
 Prodimur, atque Italis longe disjungimur oris.  
 Hic pietatis honos? sic nos in sceptrâ reponis?"  
 Olli subridens hominum sator atque deorum  
 Vultu, quo cœlum tempestatesque serenat,  
 Oscula libavit natæ; dehinc talia fatur:  
 "Parce metu, Cytherea; manent immota tuorum  
 Fata tibi; cernes urbem et promissa Lavini  
 Mœnia, sublimemque feres ad sidera cœli  
 Magnanimum Ænean; neque me sententia vertit. 260  
 Hic—tibi fabor enim, quando hæc te cura remordet,  
 Longius et volvens fatorum arcana movebo—  
 Bellum ingens geret Italia, populosque feroces  
 Contundet; moresque viris et mœnia ponet,  
 Tertia dum Latio regnantem viderit æstas,  
 Ternaque transierint Rutulis hiberna subactis.  
 At puer Ascanius, cui nunc cognomen Iulo  
 [Additur, Ilus erat, dum res stetit Ilia regno,]  
 Triginta magnos volvendis mensibus orbes  
 Imperio explebit, regnumque ab sede Lavini 270  
 Transferet, et longam multa vi munit Albam.

Hic jam ter centum totos regnabitur annos  
 Gente sub Hectorea, donec regina sacerdos  
 Marte gravis geminam partu dabit Ilia prolem.  
 Inde lupæ fulvo nutricis tegmine lætus  
 Romulus excipiet gentem, et Mavortia condet  
 Mœnia, Romanosque suo de nomine dicet.  
 His ego nec metas rerum nec tempora pono ;  
 Imperium sine fine dedi. Quin aspera Juno,  
 Quæ mare nunc terrasque metu cœlumque fatigat, 280  
 Consilia in melius referet, mecumque fovebit  
 Romanos, rerum dominos, gentemque togatam.  
 Sic placitum. Veniet lustris labentibus ætas,  
 Quum domus Assaraci Phthiam clarasque Mycenæ  
 Servitio premet, ac victis dominabitur Argis.  
 Nascetur pulchra Trojanus origine Cæsar,  
 Imperium oceano, famam qui terminet astris,  
 Julius, a magno demissum nomen Iulo.  
 Hunc tu olim cœlo, spoliis Orientis onustum,  
 Accipies securus ; vocabitur hic quoque votis. 290  
 Aspera tum positis mitescent sæcula bellis ;  
 Cana Fides et Vesta, Remo cum fratre Quirinus  
 Jura dabunt ; diræ ferro et compagibus arctis  
 Claudentur belli portæ ; Furor impius intus,  
 Sæva sedens super arma, et centum vinctus ahenis  
 Post tergum nodis, fremet horridus ore cruento."

Hæc ait : et Maia genitum demittit ab alto,  
 Ut terræ, utque novæ pateant Carthaginis arces  
 Hospitio Teucris, ne fati nescia Dido  
 Finibus arceret. Volat ille per aëra magnum 300  
 Remigio alarum, ac Libyæ citus adstitit oris.  
 Et jam jussa facit ; ponuntque ferocia Pœni  
 Corda, volente deo ; in primis regina quietum  
 Accipit in Teucros animum mentemque benignam.

At pius Æneas per noctem plurima volvens,  
 Ut primum lux alma data est, exire locosque  
 Explorare novos, quas vento accesserit oras,

Qui teneant, nam inculta videt, hominesne feræne,  
 Quærere constituit, sociisque exacta referre.  
 Classem in convexo nemorum sub rupe cavata 310  
 Arboribus clausam circum atque horrentibus umbris  
 Occulit: ipse uno graditur comitatus Achate,  
 Bina manu lato crispans hastilia ferro.  
 Cui mater media sese tulit obvia silva,  
 Virginis os habitumque gerens et virginis arma  
 Spartanæ, vel qualis equos Threïssa fatigat  
 Harpalyce, volucremque fuga prævertitur eorum.  
 Namque humeris de moreabilem suspenderat arcum  
 Venatrix, dederatque comam diffundere ventis,  
 Nuda genu, nodoque sinus collecta fluentes. 320  
 Ac prior, "Heus," inquit, "juvenes, monstrate mearum  
 Vidistis si quam hic errantem forte sororum,  
 Succinctam pharetra et maculosæ tegmine lyncis,  
 Aut spumantis apri cursum clamore prementem."

Sic Venus; et Veneris contra sic filius orsus:  
 "Nulla tuarum audita mihi neque visa sororum,  
 O—quam te memorem—virgo? namque haud tibi vultus  
 Mortalis, nec vox hominem sonat. O dea certe:  
 An Phœbi soror? an nympharum sanguinis una?  
 Sis felix, nostrumque leves, quæcumque, laborem, 330  
 Et quo sub cœlo tandem, quibus orbis in oris  
 Jactemur, doceas. Ignari hominumque locorumque  
 Erramus, vento huc et vastis fluctibus acti.  
 Multa tibi ante aras nostra cadet hostia dextra."

Tum Venus: "Haud equidem tali me dignor honore;  
 Virginibus Tyriis mos est gestare pharetram,  
 Purpureoque alte suras vincire cothurno.  
 Punica regna vides, Tyrios et Agenoris urbem;  
 Sed fines Libyci, genus intractabile bello.  
 Imperium Dido Tyria regit urbe profecta, 340  
 Germanum fugiens. Longa est injuria, longæ  
 Ambages; sed summa sequar fastigia rerum.  
 Huic conjux Sychæus erat, ditissimus agri

Phœnicum, et magno miseræ dilectus amore,  
 Cui pater intactam dederat, primisque jugarat  
 Ominibus. Sed regna Tyri germanus habebat  
 Pygmalion, scelere ante alios immanior omnes.  
 Quos inter medius venit furor. Ille Sychæum  
 Impius ante aras atque auri cæcus amore  
 Clam ferro incautum superat, securus amorum . 350  
 Germanæ ; factumque diu celavit, et ægram,  
 Multa malus simulans, vana spe lusit amantem.  
 Ipsa sed in somnis inhumati venit imago  
 Conjugis ; ora modis attollens pallida miris,  
 Crudeles aras trajectaque pectora ferro  
 Nudavit, cæcumque domus scelus omne rexit.  
 Tum celerare fugam patriaque excedere suadet,  
 Auxiliumque viæ veteres tellure recludit  
 Thesaurus, ignotum argenti pondus et auri.  
 His commota fugam Dido sociosque parabat. 360  
 Conveniunt, quibus aut odium crudele tyranni  
 Aut metus acer erat ; naves, quæ forte paratæ,  
 Corripiunt, onerantque auro. Portantur avari  
 Pygmalionis opes pelago ; dux femina facti.  
 Devenere locos, ubi nunc ingentia cernes  
 Mœnia surgentemque novæ Carthaginis arcem,  
 Mercatique solum, facti de nomine Byrsam,  
 Taurino quantum possent circumdare tergo.  
 Sed vos qui tandem, quibus aut venistis ab oris,  
 Quove tenetis iter ?" Quærenti talibus ille 370  
 Suspirans, imoque trahens a pectore vocem :  
 " O dea, si prima repetens ab origine pergam,  
 Et vacet annales nostrorum audire laborum,  
 Ante diem clauso componet vesper Olympo,  
 Nos Troja antiqua, si vestras forte per aures  
 Trojæ nomen iit, diversa per æquora vectos  
 Forte sua Libycis tempestas appulit oris.  
 Sum pius Æneas, raptos qui ex hoste penates  
 Classe veho mecum, fama super æthera notus.

Italiam quæro patriam, genus ab Jove summo.  
Bis denis Phrygium conscendi navibus æquor,  
Matrè dea monstrante viam, data fata secutus.  
Vix septem convulsæ undis euroque supersunt.  
Ipse ignotus, egens, Libyæ deserta peragro,  
Europa atque Asia pulsus." Nec plura querentem  
Passa Venus medio sic interfata dolore est :

380

"Quisquis es, haud, credo, invisus cœlestibus auras  
Vitales carpis, Tyriam qui adveneris urbem.  
Perge modo, atque hinc te reginæ ad limina perfer.  
Namque tibi reduces socios classemque relata  
Nuncio, et in tutum versis aquilonibus actam,  
Ni frustra augurium vani docuere parentes.  
Aspice bis senos lætantes agmine cyncos,  
Ætheria quos lapsa plaga Jovis ales aperto  
Turbabat cœlo ; nunc terras ordine longo  
Aut capere, aut captas jam despectare videntur :  
Ut reduces illi ludunt stridentibus alis,  
Et cœtu cinxere polum, cantusque dedere,  
Haud aliter puppesque tuæ pubesque tuorum  
Aut portum tenet, aut pleno subit ostia velo.  
Perge modo, et, qua te ducit via, dirige gressum."

390

400

Dixit ; et avertens rosea cervice refulsit,  
Ambrosiæque comæ divinum vertice odorem  
Spiravere : pedes vestis defluxit ad imos ;  
Et vera incessu patuit dea. Ille ubi matrem  
Agnovit, tali fugientem est voce secutus :  
"Quid natum toties crudelis tu quoque falsis  
Ludis imaginibus ? cur dextræ jungere dextram  
Non datur, ac veras audire et reddere voces ?"  
Talibus incusat, gressumque ad mœnia tendit.  
At Venus obscuro gradientes aëre sepsit,  
Et multo nebulæ circum dea fudit amictu,  
Cernere ne quis eos, neu quis contingere posset,  
Molirive moram, aut veniendi poscere causas.  
Ipsa Paphum sublimis abit, sedesque revisit

410



Læta suas, ubi templum illi, centumque Sabæo  
Thure calent aræ, sertisque recentibus halant.

Corripuere viam interea, qua semita monstrat.  
Jamque ascendebant collem, qui plurimus urbi  
Imminet, adversasque aspectat desuper arces. 420  
Miratur molem Æneas, magalia quondam ;  
Miratur portas, strepitumque et striata viarum.  
Instant ardentes Tyrii : pars ducere muros,  
Molirique arcem, et manibus subvolvere saxa ;  
Pars optare locum tecto, et concludere sulco ;  
Jura magistratusque legunt, sanctumque senatum ;  
Hic portus alii effodiunt ; hic alta theatris  
Fundamenta locant alii, immaesque columnas  
Rupibus excidunt, scenis decora alta futuris :

Qualis apes æstate nova per florea ruia 430  
Exercet sub sole labor, quum gentis adultos  
Educunt fetus, aut quum liquentia mella  
Stipant, et dulci distendunt nectare cellas ;  
Aut onera accipiunt venientum, aut agmine facto  
Ignavum fucos pecus a præsepibus arcent :  
Fervet opus, redolentque thymo fragrantia mella.  
“ O fortunati, quorum jam mœnia surgunt ! ”

Æneas ait, et fastigia suspicit urbis.  
Infert se septus nebula, mirabile dictu,  
Per medios, miscetque viris ; neque cernitur ulli. 440

Lucus in urbe fuit media, lætissimus umbræ,  
Quo primum jactati undis et turbine Poeni  
Effodere loco signum, quod regia Juno  
Monstrarat, caput acris equi ; sic nam fore bello  
Egregiam et facilem victu per sæcula gentem.  
Hic templum Junoni ingens Sidonia Dido  
Condebat, donis opulentum et numine divæ ;  
Ærea cui gradibus surgebant limina, nexæque  
Ære trabes : foribus cardo stridebat ahenis.  
Hoc primum in luco nova res oblata timorem 450  
Leniit ; hic primum Æneas sperare salutem

Ausus, et afflictis melius confidere rebus.  
Namque sub ingenti lustrat dum singula templo  
Reginam opperiens, dum, quæ fortuna sit urbi,  
Artificumque manus inter se operumque laborem  
Miratur, videt Iliacas ex ordine pugnas,  
Bellaque jam fama totum vulgata per orbem,  
Atridas, Priamumque, et sævum ambobus Achillem.  
Constitit, et lacrimans, "Quis jam locus," inquit, "Achate,  
Quæ regio in terris nostri non plena laboris?" 460  
En Priamus! Sunt hic etiam sua præmia laudi;  
Sunt lacrimæ rerum, et mentem mortalia tangunt.  
Solve metus; feret hæc aliquam tibi fama salutem."  
Sic ait, atque animum pictura pascit inani,  
Multa gemens, largoque humectat flumine vultum.  
Namque videbat, uti bellantes Pergama circum  
Hac fugerent Graii, premeret Trojana juvenus;  
Hac Phryges; instaret curru cristatus Achilles.  
Nec procul hinc Rhesi niveis tentoria velis  
Agnoscit lacrimans, primo quæ prodita somno 470  
Tydides multa vastabat cæde cruentus,  
Ardentesque avertit equos in castra, prius quam  
Pabula gustassent Trojæ Xanthumque bibissent.  
Parte alia fugiens amissis Troilus armis,  
Infelix puer, atque impar congressus Achilli,  
Fertur equis, curruque hæret resupinus inani,  
Lora tenens tamen: huic cervixque comæque trahuntur  
Per terram, et versa pulvis inscribitur hasta.  
Interea ad templum non æquæ Palladis ibant  
Crinibus Iliades passis, peplumque ferebant 480  
Suppliciter tristes et tunsæ pectora palmis;  
Diva solo fixos oculos aversa tenebat.  
Ter circum Iliacos raptaverat Ilectora muros,  
Exanimumque auro corpus vendebat Achilles.  
Tum vero ingentem gemitum dat pectore ab imo,  
Ut spolia, ut currus, utque ipsum corpus amici,  
Tendentemque manus Priamum conspexit inermes.

Se quoque principibus permixtum agnovit Achivis,  
 Eoasque acies et nigri Memnonis arma.

Ducit Amazonidum lunatis agmina peltis 490  
 Penthesilea furens, mediisque in millibus ardet,  
 Aurea subnectens exsertæ cingula mammæ  
 Bellatrix, audetque viris concurrere virgo.

Hæc dum Dardanio Æneæ miranda videntur,  
 Dum stupet, obtutuque hæret defixus in uno;  
 Regina ad templum, forma pulcherrima Dido,  
 Incessit, magna juvenum stipante caterva.  
 Qualis in Eurotæ ripis, aut per juga Cynthi  
 Exercet Diana choros, quam mille secutæ  
 Hinc atque hinc glomerantur Oreades: illa pharetram 500  
 Fert humero, gradiensque deas supereminet omnes;  
 Latonæ tacitum pertentant gaudia pectus:  
 Talis erat Dido, talem se læta ferebat  
 Per medios, instans operi regnisque futuris.  
 Tum foribus divæ, media testudine templi,  
 Septa armis solioque alte subnixa resedit.  
 Jura dabat legesque viris, operumque laborem  
 Partibus æquabat justis, aut sorte trahebat;  
 Quum subito Æneas concursu accedere magno  
 Anthea Sergestumque videt fortemque Cloanthum. 510

Teucrorumque alios, ater quos æquore turbo  
 Dispulerat, penitusque alias avexerat oras.  
 Obstupuit simul ipse, simul percussus Achates  
 Lætitiæque metique: avidi conjungere dextras  
 Ardebant; sed res animos incognita turbat.  
 Dissimulant; et nube cava speculantur amicti,  
 Quæ fortuna viris; classem quo litore linquant;  
 Quid veniant: cunctis nam lecti navibus ibant,  
 Orantes veniam, et templum clamore petebant.

Postquam introgressi, et coram data copia fandi, 520  
 Maximus Ilioneus placido sic pectore cœpit:  
 "O Regina, novam cui condere Jupiter urbem  
 Justitiæque dedit gentes frenare superbas,

Troës te miseri, ventis maria omnia vecti,  
 Oramus : prohibe infandos a navibus ignes ;  
 Parce pio generi, et propius res aspice nostras.  
 Non nos aut ferro Libycos populare penates  
 Venimus, aut raptas ad litora vertere prædas :  
 Non ea vis animo, nec tanta superbia victis.  
 Est locus, Hesperiam Graii cognomine dicunt, 530  
 Terra antiqua, potens armis atque ubere glebæ :  
 Qnotri coluere viri ; nunc fama, minores  
 Italiam dixisse ducis de nomine gentem.  
 Huc cursus fuit ;  
 Quum subito assurgens fluctu nimbosus Orion  
 In vada cæca tulit, penitusque procacibus austris  
 Perque undas, superante salo, perque invia saxa  
 Dispulit. Huc pauci vestris adnavimus oris.  
 Quod genus hoc hominum ? quæve hunc tam barbara morem  
 Permittit patria ? hospitio prohibemur arenæ ! 540  
 Bella cient, primaque vetant consistere terra.  
 Si genus humanum et mortalia temnitis arma,  
 At sperate deos memores fandi atque nefandi.  
 Rex erat Æneas nobis, quo justior alter  
 Nec pietate fuit nec bello major et armis :  
 Quem si fata virum servant, si vescitur aura  
 Ætheria, neque adhuc crudelibus occubat umbris,  
 Non metus, officio ne te certasse priorem  
 Pœniteat. Sunt et Siculis regionibus urbes,  
 Arvaque, Trojanoque a sanguine clarus Acestes. 550  
 Quassatam ventis liceat subducere classem,  
 Et silvis aptare trabes et stringere remos ;  
 Si datur Italiam, sociis et rege recepto,  
 Tendere, ut Italiam læti Latiumque petamus ;  
 Sin absumta salus, et te, pater optime Teucrum,  
 Pontus habet Libyæ, nec spes jam restat Iuli,  
 At freta Sicaniæ saltem sedesque paratas,  
 Unde huc advecti, regemque petamus Acesten.”  
 Talibus Ilioneus ; cuncti simul ore fremebant  
 Dardanidæ. 560

Tum breviter Dido, vultum demissa, profatur:  
 "Solvite corde metum, Teucri, secludite curas.

Res dura et regni novitas me talia cogunt  
 Moliri, et late fines custode tueri.

Quis genus Æneadum, quis Trojæ nesciat urbem,  
 Virtutesque virosque, aut tanti incendia belli?

Non obtusa adeo gestamus pectora Pœni;

Nec tam aversus equos Tyria Sol jungit ab urbe.

Seu vos Hesperiam magnam Saturniaque arva,

Sive Erycis fines regemque optatis Acesten,

Auxilio tutos dimittam, opibusque juvabo.

Vultis et his mecum pariter considerare regnis;

Urbem quam statuo, vestra est: subducite naves;

Tros Tyriusque mihi nullo discrimine agetur.

Atque utinam rex ipse, noto compulsus eodem,

Afforet Æneas! Equidem per litora certos

Dimittam, et Libyæ lustrare extrema jubebo,

Si quibus ejectus silvis aut urbibus errat."

570

His animum arrecti dictis, et fortis Achates

Et pater Æneas jamdudum erumpere nubem

Ardebant. Prior Ænean compellat Achates:

"Nate dea, quæ nunc animo sententia surgit?

Omnia tuta vides, classem sociosque receptos.

Unus abest, medio in fluctu quem vidimus ipsi

Submersum; dictis respondent cetera matris."

Vix ea fatus erat, quum circumfusa repente

Scindit se nubes, et in æthera purgat apertum.

Restitit Æneas, claraque in luce refulsit,

Os humerosque deo similis: namque ipsa decoram

Cæsariem nato genetrix, lumenque juventæ

Purpureum, et lætos oculis afflarat honores:

Quale manus addunt ebori decus, aut ubi flavo

Argentum Pariusve lapis circumdatur auro.

Tum sic reginam alloquitur, cunctisque repente

Improvisus ait: "Coram, quem quæritis, adsum

Troius Æneas, Libycis ereptus ab undis.

580

590

O sola infandos Trojæ miserata labores,  
 Quæ nos, reliquias Danaum, terræque marisque  
 Omnibus exhaustos jam casibus, omnium egenos,  
 Urbe, domo, socias ! grates persolvere dignas 600  
 Non opis est nostræ, Dido, nec quidquid ubique est  
 Gentis Dardaniæ, magnum quæ sparsa per orbem.  
 Di tibi, si qua pios respectant numina, si quid  
 Usquam justitia est et mens sibi conscia recti,  
 Præmia digna ferant. Quæ te tam læta tulerunt  
 Sæcula ? qui tanti talem genuere parentes ?  
 In freta dum fluvii current, dum montibus umbræ  
 Lustrabunt convexa, polus dum sidera pascet :  
 Semper honos nomenque tuum, laudesque manebunt,  
 Quæ me cumque vocant terræ." Sic fatus, amicum 610  
 Ilionea petit dextra, lævaque Serestum ;  
 Post alios, fortemque Gyan, fortemque Cloanthum.

Obstupuit primo aspectu Sidonia Dido,  
 Casu deinde viri tanto ; et sic ore locuta est :  
 " Quis te, nate dea, per tanta pericula casus  
 Insequitur ? quæ vis immanibus applicat oris ?  
 Tune ille Æneas, quem Dardanio Anchisæ  
 Alma Venus Phrygii genuit Simoëntis ad undam ?  
 Atque equidem Teucrum memini Sidona venire,  
 Finibus expulsum patriis, nova regna petentem 620  
 Auxilio Beli : genitor tum Belus opimam  
 Vastabat Cyprum, et victor ditione tenebat :  
 Tempore jam ex illo casus mihi cognitus urbis  
 Trojanæ, nomenque tuum, regesque Pelasgi.  
 Ipse hostis Teucros insigni laude ferebat,  
 Seque ortum antiqua Teucrorum ab stirpe volebat.  
 Quare agite, o tectis, juvenes, succedite nostris.  
 Me quoque per multos similis fortuna labores  
 Jactatam hac demum voluit consistere terra.  
 Non ignara mali miseris succurrere disco." 630  
 Sic memorat : simul Ænean in regia ducit  
 Tecta ; simul divum templis indicit honorem.

Nec minus interea sociis ad litora mittit  
 Viginti tauros, magnorum horrentia centum  
 Terga suum, pingues centum cum matribus agnos,  
 Munera lætitiæque dii.

At domus interior regali splendida luxu  
 Instruitur, mediisque parant convivia tectis :  
 Arte laboratæ vestes ostroque superbo,  
 Ingens argentum mensis, cælataque in auro 640  
 Fortia facta patrum, series longissima rerum,  
 Per tot ducta viros antiqua ab origine gentis.

Æneas—neque enim patrius consistere mentem  
 Passus amor—rapidum ad naves præmittit Achaten,  
 Ascanio ferat hæc, ipsumque ad mœnia ducat.  
 Omnis in Ascanio cari stat cura parentis.  
 Munera præterea, Iliacis erepta ruinis,  
 Ferre jubet, pallam signis auroque rigentem,  
 Et circumtextum croceo velamen acantho,  
 Ornatus Argivæ Helenæ ; quos illa Mycenis, 650  
 Pergama quum peteret inconcessosque hymenæos,  
 Extulerat, matris Lædæ mirabile donum :  
 Præterea sceptrum, Ilione quod gesserat olim,  
 Maxima natarum Priami, colloque monile  
 Baccatum, et duplicem gemmis auroque coronam.  
 Hæc celerans, iter ad naves tendebat Achates.

At Cytherea novas artes, nova pectore versat  
 Consilia, ut faciem mutatus et ora Cupido  
 Pro dulci Ascanio veniat, donisque furem  
 Incendat reginam, atque ossibus implicet ignem ; 660  
 Quippe domum timet ambiguum Tyriosque bilingues.  
 Urit atrox Juno, et sub noctem cura recursat.  
 Ergo his aligerum dictis affatur Amorem :  
 “ Nate, meæ vires, mea magna potentia solus,  
 Nate, patris summi qui tela Typhoïa temnis,  
 Ad te confugio, et supplex tua numina posco.  
 Frater ut Æneas pelago tuus omnia circum  
 Litora jactetur odiis Junonis iniquæ,

Nota tibi ; et nostro doluisti sæpe dolore.  
Hunc Phœnissa tenet Dido, blandisque moratur 670  
Vocibus ; et vereor, quo se Junonia vertant  
Hospitia ; haud tanto cessabit cardine rerum.  
Quocirca capere ante dolis et cingere flamma  
Reginam meditor, ne quo se numine mutet ;  
Sed magno Æneæ mecum teneatur amore.  
Qua facere id possis, nostram nunc accipe mentem :  
Regius accitu cari genitoris ad urbem  
Sidoniam puer ire parat, mea maxima cura,  
Dona ferens, pelago et flammis restantia Trojæ :  
Hunc ego, sopitum somno, super alta Cythera 680  
Aut super Idalium sacrata sede recondam,  
Ne qua scire dolos, mediusve occurrere possit.  
Tu faciem illius noctem non amplius unam  
Falle dolo, et notos pueri puer indue vultus :  
Ut quum te gremio accipiet lætissima Dido  
Regales inter mensas laticemque Lyæum,  
Quum dabit amplexus atque oscula dulcia figet,  
Occultum inspire ignem, fallasque veneno.”  
Paret Amor dictis caræ genetricis, et alas  
Exuit, et gressu gaudens incedit Iuli. 690  
At Venus Ascanio placidam per membra quietem  
Irrigat, et fotum gremio dea tollit in altos  
Idaliæ lucos, ubi mollis amaracus illum  
Floribus et dulci aspirans complectitur umbra.  
Jamque ibat dicto parens, et dona Cupido  
Regia portabat Tyriis, duce lætus Achate.  
Quum venit, aulæis jam se regina superbis  
Aurea composuit sponda, mediamque locavit :  
Jam pater Æneas, et jam Trojana juvenus  
Conveniunt, stratoque super discumbitur ostro. 700  
Dant famuli manibus lymphas, Cereremque canistris  
Expediunt, tonsisque ferunt mantelia villis.  
Quinquaginta intus famulæ, quibus ordine longo  
Cura penum struere, et flammis adolere penates ;



Centum aliæ, totidemque pares ætate ministri,  
 Qui dapibus mensas onerant, et pocula ponunt.  
 Nec non et Tyrii per limina læta frequentes  
 Convenere, toris jussi discumbere pictis.

Mirantur dona Æneæ; mirantur Iulum,  
 Flagrantesque dei vultus, simulataque verba, 710  
 Pallamque, et pictum croceo velamen acantho.

Præcipue infelix, pesti devota futuræ,  
 Expleri mentem nequit, ardescitque tuendo  
 Phœnissa, et pariter puero donisque movetur.  
 Ille ubi complexu Æneæ colloque pependit,  
 Et magnum falsi implevit genitoris amorem,  
 Reginam petit. Hæc oculis, hæc pectore toto  
 Hæret; et interdum gremio foveat; inscia Dido  
 Insidat quantus miseræ deus! At memor ille  
 Matris Acidaliæ paulatim abolere Sychæum 720  
 Incipit, et vivo tentat prævertere amore  
 Jam pridem resides animos desuetaque corda.

Postquam prima quies epulis, mensæque remotæ,  
 Crateras magnos statuunt, et vina coronant.  
 Fit strepitus tectis, vocemque per ampla volutant  
 Atria; dependent lychni laquearibus aureis  
 Incensi, et noctem flammis funalia vincunt.  
 Hic regina gravem gemmis auroque poposcit  
 Implevitque mero pateram, quam Belus, et omnes  
 A Belo soliti; tum facta silentia tectis: 730

“Jupiter, hospitibus nam te dare jura loquuntur,  
 Hunc lætum Tyriisque diem Trojaque profectis  
 Esse velis, nostrosque hujus meminisse minores.  
 Adsit lætitiæ Bacchus dator, et bona Juno.  
 Et vos, o, cœtum, Tyrii, celebrate faventes.”  
 Dixit, et in mensam laticum libavit honorem,  
 Primaque, libato, summo tenus attigit ore;  
 Tum Bitiæ dedit increpitans: ille impiger hausit  
 Spumantem pateram, et pleno se proluit auro;  
 Post alii proceres. Cithara crinitus Iopas 740

Personat aurata, docuit quæ maximus Atlas.  
Hic canit errantem lunam solisque labores ;  
Unde hominum genus, et pecudes ; unde imber, et ignes ;  
Arcturum, pluviasque Hyadas, geminosque Triones ;  
Quid tantum oceano properent se tingere soles  
Hiberni, vel quæ tardis mora noctibus obstet.  
Ingeminant plausu Tyrri, Troësque sequuntur.  
Nec non et vario noctem sermone trahebat  
Infelix Dido, longumque bibebat amorem,  
Multa super Priamo rogitans, super Hectore multa ; 750  
Nunc, quibus Auroræ venisset filius armis ;  
Nunc, quales Diomedis equi ; nunc, quantus Achilles.  
“ Immo age, et a prima, dic, hospes, origine nobis  
Insidias,” inquit, “ Danaum, casusque tuorum,  
Erroresque tuos ; nam te jam septima portat  
Omnibus errantem terris et fluctibus æstas.”

## Æ N E I D O S

## LIBER SECUNDUS.



CONTIGUERE omnes, intentique ora tenebant.

Inde toro pater Æneas sic orsus ab alto :

“ Infandum, Regina, jubes renovare dolorem,

Trojanas ut opes et lamentabile regnum

Eruerint Danaï ; quæque ipse miserrima vidi,

Et quorum pars magna fui. Quis talia fando

Myrmidonum, Dolopumve, aut duri miles Ulixi,

Temperet a lacrimis ! et jam nox humida cœlo

Præcipitat, suadentque cadentia sidera somnos.

Sed si tantus amor casus cognoscere nostros, 10

Et breviter Trojæ supremum audire laborem,

Quanquam animus meminisse horret luctuque refugit,

Incipiam. Fracti bello fatisque repulsi

Ductores Danaum, tot jam labentibus annis,

Instar montis equum divina Palladis arte

Ædificant, sectaque intexunt abiete costas.

Votum pro reditu simulant ; ea fama vagatur.

Huc delecta virum sortiti corpora furtim

Includunt cæco lateri, penitusque cavernas

Ingentes utrumque armato milite complent. 20

“ Est in conspectu Tenedos, notissima fama

Insula, dives opum, Priami dum regna manebant,

Nunc tantum sinus et statio male fida carinis :

Huc se provecti deserto in litore condunt.

Nos abiisse rati, et vento petiisse Mycenæ.

Ergo omnis longo solvit se Teucria luctu.

Panduntur portæ ; juvat ire, et Dorica castra  
 Desertosque videre locos litusque relictum.  
 Hic Dolopum manus, hic sævus tendebat Achilles ;  
 Classibus hic locus, hic acie certare solebant. 30  
 Pars stupet innuptæ donum exitiale Minervæ,  
 Et molem mirantur equi ; primusque Thymœtes  
 Duci intra muros hortatur et arce locari,  
 Sive dolo, seu jam Trojæ sic fata ferebant.  
 At Capys, et quorum melior sententia menti,  
 Aut pelago Danaum insidias suspectaque dona  
 Præcipitare jubent, subjectisque urere flammis :  
 Aut terebrare cavas uteri et tentare latebras.  
 Scinditur incertum studia in contraria vulgus.

“ Primus ibi ante omnes, magna comitante caterva, 40  
 Laocoon ardens summa decurrit ab arce ;  
 Et procul : ‘ O miseri, quæ tanta insania, cives ?  
 Creditis avectos hostes ? aut ulla putatis  
 Dona carere dolis Danaum ? sic notus Ulixes ?  
 Aut hoc inclusi ligno occultantur Achivi,  
 Aut hæc in nostros fabricata est machina muros,  
 Inspectura domos, venturaque desuper urbi ;  
 Aut aliquis latet error : equo ne credite, Teucri.  
 Quidquid id est, timeo Danaos et dona ferentes.’  
 Sic fatus, validis ingentem viribus hastam 50  
 In latus inque feri curvam compagibus alvum  
 Contorsit. Stetit illa tremens, utroque recusso  
 Insonuere cavæ gemitumque dedere cavernæ.  
 Et, si fata deum, si mens non læva fuisset,  
 Impulerat ferro Argolicas fœdare latebras ;  
 Trojaque nunc stares, Priamique arx alta maneres.

“ Ecce, manus juvenem interea post terga revinctum  
 Pastores magno ad regem clamore trahebant  
 Dardanidæ, qui se ignotum venientibus ultro,  
 Hoc ipsum ut strueret, Trojamque aperiret Achivis, 60  
 Obtulerat, fidens animi, atque in utrumque paratus,  
 Seu versare dolos, seu certæ occumbere morti.

Undique visendi studio Trojana juvenus  
 Circumfusa ruit, certantque illudere capto.  
 Accipe nunc Danaum insidias, et crimine ab uno  
 Disce omnes.

Namque, ut conspectu in medio turbatus, inermis  
 Constitit, atque oculis Phrygia agmina circumspexit :  
 ‘Heu, quæ nunc tellus,’ inquit, ‘quæ me æquora possunt  
 Accipere ? aut quid jam misero mihi denique restat ? 70  
 Cui neque apud Danaos usquam locus, et super ipsi  
 Dardanidæ infensi pœnas cum sanguine poscunt.’  
 Quo gemitu conversi animi, compressus et omnis  
 Impetus. Hortamur fari, quo sanguine cretus,  
 Quidve ferat ; memoret, quæ sit fiducia capto.  
 Ille hæc, deposita tandem formidine, fatur :

“ ‘Cuncta equidem tibi, Rex, fuerit quodcumque, fatebor  
 Vera,’ inquit : ‘neque me Argolica de gente negabo :  
 Hoc primum ; nec, si miserum fortuna Sinonem  
 Finxit, vanum etiam mendacemque improba finget. 80  
 Fando aliquod si forte tuas pervenit ad aures  
 Belidæ nomen Palamedis et inclyta fama  
 Gloria : quem falsa sub proditione Pelasgi  
 Insontem, infando indicio, quia bella vetabat,  
 Demisere neci ; nunc cassum lumine lugent ;  
 Illi me comitem et consanguinitate propinquum  
 Pauper in arma pater primis huc misit ab annis :  
 Dum stabat regno incolumis, regumque vige-  
 bat Consiliis, et nos aliquod nomenque decusque  
 Gessimus. Invidia postquam pellacis Ulixi 90  
 (Haud ignota loquor) superis concessit ab oris :  
 Afflictus vitam in tenebris luctuque trahebam,  
 Et casum insontis mecum indignabar amici.  
 Nec tacui demens ; et me, fors si qua tulisset,  
 Si patrios unquam remeassem victor ad Argos,  
 Promisi ultorem ; et verbis odia aspera movi.  
 Hinc mihi prima mali labes ; hinc semper Ulixes  
 Criminibus terrere novis ; hinc spargere voces

In vulgum ambiguas, et quærere conscius arma.  
 Nec requievit enim, donec Calchante ministro— 100  
 Sed quid ego hæc autem nequidquam ingrata revolve ?  
 Quidve moror, si omnes uno ordine habetis Achivos,  
 Idque audire sat est ? jamdudum sumite pœnas :  
 Hoc Ithacus velit, et magno mercentur Atridæ.  
 Tum vero ardemus scitari et quærere causas,  
 Ignari scelerum tantorum artisque Pelasgæ.  
 Prosequitur pavitans, et ficto pectore fatur.  
 “ Sæpe fugam Danaï Troja cupiere relicta  
 Moliri, et longo fessi discedere bello.  
 Fecissentque utinam ! sæpe illos aspera ponti 110  
 Intercluserit hiems, et terruit auster euntes.  
 Præcipue, quum jam hic trabibus contextus acernis  
 Staret equus, toto sonuerunt æthere nimbi.  
 Suspensi Eurypylum scitatum oracula Phœbi  
 Mittimus ; isque adytis hæc tristia dicta reportat :  
 Sanguine placastis ventos et virgine cæsa,  
 Quum primum Iliacas Danaï venistis ad oras :  
 Sanguine quærendi reditus, animaque litandum  
 Argolica. Vulgi quæ vox ut venit ad aures, 120  
 Obstupuere animis, gelidusque per ima cucurrit  
 Ossa tremor, cui fata parent, quem poscat Apollo.  
 Hic Ithacus vatem magno Calchanta tumultu  
 Protrahit in medios ; quæ sint ea numina divum,  
 Flagitat. Et mihi jam multi crudele canebant  
 Artificis scelus, et taciti ventura videbant.  
 Bis quinos silet ille dies, tectusque recusat  
 Prodere voce sua quemquam, aut opponere morti.  
 Vix tandem magnis Ithaci clamoribus actus,  
 Composito rumpit vocem, et me destinat aræ.  
 Assensere omnes ; et, quæ sibi quisque timebat, 130  
 Unius in miseri exitium conversa tulere.  
 Jamque dies infanda aderat ; mihi sacra parari,  
 Et salsæ fruges, et circum tempora vittæ.  
 Eripui, fateor, leto me, et vincula rupi ;

Limosoque lacu per noctem obscurus in ulva  
 Delitui dum vela darent, si forte dedissent.  
 Nec mihi jam patriam antiquam spes ulla videndi,  
 Nec dulces natos exoptatumque parentem ;  
 Quos illi fors ad pœnas ob nostra reposcent  
 Effugia, et culpam hanc miserorum morte piabunt. 140  
 Quod te per superos et conscia numina veri,  
 Per, si qua est, quæ restet adhuc mortalibus usquam  
 Intemerata fides, oro, miserere laborum  
 Tantorum ; miserere animi non digna ferentis.'

" His lacrimis vitam damus, et miserescimus ultro.  
 Ipse viro primus manicas atque arcta levare  
 Vincula jubet Priamus, dictisque ita fatur amicis :  
 ' Quisquis es, amissos hinc jam obliviscere Graios :  
 Noster eris ; mihiq; hæc edissere vera roganti.  
 Quo molem hanc immanis equi statuere ? quis auctor ? 150  
 Quidve petunt ? quæ religio ? aut quæ machina belli ?'  
 Dixerat. Ille dolis instructus et arte Pelasga,  
 Sustulit exutas vinclis ad sidera palmas :  
 ' Vos æterni ignes, et non violabile vestrum  
 Testor numen,' ait ; ' vos aræ ensesque nefandi,  
 Quos fugi, vittæque deum, quas hostia gessi :  
 Fas mihi Graiorum sacrata resolvere jura,  
 Fas odisse viros, atque omnia ferre sub auras,  
 Si qua tegunt : teneor patriæ nec legibus ullis.  
 Tu modo promissis maneat, servataque serves 160  
 Troja fidem ; si vera feram, si magna rependam.

" " Omnis spes Danaum et cœpti fiducia belli  
 Palladis auxiliis semper stetit. Impius ex quo  
 Tydides sed enim, scelerumque inventor Ulixes,  
 Fatale aggressi sacrato avellere templo  
 Palladium, cæsis summæ custodibus arcis,  
 Corripuere sacram effigiem, manibusque cruentis  
 Virgineas ausi divæ contingere vittas ;  
 Ex illo fluere ac retro sublapsa referri  
 Spes Danaum, fractæ vires, aversa deæ mens. 170

Nec dubiis ea signa dedit Tritonia monstris.  
 Vix positum castris simulacrum : arsere coruscæ  
 Luminibus flammæ arrectis, salsusque per artus  
 Sudor iit ; terque ipsa solo, mirabile dictu,  
 Emicuit, parmamque ferens hastamque trementem.  
 Extemplo tentanda fuga canit æquora Calchas ;  
 Nec posse Argolicis excindi Pergama telis,  
 Omina ni repetant Argis, numenque reducant,  
 Quod pelago et curvis secum avexere carinis.  
 Et nunc, quod patrias vento petiere Mycenæ, 180  
 Arma deosque parant comites, pelagoque remenso  
 Improvisi aderunt. Ita digerit omina Calchas.  
 Hanc pro Palladio, moniti, pro numine læso,  
 Effigiem statuere, nefas quæ triste piaret.  
 Hanc tamen immensam Calchas attollere molem  
 Roboribus textis, cæloque educere jussit,  
 Ne recipi portis, aut duci in mœnia possit ;  
 Neu populum antiqua sub religione tueri.  
 Nam, si vestra manus violasset dona Minervæ,  
 Tum magnum exitium (quod di prius omen in ipsum 190  
 Convertant !) Priami imperio Phrygibusque futurum.  
 Sin manibus vestris vestram ascendisset in urbem,  
 Ultro Asiam magno Pelopea ad mœnia bello  
 Venturam, et nostros ea fata manere nepotes.  
 Talibus insidiis perjurique arte Sinonis  
 Credita res, captique dolis lacrimisque coactis,  
 Quos neque Tydides, nec Larissæus Achilles,  
 Non anni domuere decem, non mille carinæ.  
 “ Hic aliud majus miseris multoque tremendum  
 Objicitur magis, atque improvida pectora turbat. 200  
 Laocoon, ductus Neptuno sorte sacerdos,  
 Solemnes taurum ingentem mactabat ad aras.  
 Ecce autem gemini a Tenedo tranquilla per alta  
 (Horresco referens) immensis orbibus angues  
 Incumbunt pelago, pariterque ad litora tendunt ;  
 Pectora quorum inter fluctus arrecta jubæque



Sanguineæ exsuperant undas ; pars cetera pontum  
 Pone legit, sinuantque immensa volumine terga ;  
 Fit sonitus, spumante salo. Jamque arva tenebant,  
 Ardentesque oculos suffecti sanguine et igni, 210  
 Sibila lambebant linguis vibrantibus ora.  
 Diffugimus visu exsanguis : illi agmine certo  
 Laocoonta petunt. Et primum parva duorum  
 Corpora natorum serpens amplexus uterque  
 Implicat, et miseros morsu depascitur artus ;  
 Post ipsum, auxilio subeuntem ac tela ferentem,  
 Corripiunt, spirisque ligant ingentibus ; et jam  
 Bis medium amplexi, bis collo squamea circum  
 Terga dati, superant capite et cervicibus altis.  
 Ille simul manibus tendit divellere nodos, 220  
 Perfusus sanie vittas atroque veneno ;  
 Clamores simul horrendos ad sidera tollit :  
 Qualis mugitus, fugit quum saucius aram  
 Taurus, et incertam excussit cervice securim.  
 At gemini lapsu delubra ad summa dracones  
 Effugiunt, sævæque petunt Tritonidis arcem,  
 Sub pedibusque deæ, clipeique sub orbe teguntur.  
 Tum vero tremefacta novus per pectora cunctis  
 Insinuat pavor ; et scelus expendisse merentem  
 Laocoonta ferunt, sacrum qui cuspide robur 230  
 Læserit, et tergo sceleratam intorserit hastam.  
 Ducendum ad sedes simulacrum, orandaque divæ  
 Numina conclamant.  
 Dividimus muros, et mœnia pandimus urbis ;  
 Accingunt omnes operi, pedibusque rotarum  
 Subjiciunt lapsus, et stuppea vincula collo  
 Intendunt. Scandit fatalis machina muros,  
 Feta armis : pueri circum innuptæque puellæ  
 Sacra canunt, funemque manu contingere gaudent.  
 Illa subit, mediæque minans illabitur urbi. 240  
 O patria, o divûm domus Ilium, et inclyta bello  
 Mœnia Dardanidum ! quater ipso in limine portæ

Substitit, atque utero sonitum quater arma dedcre.  
 Instamus tamen immemores cæcique furore,  
 Et monstrum infelix sacrata sistimus arce.  
 Tunc etiam fatis aperit Cassandra futuris  
 Ora, dei jussu non unquam credita Teucris.  
 Nos delubra deum miseri, quibus ultimus esset  
 Ille dies, festa velamus fronde per urbem.  
 Vertitur interea cœlum, et ruit oceano nox,  
 Involvens umbra magna terramque polumque,  
 Myrmidonumque dolos; fusi per mœnia Teucri  
 Conticuere; sopor fessos complectitur artus.

250

“Et jam Argiva phalanx instructis navibus ibat  
 A Tenedo, tacitæ per amica silentia lunæ  
 Litora nota petens; flammæ quum regia puppis  
 Extulerat, fatisque deum defensus iniquis,  
 Inclusos utero Danaos et pinea furtim  
 Laxat claustra Sinon. Illos patefactus ad auras  
 Reddit equus; lætique cavo se robore promunt  
 Thessandrus Sthenelusque duces, et dirus Ulixes,  
 Demissum lapsi per funem, Acamasque, Thoasque,  
 Pelidesque Neoptolemus, primusque Machaon,  
 Et Menelaus, et ipse doli fabricator Epeos.  
 Invadunt urbem somno vinoque sepultam;  
 Cæduntur vigiles, portisque patentibus omnes  
 Accipiunt socios, atque agmina conscia jungunt.

260

“Tempus erat, quo prima quies mortalibus ægris  
 Incipit, et dono divum gratissima serpit.  
 In somnis, ecce, ante oculos mæstissimus Hector  
 Visus adesse mihi, largosque effundere fletus,  
 Raptatus bigis ut quondam, aterque cruento  
 Pulvere, perque pedes trajectus lora tumentes.  
 Hei mihi, qualis erat! quantum mutatus ab illo  
 Hectore, qui redit exuvias indutus Achilli,  
 Vel Danaum Phrygios jaculatus puppibus ignes!  
 Squalentem barbam, et concretos sanguine crines,  
 Vulnæraque illa gerens, quæ circum plurima muros

270

Accepit patrios. Ultro flens ipse videbar  
 Compellare virum, et mæstas expromere voces : 280  
 ‘ O lux Dardaniæ, spes o fidissima Teucrum,  
 Quæ tantæ tenuere moræ ? quibus Hector ab oris  
 Exspectate venis ? ut te post multa tuorum  
 Funera, post varios hominumque urbisque labores  
 Defessi aspicimus ! quæ causa indigna serenos  
 Fœdavit vultus ? aut cur hæc vulnera cerno ?’  
 Ille nihil ; nec me quærentem vana moratur :  
 Sed graviter gemitus imo de pectore ducens,  
 ‘ Heu ! fuge, nate dea, teque his,’ ait, ‘ eripe flammis.  
 Hostis habet muros ; ruit alto a culmine Troja. 290  
 Sat patriæ Priamoque datum. Si Pergama dextra  
 Defendi possent, etiam hac defensa fuissent.  
 Sacra suosque tibi commendat Troja penates ;  
 Hos cape fatorum comites ; his mœnia quære,  
 Magna pererrato statues quæ denique ponto.’  
 Sic ait ; et manibus vittas Vestamque potentem  
 Æternumque adytis effert penetralibus ignem.  
 “ Diverso interea miscentur mœnia luctu ;  
 Et magis atque magis, quanquam secreta parentis  
 Anchisæ domus arboribusque oblecta recessit, 300  
 Clarescunt sonitus, armorumque ingruit horror.  
 Excutior somno, et summi fastigia tecti  
 Ascensu supero, atque arrectis auribus adsto ;  
 In segetem veluti quum flamma furentibus austris  
 Incidit, aut rapidus montano flumine torrens  
 Sternit agros, sternit sata læta boumque labores,  
 Præcipientesque trahit silvas ; stupet inscius alto  
 Accipiens sonitum saxi de vertice pastor.  
 Tum vero manifesta fides, Danaumque patescunt  
 Insidiæ. Jam Deïphobi dedit ampla ruinam, 310  
 Vulcano superante, domus ; jam proximus ardet  
 Ucalegon ; Sigea igni freta late relucet :  
 Exoritur clamorque virum clangorque tubarum.  
 Arma amens capio ; nec sat rationis in armis :

Sed glomerare manum bello, et concurrere in arcem  
Cum sociis ardent animi. Furor iraque mentem  
Præcipitant; pulchrumque mori succurrit in armis.

“Ecce autem telis Panthus elapsus Achivum,  
Panthus Othryades, arcis Phœbique sacerdos, 320  
Sacra manu victosque deos, parvumque nepotem  
Ipse trahit, cursuque amens ad limina tendit.

‘Quo res summa loco, Panthu? quam prendimus arcem?’

Vix ea fatus eram, gemitu quum talia reddit:

‘Venit summa dies et ineluctabile tempus  
Dardaniæ. Fuimus Troës; fuit Ilium, et ingens  
Gloria Teucrorum. Ferus omnia Jupiter Argos  
Transtulit: incensa Danai dominantur in urbe.

Arduus armatos mediis in mœnibus adstans  
Fundit equus, victorque Sinon incendia miscet, 330  
Insultans. Portis alii bipatientibus adsunt,  
Millia quot magnis unquam venere Mycenis;

Obsedere alii telis angusta viarum

Oppositi; stat ferri acies mucrone corusco  
Stricta, parata neci; vix primi prælia tentant  
Portarum vigiles, et cæco Marte resistunt.’

Talibus Othryadæ dictis et numine divum  
In flammæ et in arma feror, quo tristis Erinys,  
Quo fremitus vocat et sublatus ad æthera clamor.

Addunt se socios Rhipeus et maximus armis 340

Epytus, oblatus per lunam, Hypanisque Dymasque,

Et lateri agglomerant nostro, juvenisque Corœbus

Mygdonides. Illis ad Trojam forte diebus

Venerat, insano Cassandræ incensus amore;

Et gener auxilium Priamo Phrygibusque ferebat,

Infelix, qui non sponsæ præcepta furentis

Audierit.

Quos ubi confertos audere in prælia vidi,

Incipio super his: ‘Juvenes, fortissima frustra

Pectora, si vobis audentem extrema cupido

Certa sequi: quæ sit rebus fortuna, videtis: 350

Excessere omnes, adytis arisque relictis,  
 Di, quibus imperium hoc steterat; succurritis urbi  
 Incensæ: moriamur et in media arma ruamus.  
 Una salus victis nullam sperare salutem.  
 Sic animis juvenum furor additus. Inde, lupi ceu  
 Raptores atra in nebula, quos improba ventris  
 Exegit cæcos rabies, catulique relict  
 Faucibus expectant siccis; per tela, per hostes  
 Vadimus haud dubiam in mortem, mediæque tenemus  
 Urbis iter: nox atra cava circumvolat umbra. 360  
 Quis cladem illius noctis, quis funera fando  
 Explicet, aut possit lacrimis æquare labores?  
 Urbs antiqua ruit, multos dominata per annos:  
 Plurima perque vias sternuntur inertia passim  
 Corpora, perque domos, et religiosa deorum  
 Limina. Nec soli pœnas dant sanguine Teucri;  
 Quondam etiam victis redit in præcordia virtus,  
 Victoresque cadunt Danai. Crudelis ubique  
 Luctus, ubique pavor, et plurima mortis imago.  
 "Primus se, Danaum magna comitante caterva, 370  
 Androgeüs offert nobis, socia agmina credens  
 Inscius, atque ultro verbis compellat amicis:  
 'Festinate, viri: non quæ tam sera moratur  
 Segnities? alii rapiunt incensa feruntque  
 Pergama: vos celsis nunc primum a navibus itis?'  
 Dixit; et extemplo—neque enim responsa dabantur  
 Fida satis—sensit medios delapsus in hostes.  
 Obstupuit, retroque pedem cum voce repressit.  
 Improvisum aspris veluti qui sentibus anguem  
 Pressit humi nitens, trepidusque repente refugit 380  
 Attollentem iras, et cærule colla tumentem:  
 Haud secus Androgeüs visu tremefactus abibat.  
 Irruimus, densis et circumfundimur armis;  
 Ignarosque loci passim et formidine captos  
 Sternimus. Aspirat primo fortuna labori.  
 Atque hic successu exsultans animisque Corœbus,

'O socii, qua prima,' inquit, 'fortuna salutis  
 Monstrat iter, quaque ostendit se dextra, sequamur :  
 Mutemus clipeos, Danaumque insignia nobis  
 Aptemus. Dolus, an virtus, quis in hoste requirat ? 390  
 Arma dabunt ipsi.' Sic fatus, deinde comantem  
 Androgeï galeam clipeique insigne decorum  
 Induitur, laterique Argivum accommodat ensem.  
 Hoc Rhipeus, hoc ipse Dymas, omnisque juvenus  
 Læta facit ; spoliis se quisque recentibus armat.  
 Vadimus immixti Danaïs haud numine nostro,  
 Multaque per cæcam congressi prælia noctem  
 Conserimus ; multos Danaum demittimus Orco.  
 Diffugiunt alii ad naves, et litora cursu  
 Fida petunt ; pars ingentem formidine turpi 400  
 Scandunt rursus equum, et nota conduntur in alvo.

"Heu nihil invitis fas quemquam fidere divis !  
 Ecce trahebatur passis Priameïa virgo  
 Crinibus a templo Cassandra adytisque Minervæ,  
 Ad cælum tendens ardentia lumina frustra,  
 Lumina,—nam teneras arcebant vincula palmas.  
 Non tulit hanc speciem furiata mente Coræbus,  
 Et sese medium injecit periturus in agmen.  
 Consequimur cuncti, et densis incurrimus armis.  
 Hic primum ex alto delubri culmine telis 410  
 Nostrorum obruimur, oriturque miserrima cædes  
 Armorum facie et Graiarum errore jubarum.  
 Tum Danai gemitu atque ereptæ virginis ira  
 Undique collecti invadunt, acerrimus Ajax,  
 Et gemini Atridæ, Dolopumque exercitus omnis :  
 Adversi rupto ceu quondam turbine venti  
 Confligunt, Zephyrusque, Notusque, et lætus Eoïs  
 Euris equis : stridunt silvæ, sævitque tridenti  
 Spumeus atque imo Nereus ciet æquora fundo.  
 Illi etiam, si quos obscura nocte per umbram 420  
 Fudimus insidiis, totaque agitavimus urbe,  
 Apparent ; primi clipeos mentitaque tela

Agnoscunt, atque ora sono discordia signant.  
 Illicet obruimur numero : primusque Corœbus  
 Penelei dextra divæ armipotentis ad aram  
 Procumbit ; cadit et Rhipeus, justissimus unus  
 Qui fuit in Teucris, et servantissimus æqui :  
 Dis aliter visum. Pereunt Hypanisque Dymasque,  
 Confixi a sociis ; nec te tua plurima, Panthu,  
 Labentem pietas, nec Apollinis infula textit. 430  
 Iliaci cineres, et flamma extrema meorum,  
 Testor, in occasu vestro nec tela nec ulla  
 Vitavisse vices Danaum ; et si fata fuissent,  
 Ut caderem, meruisse manu. Divellimur inde :  
 Iphitus et Pelias mecum ; quorum Iphitus ævo  
 Jam gravior, Pelias et vulnere tardus Ulixi ;  
 Protinus ad sedes Priami clamore vocati.  
 Hic vero ingentem pugnam, ceu cetera nusquam  
 Bella forent, nulli tota morerentur in urbe,  
 Sic Martem indomitum, Danaosque ad tecta ruentes 440  
 Cernimus, obsessumque acta testudine limen.  
 Hærent parietibus scalæ, postesque sub ipsos  
 Nituntur gradibus, clipeosque ad tela sinistris  
 Protecti obijciunt, prensant fastigia dextris.  
 Dardanidæ contra turres ac tecta domorum  
 Culmina convellunt : his se, quando ultima cernunt,  
 Extrema jam in morte parant defendere telis,  
 Auratasque trabes, veterum decora alta parentum,  
 Devolvunt : alii strictis mucronibus imas  
 Obsedere fores ; has servant agmine denso. 450  
 Instaurati animi, regis succurrere tectis,  
 Auxilioque levare viros, vimque addere victis.  
 "Limen erat, cæcæque fores, et pervius usus  
 Tectorum inter se Priami, postesque relict  
 A tergo ; infelix qua se, dum regna manebant,  
 Sæpius Andromache ferre incommitata solebat  
 Ad soceros, et avo puerum Astyanacta trahebat.  
 Evado ad summi fastigia culminis, unde

Tela manu miseri jactabant irrita Teucri.

Turrim, in præcipiti stantem summisque sub astra 460

Eductam tectis, unde omnis Troja videri,

Et Danaum solitæ naves, et Achaïa castra,

Aggressi ferro circum, quo summa labantes

Juncturas tabulata dabant, convellimus altis

Sedibus, impulimusque : ea lapsa repente ruinam

Cum sonitu trahit, et Danaum super agmina late

Incidit. Ast alii subeunt ; nec saxa, nec ullum

Telorum interea cessat genus.

“ Vestibulum ante ipsum primoque in limine Pyrrhus

Exsultat, telis et luce coruscus athena : 470

Qualis ubi in lucem coluber, mala gramina pastus,

Frigida sub terra tumidum quem bruma tegebat,

Nunc positis novus exuviis nitidusque juvena,

Lubrica convolvit sublato pectore terga

Arduus ad solem, et linguis micat ore trisulcis.

Una ingens Periphas et equorum agitator Achillis

Armiger Automedon, una omnis Scyria pubes

Succedunt tecto, et flammæ ad culmina jactant.

Ipsæ inter primos correpta dura bipenni

Limina perrumpit, postesque a cardine vellit 480

Æratos ; jamque excisa trabe firma cavavit

Robora, et ingentem lato dedit ore fenestram.

Apparet domus intus, et atria longa patescunt ;

Apparent Priami et veterum penetralia regum ;

Armatisque vident stantes in limine primo.

“ At domus interior gemitu miseroque tumultu

Miscetur ; penitusque cavæ plangoribus ædes

Femineis ululant ; ferit aurea sidera clamor.

Tum pavidæ tectis matres ingentibus errant,

Amplexæque tenent postes, atque oscula figunt. 490

Instat vi patria Pyrrhus ; nec claustra, neque ipsi

Custodes sufferre valent. Labat ariete crebro

Janua, et emoti procumbunt cardine postes.

Fit via vi : rumpunt aditus, primosque trucidant



Immissi Danai, et late loca milite complent.  
 Non sic, aggeribus ruptis quum spumeus amnis  
 Exiit, oppositasque evicit gurgite moles,  
 Fertur in arva furens cumulo, camposque per omnes  
 Cum stabulis armenta trahit. Vidi ipse furentem  
 Cæde Neoptolemum, geminosque in limine Atridas: 500  
 Vidi Hecubam centumque nurus, Priamumque per aras  
 Sanguine fœdantem, quos ipse sacraverat, ignes.  
 Quinquaginta illi thalami, spes tanta nepotum,  
 Barbarico postes auro spoliisque superbi,  
 Procubuere: tenent Danai, qua deficit ignis.

“Forsitan et Priami fuerint quæ fata, requiras.  
 Urbis uti captæ casum convulsaque vidit  
 Limina tectorum, et medium in penetralibus hostem,  
 Arma diu senior desueta trementibus ævo  
 Circumdat nequidquam humeris, et inutile ferrum 510  
 Cingitur, ac densos fertur moriturus in hostes.  
 Ædibus in mediis, nudoque sub ætheris axe,  
 Ingens ara fuit, juxtaque veterrima laurus,  
 Incumbens aræ atque umbra complexa penates.  
 Hic Hecuba et natæ nequidquam altaria circum,  
 Præcipites atra ceu tempestate columbæ,  
 Condensæ et divum amplexæ simulacra sedebant.  
 Ipsum autem sumtis Priamum juvenalibus armis  
 Ut vidit,—‘Quæ mens tam dira, miserrime conjux,  
 Impulit his cingi telis? aut quo ruis?’ inquit. 520  
 ‘Non tali auxilio, nec defensoribus istis  
 Tempus eget; non, si ipse meus nunc afforet Hector.  
 Huc tandem concede; hæc ara tuebitur omnes,  
 Aut moriere simul.’ Sic ore effata recepit  
 Ad sese, et sacra longævum in sede locavit.

“Ecce autem elapsus Pyrrhi de cæde Polites,  
 Unus natorum Priami, per tela, per hostes  
 Porticibus longis fugit, et vacua atria lustrat  
 Saucius. Illum ardens infesto vulnere Pyrrhus  
 Insequitur, jam jamque manu tenet, et premit hasta. 530

Ut tandem ante oculos evasit et ora parentum,  
Concidit, ac multo vitam cum sanguine fudit.  
Hic Priamus, quanquam in media jam morte tenetur,  
Non tamen abstinuit, nec voci iræque pepercit.  
‘At tibi pro scelere,’ exclamat, ‘pro talibus ausis,  
Di, si qua est cœlo pietas, quæ talia curet,  
Persolvant grates dignas, et præmia reddant  
Debita, qui nati coram me cernere letum  
Fecisti, et patrios fœdasti funere vultus.  
At non ille, satum quo te mentiris, Achilles  
Talis iu hoste fuit Priamo; sed jura fidemque  
Supplicis erubuit, corpusque exsanguie sepulcro  
Reddidit Hectoreum, meque in mea regna remisit.’  
Sic fatus senior, telumque imbelle sine ictu  
Conjecit; rauco quod protinus ære repulsum,  
Et summo clipei nequidquam umbone pependit.  
Cui Pyrrhus: ‘Referes ergo hæc, et nuncius ibis  
Pelidæ genitori: illi mea tristia facta  
Degeneremque Neoptoleum narrare memento.  
Nunc morere.’ Hoc dicens, altaria ad ipsa trementem 550  
Traxit et in multo lapsantem sanguine nati,  
Implicuitque comam læva, dextraque coruscum  
Extulit ac lateri capulo tenus abdidit ensem.  
Hæc finis Priami fatorum; hic exitus illum  
Sorte tulit, Trojam incensam et prolapsa videntem  
Pergama, tot quondam populis terrisque superbum  
Regnatorem Asiæ. Jacet ingens litore truncus,  
Avulsumque humeris caput, et sine nomine corpus  
“At me tum primum sævus circumstetit horror:  
Obstupui; subiit cari genitoris imago,  
Ut regem æquævum crudeli vulnere vidi  
Vitam exhalantem; subiit deserta Creüsa,  
Et direpta domus, et parvi casus Iuli.  
Respicio, et quæ sit me circum copia lustrò.  
Deseruere omnes defessi; et corpora saltu  
Ad terram misere aut ignibus ægra dedere

540

560

“[Jamque adeo super unus eram ; quum limina Vestæ  
 Servantem et tacitam secreta in sede latentem  
 Tyndarida aspicio ; dant clara incendia lucem  
 Erranti, passimque oculos per cuncta ferenti. † 570  
 Illa sibi infestos eversa ob Pergama Teucros,  
 Et pœnas Danaum et deserti conjugis iras  
 Præmetuens, Trojæ et patriæ communis Erinys,  
 Abdiderat sese, atque aris invisa sedebat.  
 Exarsere ignes animo ; subit ira cadentem  
 Ulcisci patriam, et sceleratas sumere pœnas :  
 Scilicet hæc Spartam incolumis patriasque Mycenæ  
 Aspiciet, partoque ibit regina triumpho ?  
 Conjugiumque, domumque, patres, natosque videbit,  
 Iliadum turba et Phrygiis comitata ministris ? 580  
 Occiderit ferro Priamus ? Troja arserit igni ?  
 Dardanium toties sudarit sanguine litus ?  
 Non ita. Namque, etsi nullum memorabile nomen  
 Feminea in pœna est nec habet victoria laudem,  
 Exstinxisse nefas tamen et sumsisse merentes  
 Laudabor pœnas ; animumque explesse juvabit  
 Ultricis flammæ, et cineres satiasse meorum.  
 Talia jactabam, et furiata mente ferebar ;]  
 Quum mihi se, non ante oculis tam clara, videndam  
 Obtulit, et pura per noctem in luce refulsit 590  
 Alma parens, confessa deam, qualisque videri  
 Cœlicolis et quanta solet ; dextraque prehensum  
 Continuit, roseoque hæc insuper addidit ore :  
 ‘ Nate, quis indomitas tantus dolor excitat iras ?  
 Quid furis ? aut quonam nostri tibi cura recessit ?  
 Non prius aspicias, ubi fessum ætate parentem  
 Liqueris Anchisen ? superet conjuxne Creüsa,  
 Ascaniusque puer ? quos omnes undique Graiæ  
 Circum errant acies, et, ni mea cura resistat,  
 Jam flammæ tulerint, inimicus et hauserit ensis. 600  
 Non tibi Tyndaridis facies invisa Lacænæ,  
 Culpatusve Paris ; divum inclementia, divum,

Has evertit opes, sternitque a culmine Trojam.  
 Aspice : namque omnem, quæ nunc obducta tuenti  
 Mortales hebetat visus tibi, et humida circum  
 Caligat, nubem eripiam : tu ne qua parentis  
 Jussa time, neu præceptis parere recusa.

Hic, ubi disjectas moles avulsaque saxis  
 Saxa vides, mixtoque undantem pulvere fumum,  
 Neptunus muros magnoque emota tridenti  
 Fundamenta quatit, totamque ab sedibus urbem  
 Eruit. Hic Juno Scæas sævissima portas  
 Prima tenet, sociumque furens a navibus agmen  
 Ferro accincta vocat.

610

Jam summas arces Tritonia, respice, Pallas  
 Insedit, nimbo effulgens et Gorgone sæva,  
 Ipse Pater Danaïs animos viresque secundas  
 Sufficit ; ipse deos in Dardana suscitât arma.  
 Eripe, nate, fugam, finemque impone labori.  
 Nusquam abero, et tutum patrio te limine sistam.’  
 Dixerat ; et spissis noctis se condidit umbris.  
 Apparent diræ facies, inimicaque Trojæ  
 Numina magna deum.

620

“Tum vero omne mihi visum considerare in ignes  
 Ilium, et ex imo verti Neptunia Troja ;  
 Ac veluti summis antiquam in montibus ornum  
 Quum ferro accisam crebrisque bipennibus instant  
 Eruere agricolæ certatim ; illa usque minatur,  
 Et tremefacta comam concusso vertice nutat,  
 Vulneribus donec paulatim evicta supremum  
 Congemuit, traxitque jugis avulsa ruinam.

630

Descendo, ac ducente deo flammam inter et hostes  
 Expedior ; dant tela locum, flammæque recedunt.

“Atque ubi jam patriæ perventum ad limina sedis  
 Antiquasque domos, genitor, quem tollere in altos  
 Optabam primum montes, primumque petebam,  
 Abnegat excisa vitam producere Troja,  
 Exsiliumque pati. ‘Vos o, quibus integer ævi

Sanguis,' ait, 'solidæque suo stant robore vires,  
Vos agitate fugam.

640

Me si coelicolæ voluissent ducere vitam :

Has mihi servassent sedes. Satis una superque

Vidimus excidia, et captæ superavimus urbi.

Sic o, sic positum affati discedite corpus.

Ipse manu mortem inveniam : miserebitur hostis,

Exuviasque petet. Facilis jactura sepulcri.

Jam pridem invisus divis, et inutilis, annos

Demoror, ex quo me divum pater atque hominum rex

Fulminis afflavit ventis, et contigit igni.'

Talia perstabat memorans, fixusque manebat.

650

Nos contra effusi lacrimis, conjuxque Creüsa,

Ascaniusque, omnisque domus, ne vertere secum

Cuncta pater, fatoque urgenti incumbere vellet.

Abnegat, inceptoque et sedibus hæret in isdem.

Rursus in arma feror, mortemque miserrimus opto,

Nam quod consilium aut quæ jam fortuna dabatur ?

'Mene efferre pedem, genitor, te posse relicto

Sperasti ? tantumque nefas patrio excidit ore ?

Si nihil ex tanta superis placet urbe relinqui,

Et sedet hoc animo, perituræque addere Trojæ

660

Teque tuosque juvat, patet isti janua leto ;

Jamque aderit multo Priami de sanguine Pyrrhus,

Natum ante ora patris, patrem qui obtruncat ad aras.

Hoc erat, alma parens, quod me per tela, per ignes

Eripis, ut mediis hostem in penetralibus, utque

Ascanium, patremque meum, juxtaque Creüsam,

Alterum in alterius mactatos sanguine cernam ?

Arma, viri, ferte arma : vocat lux ultima victos.

Reddite me Danais ; sinite instaurata revisam

Prælia. Nunquam omnes hodie moriemur inulti.'

670

"Hinc ferro accingor rursus, clipeoque sinistram

Insertabam aptans, meque extra tecta ferebam.

Ecce autem complexa pedes in limine conjux

Hærebat, parvumque patri tendebat Iulum :

'Si periturus abis, et nos rape in omnia tecum ;  
 Sin aliquam expertus sumtis spem ponis in armis,  
 Hanc primum tutare domum. Cui parvus Iulus,  
 Cui pater, et conjux quondam tua dicta relinquo?' \*

"Talia vociferans gemitu tectum omne replebat ;  
 Quum subitum dictuque oritur mirabile monstrum. 680  
 Namque manus inter mæstorumque ora parentum  
 Ecce levis summo de vertice visus Iuli

Fundere lumen apex, tactuque innoxia molles  
 Lambere flamma comas, et circum tempora pasci.  
 Nos pavidī trepidare metu, crinemque flagrantem  
 Excutare, et sanctos restinguere fontibus ignes.

At pater Anchises oculos ad sidera lætus  
 Extulit, et cœlo palmas cum voce tetendit :

'Jupiter omnipotens, precibus si flecteris ullis,  
 Aspice nos ; hoc tantum ; et, si pietate meremur, 690  
 Da deinde auxilium, pater, atque hæc omina firma.'

"Vix ea fatus erat senior ; subitoque fragore  
 Intonuit lævum, et de cœlo lapsa per umbras  
 Stella facem ducens multa cum luce cucurrit.

Illam, summa super labentem culmina tecti,  
 Cernimus Idæa claram se condere silva,  
 Signantemque vias ; tum longo limite sulcus  
 Dat lucem, et late circum loca sulfure fumant.

Hic vero victus genitor se tollit ad auras,  
 Affaturque deos, et sanctum sidus adorat. 700

'Jam jam nulla mora est ; sequor, et qua ducitis, adsum.  
 Di patrii, servate domum, servate nepotem !

Vestrum hoc augurium, vestroque in numine Troja est.  
 Cedo equidem, nec, nate, tibi comes ire recuso.'

Dixerat ille ; et jam per mœnia clarior ignis  
 Auditur, propiusque æstus incendia volvunt.

'Ergo age, care pater, cervici imponere nostræ ;  
 Ipse subibo humeris, nec me labor iste gravabit ;  
 Quo res cumque cadent, unum et commune periculum,  
 Una salus ambobus erit. Mihi parvus Iulus 710

Sit comes, et longe servet vestigia conjux.  
 Vos, famuli, quæ dicam, animis advertite vestris.  
 Est urbe egressis tumulus templumque vetustum  
 Desertæ Cereris, juxtaque antiqua cupressus,  
 Religione patrum multos servata per annos :  
 Hanc ex diverso sedem veniemus in unam.  
 Tu, genitor, cape sacra manu patriosque penates :  
 Me, bello e tanto digressum et cæde recenti,  
 Attrectare nefas, donec me flumine vivo  
 Abluero.'

720

Hæc fatus, latos humeros subjectaque colla  
 Veste super fulvique insternor pelle leonis ;  
 Succedoque oneri. Dextræ se parvus Iulus  
 Implicuit, sequiturque patrem non passibus æquis :  
 Pone subit conjux : ferimur per opaca locorum.  
 Et me, quem dudum non ulla injecta movebant  
 Tela, neque adverso glomerati ex agmine Graii,  
 Nunc omnes terrent auræ, sonus excitat omnis,  
 Suspensum et pariter comitique onerique timentem.  
 Jamque propinquabam portis, omnemque videbar 730  
 Evasisse vicem ; subito quum creber ad aures  
 Visus adesse pedum sonitus, genitorque per umbram  
 Prospiciens, 'Nate,' exclamat, 'fuge, nate ; propinquant ;  
 Ardentes clipeos atque æra micantia cerno.'  
 Hic mihi nescio quod trepido male numen amicum  
 Confusam eripuit mentem. Namque avia cursu  
 Dum sequor, et nota excedo regione viarum,  
 Heu ! misero conjux fatone erepta Creüsa  
 Substitit, erravitne via, seu lassa resedit,  
 Incertum ; nec post oculis est reddita nostris. 740  
 Nec prius amissam respexi, animumve reflexi,  
 Quam tumulum antiquæ Cereris sedemque sacratam  
 Venimus : hic demum collectis omnibus una  
 Defuit ; et comites, natumque, virumque fefellit.  
 Quem non incusavi amens hominumque deorumque ?  
 Aut quid in eversa vidi crudelius urbe ?

Ascanium, Anchisenque patrem, Teucrosque penates  
 Commendo sociis, et curva valle recondo ;  
 Ipse urbem repeto, et cingor fulgentibus armis.  
 Stat casus renovare omnes, omnemque reverti 750  
 Per Trojam, et rursus caput objectare periclis.  
 Principio muros obscuraque limina portæ,  
 Qua gressum extuleram, repeto ; et vestigia retro  
 Observata sequor per noctem et lumine lustrō.  
 Horror ubique animos, simul ipsa silentia terrent.  
 Inde domum, si forte pedem, si forte tulisset,  
 Me refero. Irruerant Danaï, et tectum omne tenebant.  
 (Ilicet) ignis edax summa ad fastigia vento  
 Volvitur ; exsuperant flammæ ; furit æstus ad auras.  
 Procedo, et Priami sedes arcemque reviso. 760  
 Et jam porticibus vacuis Junonis asylo  
 Custodes lecti Phœnix et dirus Ulixes  
 Prædam asservabant. Huc undique Troïa gaza  
 Incensis erepta adytis, mensæque deorum,  
 Crateresque auro solidi, captivæque vestis  
 Congeritur. Pueri et pavidæ longo ordine matres  
 Stant circum.  
 Ausus quin etiam voces jactare per umbram,  
 Implevi clamore vias, mæstusque Creüsam  
 Nequidquam ingeminans iterumque iterumque vocavi. 770  
 Quærenti, et tectis urbis sine fine furenti,  
 Infelix simulacrum atque ipsius umbra Creüsæ  
 Visa mihi ante oculos, et nota major imago.  
 Obstupui, steteruntque comæ, et vox faucibus hæsit.  
 Tum sic affari, et curas his demere dictis :  
 ‘ Quid tantum insano juvat indulgere dolori,  
 O dulcis conjux ? non hæc sine numine divum  
 Eveniunt : nec te [hinc] comitem asportare Creüsam  
 Fas, aut ille sinit superi regnator Olympi.  
 Longa tibi exsilia, et vastum maris æquor arandum. 780  
 Et terram Hesperiam venies, ubi Lydius arva  
 Inter opima virum leni fluit agmine Thybris .



Illic res lætæ, regnumque, et regia conjux  
Parta tibi ; lacrimas dilectæ pelle Creüsæ.  
Non ego Myrmidonum sedes Dolopumve superbas  
Aspiciam, aut Graiis servitum matribus ibo,  
Dardanis, et divæ Veneris nurus :  
Sed me magna deûm genetrix his detinet oris.  
Jamque vale, et nati serva communis amorem.  
Hæc ubi dicta dedit, lacrimantem, et multa volentem 790  
Dicere, deseruit, tenuesque recessit in auras.  
Ter conatus ibi collo dare brachia circum ;  
Ter frustra compressa manus effugit imago,  
Par levibus ventis, volucrique simillima somno.  
Sic demum socios consumpta nocte reviso.

“Atque hic ingentem comitum affluxisse novorum  
Invenio admirans numerum, matresque, virosque,  
Collectam exsilio pubem, miserabile vulgus.  
Undique convenere, animis opibusque parati,  
In quascumque velim pelago deducere terras. 800  
Jamque jugis summæ surgebat Lucifer Idæ,  
Ducebatque diem ; Danaïque obsessa tenebant  
Limina portarum ; nec spes opis ulla dabatur.  
Cessi, et sublato montem genitore petivi.

P. VIRGILII MARONIS

Æ N E I D O S

LIBER TERTIUS.

~~~~~

“POSTQUAM res Asiæ Priamique evertere gentem  
Immeritam visum superis, ceciditque superbum  
Ilium, et omnis humo fumat Neptunia Troja ;  
Diversa exsilia et desertas quærere terras  
Auguriis agimur divum, classemque sub ipsa  
Antandro et Phrygiæ molimur montibus Idæ,  
Incerti quo fata ferant, ubi sistere detur ;  
Contrahimusque viros. Vix prima inceperat æstas ;  
Et pater Anchises dare fatis vela jubebat ;  
Litora quum patriæ lacrimans portusque relinquo 10  
Et campos, ubi Troja fuit. Feror exsul in altum  
Cum sociis natoque penatibus et magnis dis.

“Terra procul vastis colitur Mavortia campis,  
Thraces arant, acri quondam regnata Lycurgo ;  
Hospitium antiquum Trojæ, sociique penates,  
Dum fortuna fuit. Feror huc, et litore curvo  
Mœnia prima loco, fatis ingressus iniquis ;  
Æneadasque meo nomen de nomine fingo.

“Sacra Dionææ matri divisque ferebam 20  
Auspiciis cœptorum operum ; superoque nitentem  
Cœlicolum regi mactabam in litore taurum.  
Forte fuit juxta tumulus, quo cornea summo  
Virgulta, et densis hastilibus horrida myrtus.  
Accessi ; viridemque ab humo convellere silvam

Conatus, ramis tegerem ut frondentibus aras,  
 Horrendum et dictu video mirabile monstrum.  
 Nam quæ prima solo ruptis radicibus arbos  
 Vellitur, huic atro liquuntur sanguine guttæ,  
 Et terram tabo maculant. Mihi frigidus horror  
 Membra quatit, gelidusque coit formidine sanguis. 30  
 Rursus et alterius lentum convellere vimen  
 Insequor, et causas penitus tentare latentes;  
 Ater et alterius sequitur de cortice sanguis.  
 Multa movens animo, Nymphas venerabar agrestes,  
 Gradivumque patrem Geticis qui præsidet arvis,  
 Rite secundarent visus, omenque levarent.  
 Tertia sed postquam majore hastilia nisu  
 Aggredior, genibusque adversæ obluctor arenæ:  
 Eloquar, an sileam? gemitus lacrimabilis imo  
 Auditur tumulo, et vox reddita fertur ad aures: 40  
 'Quid miserum, Ænea, laceras? jam parce sepulto;  
 Parce pias scelerare manus. Non me tibi Troja  
 Externum tulit; aut cruor hic de stipite manat.  
 Heu! fuge crudeles terras, fuge litus avarum.  
 Nam Polydorus ego. Hic confixum ferrea textit  
 Telorum seges, et jaculis increvit acutis.'  
 Tum vero ancipiti mentem formidine pressus  
 Obstupui, steteruntque comæ, et vox faucibus hæsit.  
 "Hunc Polydorum auri quondam cum pondere magno  
 Infelix Priamus furtim mandarat alendum 50  
 Threicio regi, quum jam diffideret armis  
 Dardaniæ, cingique urbem obsidione videret.  
 Ille, ut opes fractæ Teucrum, et fortuna recessit,  
 Res Agamemnonias victriciaque arma secutus,  
 Fas omne abrumpit, Polydorum obtruncat, et auro  
 Vi potitur. Quid non mortalia pectora cogis,  
 Auri sacra fames! Postquam pavor ossa reliquit,  
 Delectos populi ad proceres, primumque parentem,  
 Monstra deum refero, et quæ sit sententia, posco.  
 Omnibus idem animus scelerata excedere terra, 60

Linqui pollutum hospitium, et dare classibus austros.  
Ergo instauramus Polydoro funus, et ingens  
Aggeritur tumulo tellus ; stant manibus aræ,  
Cæruleis mæstæ vittis atraque cupresso,  
Et circum Iliades crinem de more solutæ :  
Inferimus tepido spumantia cymbia lacte,  
Sanguinis et sacri pateras : animamque sepulcro  
Condimus, et magna supremum voce cimus.

“ Inde ubi prima fides pelago, placataque venti  
Dant maria, et lenis crepitans vocat auster in altum, 70  
Deducunt socii naves, et litora complent.

Provehimur portu, terræque urbesque recedunt.

Sacra mari colitur medio gratissima tellus

Nereïdum matri et Neptuno Ægæo ;

Quam pius Arcitenens, oras et litora circum

Errantem, Gyaro celsa Myconoque revinxit,

Immotamque coli dedit, et contemnere ventos.

Huc feror ; hæc fessos tuto placidissima portu

Accipit. Egressi veneramur Apollinis urbem.

Rex Anius, rex idem hominum Phœbique sacerdos, 80

Vittis et sacra redimitus tempora lauro

Occurrit ; veterem Anchisen agnoscit amicum.

Jungimus hospitio dextras, et tecta subimus.

Templa dei saxo venerabar structa vetusto :

‘ Da propriam, Thymbræe, domum ! da mœnia fessis,

Et genus, et mansuram urbem ! Serva altera Trojæ

Pergama, reliquias Danaum atque immitis Achilli !

Quem sequimur ? quove ire jubes ? ubi ponere sedes ?

Da, pater, augurium, atque animis illabere nostris.’

“ Vix ea fatus eram ; tremere omnia visa repente, 90

Liminaque, laurusque dei ; totusque moveri

Mons circum, et mugire adytis cortina reclusis.

Submissi petimus terram, et vox fertur ad aures :

‘ Dardanidæ duri, quæ vos a stirpe parentum

Prima tulit tellus, eadem vos ubere læto

Accipiet reduces. Antiquam exquirite matrem.

Hic domus Æneæ cunctis dominabitur oris,  
 Et nati natorum, et qui nascentur ab illis.  
 Hæc Phœbus : mixtoque ingens exorta tumultu  
 Lætitia, et cuncti, quæ sint ea mœnia, quærunt ; 100  
 Quo Phœbus vocet errantes, jubeatque reverti.  
 Tum genitor, veterum volvens monumenta virorum,  
 ‘ Audite, o proceres,’ ait, ‘ et spes discite vestras.  
 Creta Jovis magni medio jacet insula ponto,  
 Mons Idæus ubi et gentis cunabula nostræ :  
 Centum urbes habitant magnas, uberrima regna.  
 Maximus unde pater, si rite audita recordor,  
 Teucus Rhœteas primum est advectus ad oras,  
 Optavitque locum regno. Nondum Ilium et arces  
 Pergameæ steterant ; habitabant vallibus imis. 110  
 Hinc mater cultrix Cybelæ, Corybantiaque æra,  
 Idæumque nemus ; hinc fida silentia sacris,  
 Et juncti currum dominæ subiere leones.  
 Ergo agite, et divum ducunt qua jussa, sequamur :  
 Placemus ventos, et Gnosia regna petamus.  
 Nec longo distant cursu ; modo Jupiter adsit,  
 Tertia lux classem Cretæis sistet in oris.’  
 Sic fatus, meritos aris mactavit honores,  
 Taurum Neptuno, taurum tibi, pulcher Apollo,  
 Nigram Hiemi pecudem, Zephyris felicibus albam. 120  
 “ Fama volat, pulsum regnis cessisse paternis  
 Idomeneæ ducem, desertaque litora Cretæ ;  
 Hoste vacare domos, sedesque adstare relictas.  
 Linquimus Ortygiæ portus, pelagoque volamus,  
 Bacchatamque jugis Naxon, viridemque Donusam,  
 Olearon, niveamque Paron, sparsasque per æquor  
 Cycladas, et crebris legimus freta concita terris.  
 Nauticus exoritur vario certamine clamor ;  
 Hortantur socii, Cretam proavosque petamus.  
 Prosequitur surgens a puppi ventus euntes, 130  
 Et tandem antiquis Curetum allabimur oris.  
 Ergo avidus muros optatæ molior urbis,

Pergameamque voco, et lætam cognomine gentem  
 Hortor amare focos, arcemque attollere tectis.  
 Jamque fere sicco subductæ litore puppes ;  
 Connubiis arvisque novis operata juvenus ;  
 Jura domosque dabam ; subito quum tabida membris,  
 Corrupto cœli tractu, miserandaque venit  
 Arboribusque satisque lues, et letifer annus.  
 Linquebant dulces animas, aut ægra trahebant 140  
 Corpora ; tum steriles exurere Sirius agros ;  
 Arebant herbæ, et victum seges ægra negabat.  
 Rursus ad oraculum Ortygiæ Phœbumque remenso  
 Hortatur pater ire mari, veniamque precari :  
 Quam fessis finem rebus ferat, unde laborum  
 Tentare auxilium jubeat, quo vertere cursus.  
 “ Nox erat, et terris animalia somnus habebat :  
 Effigies sacræ divum Phrygiique penates,  
 Quos mecum a Troja mediisque ex ignibus urbis  
 Extuleram, visi ante oculos adstare jacentis 150  
 In somnis, multo manifesti lumine, qua se  
 Plena per insertas fundebat luna fenestras ;  
 Tum sic affari, et curas his demere dictis :  
 ‘ Quod tibi delato Ortygiam dicturus Apollo est,  
 Hic canit, et tua nos en ultro ad limina mittit.  
 Nos te, Dardania incensa, tuaque arma secuti,  
 Nos tumidum sub te permensi classibus æquor,  
 Idem venturos tollemus in astra nepotes,  
 Imperiumque urbi dabimus. Tu mœnia magnis  
 Magna para, longumque fugæ ne linque laborem. 160  
 Mutandæ sedes. Non hæc tibi litora suasit  
 Delius, aut Cretæ jussit considerare, Apollo.  
 Est locus, Hesperiam Graii cognomine dicunt :  
 Terra antiqua, potens armis, atque ubere glebæ ;  
 Cœnotri coluere viri ; nunc fama, minores  
 Italiam dixisse ducis de nomine gentem.  
 Hæ nobis propriæ sedes ; hinc Dardanus ortus,  
 Iasiusque pater, genus a quo principe nostrum.

Surge age, et hæc lætus longævo dicta parenti  
 Haud dubitanda refer: Corythum terrasque requirat 170  
 Ausonias. Dictæa negat tibi Jupiter arva.  
 Talibus attonitus visis ac voce deorum,—  
 Nec sopor illud erat; sed coram agnoscere vultus,  
 Velatasque comas, præsentiaque ora videbar;  
 Tum gelidus toto manabat corpore sudor:—  
 Corripio e stratis corpus, tendoque supinas  
 Ad cælum cum voce manus, et munera libo  
 Intemerata focis. Perfecto lætus honore  
 Anchisen facio certum, remque ordine pando.  
 Agnovit prolem ambiguum geminosque parentes, 180  
 Seque novo veterum deceptum errore locorum.  
 Tum memorat: 'Nate, Iliacis exercite fatis,  
 Sola mihi tales casus Cassandra canebat.  
 Nunc repeto, hæc generi portendere debita nostro,  
 Et sæpe Hesperiam, sæpe Itala regna vocare.  
 Sed quis ad Hesperia venturos litora Teucros  
 Crederet? aut quem tum vates Cassandra moveret?  
 Cedamus Phœbo, et moniti meliora sequamur.'  
 Sic ait: et cuncti dicto paremus ovantes.  
 Hanc quoque deserimus sedem, paucisque relictis 190  
 Vela damus, vastumque cava trabe currimus æquor.  
 "Postquam altum tenuere rates, nec jam amplius ullæ  
 Apparent terræ, cælum undique et undique pontus;  
 Tum mihi cæruleus supra caput adstitit imber,  
 Noctem hiememque ferens, et inhorruit unda tenebris.  
 Continuo venti volvunt mare, magna que surgunt  
 Æquora; dispersi jactamur gurgite vasto.  
 Involvere diem nimbi, et nox humida cælum  
 Abstulit; ingeminant abruptis nubibus ignes.  
 Excutimur cursu, et cæcis erramus in undis. 200  
 Ipse diem noctemque negat discernere cœlo,  
 Nec meminisse viæ media Palinurus in unda.  
 Tres adeo incertos cæca caligine soles  
 Erramus pelago, totidem sine sidere noctes.

Quarto terra die primum se attollere tandem  
 Visa, aperire procul montes, ac volvere fumum.  
 Vela cadunt; remis insurgimus; haud mora, nautæ  
 Adnixi torquent spumas, et cærulea verrunt.  
 Servatum ex undis Strophadum me litora primum  
 Accipiunt, Strophades Graio stant nomine dictæ  
 Insulæ Ionio in magno, quas dira Celæno  
 Harpyiæque colunt aliæ, Phineia postquam  
 Clausa domus, mensasque metu liquere priores.  
 Tristius haud illis monstrum, nec sævior ulla  
 Pestis et ira deum Stygiis sese extulit undis.  
 Virginei volucrum vultus, foedissima ventris  
 Proluvies, unæque manus, et pallida semper  
 Ora fame.

210

“Huc ubi delati portus intravimus, ecce  
 Læta boum passim campis armenta videmus  
 Caprigenumque pecus, nullo custode, per herbas.  
 Irruimus ferro, et divos ipsumque vocamus  
 In partem prædamque Jovem. Tum litore curvo  
 Exstruimusque toros, dapibusque epulamur opimis.  
 At subitæ horrifico lapsu de montibus adsunt  
 Harpyiæ, et magnis quatiunt clangoribus alas,  
 Diripiuntque dapes, contactuque omnia fœdant  
 Immundo; tum vox tetrum dira inter odorem.  
 Rursum in secessu longo sub rupe cavata,  
 Arboribus clausi circum atque horrentibus umbris,  
 Instruimus mensas, arisque reponimus ignem:  
 Rursum ex diverso cœli cæcisque latebris  
 Turba sonans prædam pedibus circumvolat uncis,  
 Polluit ore dapes. Sociis tunc, arma capessant,  
 Edico, et dira bellum cum gente gerendum:  
 Haud secus ac jussi faciunt, tectosque per herbam  
 Disponunt enses, et scuta latentia condunt.  
 Ergo, ubi delapsæ sonitum per curva dedere  
 Litora, dat signum specula Misenus ab alta  
 Ære cavo. Invadunt socii, et nova proelia tentant,

220

230

240



Obscenas pelagi ferro fœdare volucres.  
 Sed neque vim plumis ullam, nec vulnera tergo  
 Accipiunt; celerique fuga sub sidera lapsæ  
 Semesam prædam et vestigia fœda relinquunt.  
 Una in præcelsa consedit rupe Celæno,  
 Infelix vates, rumpitque hanc pectore vocem:  
 ‘Bellum etiam pro cæde boum stratisque iuven-  
 Laomedontiadæ, bellumne inferre paratis,  
 Et patrio Harpyias insontes pellerè regno?  
 Accipite ergo animis atque hæc mea figite dicta:  
 Quæ Phœbo pater omnipotens, mihi Phœbus Apollo  
 Prædixit, vobis Furiarum ego maxima pando.  
 Italiam cursu petitis; ventisque vocatis  
 Ibitis Italiam, portusque intrare licebit.  
 Sed non ante datam cingetis mœnibus urbem,  
 Quam vos dira fames nostræque injuria cædis  
 Ambesas subigat malis absumere mensas.’

250

“Dixit; et in silvam pennis ablata refugit.  
 At sociis subita gelidus formidine sanguis  
 Deriguit; cecidere animi: nec jam amplius armis,  
 Sed votis precibusque jubent exposcere pacem,  
 Sive deæ, seu sint diræ obscenæque volucres.  
 Et pater Anchises passis de litore palmis  
 Numina magna vocat, meritosque indicit honores:  
 ‘Di, prohibete minas! di, talem avertite casum,  
 Et placidi servate pios!’ Tum litore funem  
 Deripere, excussosque jubet laxare rudentes.  
 Tendunt vela noti: ferimur spumantibus undis,  
 Qua cursum ventusque gubernatorque vocabant.  
 Jam medio apparet fluctu nemorosa Zacynthos,  
 Dulichiumque, Sameque, et Neritos ardua saxis.  
 Effugimus scopulos Ithacæ, Laërtia regna,  
 Et terram altricem sævi exsecramur Ulixi.  
 Mox et Leucataë nimbose cacumina montis,  
 Et formidatus nautis aperitur Apollo.

270

Hunc petimus fessi, et parvæ succedimus urbi :  
Ancora de prora jacitur ; stant litore puppes.

“ Ergo insperata tandem tellure potiti,  
Lustramurque Jovi, votisque incendimus aras ;  
Actiaque Iliacis celebramus litora ludis. 280

Exercent patrias oleo labente palæstras  
Nudati socii. Juvat evasisse tot urbes  
Argolicas, mediosque fugam tenuisse per hostes.

Interea magnum sol circumvolvitur annum,  
Et glacialis hiems aquilonibus asperat undas.

Ære cavo clipcum, magni gestamen Abantis,  
Postibus adversis figo, et rem carmine signo :

ÆNEAS HÆC DE DANAIS VICTORIBUS ARMA.

Linquere tum portus jubeo, et considerare transtris.  
Certatim socii feriunt mare, et æquora verrunt. 290

Protenus aërias Phæacum abscondimus arces,  
Litoraque Epiri legimus, portuque subimus  
Chaonio, et celsam Buthroti accedimus urbem.

“ Hic incredibilis rerum fama occupat aures,  
Priamiden Helenum Graias regnare per urbes,

Conjugio Æacidæ Pyrrhi sceptrisque potitum ;  
Et patrio Andromachen iterum cessisse marito.

Obstupui ; miroque incensum pectus amore  
Compellare virum, et casus cognoscere tantos. 300

Progredior portu, classes et litora linquens ;

Solemnes quum forte dapes et tristia dona,  
Ante urbem in luco, falsi Simoëntis ad undam,

Libabat cineri Andromache, manesque vocabat

Hectoreum ad tumulum, viridi quem cespite inanem,

Et geminas, causam lacrimis, sacraverat aras.

Ut me conspexit venientem, et Troïa circum

Arma amens vidit, magnis exterrita monstis

Deriguit visu in medio ; calor ossa reliquit ;

Labitur, et longo vix tandem tempore fatur :

Verane te facies, verus mihi nuncius affers, 310

Nate dea ? vivisne ? aut si lux alma recessit,  
 Hector ubi est ? dixit, lacrimasque effudit, et omnem  
 Implevit clamore locum. Vix pauca furenti  
 Subjicio, et raris turbatus vocibus hisco :  
 ‘Vivo equidem, vitamque extrema per omnia duco.  
 Ne dubita : nam vera vides.

Heu ! quis te casus dejectam conjuge tanto  
 Excipit ? aut quæ digna satis fortuna revisit ?  
 Hectoris Andromache Pyrrhin’ connubia servas ?  
 Dejecit vultum, et demissa voce locuta est : 320

‘O felix una ante alias Priameïa virgo,  
 Hostilem ad tumultum Trojæ sub mœnibus altis  
 Jussa mori, quæ sortitus non pertulit ullos,  
 Nec victoris heri tetigit captiva cubile !  
 Nos, patria incensa, diversa per æquora vectæ,  
 Stirpis Achilleæ fastus juvenemque superbum,  
 Servitio enixæ, tulimus ; qui deinde, secutus  
 Ledæam Hermionem Lacedæmoniosque hymenæos,  
 Me famulo famulamque Heleno transmisit habendam.  
 Ast illum, ereptæ magno inflammatus amore 330  
 Conjugis, et scelerum Furiis agitatus, Orestes  
 Excipit incautum, patriasque obtruncat ad aras.  
 Morte Neoptolemi regnorum reddita cessit  
 Pars Heleno, qui Chaonios cognomine campos,  
 Chaoniamque omnem Trojano a Chaone dixit,  
 Pergamaque Iliacamque jugis hanc addidit arcem.  
 Sed tibi qui cursum venti, quæ fata dedere ?  
 Aut quisnam ignarum nostris deus appulit oris ?  
 Quid puer Ascanius ? Superatne, et vescitur aura ?  
 Quem tibi jam Troja— 340

Ecqua tamen puero est amissæ cura parentis ?  
 Ecquid in antiquam virtutem animosque viriles  
 Et pater Æneas et avunculus excitat Hector ?

“Talia fundebat lacrimans, longosque ciebat  
 Incassum fletus ; quum sese a mœnibus heros  
 Priamides multis Helenus comitantibus affert,

Agnoscitque suos, lætusque ad limina ducit,  
 Et multum lacrimas verba inter singula fundit.  
 Procedo, et parvam Trojam, simulataque magnis  
 Pergama, et arentem Xanthi cognomine rivum 350  
 Agnosco, Scææque amplector limina portæ.  
 Nec non et Teucris sociâ simul urbe fruuntur :  
 Illos porticibus rex accipiebat in amplis.  
 Aulâi in medio libabant pocula Bacchi,  
 Impositis auro dapibus, paterasque tenebant.

“ Jamque dies, alterque dies processit ; et auræ  
 Vela vocant, tumidoque inflatur carbasus austro.  
 His vatem aggredior dictis, ac talia quæso :  
 ‘Trojugena, interpretes divum, qui numina Phœbi,  
 Qui tripodas, Clarii laurus, qui sidera sentis, 360  
 Et volucrum linguas, et præpetis omina pennæ,  
 Fare age—namque omnem cursum mihi prospera dixit  
 Religio, et cuncti suaserunt numine divi  
 Italiam petere, et terras tentare repostas ;  
 Sola novum dictuque nefas Harpyia Celæno  
 Prodigium canit, et tristes denuntiat iras,  
 Obscenamque famem—quæ prima pericula vito ?  
 Quidque sequens tantos possim superare labores ?  
 Hic Helenus, cæsis primum de more juvenis,  
 Exorat pacem divum, vittasque resolvit 370  
 Sacrati capitis, meque ad tua limina, Phœbe,  
 Ipse manu multo suspensum numine ducit ;  
 Atque hæc deinde canit divino ex ore sacerdos :

‘Nate dea,—nam te majoribus ire per altum  
 Auspiciis manifesta fides ; sic fata deum rex  
 Sortitur, volvitque vices ; is vertitur ordo—  
 Pauca tibi e multis, quo tutior hospita lustres  
 Æquora, et Ausonio possis considerare portu,  
 Expediam dictis ; prohibent nam cetera Parcæ  
 Scire Helenum farique vetat Saturnia Juno. 380  
 Principio Italiam, quam tu jam rere propinquam,  
 Vicinosque, ignare, paras invadere portus,

Longa procul longis via dividit invia terris.  
 Ante et Trinacria lentandus remus in unda,  
 Et salis Ausonii lustrandum navibus æquor,  
 Infernique lacus, Æææque insula Circæ,  
 Quam tuta possis urbem componere terra.  
 Signa tibi dicam ; tu condita mente teneto :  
 Quum tibi sollicito secreti ad fluminis undam  
 Litoreis ingens inventa sub ilicibus sus, 390  
 Triginta capitum fetus enixa, jacebit,  
 Alba, solo recubans, albi circum ubera nati :  
 Is locus urbis erit, requies ea certa laborum.  
 Nec tu mensarum morsus horresce futuros ;  
 Fata viam invenient, aderitque vocatus Apollo.  
 Has autem terras Italique hanc litoris oram,  
 Proxima quæ nostri perfunditur æquoris æstu,  
 Effuge : cuncta malis habitantur mœnia Graiis.  
 Hic et Narycii posuerunt mœnia Locri,  
 Et Sallentinos obsedit milite campos 400  
 Lyctius Idomeneus ; hic illa ducis Melibœi  
 Parva Philoctetæ subnixa Petelia muro.  
 Quin, ubi transmissæ steterint trans æquora classes,  
 Et positis aris jam vota in litore solves ;  
 Purpureo velare comas adopertus amictu,  
 Ne qua inter sanctos ignes in honore deorum  
 Hostilis facies occurrat, et omina turbet.  
 Hunc socii morem sacrorum, hunc ipse teneto ;  
 Hac casti maneant in religione nepotes.  
 Ast, ubi digressum Siculæ te admoverit oræ 410  
 Ventus, et angusti rarescent claustra Pelori,  
 Læva tibi tellus, et longo læva petantur  
 Æquora circuitu ; dextrum fuge litus et undas.  
 Hæc loca, vi quondam et vasta convulsa ruina,  
 Tantum ævi longinqua valet mutare vetustas !  
 Dissiluisse ferunt, quum protenus utraque tellus  
 Una foret ; venit medio vi pontus, et undis  
 Hesperium Siculo latus abscidit, arvaque et urbes

Litore diductas angusto interluit æstu.  
 Dextrum Scylla latus, lævum implacata Charybdis 420  
 Obsidet, atque imo barathri ter gurgite vastos  
 Sorbet in abruptum fluctus, rursusque sub auras  
 Erigit alternos, et sidera verberat unda.  
 At Scyllam cæcis cohibet spelunca latebris,  
 Ora exsertantem, et naves in saxa trahentem.  
 Prima hominis facies, et pulchro pectore virgo  
 Pube tenus ; postrema inmani corpore pistrinx,  
 Delphinum caudas utero commissa luporum.  
 Præstat Trinacrii metas lustrare Pachyni  
 Cessantem, longos et circumflectere cursus, 430  
 Quam semel informem vasto vidisse sub antro  
 Scyllam, et cæruleis canibus resonantia saxa.  
 Præterea, si qua est Heleno prudentia, vati  
 Si qua fides, animum si veris implet Apollo,  
 Unum illud tibi, nate dea, proque omnibus unum  
 Prædicam, et repetens iterumque iterumque monebo :  
 Junonis magnæ primum prece numen adora ;  
 Junoni cane vota libens, dominamque potentem  
 Supplicibus supera donis : sic denique victor  
 Trinacria fines Italos mittere relicta. 440  
 Huc ubi delatus Cumæam accesseris urbem,  
 Divinosque lacus et Averno sonantia silvis,  
 Insanam vatem aspicias ; quæ rupe sub ima.  
 Fata canit, foliisque notas et nomina mandat.  
 Quæcumque in foliis descripsit carmina virgo,  
 Digerit in numerum, atque antro seclusa relinquit.  
 Illa manent immota locis, neque ab ordine cedunt.  
 Verum eadem, verso tenuis quum cardine ventus  
 Impulit, et teneras turbavit janua frondes,  
 Nunquam deinde cavo volitantia prendere saxo, 450  
 Nec revocare situs, aut jungere carmina curat.  
 Inconsulti abeunt, sedemque odere Sibyllæ.  
 Hic tibi ne qua moræ fuerint dispendia tanti,—  
 Quamvis increpitent socii, et vi cursus in altum

Vela vocet, possisque sinus implere secundos,—  
 Quin adeas vatem, precibusque oracula poscas.  
 Ipsa canat, vocemque volens atque ora resolvat.  
 Illa tibi Italiæ populos, venturaque bella,  
 Et, quo quemque modo fugiasque ferasque laborem,  
 Expediet, cursusque dabit venerata secundos. 460  
 Hæc sunt, quæ nostra liceat te voce moneri.  
 Vade age, et ingentem factis fer ad æthera Trojam.'

"Quæ postquam vates sic ore effatus amico est,  
 Dona dehinc auro gravia sectoque elephanto  
 Imperat ad naves ferri, stipatque carinis  
 Ingens argentum, Dodonæosque lebetas,  
 Loricam consertam hamis auroque trilicem,  
 Et conum insignis galeæ cristasque comantes,  
 Arma Neoptolemi. Sunt et sua dona parenti.  
 Addit equos, additque duces; 470  
 Remigium supplet, socios simul instruit armis.

"Interea classem velis aptare jubebat  
 Anchises, fieret vento mora ne qua ferenti.  
 Quem Phœbi interpres multo compellat honore :  
 'Conjugio, Anchisa, Veneris dignate superbo,  
 Cura deûm, bis Pergameis erepte ruinis,  
 Ecce tibi Ausoniæ tellus : hanc arripe velis.  
 Et tamen hanc pelago præterlabare necesse est :  
 Ausoniæ pars illa procul, quam pandit Apollo.  
 Vade,' ait, 'o felix nati pietate ! quid ultra 480  
 Provehor, et fando surgentes demoror austros ?'  
 Nec minus Andromache, digressu mæsta supremo,  
 Fert picturatas auri subtemine vestes  
 Et Phrygiam Ascanio chlamydem ; nec cedit honori ;  
 Textilibusque onerat donis, ac talia fatur :  
 'Accipe et hæc, manuum tibi quæ monumenta mearum  
 Sint, puer, et longum Andromachæ testentur amorem,  
 Conjugis Hectoreæ. Cape dona extrema tuorum,  
 O mihi sola mei super Astyanactis imago.  
 Sic oculos, sic ille manus, sic ora ferebat ; 490

Et nunc æquali tecum pubesceret ævo.  
 Hos ego digrediens lacrimis affabar obortis :  
 ' Vivite felices, quibus est fortuna peracta  
 Jam sua : nos alia ex aliis in fata vocamur.  
 Vobis parta quies ; nullum maris æquor arandum ;  
 Arva neque Ausoniæ, semper cedentia retro,  
 Quærenda. Effigiem Xanthi Trojamque videtis,  
 Quam vestræ fecere manus, melioribus, opto,  
 Auspiciis, et quæ fuerit minus obvia Graiis.  
 Si quando Thybrim vicinaque Thybridis arva  
 Intraro, gentique meæ data mœnia cernam,  
 Cognatas urbes olim populosque propinquos  
 Epiro, Hesperia,—quibus idem Dardanus auctor  
 Atque idem casus,—unam faciemus utramque  
 Trojam animis. Maneat nostros ea cura nepotes.'

500

"Provehimur pelago vicina Ceraunia juxta,  
 Unde iter Italiam cursusque brevissimus undis.  
 Sol ruit interea, et montes umbrantur opaci :  
 Sternimur optatæ gremio telluris ad undam,  
 Sortiti remos, passimque in litore sicco  
 Corpora curamus ; fessos sopor irrigat artus.  
 Necdum orbem medium Nox horis acta subibat :  
 Haud segnis strato surgit Palinurus, et omnes  
 Explorat ventos, atque auribus aëra captat ;  
 Sidera cuncta notat tacito labentia cœlo,  
 Arcturum, pluviasque Hyadas, geminosque Triones,  
 Armatumque auro circumspicit Oriona.  
 Postquam cuncta videt cœlo constare sereno,  
 Dat clarum e puppi signum : nos castra movemus,  
 Tentamusque viam, et velorum pandimus alas.  
 Jamque rubescebat stellis Aurora fugatis ;  
 Quum procul obscuros colles humilemque videmus  
 Italiam. Italiam primus conclamat Achates ;  
 Italiam læto socii clamore salutant.  
 Tum pater Anchises magnum cratera corona  
 Induit, implevitque mero, divosque vocavit

510

520



Stans celsa in puppi :

‘Di, maris et terræ tempestatumque potentes,

Ferte viam vento facilem, et spirate secundi.’

Crebrescunt optatæ auræ, portusque patescit 530

Jam propior, templumque apparet in arce Minervæ :

Vela legunt socii, et proras ad litora torquent.

Portus ab euroo fluctu curvatus in arcum ;

Objectæ salsa spumant aspargine cautes :

Ipsæ latet ; gemino demittunt brachia muro

Turriti scopuli, refugitque ab litore templum.

Quatuor hic, primum omen, equos in gramine vidi

Tondentes campum late, candore nivali.

Et pater Anchises ‘Bellum, o terra hospita, portas ;

Bello armantur equi ; bellum hæc armenta minantur. 540

Sed tamen idem olim curru succedere sueti

Quadrupedes, et frena jugo concordia ferre ;

Spes et pacis,’ ait. Tum numina sancta precamur

Palladis armisonæ, quæ prima accepit ovantes ;

Et capita ante aras Phrygio velamur amictu ;

Præceptisque Heleni, dederat quæ maxima, rite

Junoni Argivæ jussos adolemus honores.

“Haud mora : continuo perfectis ordine votis.

Cornua velatarum obvertimus antennarum,

Grajugenumque domos suspectaque linquimus arva. 550

Hinc sinus Herculei, si vera est fama, Tarenti

Cernitur. Attollit se diva Lacinia contra,

Caulonisque arces, et navifragum Scylaceum,

Tum procul e fluctu Trinacria cernitur Ætna ;

Et gemitum ingentem pelagi pulsataque saxa

Audimus longe, fractasque ad litora voces ;

Exsultantque vada, atque æstu miscentur arenæ.

Et pater Anchises : ‘Nimirum hæc illa Charybdis ;

Hos Helenus scopulos, hæc saxa horrenda canebat.

Eripite, o socii ; pariterque insurgite remis.’ 560

Haud minus ac jussi faciunt ; primusque rudentem

Contorsit lævas proram Palinurus ad undas ;

Lævam cuncta cohors remis ventisque petivit.  
 Tollimur in cœlum curvato gurgite, et idem  
 Subducta ad manes imos desidimus unda.  
 Ter scopuli clamorem inter cava saxa dedere :  
 Ter spumam elisam et rorantia vidimus astra.  
 Interea fessos ventus cum sole reliquit ;  
 Ignarique viæ Cyclopus allabimur oris.

“ Portus ab accessu ventorum immotus, et ingens 570  
 Ipse ; sed horrificis juxta tonat Ætna ruinis,  
 Interdumque atram prorumpit ad æthera nubem,  
 Turbine fumantem piceo et candente favilla ;  
 Attollitque globos flammaram, et sidera lambit :  
 Interdum scopulos avulsaque viscera montis  
 Erigit eructans, liquefactaque saxa sub auras  
 Cum gemitu glomerat, fundoque exæstuat imo.  
 Fama est, Enceladi semiustum fulmine corpus  
 Urgeri mole hac, ingentemque insuper Ætnam  
 Impositam ruptis flammam exspirare caminis ; 580  
 Et fessum quoties mutet latus, intremere omnem  
 Murmure Trinacriam, et cœlum subtexere fumo.  
 Noctem illam tecti silvis immania monstra  
 Perferimus, nec, quæ sonitum det causa, videmus.  
 Nam neque erant astrorum ignes, nec lucidus æthra  
 Siderea polus, obscuro sed nubila cœlo ;  
 Et lunam in nimbo nox intempesta tenebat.

“ Postera jamque dies primo surgebat Eoo,  
 Humentemque Aurora polo dimoverat umbram ;  
 Quum subito e silvis, macie confecta suprema, 590  
 Ignoti nova forma viri miserandaque cultu  
 Procedit, supplexque manus ad litora tendit.  
 Respicimus. Dira illuvies, immissaque barba,  
 Consertum tegumen spinis : at cetera Graius,  
 Et quondam patriis ad Trojam missus in armis.  
 Isque ubi Dardanios habitus et Troia vidit  
 Arma procul, paulum aspectu conterritus hæsit,  
 Continuitque gradum ; mox sese ad litora præcepit

Cum fletu precibusque tulit : 'Per sidera testor,  
 Per superos, atque hoc cœli spirabile lumen : 600  
 Tollite me, Teuceri ; quascumque abducite terras ;  
 Hoc sat erit. Scio me Danaïs e classibus unum,  
 Et bello Iliacos fateor petiisse penates.  
 Pro quo, si sceleris tauta est injuria nostri,  
 Spargite me in fluctus, vastoque immergite ponto.  
 Si pereo, hominum manibus periisse juvabit.'  
 Dixerat ; et genua amplexus, genibusque volutans  
 Hærebat. Qui sit, fari, quo sanguine cretus,  
 Hortamur ; quæ deinde agitet fortuna, fateri.  
 Ipse pater dextram Anchises, haud multa moratus, 610  
 Dat juveni, atque animum præsentî pignore firmat.  
 Ille hæc, deposita tandem formidine, fatur :  
 " 'Sum patria ex Ithaca, comes infelicis Ulixi,  
 Nomen Achemenides, Trojam genitore Adamasto  
 Paupere (mansissetque utinam fortuna !) profectus.  
 Hic me, dum trepidi crudelia limina linquunt,  
 Immemores socii vasto Cyclopi in antro  
 Deseruere. Domus sanie dapibusque cruentis,  
 Intus opaca, ingens. Ipse arduus, altaque pulsât  
 Sidera, (Di, talem terris avertite pestem !) 620  
 Nec visu facilis, nec dictu affabilis ulli.  
 Visceribus miserorum et sanguine vescitur atro.  
 Vidi egomet, duo de numero quum corpora nostro  
 Prensa manu magna medio resupinus in antro  
 Frangeret ad saxum, sanieque exspersa natarent  
 Limina ; vidi atro quum membra fluentia tabo  
 Manderet, et tepidi tremerent sub dentibus artus.  
 Haud impune quidem ; nec talia passus Ulixes,  
 Oblitusve sui est Ithacus discrimine tanto.  
 Nam simul, expletus dapibus vinoque sepultus, 630  
 Cervicem inflexam posuit, jacuitque per antrum  
 Immensus, saniem eructans ac frustra cruento  
 Per somnum commixta mero ; nos, magna precati  
 Numina, sortitique vices, una undique circum

Fundimur, et telo lumen terebramus acuto  
 Ingens, quod torva solum sub fronte latebat,  
 Argolici clipei aut Phœbeæ lampadis instar,  
 Et tandem læti sociorum ulciscimur umbras.  
 Sed fugite, o miseri, fugite, atque ab litore funem  
 Rumpite.

640

Nam, qualis quantusque cavo Polyphemus in antro  
 Lanigeras claudit pecudes, atque ubera pressat,  
 Centum alii curva hæc habitant ad litora vulgo  
 Infandi Cyclopes, et altis montibus errant.  
 Tertia jam Lunæ se cornua lumine complent,  
 Quum vitam in silvis, inter deserta ferarum  
 Lustra domosque traho, vastosque ab rupe Cyclopas  
 Prospicio, sonitumque pedum vocemque tremisco.  
 Victum infelicem, baccas lapidosaque corna,  
 Dant rami, et vulsis pascunt radicibus herbæ.  
 Omnia collustrans, hanc primum ad litora classem  
 Conspexi venientem. Huic me, quæcumque fuisset,  
 Addixi: satis est gentem effugisse nefandam.  
 Vos animam hanc potius quocumque absumite leto.'

650

"Vix ea fatus erat; summo quum monte videmus  
 Ipsum inter pecudes vasta se mole moventem  
 Pastorem Polyphemum, et litora nota petentem,—  
 Monstrum horrendum, informe, ingens, cui lumen adem-  
 tum.

Trunca manu pinus regit et vestigia firmat.  
 Lanigeræ comitantur oves; ea sola voluptas,  
 Solamenque mali.

660

Postquam altos tetigit fluctus, et ad æquora venit,  
 Luminis effossi fluidum lavit inde cruorem,  
 Dentibus infrendens gemitu; graditurque per æquor  
 Jam medium, necdum fluctus latera ardua tinxit.  
 Nos procul inde fugam trepidi celerare, recepto  
 Supplice sic merito, tacitique incidere funem;  
 Verrimus et proni certantibus æquora remis.  
 Sensit, et ad sonitum vocis vestigia torsit.

Verum ubi nulla datur dextra affectare potestas, 670  
 Nec potis Ionios fluctus æquare sequendo,  
 Clamorem immensum tollit; quo pontus et omnes  
 Intremuere undæ, penitusque exterrita tellus  
 Italiæ, curvisque immugiit Ætna cavernis.  
 At genus e silvis Cyclopum et montibus altis  
 Excitum ruit ad portus, et litora complent.  
 Cernimus adstantes nequidquam lumine torvo  
 Ætnæos fratres, cœlo capita alta ferentes,  
 Concilium horrendum: quales quum vertice celso 680  
 Aëriæ quercus, aut coniferæ cyparissi  
 Constiterunt, silva alta Jovis, lucusve Dianæ.  
 Præcipites metus acer agit quocumque rudentes  
 Excutere, et ventis intendere vela secundis.  
 [Contra jussa monent Heleni, Scyllam atque Charybdim  
 Inter utramque viam, leti discrimine parvo,  
 Ni teneant cursus; certum est dare lintea retro.]  
 Ecce autem Boreas angusta ab sede Pelori  
 Missus adest. Vivo prætervehor ostia saxo  
 Pantagiæ, Megarosque sinus, Thapsumque jacentem.  
 Talia monstrabat relegens errata retrorsum 690  
 Litora Achemenides, comes infelicis Ulixi.  
 "Sicanio prætenta sinu jacet insula contra  
 Plemyrion undosum; nomen dixere priores  
 Ortygiam. Alpheum fama est huc Elidis amnem  
 Occultas egisse vias subter mare, qui nunc  
 Ore, Arethusa, tuo Siculis confunditur undis.  
 Jussi numina magna loci veneramur; et inde  
 Exsupero præpingue solum stagnantis Helori.  
 Hinc altas cautes projectaque saxa Pachyni  
 Radimus; et fati nunquam concessa moveri 700  
 Apparet Camarina procul, campique Geloi,  
 Immanisque Gela fluvii cognomine dicta.  
 Arduus inde Acragas ostentat maxima longe  
 Mœnia, magnanimum quondam generator equorum.  
 Teque datis linquo ventis, palmosa Selinus,

Et vada dura lego saxis Lilybeïa cæcis.  
Hinc Drepani me portus et illætabilis ora  
Accipit. Hic, Pelagi tot tempestatibus actus,  
Heu! genitorem, omnis curæ casusque levamen,  
Amitto Anchisen: hic me, pater optime, fessum  
Deseris, heu! tantis nequidquam crepte periclis.  
Nec vates Helenus, quum multa horrenda moneret,  
Hos mihi prædixit luctus, non dira Celæno.  
Illic labor extremus, longarum hæc meta viarum.  
Hinc me digressum vestris deus appulit oris."

710

Sic pater Æneas, intentis omnibus, unus  
Fata renarrabat divum, cursusque docebat.  
Conticuit tandem, factoque hic fine quievit.

P. VIRGILII MARONIS

Æ N E I D O S

LIBER QUARTUS.



At regina gravi jamdudum saucia cura  
Vulnus alit venis, et cæco carpitur igni.  
Multa viri virtus animo, multusque recursat  
Gentis honos; hærent infixi pectore vultus  
Verbaque; nec placidam membris dat cura quietem.  
Postera Phœbea lustrabat lampade terras,  
Humentemque Aurora polo dimoverat umbram;  
Quum sic unanimam alloquitui male sana sororem.  
“Anna soror, quæ me suspensam insomnia terrent!  
Quis novus hic nostris successit sedibus hospes! 10  
Quem sese ore ferens! quam forti pectore et armis!  
Credo equidem, nec vana fides, genus esse deorum:  
Degeneres animos timor arguit. Heu, quibus ille  
Jactatus fatis! quæ bella exhausta canebat!  
Si mihi non animo fixum immotumque sederet,  
Ne cui me vinclo vellem sociare jugali,  
Postquam primus amor deceptam morte fefellit;  
Si non pertæsum thalami tædæque fuisset,  
Huic uni forsân potui succumbere culpæ.  
Anna, fatebor enim, miseri post fata Sychæi 20  
Conjugis, et sparsos fraterna cæde penates,  
Solus hic inflexit sensus, animumque labantem  
Impulit: agnosco veteris vestigia flammæ.  
Sed mihi vel tellus optem prius ima dehiscat,

Vel Pater omnipotens adigat me fulmine ad umbras,  
 Pallentes umbras Erebi noctemque profundam,  
 Ante, Pudor, quam te violò, aut tua jura resolvo.  
 Ille meos, primus qui me sibi junxit, amores  
 Abstulit; ille habeat secum servetque sepulcro."  
 Sic effata sinum lacrimis implevit obortis.

30

Anna refert: "O luce magis dilecta sorori,  
 Solane perpetua mærens carpere juventa?  
 Nec dulces natos, Veneris nec præmia noris?  
 Id cinerem aut manes credis curare sepultos?  
 Esto: ægram nulli quondam flexere mariti,  
 Non Libyæ, non ante Tyro; despectus Iarbas,  
 Ductoresque alii, quos Africa terra triumphis  
 Dives alit: placitone etiam pugnabis amor?  
 Nec venit in mentem, quorum consederis arvis?  
 Hinc Gætulæ urbes, genus insuperabile bello,  
 Et Numidæ infreni cingunt, et inhospita Syrtis;  
 Hinc deserta siti regio, lateque furentes  
 Barcæi. Quid bella Tyro surgentia dicam  
 Germanique minas?"

40

Dis equidem auspiciis reor et Junone secunda  
 Hunc cursum Iliacas vento tenuisse carinas.  
 Quam tu urbem, soror, hanc cernes, quæ surgere regna  
 Conjugio tali! Teucrum comitantibus armis,  
 Punica se quantis attollet gloria rebus!  
 Tu modo posce deos veniam, sacrisque litatis  
 Indulge hospitio, causasque innecte morandi;  
 Dum pelago desævit hiems et aquosus Orion,  
 Quassatæque rates, dum non tractabile cælum."  
 His dictis incensum animum inflammavit amore,  
 Spemque dedit dubiæ menti, solvitque pudorem.

50

Principio delubra adeunt, pacemque per aras  
 Exquirunt: mactant lectas de more bidentes  
 Legiferæ Cereri, Phœboque, patrique Lyæo;  
 Junoni ante omnes, cui vincla jugalia curæ.  
 Ipsa, tenens dextra pateram, pulcherrima Dido

60



Candentis vaccæ media inter cornua fundit ;  
 Aut ante ora deum pingues spatiat ad aras,  
 Instauratque diem donis, pecudumque reclusis  
 Pectoribus inhians spirantia consulit exta.  
 Heu vatum ignaræ mentes ! quid vota furem,  
 Quid delubra juvant ? Est mollis flamma medullas  
 Interea, et tacitum vivit sub pectore vulnus.  
 Uritur infelix Dido, totaque vagatur  
 Urbe furens : qualis conjecta cerva sagitta,  
 Quam procul incautam nemora inter Cresia fixit 70  
 Pastor agens telis, liquitque volatile ferrum  
 Nescius : illa fuga silvas saltusque peragrat  
 Dictæos ; hæret lateri letalis arundo.  
 Nunc media Ænean secum per mœnia ducit,  
 Sidoniasque ostentat opes, urbemque paratam ;  
 Incipit effari, mediaque in voce resistit :  
 Nunc eadem, labente die, convivia quærit,  
 Iliacosque iterum demens audire labores  
 Exposcit, pendetque iterum narrantis ab ore.  
 Post, ubi digressi, lumenque obscura vicissim 80  
 Luna premit, suadentque cadentia sidera somnos,  
 Sola domo mæret vacua, stratisque relictis  
 Incubat : illum absens absentem auditque videtque.  
 Aut gremio Ascanium, genitoris imagine capta,  
 Detinet, infandum si fallere possit amorem.  
 Non cœptæ assurgunt turres ; non arma juvenus  
 Exercet, portusve aut propugnacula bello  
 Tuta parant : pendent opera interrupta, minæque  
 Murorum ingentes, æquataque machina cœlo.  
 Quam simul ac tali persensit peste teneri 90  
 Cara Jovis conjux, nec famam obstare furori ;  
 Talibus aggreditur Venerem Saturnia dictis :  
 “ Egregiam vero laudem et spolia ampla refertis  
 Tuque puerque tuus ; magnum et memorabile numen,  
 Una dolo divum si femina victa duorum est.  
 Nec me adeo fallit, veritam te mœnia nostra,

Suspectas habuisse domos Carthaginis altæ.  
 Sed quis erit modus ? aut quo nunc certamina tanta ?  
 Quin potius pacem æternam pactosque hymenæos  
 Exercemus ? habes, tota quod mente petisti : 100  
 Ardet amans Dido, traxitque per ossa furem.  
 Communem hunc ergo populum paribusque regamus  
 Auspiciis ; liceat Phrygio servire marito,  
 Dotalisque tuæ Tyrios permittere dextrâ."

Olli—sensit enim simulata mente locutam,  
 Quo regnum Italiæ Libycas averteret oras—  
 Sic contra est ingressa Venus : " Quis talia demens  
 Abnuat, aut tecum malit contendere bello ?  
 Si modo, quod memoras, factum fortuna sequatur.  
 Sed fatis incerta feror, si Jupiter unam 110

Esse velit Tyriis urbem Trojaque profectis,  
 Miscerive probet populos, aut fœdera jungi.  
 Tu conjux ; tibi fas animum tentare precando.  
 Perge ; sequar." Tum sic excepit regia Juno :  
 " Mecum erit iste labor. Nunc qua ratione, quod instat,  
 Conferri possit, paucis, adverte, docebo.

Venatum Æneas unaque miserrima Dido  
 In nemus ire parant, ubi primos crastinus ortus  
 Extulerit Titan, radiisque retexerit orbem.  
 His ego nigram commixta grandine nimbum, 120  
 Dum trepidant alæ, saltusque indagine cingunt,  
 Desuper infundam, et tonitru cœlum omne cicbo.  
 Diffugient comites, et nocte tegentur opaca :  
 Speluncam Dido dux et Trojanus eandem  
 Devenient. Adero, et, tua si mihi certa voluntas,  
 Connubio jungam stabili propriamque dicabo.  
 Hic Hymenæus erit." Non adversata petenti  
 Annuit, atque dolis risit Cytherea repertis.

Oceanum interea surgens Aurora relinquit.  
 It portis, jubare exorto, delecta juvenus : 130  
 Retia rara, plagæ, lato venabula ferro,  
 Massylisque ruunt equites, et odora canum vis.

Reginam thalamo cunctantem ad limina primi  
 Pœnorum exspectant ; ostroque insignis et auro  
 Stat sonipes, ac frena ferox spumantia mandit.  
 Tandem progreditur, magna stipante caterva,  
 Sidoniam picto chlamydem circumdata limbo :  
 Cui pharetra ex auro, crines nodantur in aurum,  
 Aurea purpuream subnectit fibula vestem :  
 Nec non et Phrygii comites et lætus Iulus 140  
 Incedunt. Ipse ante alios pulcherrimus omnes  
 Infert se socium Æneas, atque agmina jungit :  
 Qualis ubi hibernam Lyciam Xanthique fluenta  
 Deserit, ac Delum maternam invisit Apollo,  
 Instauratione choros, mixtique altaria circum  
 Cretesque Dryopesque fremunt pictique Agathyrsi :  
 Ipse jugis Cynthi graditur, mollique fluentem  
 Fronde premit crinem fingens, atque implicat auro ;  
 Tela sonant humeris. Haud illo segnior ibat  
 Æneas ; tantum egregio decus enitet ore. 150  
 Postquam altos ventum in montes atque invia lustra,  
 Ecce feræ, saxi dejectæ vertice, capræ  
 Decurrere jugis ; alia de parte patentes  
 Transmittunt cursu campos atque agmina cervi  
 Pulverulenta fuga glomerant, montesque relinquunt.  
 At puer Ascanius mediis in vallibus acri  
 Gaudet equo ; jamque hos cursu, jam præterit illos,  
 Spumantemque dari pecora inter inertia votis  
 Optat aprum, aut fulvum descendere monte leonem.  
 Interea magno misceri murmure cœlum 160  
 Incipit : insequitur commixta grandine nimbus.  
 Et Tyrii comites passim, et Trojana juvenus,  
 Dardaniusque nepos Veneris, diversa per agros  
 Tecta metu petiere : ruunt de montibus amnes.  
 Speluncam Dido dux et Trojanus eandem  
 Deveniunt. Prima et Tellus et pronuba Juno  
 Dant signum : fulsere ignes, et conscius æther  
 Connubiis ; summoque ulularunt vertice Nymphæ.

Ille dies primus leti primusque malorum  
 Causa fuit. Neque enim specie famave movetur, 170  
 Nec jam furtivum Dido meditatur amorem :  
 Conjugium vocat ; hoc prætexit nomine culpam.

Extemplo Libyæ magnas it Fama per urbes,—  
 Fama, malum, quo non aliud velocius ullum :  
 Mobilitate viget, viresque acquirit eundo ;  
 Parva metu primo ; mox sese attollit in auras,  
 Ingrediturque solo, et caput inter nubila condit.  
 Illam Terra parens, ira irritata deorum,  
 Extremam, ut perhibent, Cœo Enceladoque sororem  
 Progenit, pedibus celerem et pernicipibus alis ; 180  
 Monstrum horrendum, ingens, cui quot sunt corpore plumæ,  
 Tot vigiles oculi subter, mirabile dictu,  
 Tot linguæ, totidem ora sonant, tot subrigit aures.  
 Nocte volat cœli medio terræque per umbram  
 Stridens, nec dulci declinat lumina somno.  
 Luce sedet custos aut summi culmine tecti,  
 Turribus aut altis, et magnas territat urbes,  
 Tam ficti pravique tenax, quam nuncia veri.  
 Hæc tum multiplici populos sermone replebat  
 Gaudens, et pariter facta atque infecta canebat : 190  
 Venisse Ænean, Trojano a sanguine cretum,  
 Cui se pulchra viro dignetur jungere Dido ;  
 Nunc hiemem inter se luxu, quam longa, fovere,  
 Regnorum immemores turpique cupidine captos.  
 Hæc passim dea fœda virum diffundit in ora.  
 Protinus ad regem cursus detorquet Iarban,  
 Incenditque animum dictis, atque aggerat iras.

Hic Hammone satus, rapta Garamantide Nympha,  
 Templâ Jovi centum latis immania regnis,  
 Centum aras posuit ; vigilemque sacraverat ignem 200  
 Excubias divum æternas, pecudumque cruore  
 Pingue solum, et variis florentia limina sertis.  
 Isque amens animi, et rumore accensus amaro,  
 Dicitur ante aras, media inter numina divum,

Multa Jovem manibus supplex orasse supinis :  
 "Jupiter omnipotens, cui nunc Maurusia pictis  
 Gens epulata toris Lenæum libat honorem,  
 Aspicias hæc ? an te, genitor, quum fulmina torques,  
 Nequidquam horremus ? cæciq; in nubibus ignes  
 Terrificant animos, et inania murmura miscent ? 210

Femina, quæ nostris errans in finibus urbem  
 Exiguam pretio posuit, cui litus arandum,  
 Cuique loci leges dedimus, connubia nostra  
 Repulit, ac dominum Ænean in regna recepit.  
 Et nunc ille Paris, cum semiviro comitatu,  
 Mæonia mentum mitra crinemque madentem  
 Subnixus, raptò potitur : nos munera templis  
 Quippe tuis ferimus, famamque fovemus inanem."

Talibus orantem dictis, arasque tenentem,  
 Audiit omnipotens, oculosque ad mœnia torsit 220  
 Regia, et oblitos famæ melioris amantes.

Tum sic Mercurium alloquitur, ac talia mandat :  
 "Vade age, nate, voca Zephyros, et labere pennis ;  
 Dardaniumque ducem, Tyria Carthagine qui nunc  
 Exspectat, fatisque datas non respicit urbes,  
 Alloquere, et celeres defer mea dicta per auras.  
 Non illum nobis genetrix pulcherrima talem  
 Promisit, Graiumque ideo bis vindicat armis ;  
 Sed fore, qui gravidam imperiis belloque frementem  
 Italiam regeret, genus alto a sanguine Teucri 230  
 Proderet, ac totum sub leges mitteret orbem.

Si nulla accendit tantarum gloria rerum,  
 Nec super ipse sua molitur laude laborem :  
 Ascanione pater Romanas invidet arces ?  
 Quid struit ? aut qua spe, inimica in gente, moratur ?  
 Nec prolem Ausoniam et Lavinia respicit arva ?  
 Naviget : hæc summa est ; hic nostri nuncius esto."

Dixerat. Ille patris magni parere parabat  
 Imperio : et primum pedibus talaria nectit 240  
 Aurea, quæ sublimem alis, sive æquora supra,

Seu terram, rapido pariter cum flamine portant.  
 Tum virgam capit ; hac animas ille evocat Orco  
 Pallentes, alias sub Tartara tristia mittit ;  
 Dat somnos adimitque, et lumina morte resignat :  
 Illa fretus agit ventos, et turbida tranat  
 Nubila. Jamque volans apicem et latera ardua cernit  
 Atlantis duri, cœlum qui vertice fulcit,—  
 Atlantis, cinctum assidue cui nubibus atris  
 Piniferum caput et vento pulsatur et imbri ;  
 Nix humeros infusa tegit : tum flumina mento 250  
 Præcipitant senis, et glacie riget horrida barba.  
 Hic primum paribus nitens Cyllenius alis  
 Constitit ; hinc toto præceps se corpore ad undas  
 Misit, avi similis, quæ circum litora, circum  
 Piscosos scopulos, humilis volat æquora juxta.  
 [Haud aliter terras inter cœlumque volabat,  
 Litus arenosum Libyæ ventosque secabat  
 Materno veniens ab avo Cyllenia proles.]  
 Ut primum alatis tetigit magalia plantis,  
 Ænean fundantem arces ac tecta novantem 260  
 Conspicit : atque illi stellatus iaspide fulva  
 Ensis erat, Tyrioque ardebat murice læna,  
 Demissa ex humeris ; dives quæ munera Dido  
 Fecerat, et tenui telas discreverat auro.  
 Continuo invadit : “Tu nunc Carthaginis altæ  
 Fundamenta locas, pulchramque uxorius urbem  
 Exstruis ? heu regni rerumque oblite tuarum !  
 Ipse deum tibi me claro demittit Olympo  
 Regnator, cœlum et terras qui numine torquet ;  
 Ipse hæc ferre jubet celeres mandata per auras : 270  
 Quid struis ? aut qua spe Libycis teris otia terris ?  
 Si te nulla movet tantarum gloria rerum,  
 Nec super ipse tua moliris laude laborem,  
 Ascanium surgentem, et spes heredis Iuli  
 Respice ; cui regnum Italiæ Romanaque tellus  
 Debentur.” Tali Cyllenius ore locutus

Mortales visus medio sermone reliquit,  
Et procul in tenuem ex oculis evanuit auram.

At vero Æneas aspectu obmutuit amens,  
Arrectæque horrore comæ, et vox faucibus hæsit. 280  
Ardet abire fuga, dulcesque relinquere terras,  
Attonitus tanto monitu imperioque deorum.  
Heu, quid agat? quo nunc reginam ambire furentem  
Audeat affatu? quæ prima exordia sumat?  
[Atque animum nunc huc celerem, nunc dividit illuc,  
In partesque rapit varias, perque omnia versat.]  
Hæc alternanti potior sententia visa est:

Mnesthea Sergestumque vocat, fortemque Serestum:  
Classem aptent taciti, sociosque ad litora cogant;  
Arma parent, et, quæ sit rebus causa novandis, 290  
Dissimulent: sese interea, quando optima Dido  
Nesciat, et tantos rumpi non speret amores,  
Tentaturum aditus, et quæ mollissima fandi  
Tempora, quis rebus dexter modus. Ocuis omnes  
Imperio læti parent, ac jussa facessunt.

At regina dolos (quis fallere possit amantem?)  
Præsensit, motusque excepit prima futuros,  
Omnia tuta timens. Eadem impia Fama furenti  
Detulit armari classem, cursumque parari.  
Sævit inops animi, totamque incensa per urbem 300  
Bacchatur: qualis commotis excita sacris  
Thyias, ubi audito stimulant trieterica Baccho  
Orgia, nocturnusque vocat clamore Cithæron.  
Tandem his Ænean compellat vocibus ultro:

“Dissimulare etiam sperasti, perfide, tantum  
Posse nefas, tacitusque mea decedere terra?  
Nec te noster amor, nec te data dextera quondam,  
Nec moritura tenet crudeli funere Dido?  
Quin etiam hiberno moliris sidere classem,  
Et mediis properas aquilonibus ire per altum, 310  
Crudelis? Quid? si non arva aliena domosque  
Ignotas peteres, et Troja antiqua maneret,

Troja per undosum peteretur classibus æquor ?  
 Mene fugis ? Per ego has lacrimas dextramque tuam te,—  
 Quando aliud mihi jam miseræ nihil ipsa reliqui,—  
 Per connubia nostra, per inceptos hymenæos,  
 Si bene quid de te merui, fuit aut tibi quidquam  
 Dulce meum : miserere domus labentis, et istam,  
 Oro, si quis adhuc precibus locus, exue mentem.  
 Te propter Libycæ gentes Nomadumque tyranni      320  
 Odere ; infensi Tyrii ; te propter eundem  
 Exstinctus pudor, et, qua sola sidera adibam,  
 Fama prior : cui me moribundam deseris, hospes ?  
 Hoc solum nomen quoniam de conjuge restat.  
 Quid moror ? an mea Pygmalion dum mœnia frater  
 Destruat, aut captam ducat Gætulus Iarbas ?  
 Saltem si qua mihi de te suscepta fuisset  
 Ante fugam suboles ; si quis mihi parvulus aula  
 Luderet Æneas, qui te tamen ore referret,  
 Non equidem omnino capta ac deserta viderer.”      330

Dixerat. Ille Jovis monitis immota tenebat  
 Lumina, et obnixus curam sub corde premebat.  
 Tandem pauca refert : “ Ego te, quæ plurima fando  
 Enumerare vales, nunquam, Regina, negabo  
 Promeritam ; nec me meminisse pigebit Elissæ,  
 Dum memor ipse mei, dum spiritus hos regit artus.  
 Pro re pauca loquar. Neque ego hanc abscondere furto  
 Speravi, ne finge, fugam ; nec conjugis unquam  
 Prætendi tædas, aut hæc in fœdera veni.  
 Me si fâta meis paterentur ducere vitam      340  
 Auspiciis, et sponte mea componere curas,  
 Urbem Trojanam primum dulcesque meorum  
 Reliquias colerem ; Priami tecta alta manerent,  
 Et recidiva manu posuissem Pergama victis.  
 Sed nunc Italiam magnam Gryneus Apollo,  
 Italiam Lyciæ jussere capessere sortes.  
 Hic amor, hæc patria est. Si te Carthaginis arces,  
 Phœnissam, Libycæque aspectus detinet urbis,



Quæ tandem, Ausonia Teucros considerare terra,  
 Invidia est? Et nos fas extera quærere regna. 350  
 Me patris Auchisæ, quoties humentibus umbris  
 Nox operit terras, quoties astra ignea surgunt,  
 Admonet in somnis et turbida terret imago;  
 Me puer Ascanius, capitisque injuria cari,  
 Quem regno Hesperisæ fraudo et fatalibus arvis.  
 Nunc etiam interpretes divum, Jove missus ab ipso,  
 (Testor utrumque caput) celeres mandata per auras  
 Detulit. Ipse deum manifesto in lumine vidi  
 Intransentem muros, vocemque his auribus hausi.  
 Desine meque tuis incendere teque querelis; 360  
 Italiam non sponte sequor."

Talia dicentem jamdudum aversa tuetur,  
 Huc illuc volvens oculos, totumque pererrat  
 Luminibus tacitis, et sic accensa profatur:  
 'Nec tibi diva parens, generis nec Dardanus auctor,  
 Perfide; sed duris genuit te cautibus horrens  
 Caucasus, Hyrcanæque admorunt ubera tigres.  
 Nam quid dissimulo? aut quæ me ad majora reservo?  
 Num fletu ingemuit nostro? num lumina flexit?  
 Num lacrimas victus dedit, aut miseratus amantem est? 370  
 Quæ quibus anteferam? Jam jam nec maxima Juno,  
 Nec Saturnius hæc oculis pater aspicit æquis.  
 Nusquam tutâ fides. Ejectum litore, egentem  
 Excepi, et regni demens in parte locavi;  
 Amissam classem, socios a morte reduxi.  
 Heu furiis incensa feror! Nunc augur Apollo,  
 Nunc Lyciæ sortes, nunc et Jove missus ab ipso  
 Interpretes divum fert horrida jussa per auras.  
 Scilicet is superis labor est; ea cura quietos  
 Sollicitat. Neque te teneo, neque dicta refello. 380  
 I, sequere Italiam ventis; pete regna per undas.  
 Spero equidem mediis, si quid pia numina possunt,  
 Supplicia hausurum scopulis, et nomine Dido  
 Sæpe vocaturum. Sequar atris ignibus absens;

Et, quum frigida mors anima seduxerit artus,  
 Omnibus umbra locis adero. Dabis, improbe, pœnas ;  
 Audiam, et hæc manes veniet mihi fama sub imos."  
 His medium dictis sermonem abrumpit, et auras  
 Ægra fugit, seque ex oculis avertit et aufert,  
 Linqvens multa metu cunctantem et multa parantem 390  
 Dicere. Suscipiunt famulæ, collapsaque membra  
 Marmoreo referunt thalamo, stratisque reponunt.

At pius Æneas, quamquam lenire dolentem  
 Solando cupit, et dictis avertere curas,  
 Multa gemens, magnoque animum labefactus amore,  
 Jussa tamen divum exsequitur, classemque revisit.  
 Tum vero Teucri incumbunt, et litore celsas  
 Deducunt toto naves. Natat uncta carina ;  
 Frondentesque ferunt remos et robora silvis  
 Infabricata fugæ studio. 400

Migrantes cernas, totaque ex urbe ruentes ;  
 Ac velut ingentem formicæ farris acervum  
 Quum populant, hiemis memores, tectoque reponunt :  
 It nigrum campis agmen, prædamque per herbas  
 Convectant calle angusto ; pars grandia trudunt  
 Obnixæ frumenta humeris ; pars agmina cogunt,  
 Castigantque moras ; opere omnis semita fervet.  
 Quis tibi tunc, Dido, cernenti talia sensus !  
 Quosve dabas gemitus, quum litora fervere late  
 Prospiceres arce ex summa, totumque videres 410  
 Misceri ante oculos tantis clamoribus æquor !  
 Improbe amor, quid non mortalia pectora cogis !  
 Ire iterum in lacrimas, iterum tentare precando  
 Cogitur, et supplex animos submittere amanti,  
 Ne quid inexpertum frustra moritura relinquat.

"Anna, vides toto properari litore : circum  
 Undique convenere ; vocat jam carbasus auras,  
 Puppibus et læti nautæ imposuere coronas.  
 Hunc ego si potui tantum sperare dolorem,  
 Et perferre, soror, potero. Miseræ hoc tamen unum 420

Exsequere, Anna, mihi ; solam nam perfidus ille  
 Te colere, arcanos etiam tibi credere sensus ;  
 Sola viri molles aditus et tempora noras.  
 I, soror, atque hostem supplex affare superbum :  
 Non ego cum Danais Trojanam exscindere gentem  
 Aulide juravi, classemve ad Pergama misi ;  
 Nec patris Anchisæ cinerem manesve revelli.  
 Cur mea dicta negat duras demittere in aures ?  
 Quo ruit ? extremum hoc miseræ det munus amanti :  
 Exspectet facilemque fugam ventosque ferentes. 439  
 Non jam conjugium antiquum, quod prodidit, oro,  
 Nec pulchro ut Latio careat, regnumque relinquat :  
 Tempus inane peto, requiem spatiumque furori,  
 Dum mea me victam doceat fortuna dolere.  
 Extremam hanc oro veniam,—miserere sororis ;  
 Quam mihi quum dederis, cumulatam morte remittam."

Talibus orabat ; talesque miserrima fletus  
 Fertque refertque soror. Sed nullis ille movetur  
 Fletibus, aut voces ullas tractabilis audit ;  
 Fata obstant, placidasque viri deus obstruit aures. 440  
 Ac velut annoso validam quum robore quercum  
 Alpini boreæ nunc hinc nunc flatibus illinc  
 Eruere inter se certant ; it stridor, et alte  
 Consternunt terram concusso stipite frondes :  
 Ipsa hæret scopulis, et, quantum vertice ad auras  
 Ætherias, tantum radice in Tartara tendit :  
 Haud secus assiduis hinc atque hinc vocibus heros  
 Tunditur, et magno persentit pectore curas :  
 Mens immota manet ; lacrimæ volvuntur inanes.

Tum vero infelix fatis exterrita Dido 450  
 Mortem orat ; tædet cœli convexa tueri.  
 Quo magis inceptum peragat, lucemque relinquat,  
 Vidit, thuricremis quum dona imponeret aris,  
 Horrendum dictu, latices nigrescere sacros,  
 Fusaque in obscenum se vertere vina cruorem.  
 Hoc visum nulli, non ipsi effata sorori.

Præterea fuit in tectis de marmore templum  
 Conjugis antiqui, miro quod honore colebat,  
 Velleribus niveis et festa fronde revinctum :  
 Hinc exaudiri voces et verba vocantis 460  
 Visa viri, nox quum terras obscura teneret :  
 Solaque culminibus ferali carmine bubo  
 Sæpe queri, et longas in fletum ducere voces.  
 Multaque præterea vatum prædicta piorum  
 Terribili monitu horrificant. Agit ipse furentem  
 In somnis ferus Æneas ; semperque relinqui  
 Sola sibi, semper longam incomitata videtur  
 Ire viam, et Tyrios deserta quærere terra.  
 Eumenidum veluti demens videt agmina Pentheus,  
 Et solem geminum, et duplices se ostendere Thebas ; 470  
 Aut Agamemnonius scenis agitatus Orestes,  
 Armatam facibus matrem et serpentibus atris  
 Quum fugit, ultricesque sedent in limine Diræ.

Ergo ubi concepit Furias, evicta dolore,  
 Decrevitque mori, tempus secum ipsa modumque  
 Exigit, et mæstam dictis aggressa sororem  
 Consilium vultu tegit, ac spem fronte serenat :  
 “ Inveni, germana, viam—gratare sorori—  
 Quæ mihi reddat eum, vel eo me solvat amantem.  
 Oceani finem juxta solemque cadentem 480  
 Ultimus Æthiopum locus est, ubi maximus Atlas  
 Axem humero torquet stellis ardentibus aptum :  
 Hinc mihi Massylæ gentis monstrata sacerdos,  
 Hesperidum templi custos, epulasque draconi  
 Quæ dabat, et sacros servabat in arbore ramos,  
 Spargens humida mella soporiferumque papaver.  
 Hæc se carminibus promittit solvere mentes,  
 Quas velit : ast aliis duras immittere curas ;  
 Sistere aquam fluviis, et vertere sidera retro ;  
 Nocturnosque ciet manes ; mugire videbis 490  
 Sub pedibus terram, et descendere montibus ornos.  
 Testor, cara, deos, et te, germana, tuumque

Dulce caput, magicas invitam accingier artes.  
 Tu secreta pyram tecto interiore sub auras  
 Erige; et arma viri, thalamo quæ fixa reliquit  
 Impius, exuviasque omnes, lectumque jugalem.  
 Quo perii, superimponas. Abolere nefandi  
 Cuncta viri monumenta jubet monstratque sacerdos."  
 Hæc effata silet; pallor simul occupat ora.  
 Non tamen Anna novis prætexere funera sacris 500  
 Germanam credit, nec tantos mente furores  
 Concipit, aut graviora timet, quam morte Sychæi.  
 Ergo jussa parat.

At regina, pyra penetrali in sede sub auras  
 Erecta ingenti tædis atque ilice secta,  
 Intenditque locum sertis, et fronde coronat  
 Funerea; super exuvias ensemque relictum  
 Effigiemque toro locat, haud ignara futuri.  
 Stant aræ circum, et crinis effusa sacerdos 510  
 Ter centum tonat ore deos, Erebumque, Chaosque,  
 Tergeminamque Hecaten, tria virginis ora Dianæ.  
 Sparserat et latices simulatos fontis Averni;  
 Falcibus et messæ ad lunam quærantur ahenis  
 Pubentes herbæ, nigri cum lacte veneni;  
 Quæritur et nascentis equi de fronte revulsus  
 Et matri præreptus amor.

Ipsa mola manibusque piis altaria juxta,  
 Unum exuta pedem vinclis, in veste recincta,  
 Testatur moritura deos, et conscia fati  
 Sidera; tum, si quod non æquo foedere amantis 520  
 Curæ numen habet justumque memorque, precatur.

Nox erat, et placidum carpebant fessa soporem  
 Corpora per terras, silvæque et sæva quierant  
 Æquora; quum medio volvuntur sidera lapsu,  
 Quum tacet omnis ager, pecudes, pictæque volucres,  
 Quæque lacus late liquidos, quæque aspera dumis  
 Rura tenent, somno positæ sub nocte silenti:  
 [Lenibant curas, et corda oblita laborum.]

At non infelix animi Phœnissa, neque unquam  
 Solvitur in somnos, oculisve aut pectore noctem 530  
 Accipit. Ingeminant curæ; rursusque resurgens  
 Sævitur amor, magnoque irarum fluctuat æstu.  
 Sic adeo insistit, secumque ita corde volutat:  
 "En, quid ago? rursusne procos irrisa priores  
 Experiar? Nomadumque petam connubia supplex,  
 Quos ego sim toties jam dedignata maritos?  
 Iliacas igitur classes atque ultima Teucrum  
 Jussa sequar? quiane auxilio juvat ante levatos,  
 Aut bene apud memores veteris stat gratia facti?  
 Quis me autem, fac velle, sinet? ratibusve superbis 540  
 Invisam accipiet? nesois, heu perdita! necdum  
 Laomedontæ sentis perjuria gentis?  
 Quid tum? sola fuga nautas comitabor ovantes?  
 An Tyriis omni que manu stipata meorum  
 Inferar? et, quos Sidonia vix urbe revelli,  
 Rursus agam pelago, et ventis dare vela jubebo?  
 Quin morere, ut merita es, ferroque averte dolorem.  
 Tu lacrimis evicta meis, tu prima furentem  
 His, germana, malis oneras, atque objicis hosti.  
 Non licuit thalami expertem sine crimine vitam 550  
 Degere, more feræ, talis nec tangere curas!  
 Non servata fides, cineri promissa Sychæo!"  
 Tantos illa suo rumpebat pectore questus.  
 Æneas celsa in puppi, jam certus eundi,  
 Carpebat somnos, rebus jam rite paratis.  
 Huic se forma dei vultu redeuntis eodem  
 Obtulit in somnis, rursusque ita visa monere est,  
 Omnia Mercurio similis, vocemque coloremque  
 Et crines flavos, et membra decora juventæ:  
 "Nate dea, potes hoc sub casu ducere somnos?  
 Nec, quæ te circum stent deinde pericula, cernis?  
 Demens! nec zephyros audis spirare secundos?  
 Illa dolos dirumque nefas in pectore versat,  
 Certa mori, varioque irarum fluctuat æstu. 560

Non fugis hinc præceps, dum præcipitare potestas ?  
 Jam mare turbari trabibus, sævasque videbis  
 Collucere faces, jam fervere litora flammis,  
 Si te his attigerit terris Aurora morantem.  
 Eia age, rumpe moras. Varium et mutabile semper  
 Femina." Sic fatus nocti se immiscuit atræ.

570

Tum vero Æneas subitis exterritus umbris  
 Corripit e somno corpus, sociosque fatigat :  
 "Præcípites vigilate, viri, et considite transtris ;  
 Solvite vela citi. Deus æthere missus ab alto,  
 Festinare fugam, tortosque incidere funes,  
 Ecce iterum stimulat. Sequimur te, sancte deorum,  
 Quisquis es, imperioque iterum paremus ovantes.  
 Adsis o, placidusque juves, et sidera cœlo  
 Dextra feras." Dixit ; vaginaque eripit ensem  
 Fulmineum, strictoque ferit retinacula ferro.

580

Idem omnis simul ardor habet ; rapiuntque ruuntque :  
 Litora deseruere ; latet sub classibus æquor ;  
 Annixi torquent spumas, et cærula verrunt.

Et jam prima novo spargebat lumine terras  
 Tithoni croceum linquens Aurora cubile.  
 Regina e speculis ut primum albescere lucem  
 Vidit, et æquatis classem procedere velis,  
 Litora et vacuos sensit sine remige portus,  
 Terque quaterque manu pectus percussa decorum,  
 Flavescentesque abscissa comas, "Pro Jupiter ! ibit  
 Hic," ait, "et nostris illuserit advena regnis ?"  
 Non arma expedient, totaque ex urbe sequentur,  
 Deripientque rates alii navalibus ? Ite,  
 Ferte citi flammæ, date vela, impellite remos.  
 Quid loquor ? aut ubi sum ? Quæ mentem insania mutat ?  
 Infelix Dido ! nunc te facta impia tangunt ?  
 Tum decuit, quum sceptrâ dabas. En dextra fidesque,  
 Quem secum patrios aiunt portare penates !  
 Quem subiisse humeris confectum ætate parentem !  
 Non potui abreptum divellere corpus, et undis

590

600

Spargere? non socios, non ipsum absumere ferro  
 Ascanium, patriisque epulandum ponere mensis?  
 Verum anceps pugnae fuerat fortuna.—Fuisset;  
 Quem metui moritura? Faces in castra tulissem,  
 Implessemque foros flammis, natumque patremque  
 Cum genere exstinxem, memet super ipsa dedissem.

Sol, qui terrarum flammis opera omnia lustras,  
 Tuque harum interpretres curarum et conscia Juno,  
 Nocturnisque Hecate triviis ululata per urbes,

Et Dirae ultrices, et di morientis Elisae,  
 Accipite haec, meritumque malis advertite numen,  
 Et nostras audite preces. Si tangere portus

Infandum caput ac terris adnare necesse est,  
 Et sic fata Jovis poscunt, hic terminus haeret:

At bello audacis populi vexatus et armis,

Finibus extorris, complexu avulsus Iuli,

Auxilium imploret, videatque indigna suorum

Funera; nec, quum se sub leges pacis iniquae

Tradiderit, regno aut optata luce fruatur,

Sed cadat ante diem mediaque inhumatus arena. 620

Haec precor; hanc vocem extremam cum sanguine fundo.

Tum vos, o Tyrii, stirpem et genus omne futurum

Exercete odiis; cinerique haec mittite nostro

Munera. Nullus amor populis, nec foedera sunt.

Exoriare aliquis nostris ex ossibus ultor,

Qui face Dardanios ferroque sequare colonos,

Nunc, olim, quocumque dabunt se tempore vires.

Litora litoribus contraria, fluctibus undas

Imprecor, arma armis; pugnent ipsique nepotesque."

Haec ait, et partes animum versabat in omnes, 630

Invisam quaerens quam primum abrumpere lucem.

Tum breviter Barcen nutricem affata Sychaei;

Namque suam patria antiqua cinis ater habebat:

"Annam cara mihi nutrix huc siste sororem;

Dic, corpus properet fluviali spargere lympa,

Et pecudes secum et monstrata piacula ducat:



Sic veniat ; tuque ipsa pia tege tempora vitta.  
 Sacra Jovi Stygio, quæ rite incepta paravi,  
 Perficere est animus, finemque imponere curis ;  
 Dardaniique rogam capitis permittere flammæ." 640  
 Sic ait. Illa gradum studio celerabat anili.  
 At trepida et cæptis immanibus efferat Dido,  
 Sanguineam volvens aciem, maculisque tremantes  
 Interfusa genas, et pallida morte futura,  
 Interiora domus irrumpit limina, et altos  
 Conscondit furibunda rogos, enseque recludit  
 Dardanium, non hos quæsitum munus in usus.  
 Hic postquam Iliacas vestes notumque cubile  
 Conspexit, paulum lacrimis et mente morata,  
 Incubuitque toro, dixitque novissima verba : 650  
 " Dulces exuviæ, dum fata deusque sinebant,  
 Accipite hanc animam, meque his exsolve curis.  
 Vixi, et, quem dederat cursum fortuna, peregi ;  
 Et nunc magna mei sub terras ibit imago.  
 Urbem præclaram statui ; mea mœnia vidi ;  
 Ulta virum, pœnas inimico a fratre recepi :  
 Felix, heu nimium felix, si litora tantum  
 Nunquam Dardaniæ tetigissent nostra carinæ !"  
 Dixit : et os impressa toro, " Moriemur inultæ !  
 Sed moriamur !" ait. " Sic, sic juvat ire sub umbras. 660  
 Hauriat hunc oculis ignem crudelis ab alto  
 Dardanus, et nostræ secum ferat omina mortis."

Dixerat : atque illam media inter talia ferro  
 Collapsam aspiciunt comites, enseque cruore  
 Spumantem, sparsasque manus. It clamor ad alta  
 Atria ; concussam bacchatur fama per urbem.  
 Lamentis, gemituque, et femineo ululatu  
 Tecta fremunt ; resonat magnis plangoribus æther :  
 Non aliter quam si immissis ruat hostibus omnis  
 Carthago, aut antiqua Tyros ; flammæque furentes 670  
 Culmina perque hominum volvantur perque deorum.  
 Audiit exanimis, trepidoque exterrita cursu,

Unguibus ora soror fœdans et pectora pugnis,  
 Per medios ruit, ac morientem nomine clamat :  
 "Hoc illud, germana, fuit ? me fraude petebas ?  
 Hoc rogus iste mihi, hoc ignes aræque parabant ?  
 Quid primum deserta querar ? comitemne sororem  
 Sprevisi moriens ? Eadem me ad fata vocasses :  
 Idem ambas ferro dolor, atque eadem hora tulisset.

His etiam struxi manibus, patriosque vocavi  
 Voce deos, sic te ut posita crudelis abessem ? 680

Exstincti me teque, soror, populumque, patresque  
 Sidonios, urbemque tuam. Date, vulnera lymphis  
 Abluam, et, extremus si quis super halitus errat,  
 Ore legam." Sic fata gradus evaserat altos,  
 Semianimemque sinu germanam amplexa fovebat  
 Cum gemitu, atque atros siccabat veste cruores.

Illa, graves oculos conata attollere, rursus  
 Deficit ; infixum stridit sub pectore vulnus.  
 Ter sese attollens cubitoque annixa levavit : 690  
 Ter revoluta toro est, oculisque errantibus alto  
 Quæsivit cœlo lucem, ingemuitque reperta.

Tum Juno omnipotens, longum miserata dolorem  
 Difficilesque obitus, Irim demisit Olympo,  
 Quæ luctantem animam nexosque resolveret artus.  
 Nam, quia nec fato merita nec morte peribat,  
 Sed misera ante diem, subitoque accensa furore,  
 Nondum illi flavum Proserpina vertice crinem  
 Abstulerat, Stygioque caput damnaverat Orco.

Ergo Iris croceis per cœlum roscida pennis, 700  
 Mille trahens varios adverso sole colores,  
 Devolat, et supra caput adstitit : "Ilunc ego Diti  
 Sacrum jussa fero, teque isto corpore solvo."  
 Sic ait, et dextra crinem secat. Omnis et una  
 Dilapsus calor, atque in ventos vita recessit.

P. VIRGILII MARONIS

Æ N E I D O S

LIBER QUINTUS.

---

INTEREA medium Æneas jam classe tenebat  
Certus iter, fluctusque atros aquilone secabat,  
Mœnia respiciens, quæ jam infelicis Elissæ  
Collucent flammis. Quæ tantum accenderit ignem,  
Causa latet ; duri magno sed amore dolores  
Polluto, notumque, furens quid femina possit,  
Triste per augurium Teucrorum pectora ducunt.  
Ut pelagus tenere rates, nec jam amplius ulla  
Occurrit tellus, maria undique et undique cœlum ;  
Olli cæruleus supra caput adstitit imber, 10  
Noctem hiememque ferens ; et inhorruit unda tenebris.  
Ipse gubernator puppi Palinurus ab alta :  
“Heu ! quianam tanti cinxerunt æthera nimbi ?  
Quidve, pater Neptune, paras ?” Sic deinde locutus  
Colligere arma jubet, validisque incumbere remis,  
Obliquatque sinus in ventum, ac talia fatur :  
“Magnanime Ænea, non, si mihi Jupiter auctor  
Spondeat, hoc sperem Italiam contingere cœlo.  
Mutati transversa fremunt et vespere ab atro  
Consurgunt venti, atque in nubem cogitur aër. 20  
Nec nos obniti contra, nec tendere tantum  
Sufficimus. Superat quoniam fortuna, sequamur,  
Quoque vocat, vertamus iter. Nec litora longe  
Fida reor fraterna Erycis portusque Sicanos,

Si modo rite memor servata remetior astra."

Tum pius Æneas : " Equidem sic poscere ventos  
Jamdudum, et frustra cerno te tendere contra.

Flecte viam velis. An sit mihi gratior ulla,

Quove magis fessas optem demittere naves,

Quam quæ Dardaniam tellus mihi servat Acesten,

Et patris Anchisæ gremio complectitur ossa ?"

Hæc ubi dicta, petunt portus, et vela secundi

Intendunt zephyri ; fertur cita gurgite classis,

Et tandem læti notæ advertuntur arenæ.

At procul excelso miratus vertice montis

Adventum sociasque rates occurrit Acestes,

Horridus in jaculis et pelle Libystidis ursæ ;

Troja Crimiso conceptum flumine mater

Quem genuit. Veterum non inmemor ille parentum

Gratatur reduces, et gaza lætus agresti

Excipit, ac fessos opibus solatur amicis.

Postera quum primo stellas oriente fugarat

Clara dies, socios in cœtum litore ab omni

Advocat Æneas, tumulique ex aggere fatur :

" Dardanidæ magni, genus alto a sanguine divum,

Annuus exactis completur mensibus orbis,

Ex quo reliquias divinique ossa parentis

Condidimus terra, mæstasque sacravimus aras.

Jamque dies, ni fallor, adest, quem semper acerbum,

Semper honoratum (sic di voluistis), habebo.

Hunc ego, Gætulis agerem si Syrtibus exsul,

Argolicove mari depensus, et urbe Mycenæ,

Annua vota tamen solemnesque ordine pompas

Exsequerer, strucremque suis altaria donis.

Nunc ultro ad cineres ipsius et ossa parentis,

Haud equidem sine mente reor, sine numine divum,

Adsumus, et portus delati intramus amicos.

Ergo agite, et lætum cuncti celebremus honorem ;

Poscamus ventos ; atque hæc me sacra quotannis

Urbe velit posita templis sibi ferre dicatis.

30

40

50

60

Bina boum vobis Troja generatus Acestes  
 Dat numero capita in naves ; adhibete penates  
 Et patrios epulis, et quos colit hospes Acestes.  
 Præterea, si nona diem mortalibus alnum  
 Aurora extulerit radiisque retexerit orbem,  
 Prima citæ Teucris ponam certamina classis ;  
 Quique pedum cursu valet, et qui viribus audax  
 Aut jaculo incedit melior levibusque sagittis,  
 Seu crud- fudit pugnam committere cestu ;  
 Cuncti adsint, meritæque exspectent præmia palmæ. 70  
 Ore favete omnes, et tempora cingite ramis."

Sic fatus, velat materna tempora myrto.  
 Hoc Helymus facit, hoc ævi maturus Acestes,  
 Hoc puer Ascanius, sequitur quos cetera pubes.  
 Ille e concilio multis cum millibus ibat  
 Ad tumulum, magna medius comitaute caterva.  
 Hic duo rite mero libans carchesia Baccho  
 Fundit humi, duo lacte novo, duo sanguine sacro ;  
 Purpureosque jacet flores, ac talia fatur :  
 "Salve, sancte parens, iterum ; salvete recepti 80  
 Nequidquam cineres, animæque umbræque paternæ.  
 Non licuit fines Italos fataliaque arva,  
 Nec tecum Ausonium, quicumque est, quærere Thybrim."  
 Dixerat hæc ; adytis quum lubricus anguis ab imis  
 Septem ingens gyros, septena volumina traxit,  
 Amplexus placide tumulum, lapsusque per aras ;  
 Cæruleæ cui terga notæ, maculosus et auro  
 Squamam incendebat fulgor : ceu nubibus arcus  
 Mille jacet varios adverso sole colores.  
 Obstupuit visu Æneas : ille agmine longo 90  
 Tandem inter pateras et levia pocula serpens  
 Libavitque dapes, rursusque innoxius imo  
 Successit tumulo, et depasta altaria liquit.  
 Hoc magis inceptos genitori instaurat honores,  
 Incertus, Geniumne loci famulumne parentis  
 Esse putet : cædit binas de more bidentes,

Totque sues, totidem nigrantes terga juvencos ;  
 Vinaque fundebat pateris, animamque vocabat  
 Anchisæ magni manesque Acheronte remissos.  
 Nec non et socii, quæ cuique est copia, læti 100  
 Dona ferunt, onerant aras, mactantque juvencos :  
 Ordine ahena locant alii, fusique per herbam  
 Subjiciunt veribus prunas, et viscera torrent.

Exspectata dies aderat, nonamque serena  
 Auroram Phaëthontis equi jam luce vehebant ;  
 Famaque finitimos et clari nomen Acestæ  
 Excierat : læto complerant litora cœtu,  
 Visuri Æneadas, pars et certare parati.  
 Munera principio ante oculos circoque locantur  
 In medio, sacri tripodes, viridesque coronæ, 110  
 Et palmæ, pretium victoribus, armaque, et ostro  
 Perfusæ vestes, argenti aurique talentum :  
 Et tuba commissos medio canit aggere ludos.  
 Prima pares ineunt gravibus certamina remis  
 Quatuor ex omni delectæ classe carinæ :  
 Velocem Mnestheus agit acri remige Pristin ;  
 Mox Italus Mnestheus, genus a quo nomine Memmî ;  
 Ingentemque Gyas ingenti mole Chimæram,  
 Urbis opus, triplici pubes quam Dardana versu  
 Impellunt, terno consurgunt ordine remi ; 120  
 Sergestusque, domus tenet a quo Sergia nomen,  
 Centauro invehitur magna ; Scyllaque Cloanthus  
 Cærulea, genus unde tibi, Romane Cluenti.

Est procul in pelago saxum spumantia contra  
 Litora, quod tumidis submersum tunditur olim  
 Fluctibus, hiberni condunt ubi sidera Cori ;  
 Tranquillo silet, immotaque attollitur unda  
 Campus, et apricis statio gratissima mergis.  
 Hic viridem Æneas frondenti ex ilice metam  
 Constituit signum nautis pater, unde reverti 130  
 Scirent, et longos ubi circumflectere cursus.  
 Tum loca sorte legunt, ipsique in puppibus auro

Ductores longe effulgent ostroque decori ;  
 Cetera populea velatur fronde juvenus,  
 Nudatosque humeros oleo perfusa nitescit.  
 Considunt transtris, intentaque brachia remis :  
 Intenti exspectant signum, exsultantiaque haurit  
 Corda pavor pulsans, laudumque arrecta cupido.  
 Inde ubi clara dedit sonitum tuba, finibus omnes,  
 Haud mora, prosiluire suis : ferit æthera clamor 140  
 Nauticus ; adductis spumant freta versa lacertis.  
 Infidunt pariter sulcos, totumque dehiscit  
 Convulsum remis rostrisque tridentibus æquor.  
 Non tam præcipites bijugo certamine campum  
 Corripuere ruuntque effusi carcere currus ;  
 Nec sic immissis aurigæ undantia lora  
 Concussere jugis, pronique in verbera pendent.  
 Tum plausu fremituque virum studiisque faventum  
 Consonat omne nemus, vocemque inclusa volutant  
 Litora ; pulsati colles clamore resultant. 150  
 Effugit ante alios, primisque elabitur undis  
 Turbam inter fremitumque Gyas ; quem deinde Cloanthus  
 Consequitur, melior remis ; sed pondere pinus  
 Tarda tenet. Post hos æquo discrimine Pristis  
 Centaurusque locum tendunt superare priorem ;  
 Et nunc Pristis habet, nunc victam præterit ingens  
 Centaurus ; nunc una ambæ junctisque feruntur  
 Frontibus, et longa sulcant vada salsa carina.  
 Jamque propinquabant scopulo, metamque tenebant :  
 Cum princeps medioque Gyas in gurgite victor 160  
 Rectorem navis compellat voce Menœten :  
 “ Quo tantum mihi dexter abis ? huc dirige gressum ;  
 Litus ama, et lævas stringat sine palmula cautes ;  
 Altum alii teneant.” Dixit. Sed cæca Menœtes  
 Saxa timens proram pelagi detorquet ad undas.  
 “ Quo diversus abis ?” iterum : “ pete saxa, Menœte,”  
 Cum clamore Gyas revocabat ; et ecce Cloanthum  
 Respicit instantem tergo et propiora tenentem.

Ille inter navemque Gyæ scopulosque sonantes  
 Radit iter lævum interior, subitoque priorem 170  
 Præterit, et metis tenet æquora tuta relictis.  
 Tum vero exarsit juveni dolor ossibus ingens ;  
 Nec lacrimis caruere genæ ; segnemque Menœten,  
 Oblitus decorisque sui sociumque salutis,  
 In mare præcipitem puppi deturbat ab alta :  
 Ipse gubernaclo rector subit, ipse magister,  
 Hortaturque viros, clavumque ad litora torquet.  
 At gravis, ut fundo vix tandem redditus imo est  
 Jam senior, madidaque fluens in veste, Menœtes,  
 Summa petit scopuli, siccaque in rupe resedit. 180  
 Illum et labentem Teucri et risere natantem ;  
 [Et salsos rident revomentem pectore fluctus.]  
 Hic læta extremis spes est accensa duobus,  
 Sergesto Mnestheique, Gyan superare morantem.  
 Sergestus capit ante locum, scopuloque propinquat ;  
 Nec tota tamen ille prior præeunte carina ;  
 Parte prior ; partem rostro premit æmula Pristis.  
 At media socios incedens nave per ipsos  
 Hortatur Mnestheus : “ Nunc, nunc insurgite remis,  
 Hectorei socii, Trojæ quos sorte suprema 190  
 Delegi comites ; nunc illas promite vires,  
 Nunc animos, quibus in Gætulis Syrtibus usi,  
 Ionioque mari, Maleæque sequacibus undis.  
 Non jam prima peto Mnestheus, neque vincere certo ;  
 Quamquam o ! sed superent, quibus hoc, Neptune, dedisti ;  
 Extremos pudeat rediisse : hoc vincite, cives,  
 Et prohibete nefas.” Olli certamine summo  
 Procumbunt : vastis tremit ictibus ærea puppis,  
 Subtrahiturque solum ; tum creber anhelitus artus  
 Aridaque ora quatit ; sudor fluit undique rivis. 200  
 Attulit ipse viris optatum casus honorem.  
 Namque furens animi, dum proram ad saxa suburget  
 Interior, spatioque subit Sergestus iniquo :  
 Infelix saxis in procurentibus hæsit.



Concussæ cautes, et acuto in murice remi  
 Obnixi crepuere, illisaque prora pependit.  
 Consurgunt nautæ, et magno clamore morantur :  
 Ferratasque trudes et acuta cuspide contos  
 Expediunt, fractosque legunt in gurgite remos.  
 At lætus Mnestheus, successuque acrior ipso, 210  
 Agmine remorum celeri, ventisque vocatis,  
 Prona petit maria, et pelago decurrit aperto.  
 Qualis spelunca subito commota columba,  
 Cui domus et dulces latebroso in pumice nidi,  
 Fertur in arva volans, plausumque exterrita pennis  
 Dat tecto ingentem ; mox aëre lapsa quieto  
 Radit iter liquidum, celeres neque commovet alas :  
 Sic Mnestheus, sic ipsa fuga secat ultima Pristis  
 Æquora, sic illam fert impetus ipse volantem.  
 Et primum in scopulo luctantem deserit alto 220  
 Sergestum brevibusque vadis, frustra que vocantem  
 Auxilia, et fractis discentem currere remis.  
 Inde Gyan ipsamque ingenti mole Chimæram  
 Consequitur ; cedit, quoniam spoliata magistro est.  
 Solus jamque ipso superest in fine Cloanthus,  
 Quem petit, et summis adnexus viribus urget.  
 Tum vero ingeminat clamor, cunctique sequentem  
 Instigant studiis, resonatque fragoribus æther.  
 Hi proprium decus et partum indignantur honorem  
 Ni teneant, vitæque volunt pro laude pacisci ; 230  
 Hos successus alit : possunt, quia posse videntur.  
 Et fors æquatis cepissent præmia rostris,  
 Ni palmas ponto tendens utrasque Cloanthus  
 Fudissetque preces, divosque in vota vocasset :  
 “ Di, quibus imperium est pelagi, quorum æquora curro,  
 Vobis lætus ego hoc candentem in litore taurum  
 Constituam ante aras, voti reus, extaque salsos  
 Porriciam in fluctus, et vina liquentia fundam.”  
 Dixit, eumque imis sub fluctibus audiit omnis  
 Nereïdum Phorcique chorus, Panopeaque virgo ; 240

Et pater ipse manu magna Portunus euntem  
 Impulit. Illa noto citius volucrique sagitta  
 Ad terram fugit, et portu se condidit alto.  
 Tum satus Anchisa, cunctis ex more vocatis,  
 Victorem magna præconis voce Cloanthum  
 Declarat, viridique advelat tempora lauro;  
 Muneraque in naves ternos optare juvencos  
 Vinaque, et argenti magnum dat ferre talentum.  
 Ipsis præcipuos ductoribus addit honores:  
 Victori chlamydem auratam, quam plurima circum 250  
 Purpura Mæandro duplici Melibœa cucurrit;  
 Intextusque puer frondosa regius Ida  
 Veloces jaculo cervos cursuque fatigat  
 Acer, anhelanti similis, quem præpes ab Ida  
 Sublimem pedibus rapuit Jovis armiger uncis.  
 Longævi palmas nequidquam ad sidera tendunt  
 Custodes; sævitque canum latratus in auras.  
 At qui deinde locum tenuit virtute secundum,  
 Levibus huic hamis consertam auroque trilicem  
 Loricam, quam Demoleo detraxerat ipse 260  
 Victor apud rapidum Simoënta sub Illo alto,  
 Donat habere viro, decus et tutamen in armis.  
 Vix illam famuli Phegeus Sagarisque ferebant  
 Multiplicem, connixi humeris; indutus at olim  
 Demoleos cursu palantes Troas agebat.  
 Tertia dona facit geminos ex ære lebetas,  
 Cymbiaque argento perfecta atque aspera signis.  
 Jamque adeo donati omnes, opibusque superbi,  
 Puniceis ibant evincti tempora tæniis:  
 Quum sævo e scopulo multa vix arte revulsus, 270  
 Amissis remis, atque ordine debilis uno,  
 Irrisam sine honore ratem Sergestus agebat.  
 Qualis sæpe viæ deprensus in aggere serpens,  
 Ærea quem obliquum rota transiit, aut gravis ictu  
 Seminecem liquit saxo lacerumque viator;  
 Nequidquam longos fugiens dat corpore tortus,

Parte ferox, ardensque oculis, et sibila colla  
 Arduus attollens; pars vulnere clauda retentat  
 Nexantem nodis, seque in sua membra plicantem.  
 Tali remigio navis se tarda movebat;

280

Vela facit tamen, et velis subit ostia plenis.  
 Sergestum Æneas promisso munere donat,  
 Servatam ob navem lætus sociosque reductos.  
 Olli serva datur, operum haud ignara Minervæ,  
 Cressa genus, Pholoë, geminique sub ubere nati.

Hoc pius Æneas misso certamine tendit  
 Gramineum in campum, quem collibus undique curvis  
 Cingebant silvæ; mediaque in valle theatri  
 Circus erat, quo se multis cum millibus heros  
 Consessu medium tulit exstructoque resedit.

290

Hic, qui forte velint rapido contendere cursu,  
 Invitat pretiis animos, et præmia ponit.  
 Undique conveniunt Teuceri mixtique Sicani;  
 Nisus et Euryalus primi:

Euryalus formæ insignis viridique juventa,  
 Nisus amore pio pueri; quos deinde secutus  
 Regius egregia Priami de stirpe Diores;  
 Hunc Salius simul et Patron: quorum alter Acarnan,  
 Alter ab Arcadio Tegeææ sanguine gentis;  
 Tum duo Trinacrii juvenes, Helymus Panopesque,

300

Assueti silvis, comites senioris Acestæ;  
 Multi præterea, quos fama obscura recondit.  
 Æneas quibus in mediis sic deinde locutus:  
 "Accipite hæc animis, lætasque advertite mentes.  
 Nemo ex hoc numero mihi non donatus abibit.  
 Gnosia bina dabo levato lucida ferro

Spicula, cælatamque argento ferre bipennem:  
 Omnibus hic erit unus honos. Tres præmia primi  
 Accipient, flavaque caput nectentur oliva:

Primus equum phaleris insignem victor habeto;  
 Alter Amazoniam pharetram plenamque sagittis  
 Threïciis, lato quam circumplectitur auro

310

Balteus, et tereti subnectit fibula gemma ;  
Tertius Argolica hac galea contentus abito."

Hæc ubi dicta, locum capiunt, signoque repente  
Corripiunt spatia audito, limenque relinquunt,  
Effusi nimbo similes ; simul ultima signant.

Primus abit, longeque ante omnia corpora Nisus  
Emicat, et ventis et fulminis ocior alis.

Proximus huic, longo sed proximus intervallo, 320

Insequitur Salius ; spatio post deinde relicto

Tertius Euryalus :

Euryalumque Helymus sequitur ; quo deinde sub ipso

Ecce volat, calcemque terit jam calce Diores,

Incumbens humero ; spatia et si plura supersint,

Transeat elapsus prior, ambiguumve relinquat.

Jamque fere spatio extremo, fessique, sub ipsam

Finem adventabant : levi cum sanguine Nisus

Labitur infelix, cæsis ut forte juvenicis

Fusus humum viridesque super madefecerat herbas. 330

Hic juvenis jam victor ovans vestigia presso

Haud tenuit titubata solo ; sed pronus in ipso

Concidit immundoque fimo sacroque cruore.

Non tamen Euryali, non ille oblitus amorum :

Nam sese opposuit Salio per lubrica surgens ;

Ille autem spissa jacuit revolutus arena.

Emicat Euryalus, et munere victor amici

Prima tenet, plausuque volat fremituque secundo.

Post Helymus subit, et nunc tertia palma Diores.

Hic totum cavæ consessum ingentis, et ora 340

Prima patrum, magnis Salius clamoribus implet,

Ereptumque dolo reddi sibi poscit honorem.

Tutatur favor Euryalum, lacrimæque decoræ,

Gratior et pulchro veniens in corpore virtus.

Adjuvat, et magna proclamat voce Diores,

Qui subiit palmæ, frustra ad præmia venit

Ultima, si primi Salio redduntur honores.

Tum pater Æneas, "Vestra," inquit, "munera vobis

Certa manent, pueri; et palmam movet ordine nemo :  
 Me liceat casus miserari insontis amici." 350

Sic fatus, tergum Gætuli inmane leonis  
 Dat Salio, villis onerosum atque unguibus aureis.  
 Hic Nisus, "Si tanta," inquit, "sunt præmia victis,  
 Et te lapsorum miseret : quæ munera Niso  
 Digna dabis ? primam merui qui laude coronam,  
 Ni me, quæ Salium, fortuna inimica tulisset :"  
 Et simul his dictis faciem ostentabat, et udo  
 Turpia membra fimo. Risit pater optimus olli,  
 Et clipeum efferri jussit, Didymaonis artes,  
 Neptuni sacro Danaïs de poste refixum. 360  
 Hoc juvenem egregium præstanti munere donat.

Post, ubi confecti cursus, et dona peregit ;  
 "Nunc, si cui virtus animusque in pectore præsens  
 Adsit, et evinctis attollat brachia palmis."  
 Sic ait, et geminum pugnæ proponit honorem :  
 Victori velatum auro vittisque juvenum ;  
 Ensem atque insignem galeam, solatia victo.  
 Nec mora ; continuo vastis cum viribus effert  
 Ora Dares, magnoque virum se murmure tollit ;  
 Solus qui Paridem solitus contendere contra, 370  
 Idemque ad tumulum, quo maximus occubat Hector,  
 Victorem Buten immani corpore, qui se  
 Bebrycia veniens Amyci de gente ferebat,  
 Perculit, et fulva moribundum extendit arena.  
 Talis prima Dares caput altum in prælia tollit,  
 Ostenditque humeros latos, alternaque jactat  
 Brachia protendens, et verberat ictibus auras.  
 Quæritur huic alius : nec quisquam ex agmine tanto  
 Audet adire virum, manibusque inducere cestus.  
 Ergo alacris, cunctosque putans excedere palma, 380  
 Æneæ stetit ante pedes ; nec plura moratus,  
 Tum læva taurum cornu tenet, atque ita fatur :  
 "Nate dea, si nemo audet se credere pugnæ,  
 Quæ finis standi ? quo me decet usque teneri ?

Ducere dona jube." Cuncti simul ore fremebant  
 Dardanidæ, reddique viro promissa juebant.  
 Hic gravis Entellum dictis castigat Acestes,  
 Proximus ut viridante toro consederat herbæ :  
 " Entelle, heroum quondam fortissime frustra,  
 Tantane tam patiens nullo certamine tolli 390  
 Dona sines ? ubi nunc nobis deus ille, magister  
 Nequidquam memoratus, Eryx ? ubi fama per omnem  
 Trinacriam, et spolia illa tuis pendentia tectis ?"  
 Ille sub hæc : " Non laudis amor, nec gloria cessit,  
 Pulsa metu ; sed enim gelidus tardante senecta  
 Sanguis hebet, frigentque effetæ in corpore vires.  
 Si mihi, quæ quondam fuerat, quaque improbus iste  
 Exsultat fidens, si nunc foret illa juventas ;  
 Haud equidem pretio inductus pulchroque juvenco  
 Venissem : nec dona moror." Sic deinde locutus 400  
 In medium geminos immani pondere cestus  
 Projecit, quibus acer Eryx in prælia suetus  
 Ferre manum, duroque intendere brachia tergo.  
 Obstupuere animi : tantorum ingentia septem  
 Terga boum plumbo insuto ferroque rigeabant.  
 Ante omnes stupet ipse Dares, longeque recusat ;  
 Magnanimusque Anchisiades et pondus et ipsa  
 Huc illuc vinctorum immensa volumina versat.  
 Tum senior tales referebat pectore voces :  
 " Quid, si quis cestus ipsius et Herculis arma 410  
 Vidisset, tristemque hoc ipso in litore pugnam ?  
 Hæc germanus Eryx quondam tuus arma gerebat :  
 Sanguine cernis adhuc fractoque infecta cerebro.  
 His magnum Alciden contra stetit ; his ego suetus,  
 Dum melior vires sanguis dabat, æmula necdum  
 Temporibus geminis canebat sparsa senectus.  
 Sed, si nostra Dares hæc Troïus arma recusat,  
 Idque pio sedet Æneæ, probat auctor Acestes,  
 Æquemus pugnæ. Erycis tibi terga remitto ;  
 Solve metus ; et tu Trojanos exue cestus." 420

Hæc fatus duplicem ex humeris rejecit amictum,  
Et magnos membrorum artus, magna ossa lacertosque  
Exuit, atque ingens media consistit arena.  
Tum satus Anchisa cestus pater extulit æquos,  
Et paribus palmas amborum innexuit armis.  
Constitit in digitos extemplo arrectus uterque,  
Brachiaque ad superas interritus extulit auras.  
Abduxere retro longe capita ardua ab ictu,  
Immiscentque manus manibus, pugnamque lacesunt ;  
Ille pedum melior motu fretusque juvena, 430  
Hic membris et mole valens : sed tarda trementi  
Genua labant ; vastos quatit æger anhelitus artus.  
Multa viri nequidquam inter se vulnera jactant,  
Multa cavo lateri ingeminant, et pectore vastos  
Dant sonitus : erratque aures et tempora circum  
Crebra manus ; duro crepitant sub vulnere malæ.  
Stat gravis Entellus, nisuque immotus eodem  
Corpore tela modo atque oculis vigilantibus exit.  
Ille, velut celsam oppugnat qui molibus urbem  
Aut montana sedet circum castella sub armis, 440  
Nunc hos, nunc illos aditus, omnemque pererrat  
Arte locum, et variis assultibus irritus urget.  
Ostendit dextram insurgens Entellus, et alte  
Extulit : ille ictum venientem a vertice velox  
Prævidit, celerique elapsus corpore cessit.  
Entellus vires in ventum effudit, et ultro  
Ipse gravis graviterque ad terram pondere vasto  
Concidit : ut quondam cava concidit aut Erymantho,  
Aut Ida in magna radicibus eruta pinus.  
Consurgunt studiis Teucris et Trinacria pubes ; 450  
It clamor cœlo ; primusque accurrit Acestes,  
Æquævumque ab humo miserans attollit amicum.  
At non tardatus casu neque territus heros  
Acrior ad pugnam redit, ac vim suscitât ira ;  
Tum pudor incendit vires et conscia virtus ;  
Præcipitemque Daren ardens agit æquore toto,

Nunc dextra ingeminans ictus, nunc ille sinistra.  
Nec mora, nec requies. Quam multa grandine nimbi  
Culminibus crepitant : sic densis ictibus heros  
Creber utraque manu pulsat versatque Dareta. 460  
Tum pater Æneas procedere longius iras,  
Et sævire animis Entellum haud passus acerbis ;  
Sed finem imposuit pugnae, fessumque Dareta  
Eripuit, mulcens dictis, ac talia fatur :  
“ Infelix, quæ tanta animum dementia cepit ?  
Non vires alias conversaque numina sentis ?  
Cede deo.” Dixitque et, prælia voce diremit.  
Ast illum fidi æquales, genua ægra trahentem,  
Jactantemque utroque caput, crassumque cruorem  
Ore ejectantem, mixtosque in sanguine dentes, 470  
Ducunt ad naves ; galeamque ensemque vocati  
Accipiunt : palmam Entello taurumque relinquunt.  
Hic victor, superans animis, tauroque superbus :  
“ Nate dea, vosque hæc,” inquit, “ cognoscite Teucri,  
Et mihi quæ fuerint juvenali in corpore vires,  
Et qua servetis revocatum a morte Dareta.”  
Dixit, et adversi contra stetit ora juvenci,  
Qui donum adstabat pugnae ; duosque reducta  
Libravit dextra media inter cornua cestus  
Arduus, effractoque illisit in ossa cerebro. 480  
Sternitur, exanimisque tremens procumbit humi bos.  
Ille super tales effundit pectore voces :  
“ Hanc tibi, Eryx, meliorem animam pro morte Daretis  
Persolvo : hic victor cestus artemque repono.”  
Protenus Æneas celeri certare sagitta  
Invitat, qui forte velint, et præmia ponit ;  
Ingentique manu malum de nave Seresti  
Erigit ; et volucrum trajecto in fune columbam,  
Quo tendant ferrum, malo suspendit ab alto.  
Convenere viri, dejectamque ærea sortem 490  
Accepit galea ; et primus clamore secundo  
Hyrtacidæ ante omnes exit locus Hippocoontis ;



Quem modo navali Mnestheus certamine victor  
 Consequitur, viridi Mnestheus evinctus oliva :  
 Tertius Eurytion, tuus, o clarissime, frater,  
 Pandare, qui quondam, jussus confundere fœdus,  
 In medios telum torsisti primus Achivos.  
 Extremus galeaque ima subsedit Acestes,  
 Ausus et ipse manu juvenum tentare laborem.  
 Tum validis flexos incurvant viribus arcus 500  
 Pro se quisque viri, et depromunt tela pharetris.  
 Primaque per cœlum nervo stridente sagitta  
 Hyrtacidæ juvenis volucres diverberat auras ;  
 Et venit, adversique infigitur arbore mali.  
 Intremuit malus, timuitque exterrita pennis  
 Ales, et ingenti sonuerunt omnia plausu.  
 Post acer Mnestheus adducto constitit arcu,  
 Alta petens, pariterque oculos telumque tetendit :  
 Ast ipsam miserandus avem contingere ferro  
 Non valuit ; nodos et vincula linea rupit, 510  
 Queis innexa pedem malo pendebat ab alto :  
 Illa notos atque atra volans in nubila fugit.  
 Tum rapidus jumdudum arcu contenta parato  
 Tela tenens, fratrem Eurytion in vota vocavit,  
 Jam vacuo lætam cœlo speculatus ; et alis  
 Plaudentem nigra figit sub nube columbam.  
 Decidit exanimis, vitamque reliquit in astris  
 Ætheriis, fixamque refert delapsa sagittam.  
 Amissa solus palma superabat Acestes :  
 Qui tamen ærias telum contendit in auras, 520  
 Ostentans artemque pater arcumque sonantem.  
 Hic oculis subitum objicitur magnoque futurum  
 Augurio monstrum : docuit post exitus ingens,  
 Seraque terrifici cecinerunt omina vates.  
 Namque volans liquidis in nubibus arsit arundo,  
 Signavitque viam flammis, tenuesque recessit  
 Consumta in ventos : cœlo ceu sæpe refixa  
 Transcurreunt crinemque volantia sidera ducunt.

Attonitis hæserè animis, superosque precati  
 Trinacrii Teucrique viri: nec maximus omen  
 Abnuìt Æneas; sed lætum amplexus Accesten  
 Muneribus cumulat magnis, ac talia fatur:  
 "Sume, pater; nam te voluit rex magnus Olympi  
 Talibus auspiciis exsortem ducere honores.  
 Ipsius Anchisæ longævi hoc munus habebis,  
 Cratera impressum signis, quem Thracius olim  
 Anchisæ genitori in magno munere Cisseus  
 Ferre sui dederat monumentum et pignus amoris."  
 Sic fatus cingit viridanti tempora lauro,  
 Et primum ante omnes victorem appellat Acesten.  
 Nec bonus Eurytion prælato invidit honori;  
 Quamvis solus avem cœlo dejecit ab alto.  
 Proximus ingreditur donis, qui vincula rupit;  
 Extremus, volucris qui fixit arundine malum.

530

540

550

560

At pater Æneas, nondum certamine misso,  
 Custodem ad sese comitemque impubis Iuli  
 Epytiden vocat, et fidam sic fatur ad aurem:  
 "Vade age, et Ascanio, si jam puerile paratum  
 Agmen habet secum, cursusque instruxit equorum,  
 Ducat avo turmas, et sese ostendat in armis,  
 Dic," ait. Ipse omnem longo decedere circo  
 Infusum populum, et campos jubet esse patentes.  
 Incedunt pueri, pariterque ante ora parentum  
 Frenatis lucent in equis: quos omnis euntes  
 Trinacriæ mirata fremit Trojæque juvenus.  
 Omnibus in morem tona coma pressa cerona:  
 Cornea bina ferunt præfixo hastilia ferro,  
 Pars leves humero pharetras; it pectore summo  
 Flexilis obtorti per collum circulus auri.  
 Tres equitum numero turmæ, ternique vagantur  
 Ductores; pueri bis seni quemque secuti  
 Agmine partito fulgent, paribusque magistris.  
 Una acies juvenum, ducit quam parvus ovantem  
 Nomen avi referens Priamus, tua clara, Polite,

Progenies, auctura Italos ; quem Thracius albis  
 Portat equus bicolor maculis, vestigia primi  
 Alba pedis frontemque ostentans arduus albam.  
 Alter Atys, genus unde Atii duxere Latini,  
 Parvus Atys, pueroque puer dilectus Iulo.  
 Extremus, formaque ante omnes pulcher, Iulus 570  
 Sidonio est investus equo, quem candida Dido  
 Esse sui dederat monumentum et pignus amoris :  
 Cetera Trinacriis pubes senioris Acestæ  
 Fertur equis.  
 Excipiunt plausu pavidos, gaudentque tuentes  
 Dardanidæ ; veterumque agnoscunt ora parentum.  
 Postquam omnem læti consessum oculosque suorum  
 Lustravere in equis : signum clamore paratis  
 Epytides longe dedit, insonuitque flagello.  
 Olli discurrere pares, atque agmina terni 580  
 Diductis solvere choris, rursusque vocati  
 Convertere vias, infestaque tela tulere.  
 Inde alios ineunt cursus aliosque recursus  
 Adversis spatiis, alternisque orbibus orbes  
 Impediunt, pugnaeque cient simulacra sub armis :  
 Et nunc terga fuga nudant ; nunc spicula vertunt  
 Infensi ; facta pariter nunc pace feruntur.  
 Ut quondam Creta fertur Labyrinthus in alta  
 Parietibus textum cæcis iter, ancipitemque  
 Mille viis habuisse dolum, qua signa sequendi 590  
 Falleret indeprencus et irremeabilis error.  
 Haud alio Teucrum nati vestigia cursu  
 Impediunt, texuntque fugas et prælia ludo ;  
 Delphinum similes, qui per maria humida nando  
 Carpathium Libycumque secant [luduntque per undas.]  
 Hunc morem, hos cursus, atque hæc certamina primus  
 Ascanius, Longam muris quum cingeret Albam,  
 Retulit, et priscos docuit celebrare Latinos,  
 Quo puer ipse modo, secum quo Troïa pubes.  
 Albani docuere suos ; hinc maxima porro 600

Accepit Roma, et patrium servavit honorem ;  
Trojaque nunc, pueri Trojanum dicitur agmen.  
Ilae celebrata tenus sancto certamina patri.

Ilic primum fortuna fidem mutata novavit.  
Dum variis tumultu referunt solemnia ludis ;  
Irim de cœlo misit Saturnia Juno  
Iliacam ad classem, ventosque aspirat eunti,  
Multa movens, necdum antiquum saturata dolorem.  
Illa viam celerans per mille coloribus arcum,  
Nulli visa, cito decurrit tramite virgo :

610

Conspicit ingentem concursum, et litora lustrat,  
Desertosque videt portus classemque relictam.  
At procul in sola secretæ Troades acta  
Amisum Anchisen flebant, cunctæque profundum  
Pontum aspectabant flentes : “ Heu, tot vada fessis,  
Et tantum superesse maris ! ” vox omnibus una.

Urbem orant ; tædet pelagi perferre laborem.

Ergo inter medias sese haud ignara nocendi  
Conjicit, et faciemque decæ vestemque reponit :

Fit Beroë, Tmarii conjux longæva Dorycli,

620

Cui genus et quondam nomen natique fuissent ;

Ac sic Dardanidum mediam se matribus infert :

“ O miseræ, quas non manus,” inquit, “ Achaïca bello

Traxerit ad letum patriæ sub mœnibus ! o gens

Infelix ! cui te exitio fortuna reservat ?

Septima post Trojæ excidium jam vertitur æstas,

Quum freta, quum terras omnes, tot inhospita saxa

Sideraque emensæ ferimur ; dum per mare magnum

Italiam sequimur fugientem, et volvimur undis.

Hic Erycis fines fraterni, atque hospes Acestes :

630

Quid prohibet muros jacere, et dare civibus urbem ?

O patria, et rapti nequidquam ex hoste penates,

Nullane jam Trojæ dicentur mœnia ? nusquam

Hectoreos amnes, Xanthum et Simoënta, videbo ?

Quin agite, et mecum infaustas exurite puppes.

Nam mihi Cassandræ per somnum vatis imago

Ardentes dare visa faces. Hic quærite Trojam ;  
 Hic domus est, inquit, vobis. Jam tempus agi res ;  
 Nec tantis mora prodigiis. En quatuor aræ  
 Neptuno. Deus ipse faces animumque ministrat.” 640  
 Hæc memorans, prima infensum vi corripit ignem,  
 Sublataque procul dextra connixa coruscat,  
 Et jacit. Arrectæ mentes, stupefactaque corda  
 Iliadum. Hic una e multis, quæ maxima natu,  
 Pyrgo, tot Priami natorum regia nutrix :  
 “Non Beroë vobis, non hæc Rhœteia, matres,  
 Est Dorycli conjux. Divini signa decoris,  
 Ardentesque notate oculos ; qui spiritus illi,  
 Qui vultus, vocisve sonus, vel gressus eunti.  
 Ipsa egomet dudum Beroën digressa reliqui 650  
 Ægram, indignantem, tali quod sola careret  
 Munere, nec meritos Anchisæ inferret honores.”  
 Hæc effata.

At matres primo ancipites oculisque malignis  
 Ambiguæ spectare rates, miserum inter amorem  
 Præsentis terræ, fatisque vocantia regna :  
 Quum dea se paribus per cœlum sustulit alis,  
 Ingentemque fuga secuit sub nubibus arcum.  
 Tum vero attonitæ monstris actæque furore  
 Conclamant, rapiuntque focis penetralibus ignem ; 660  
 Pars spoliant aras, frondem ac virgulta facesque  
 Conjiciunt. Furit immissis Vulcanus habenis  
 Transtra per et remos et pictas abiete puppes.  
 Nuncius Anchisæ ad tumultum cuneosque theatri  
 Incensas perfert naves Eumelus ; et ipsi  
 Respiciunt atram in nimbo volitare favillam.  
 Primus et Ascanius, cursus ut lætus equestres  
 Ducebat, sic acer equo turbata petivit  
 Castra ; nec exanimis possunt retinere magistri.  
 “Quis furor iste novus ? quo nunc, quo tenditis,” inquit, 670  
 “Heu miseræ cives ? non hostem, inimicaque castra  
 Argivum ; vestras spes uritis. En, ego vester

Ascanius :” galeam ante pedes projecit inanem,  
 Qua ludo indutus belli simulacra ciebat.  
 Accelerat simul Æneas, simul agmina Teucrum.  
 Ast illæ diversa metu per litora passim  
 Diffugiunt ; silvasque, et sicubi concava furtim  
 Saxa petunt. Piget incepti lucisque, suosque  
 Mutatæ agnoscunt, excussaue pectore Juno est.  
 Sed non idcirco flammæ atque incendia vires  
 Indomitas posuere : udo sub robore vivit  
 Stuppa vomens tardum fumum, lentusque carinas  
 Est vapor, et toto descendit corpore pestis ;  
 Nec vires heroum infusaue flumina prosunt.  
 Tum pius Æneas humeris abscindere vestem,  
 Auxilioque vocare deos, et tendere palmas :  
 “ Jupiter omnipotens, si nondum exosus ad unum  
 Trojanos, si quid pietas antiqua labores  
 Respicit humanos, da flammam evadere classi  
 Nunc, Pater, et tenues Teucrum res eripe leto.  
 Vel tu, quod superest, infesto fulmine morti,  
 Si mereor, demitte, tuaque hic obrue dextra.”  
 Vix hæc ediderat, quum effusis imbris atra  
 Tempestas sine more furit, tonitruque tremiscunt  
 Ardua terrarum et campi ; ruit æthere toto  
 Turbidus imber aqua densisque nigerrimus austris ;  
 Implenturque super puppes ; semiusta madescunt  
 Robora ; restinctus donec vapor omnis, et omnes,  
 Quatuor amissis, servatæ a peste carinæ.  
 At pater Æneas, casu concussus acerbo,  
 Nunc huc ingentes nunc illuc pectore curas  
 Mutabat versans : Siculisne resideret arvis,  
 Oblitus fatorum, Italasne capesseret oras.  
 Tum senior Nautes, unum Tritonia Pallas  
 Quem docuit, multaue insignem reddidit arte,  
 Hæc responsa dabat, vel quæ portenderet ira  
 Magna deûm, vel quæ fatorum posceret ordo.  
 Isque his Æneam solatus vocibus infit :

680

690

700

“Nate dea, quo fata trahunt retrahuntque, sequamur :  
 Quidquid erit, superanda omnis fortuna ferendo est. 710  
 Est tibi Dardanius divinæ stirpis Acestes :  
 Hunc cape consiliis socium et conjunge volentem ;  
 Huic trade, amissis superant qui navibus, et quos  
 Pertæsum magni incepti rerumque tuarum est ;  
 Longævosque senes, ac fessas æquore matres,  
 Et quidquid tecum invalidum metuensque pericli est,  
 Delige ; et his habeant terris sine mœnia fessi :  
 Urbem appellabunt permissio nomine Acestam.”

Talibus incensus dictis senioris amici :  
 Tum vero in curas animum diducitur omnes ; 720  
 Et Nox atra polum bigis subvecta tenebat.  
 Visa dehinc cœlo facies delapsa parentis  
 Anchisæ subito tales effundere voces :  
 “Nate, mihi vita quondam, dum vita manebat,  
 Care magis ; nate, Iliacis exercite fatis ;  
 Imperio Jovis huc venio, qui classibus ignem  
 Depulit, et cœlo tandem miseratus ab alto est.  
 Consiliis pare, quæ nunc pulcherrima Nautes  
 Dat senior : lectos juvenes, fortissima corda,  
 Defer in Italiam. Gens dura atque aspera cultu 730  
 Debellanda tibi Latio est. Ditis tamen ante  
 Infernas accede domos, et Aversa per alta  
 Congressus pete, nate, meos. Non me impia namque  
 Tartara habent, tristes umbræ ; sed amœna piorum  
 Concilia Elysiumque colo. Huc casta Sibylla  
 Nigrarum multo pecudum te sanguine ducet.  
 Tum genus omne tuum, et, quæ dentur mœnia, disces.  
 Jamque vale : torquet medios Nox humida cursus,  
 Et me sævus equis Oriens afflavit anhelis.”  
 Dixerat : et tenues fugit, ceu fumus, in auras. 740  
 Æneas, “Quo deinde ruis ? quo proripis ?” inquit,  
 “Quem fugis ? aut quis te nostris complexibus arcet ?”  
 Hæc memorans cinerem et sopitos suscitât ignes ;

Pergameumque Larem, et canæ penetralia Vestæ,  
Farre pio et plena supplex veneratur acerra.

Extemplo socios primumque arcessit Acesten,  
Et Jovis imperium et cari præcepta parentis  
Edocet, et quæ nunc animo sententia constet.

Haud mora consiliis, nec jussa recusat Acestes.

Transcribunt urbi matres, populumque volentem

750

Deponunt, animos nil magnæ laudis egentes.

Ipsi transtra novant, flammisque ambesa reponunt

Robora navigiis; aptant remosque rudentesque:

Exigui numero, sed bello vivida virtus.

Interea Æneas urbem designat aratro,

Sortiturque domos; hoc Ilium, et hæc loca Trojam

Esse jubet. Gaudet regno Trojanus Acestes,

Indicitque forum, et patribus dat jura vocatis.

Tum vicina astris Erycino in vertice sedes

Fundatur Veneri Idaliæ, tumuloque sacerdos

760

Ac lucus late sacer additur Anchiseo.

Jamque dies epulata novem gens omnis, et aris

Factus honos; placidi straverunt æquora venti,

Creber et aspirans rursus vocat Auster in altum.

Exoritur procurva ingens per litora fletus;

Complexi inter se noctemque diemque morantur.

Ipsæ jam matres, ipsi, quibus aspera quondam

Visa maris facies, et non tolerabile nomen,

Ire volunt, omnemque fugæ perferre laborem.

Quos bonus Æneas dictis solatur amicis,

770

Et consanguineo lacrimans commendat Acestæ.

Tres Eryci vitulos, et Tempestatibus agnam,

Cædere deinde jubet, solvique ex ordine funem.

Ipse, caput tonsæ foliis evinctus olivæ,

Stans procul in prora pateram tenet, extaque salsos

Porricit in fluctus, ac vina liquentia fundit.

Prosequitur surgens a puppi ventus euntes.

Certatim socii feriunt mare, et æquora verrunt.

At Venus interea Neptunum exercita curis



Alloquitur, talesque effundit pectore questus :

780

“Junonis gravis ira, nec exsaturabile pectus  
Cogunt me, Neptune, preces descendere in omnes ;  
Quam nec longa dies, pietas nec mitigat ulla,  
Nec Jovis imperio fatisque infracta quiescit.  
Non media de gente Phrygum exedissee nefandis  
Urbem odiis satis est, nec pœnam traxe per omnem  
Reliquias ; Trojæ cineres atque ossa peremtæ  
Insequitur. Causas tanti sciat illa furoris.  
Ipse mihi nuper Libycis tu testis in undis,  
Quam molem subito excierit. Maria omnia cœlo  
Miscuit, Æoliis nequidquam freta procellis,  
In regnis hoc ausa tuis.

790

Per scelus ecce etiam Trojanis matribus actis  
Exussit fœde puppes ; et classe subegit  
Amissa socios ignotæ linqvere terræ.  
Quod superest, oro, liceat dare tuta per undas  
Vela tibi ! liceat Laurentem attingere Thybrim !  
Si concessa peto, si dant ea mœnia Parcæ.”

Tum Saturnius hæc domitor maris edidit alti :  
“Fas omne est, Cytherea, meis te fidere regnis.  
Unde genus ducis. Merui quoque ; sæpe furores  
Compressi et rabiem tantam cœlique marisque.  
Nec minor in terris (Xanthum Simoëntaque testor)  
Æneæ mihi cura tui. Quum Troïa Achilles  
Exanimata sequens impingeret agmina muris,  
Millia multa daret leto, gemerentque repleti  
Amnes, nec reperire viam atque evolvere posset  
In mare se Xanthus : Pelidæ tunc ego forti  
Congressum Ænean, nec dis nec viribus æquis,  
Nube cava rapui : cuperem quum vertere ab imo  
Structa meis manibus perjuræ mœnia Trojæ.

800

810

Nunc quoque mens eadem perstat mihi : pelle timorem.  
Tutus, quos optas, portus accedet Averni.  
Unus erit tantum, amissum quem gurgite quæret ;  
Unum pro multis dabitur caput ”

His ubi læta deæ permulsit pectora dictis,  
 Jungit equos auro genitor, spumantiaque addit  
 Frena feris, manibusque omnes effundit habenas :  
 Cæruleo per summa levis volat æquora curru. 820  
 Subsident undæ, tumidumque sub axe tonanti  
 Sternitur æquor aquis ; fugiunt vasto æthere nimbi.  
 Tum variæ comitum facies,—immania cete,  
 Et senior Glauci chorus, Inousque Palæmon,  
 Tritonesque citi, Phorcique exercitus omnis :  
 Læva tenent Thetis, et Melite, Panopeaque virgo,  
 Nesæe, Spioque, Thaliaque Cymodoceque.

His patris Æneæ suspensam blanda vicissim  
 Gaudia pertentant mentem ; jubet ocius omnes  
 Attolli malos, intendi brachia velis. 830  
 Una omnes fecere pedem ; pariterque sinistros,  
 Nunc dextros solvere sinus ; una ardua torquent  
 Cornua detorquentque : ferunt sua flamina classem.  
 Princeps ante omnes densum Palinurus agebat  
 Agmen : ad hunc alii cursum contendere jussi.  
 Jamque fere mediam cœli nox humida metam  
 Contigerat : placida laxarant membra quiete  
 Sub remis fusi per dura sedilia nautæ ;  
 Quum levis ætheriis delapsus Somnus ab astris  
 Aëra dimovit tenebrosum, et dispulit umbras,  
 Te, Palinure, petens, tibi somnia tristia portans 840  
 Insonti : puppique deus consedit in alta,  
 Phorbanti similis, funditque has ore loquelas :  
 “ Iaside Palinure, ferunt ipsa æquora classem ;  
 Æquatæ spirant auræ ; datur hora quieti :  
 Pone caput, fessosque oculos furare labori.  
 Ipse ego paulisper pro te tua munera inibo.”  
 Cui vix attollens Palinurus lumina fatur :  
 “ Mene salis placidi vultum fluctusque quietos  
 Ignorare jubes ? mene huic confidere monstro ?  
 Ænean credam quid enim fallacibus austris, 850  
 Et cœli toties deceptus fraude sereni ?”

Talia dicta dabat, clavumque affixus et hærens  
Nusquam amittebat, oculosque sub astra tenebat.  
Ecce deus ramum Lethæo rore madentem,  
Vique soporatum Stygia, super utraque quassat  
Tempora ; cunctantique natantia lumina solvit.  
Vix primos inopina quies laxaverat artus :  
Et super incumbens, cum puppis parte revulsa,  
Cumque gubernaclo, liquidas projecit in undas  
Præcipitem, ac socios nequidquam sæpe vocantem. 860  
Ipse volans tenues se sustulit ales ad auras.  
Currit iter tutum non secius æquore classis,  
Promissisque patris Neptuni interrita fertur.  
Jamque adeo scopulos Sirenum advecta subibat,  
Difficiles quondam, multorumque ossibus albos ;  
Tum rauca assiduo longe sale saxa sonabant :  
Quum pater amisso fluitantem errare magistro  
Sensit, et ipse ratem nocturnis rexit in undis,  
Multa gemens, casuque animum concussus amici.  
“ O nimium cœlo et pelago confise sereno, 870  
Nudus in ignota, Palinure, jacebis arena ! ”

P. VIRGILII MARONIS

Æ N E I D O S

LIBER SEXTUS.

---

Sic fatur lacrimans, classicque immittit habenas,  
Et tandem Euboïcis Cumarum allabitur oris.  
Obvertunt pelago proras ; tum dente tenaci  
Ancora fundabat naves, et litora curvæ  
Prætexunt puppes ; juvenum manus emicat ardens  
Litus in Hesperium ; quærit pars semina flammæ  
Abstrusa in venis silicis ; pars densa ferarum  
Tecta rapit, silvas, inventaque flumina monstrat.  
At pius Æneas arces, quibus altus Apollo  
Præsidet, horrendæque procul secreta Sibyllæ, 10  
Antrum immane, petit ; magnam cui mentem animumque  
Delius inspirat vates, aperitque futura.  
Jam subeunt Triviæ lucos atque aurea tecta.

Dædalus, ut fama est, fugiens Minoia regna,  
Præpetibus pennis ausus se credere cœlo,  
Insuetum per iter gelidas enavit ad Arctos,  
Chalcidicaque levis tandem super adstitit arce.  
Redditus his primum terris tibi, Phœbe, sacravit  
Remigium alarum, posuitque immania templa.  
In foribus letum Androgeï : tum pendere pœnas 20  
Cecropidæ jussi, miserum ! septena quotannis  
Corpora natorum ; stat ductis sortibus urna.  
Contra elata mari respondet Gnosia tellus :

Hic crudelis amor tauri suppostaque furto  
 Pasiphaë, mixtumque genus, prolesque biformis  
 Minotaurus inest, Veneris monumenta nefandæ ;  
 Hic labor ille domus, et inextricabilis error :  
 Magnum reginæ sed enim miseratus amorem  
 Dædalus, ipse dolos tecti ambagesque resolvit,  
 Cæca regens filo vestigia. Tu quoque magnam 30  
 Partem opere in tanto, sineret dolor, Icare, haberes.  
 Bis conatus erat casus effingere in auro ;  
 Bis patriæ cecidere manus. Quin protenus omnia  
 Perlegerent oculis, ni jam præmissus Achates  
 Afforet, atque una Phœbi Triviæque sacerdos,  
 Deïphobe Glauci, fatur quæ talia regi :  
 “ Non hoc ista sibi tempus spectacula poscit.  
 Nunc grege de intacto septem mactare juvencos  
 Præstiterit, totidem lectas de more bidentes.”

Talibus affata Ænean—nec sacra morantur 40  
 Jussa viri—Teucros vocat alta in templa sacerdotes.  
 Excisum Euboicæ latus ingens rupis in antrum,  
 Quo lati ducunt aditus centum, ostia centum ;  
 Unde ruunt totidem voces, responsa Sibyllæ.  
 Ventum erat ad limen, quum virgo, “Poscere fata  
 Tempus,” ait : “deus, ecce deus !” Cui talia fanti  
 Ante fores subito non vultus, non color unus,  
 Non comtæ mansere comæ ; sed pectus anhelum,  
 Et rabie fera corda tument ; majorque videri,  
 Nec mortale sonans ; afflata est numine quando 50  
 Jam propiore dei. “Cessas in vota precesque,  
 Tros,” ait, “Ænea ? cessas ? neque enim ante dehiscit  
 Attonitæ magna ora domus.” Et talia fata  
 Conticuit. Gelidus Teucris per dura cucurrit  
 Ossa tremor, funditque preces rex pectore ab imo :  
 “Phœbe, graves Trojæ semper miserate labores,  
 Dardana qui Paridis direxti tela manusque  
 Corpus in Æacidæ ; magnas obeuntia terras  
 Tot maria intravi, duce te, penitusque repostas

Massylum gentes, prætentaque Syrtibus arva ; 60  
 Jam tandem Italiæ fugientis prendimus oras.  
 Hac Trojana tenus fuerit fortuna secuta.  
 Vos quoque Pergamæ jam fas est parcere genti,  
 Dique deæque omnes, quibus obstitit Ilium et ingens  
 Gloria Dardaniæ. Tuque, o sanctissima vates,  
 Præscia venturi, da, non indebita posco  
 Regna meis fatis, Latio considerare Teucros,  
 Errantesque deos agitataque numina Trojæ.  
 Tum Phœbo et Triviæ solido de marmore templum  
 Instituam festosque dies de nomine Phœbi. 70  
 Te quoque magna manent regnis penetralia nostris ;  
 Hic ego namque tuas sortes arcanæque fata,  
 Dicta meæ genti, ponam, lectosque sacrobo,  
 Alma, viros. Foliis tantum ne carmina manda ;  
 Ne turbata volent rapidis ludibria ventis :  
 Ipsa canas, oro." Finem dedit ore loquendi.  
 At Phœbi nondum patiens, immanis in antro  
 Bacchatur vates, magnum si pectore possit  
 Excussisse deum : tanto magis ille fatigat  
 Os rabidum, fera corda domans, fingitque premendo. 80  
 Ostia jamque domus patuere ingentia centum  
 Sponte sua, vatisque ferunt responsa per auras :  
 "O tandem magnis pelagi defuncte periclis !  
 Sed terra graviora manent. In regna Lavinî  
 Dardanidæ venient ; mitte hanc de pectore curam ;  
 Sed non et venisse volent. Bella, horrida bella,  
 Et Thybrim multo spumantem sanguine cerno.  
 Non Simois tibi nec Xanthus, nec Dorica castra  
 Defuerint : alius Latio jam partus Achilles,  
 Natus et ipse dea : nec Teucris addita Juno 90  
 Usquam aberit. Quum tu supplex in rebus egenis  
 Quas gentes Italum aut quas non oraveris urbes !  
 Causa mali tanti conjux iterum hospita Teucris,  
 Externique iterum thalami.  
 Tu ne cede malis ; sed contra audentior ito,

Qua tua te fortuna sinet. Via prima salutis.  
Quod minime reris, Graia pandetur ab urbe."

Talibus ex adyto dictis Cumæa Sibylla  
Horrendas canit ambages, antroque remugit  
Obscuris vera involvens : ea frena furenti 100  
Concutit, et stimulos sub pectore vertit Apollo.  
Ut primum cessit furor, et rabida ora quierunt,  
Incipit Æneas heros : "Non ulla laborum,  
O virgo, nova mi facies inopinave surgit :  
Omnia præcepi, atque animo mecum ante peregi.  
Unum oro—quando hic inferni janua regis  
Dicitur, et tenebrosa palus Acheronte refuso—  
Ire ad conspectum cari genitoris et ora  
Contingat : doceas iter, et sacra ostia pandas.  
Illum ego per flammās et mille sequentia tela 110  
Eripui his humeris, medioque ex hoste recepi ;  
Ille, meum comitatus iter, maria omnia mecum  
Atque omnes pelagique minas cœlique ferebat  
Invalidus, vires ultra sortemque senectæ.  
Quin, ut te supplex peterem et tua limina adirem,  
Idem orans mandata dabat. Natique patrisque,  
Alma, precor, miserere ; potes namque omnia : nec te  
Nequidquam lucis Hecate præfecit Avernis ;  
Si potuit manes arcessere conjugis Orpheus, 120  
Threïcia fretus cithara fidibusque canoris ;  
Si fratrem Pollux alterna morte redemit,  
Itque reditque viam toties. Quid Thesea, magnum  
Quid memorem Alciden ? Et mi genus ab Jove summo."  
Talibus orabat dictis, arasque tenebat ;  
Quum sic orsa loqui vates : "Sate sanguine divum,  
Tros Anchisiada, facilis descensus Averno ;  
Noctes atque dies patet atri janua Ditis ;  
Sed revocare gradum superasque evadere ad auras,  
Hoc opus, hic labor est. Pauci, quos æquus amavit  
Jupiter, aut ardens evexit ad æthera virtus, 130  
Dis geniti potuere. Tenent mediâ omnia silvæ,

Cocytusque sinu labens circumvenit atro.  
 Quod si tantus amor menti, si tanta cupido est  
 Bis Stygios innare lacus, bis nigra videre  
 Tartara, et insano juvat indulgere labori ;  
 Accipe, quæ peragenda prius. Latet arbore opaca  
 Aureus et foliis et lento vimine ramus,  
 Junoni infernæ dictus sacer : hunc tegit omnis  
 Lucus, et obscuris claudunt convallibus umbræ.  
 Sed non ante datur telluris operta subire, 140  
 Auricomos quam qui decerpserit arbore fetus.  
 Hoc sibi pulchra suum ferri Proserpina munus  
 Instituit. Primo avulso non deficit alter  
 Aureus ; et simili frondescit virga metallo.  
 Ergo alte vestiga oculis, et rite repertum  
 Carpe manu : namque ipse volens facilisque sequetur,  
 Si te fata vocant : aliter, non viribus ullis  
 Vincere, nec duro poteris convellere ferro.  
 Præterea jacet exanimum tibi corpus amici,  
 Heu nescis ! totamque incestat funere classem ; 150  
 Dum consulta petis, nostroque in limine pendes.  
 Sedibus huuc refer ante suis, et conde sepulcro.  
 Duc nigras pecudes ; ea prima piacula sunt.  
 Sic demum lucos Stygios, regna invia vivis,  
 Aspicias." Dixit, pressoque obmutuit ore.  
 Æneas mæsto defixus lumina vultu  
 Ingreditur, linquens antrum ; cæcosque volutat  
 Eventus animo secum. Cui fidus Achates  
 It comes, et paribus curis vestigia figit.  
 Multa inter sese vario sermone sercbant ; 160  
 Quem socium exanimem vates, quod corpus humandum  
 Diceret. Atque illi Misenum in litore sicco,  
 Ut venere, vident indigna morte peremptum,—  
 Misenum Æoliden : quo non præstantior alter  
 Ære ciere viros, Martemque accendere cantu.  
 Hectoris hic magni fuerat comes ; Hectora circum  
 Et lituo pugnas insignis obibat et hasta.



Postquam illum vita victor spoliavit Achilles,  
 Dardanio Æneæ sese fortissimus heros  
 Addiderat socium, non inferiora secutus. 170  
 Sed tum, forte cava dum personat æquora concha  
 Demens, et cantu vocat in certamina divos,  
 Æmulus exceptum Triton, si credere dignum est,  
 Inter saxa virum spumosa immerserat unda.  
 Ergo omnes magno circum clamore fremebant ;  
 Præcipue pius Æneas. Tum jussa Sibyllæ,  
 Haud mora, festinant flentes, aramque sepulcri  
 Congerere arboribus, cœloque educere certant.  
 Itur in antiquam silvam, stabula alta ferarum :  
 Procumbunt piceæ ; sonat icta securibus ilex ; 180  
 Fraxineæque trabes cuneis et fissile robur  
 Scinditur ; advolvunt ingentes montibus ornos.  
 Nec non Æneas opera inter talia primus  
 Hortatur socios, paribusque accingitur armis :  
 Atque hæc ipse suo tristi cum corde volutat,  
 Aspectans silvam immensam, et sic voce precatur :  
 “ Si nunc se nobis ille aureus arbore ramus  
 Ostendat nemore in tanto ! quando omnia vere  
 Heu nimium de te vates, Misene, locuta est.”  
 Vix ea fatus erat, geminæ quum forte columbæ 190  
 Ipsa sub ora viri cœlo venere volantes,  
 Et viridi sedere solo. Tum maximus heros  
 Maternas agnoscit aves, lætusque precatur :  
 “ Este duces, o, si qua via est, cursumque per auras  
 Dirigite in lucos, ubi pinguem dives opacat  
 Ramus humum. Tuque o, dubiis ne defice rebus,  
 Diva parens.” Sic effatus vestigia pressit,  
 Observans quæ signa ferant, quo tendere pergant.  
 Pascentes illæ tantum prodire volando,  
 Quantum acie possent oculi servare sequentum. 200  
 Inde ubi venere ad fauces graveolentis Averni,  
 Tollunt se celeres ; liquidumque per aëra lapsæ  
 Sedibus optatis geminæ super arbore sidunt,

Discolor unde auri per ramos aura refulsit.  
 Quale solet silvis brumali frigore viscum  
 Fronde virere nova, quod non sua seminat arbos,  
 Et croceo fetu teretes circumdare truncos :  
 Talis erat species auri frondentis opaca  
 Illice ; sic leni crepitabat bractea vento.  
 Corripit Æneas extemplo, avidusque refringit  
 Cunctantem, et vatis portat sub tecta Sibyllæ.

210

Nec minus interea Misenum in litore Teucri  
 Flebant, et cineri ingrato suprema ferebant.  
 Principio pinguem tædis et robore secto  
 Ingentem struxere pyram : cui frondibus atris  
 Intexunt latera, et ferales ante cupressos  
 Constituunt, decorantque super fulgentibus armis.  
 Pars calidos latices et abena undantia flammis  
 Expediunt, corpusque lavant frigentis et unguunt :  
 Fit gemitus. Tum membra toro defleta reponunt,  
 Purpureasque super vestes, velamina nota,  
 Conjiciunt : pars ingenti subiere feretro,  
 Triste ministerium ; et subjectam more parentum  
 Aversi tenere facem. Congesta cremantur  
 Thurea dona, dapes, fuso crateres olivo.  
 Postquam collapsi cineres, et flamma quievit,  
 Reliquias vino et bibulam lavere favillam ;  
 Ossaque lecta cado texit Corynæus ahenò.  
 Idem ter socios pura circumtulit unda,  
 Spargens rore levi et ramo felicis olivæ,  
 Lustravitque viros, dixitque novissima verba.  
 At pius Æneas ingenti mole sepulcrum  
 Imponit, suaque arma viro, remumque tubamque,  
 Monte sub ærìo ; qui nunc Misenus ab illo  
 Dicitur, æternumque tenet per sæcula nomen.

220

230

His actis propere exsequitur præcepta Sibyllæ.  
 Spelunca alta fuit, vastoque immanis hiatu,  
 Scrupea, tuta lacu nigro nemorumque tenebris :  
 Quam super haud ullæ poterant impune volantes

Tendere iter pennis : talis sese halitus atris 240  
 Faucibus effundens supera ad convexa ferebat :  
 [Unde locum Graii dixerunt nomine Aornon.]  
 Quatuor hic primum nigrantes terga juvencos  
 Constituit, frontique invergit vina sacerdos ;  
 Et summas carpens media inter cornua sætas,  
 Ignibus imponit sacris, libamina prima,  
 Voce vocans Hecaten, Cœloque Ereboque potentem :  
 Supponunt alii cultros, tepidumque cruorem  
 Suscipiunt pateris. Ipse atri velleris agnam  
 Æneas matri Eumenidum magnæque sorori 250  
 Ense ferit, sterilemque tibi, Proserpina, vaccam :  
 Tum Stygio regi nocturnas inchoat aras,  
 Et solida imponit taurorum viscera flammis,  
 Pingue super oleum infundens ardentibus extis.  
 Ecce autem, primi sub lumina solis et ortus,  
 Sub pedibus mugire solum, et juga cœpta moveri  
 Silvarum, visæque canes ululare per umbram,  
 Adventante dea. "Procul o, procul este, profani,"  
 Conclamat vates, "totoque absistite luco ;  
 Tuque invade viam, vaginaque eripe ferrum : 260  
 Nunc animis opus, Ænea nunc pectore firmo."  
 Tantum effata, furens antro se immisit aperto :  
 Ille ducem haud timidis vadentem passibus æquat.

Di, quibus imperium est animarum, Umbræque silentes,  
 Et Chaos, et Phlegethon, loca nocte tacentia late,  
 Sit mihi fas audita loqui ; sit numine vestro  
 Pandere res alta terra et caligine mersas.  
 Ibant obscuri sola sub nocte per umbram,  
 Perque domos Ditis vacuas, et inania regna.  
 Quale per incertam lunam sub luce maligna 270  
 Est iter in silvis : ubi cœlum condidit umbra  
 Jupiter, et rebus nox abstulit atra colorem.  
 Vestibulum ante ipsum primisque in faucibus Orci  
 Luctus et ultrices posuere cubilia Curæ ;  
 Pallentesque habitant Morbi, tristisque Senectus,

Et Metus, et malesuada Fames, ac turpis Egestas,—  
 Terribiles visu formæ,—Letumque, Labosque ;  
 Tum consanguineus Leti Sopor, et mala mentis  
 Gaudia, mortiferumque adverso in limine Bellum,  
 Ferreique Eumenidum thalami, et Discordia demens, 280  
 Vipereum crinem vittis innexa cruentis.

In medio ramos annosaque brachia pandit  
 Ulmus opaca, ingens ; quam sedem Somnia vulgo  
 Vana tenere ferunt, foliisque sub omnibus hærent.  
 Multaque præterea variarum monstra ferarum,  
 Centauri in foribus stabulant, Scyllæque bifformes,  
 Et centumgeminus Briareus, ac bellua Lernæ  
 Horrendum stridens, flammisque armata Chimæra,  
 Gorgones, Harpyiæque, et forma tricorporis umbræ.  
 Corripit hic subita trepidus formidine ferrum 290  
 Æneas, strictamque aciem venientibus offert ;  
 Et, ni docta comes tenues sine corpore vitas  
 Admoneat volitare cava sub imagine formæ,  
 Irruat, et frustra ferro diverberet umbras.

Hinc via, Tartarei quæ fert Acherontis ad undas :  
 Turbidus hic cœno vastaque voragine gurgēs  
 Æstuat, atque omnem Cocyto eructat arenam.  
 Portitor has horrendus aquas et flumina servat  
 Terribili squalore Charon : cui plurima mento 300  
 Canities inculta jacet ; stant lumina flamma ;  
 Sordidus ex humeris nodo dependet amictus.  
 Ipse ratem conto subigit velisque ministrat,  
 Et ferruginea subvectat corpora cymba  
 Jam senior ; sed cruda deo viridisque senectus.  
 Huc omnis turba ad ripas effusa ruebat,  
 Matres atque viri, defunctaque corpora vita  
 Magnanimum heroum, pueri innuptæque puellæ,  
 Impositique rogis juvenes ante ora parentum :  
 Quam multa in silvis auctumni frigore primo  
 Lapsa cadunt folia ; aut ad terram gurgite ab alto 310  
 Quam multæ glomerantur aves, ubi frigidus annus

Trans pontum fugat, et terris immittit apricis.

Stabant orantes primi transmittere cursum,

Tendebantque manus ripæ ulterioris amore ;

Navita sed tristis nunc hos, nunc accipit illos :

Ast alios longe submotos arcet arena.

Æneas, miratus enim mōtusque tumultu,

“ Dic,” ait, “ o virgo, quid vult concursus ad amnem ?

Quidve petunt animæ ? vel quo discrimine ripas

Hæ relinquunt, illæ remis vada livida verrunt ?” 320

Olli sic breviter fata est longæva sacerdos :

“ Anchisa generate, deum certissima proles,

Cocytî stagna alta vides, Stygiamque paludem,

Di cujus jurare timent et fallere numen.

Hæc omnis, quam cernis, inops inhumataque turba est ;

Portitor ille, Charon ; hi, quos vehit unda, sepulti.

Nec ripas datur horrendas et rauca fluenta

Transportare prius, quam sedibus ossa quierunt.

Centum errant annos, volitantque hæc litora circum :

Tum demum admissi stagna exoptata revisunt.” 330

Constitit Anchisa satus, et vestigia pressit,

Multa putans, sortemque animo miseratus iniquam.

Cernit ibi mæstos et mortis honore carentes

Leucaspim et Lyciæ ductorem classis Orontem :

Quos simul a Troja ventosa per æquora vectos

Obruit auster, aqua involvens navemque virosque.

Ecce gubernator sese Palinurus agebat :

Qui Libyco nuper cursu, dum sidera servat,

Exciderat puppi mediis effusus in undis.

Hunc ubi vix multa mæstum cognovit in umbra, 340

Sic prior alloquitur : “ Quis te, Palinure, deorum

Eripuit nobis, medioque sub æquore mersit ?

Dic age. Namque mihi, fallax haud ante repertus,

Hoc uno responso animum delusit Apollo,

Qui fore te ponto incolumem, finesque canebat

Venturum Ausonios. En hæc promissa fides est ?”

Ille autem : “ Neque te Phœbi cortina fefellit,

Dux Anchisiada, nec me deus æquore mersit.  
 Namque gubernaculum multa vi forte revulsum,  
 Cui datus hærebam custos, cursusque regebam, 350  
 Præcipitans traxi mecum. Maria aspera juro,  
 Non ullum pro me tantum cepisse timorem,  
 Quam tua ne, spoliata armis, excussa magistro,  
 Deficeret tantis navis surgentibus undis.  
 Tres notus hibernas immensa per æquora noctes  
 Vexit me violentus aqua; vix lumine quarto  
 Prospexi Italiam summa sublimis ab unda.  
 Paulatim adnabam terræ: jam tuta tenebam;  
 Nî gens crudelis madida cum veste gravatum,  
 Prensantemque uncis manibus capita aspera montis, 360  
 Ferro invasisset, prædamque ignara putasset.  
 Nunc me fluctus habet, versantque in litore venti.  
 Quod te per cœli jucundum lumen et auras,  
 Per genitorem oro, per spes surgentis Iuli:  
 Eripe me his, invicte, malis; aut tu mihi terram  
 Injice, namque potes, portusque require Velinos;  
 Aut tu, si qua via est, si quam tibi diva creatrix  
 Ostendit,—neque enim, credo, sine numine divum  
 Flumina tanta paras Stygiamque innare paludem—  
 Da dextram misero, et tecum me tolle per undas; 370  
 Sedibus ut saltem placidis in morte quiescam.”  
 Talia fatus erat, cœpit quum talia vates:  
 “Unde hæc, o Palinure, tibi tam dira cupido?  
 Tu Stygias inhumatus aquas amnemque severum  
 Eumenidum aspicias, ripamve injussus adibis?  
 Desine fata deum flecti sperare precando.  
 Sed cape dicta memor, duri solatia casus.  
 Nam tua finitimi, longe lateque per urbes  
 Prodigiiis acti cœlestibus, ossa piabunt,  
 Et statuent tumulum, et tumulo solemnia mittent; 380  
 Æternumque locus Palinuri nomen habebit.”  
 His dictis curæ emotæ, pulsusque parumper  
 Corde dolor tristi; gaudet cognomine terra.

Ergo iter inceptum peragunt, fluvioque propinquant :  
 Navita quos jam inde ut Stygia prospexit ab unda  
 Per tacitum nemus ire, pedemque advertere ripæ,  
 Sic prior aggreditur dictis, atque increpat ultro :  
 " Quisquis es, armatus qui nostra ad flumina tendis,  
 Fare age, quid venias ; jam istinc, et comprime gressum.  
 Umbrarum hic locus est, Somni Noctisque soporæ ;      390  
 Corpora viva nefas Stygia vectare carina.  
 Nec vero Alciden me sum lætatus euntem  
 Accepisse lacu, nec Thesea Pirithoumque ;  
 Dis quamquam geniti, atque invicti viribus essent.  
 Tartareum ille manu custodem in vincla petivit,  
 Ipsius a solio regis traxitque trementem :  
 Hi dominam Ditis thalamo deducere adorti."  
 Quæ contra breviter fata est Amphrysia vates :  
 " Nullæ hic insidiæ tales ; absiste moveri ;  
 Nec vim tela ferunt : licet ingens janitor antro      400  
 Æternum latrans exsanguis terreat umbras ;  
 Casta licet patrui servet Proserpina limen.  
 Troïas Æneas, pietate insignis et armis,  
 Ad genitorem imas Erebi descendit ad umbras.  
 Si te nulla movet tantæ pietatis imago,  
 At ramum hunc (aperit rarum, qui veste latebat)  
 Agnoscas." Tumida ex ira tum corda residunt.  
 Nec plura his. Ille admirans venerabile donum  
 Fatalis virgæ, longo post tempore visum,  
 Cæruleam advertit puppim, ripæque propinquat.      410  
 Inde alias animas, quæ per juga longa sedebant,  
 Deturbat, laxatque foros : simul accipit alveo  
 Ingentem Ænean. Gemuit sub pondere cymba  
 Sutilis, et multam accepit rimosa paludem.  
 Tandem trans fluvium incolumis vatemque virumque  
 Informi limo glaucaque exponit in ulva.

Cerberus hæc ingens latratu regna trifauci  
 Personat, adverso recubans immanis in antro.  
 Cui vates, horrere videns jam colla colubris,

Melle soporata et medicatis frugibus offam 420  
 Objicit. Ille fame rabida tria guttura pandens  
 Corripit objectam, atque immania terga resolvit  
 Fusus humi, totoque ingens extenditur antro.  
 Occupat Æneas aditum custode sepulto,  
 Evaditque celer ripam irremeabilis undæ.  
 Continuo auditæ voces, vagitus et ingens  
 Infantumque animæ flentes, in limine primo :  
 Quos dulcis vitæ exsortes, et ab ubere raptos,  
 Abstulit atra dies, et funere mersit acerbo.  
 Hos juxta falso damnati crimine mortis. 430  
 Nec vero hæ sine sorte datæ, sine judice, sedes.  
 Quæsitior Minos urnam movet ; ille silentum  
 Conciliumque vocat, vitasque et crimina discit.  
 Proxima deinde tenent mæsti loca, qui sibi letum  
 Insontes peperere manu, lucemque perosi  
 Projecere animas. Quam vellent æthere in alto  
 Nunc et pauperiem et duros perferre labores !  
 Fas obstat, tristique palus inamabilis unda  
 Alligat, et novies Styx interfusa coërcet.  
 Nec procul hinc partem fusi monstrantur in omnem 440  
 Lugentes campi ; sic illos nomine dicunt.  
 Hic, quos durus amor crudeli tabe peredit,  
 Secreti celant calles, et myrtea circum  
 Silva tegit ; curæ non ipsa in morte relinquunt.  
 His Phædræ Procrinque locis, mæstamque Eriphylen  
 Crudelis nati monstrantem vulnera cernit,  
 Evaduenque, et Pasiphaën ; his Laodamia  
 It comes, et juvenis quondam, nunc femina, Cænis,  
 Rursus et in veterem fato revoluta figuram.  
 Inter quas Phœnissa recens a vulnere Dido 450  
 Errabat silva in magna ; quam Troius heros,  
 Ut primum juxta stetit agnovitque per umbram  
 Obscuram, qualem primo qui surgere mense  
 Aut videt aut vidisse putat per nubila lunam,  
 Demisit lacrimas, dulcique affatus amore est :



" Infelix Dido, verus mihi nuncius ergo  
 Venerat, exstinctam ferroque extrema secutam :  
 Funeris heu tibi causa fui ? Per sidera juro,  
 Per superos, et si qua fides tellure sub ima est,  
 Invitus, regina, tuo de litore cessi. 460  
 Sed me jussa deum, quæ nunc has ire per umbras,  
 Per loca senta situ cogunt noctemque profundam,  
 Imperiis egere suis ; nec credere quivi  
 Hunc tantum tibi me discessu ferre dolorem.  
 Siste gradum, teque aspectu ne subtrahe nostro.  
 Quem fugis ? extremum fato, quod te alloquor, hoc est."  
 Talibus Æneas ardentem et torva tuentem  
 Lenibat dictis animum, lacrimasque ciebat.  
 Illa solo fixos oculos aversa tenebat ;  
 Nec magis incepto vultum sermone movetur, 470  
 Quam si dura silex aut stet Marpesia cautes.  
 Tandem corripuit sese, atque inimica refugit  
 In nemus umbriferum ; conjux ubi pristinus illi  
 Respondet curis, æquatque Sychæus amorem.  
 Nec minus Æneas, casu percussus iniquo,  
 Prosequitur lacrimans longe, et miseratur euntem.  
 Inde datum molitur iter. Jamque arva tenebant  
 Ultima, quæ bello clari secreta frequentant.  
 Hic illi occurrit Tydeus, hic inclytus armis  
 Parthenopæus, et Adrasti pallentis imago. 480  
 Hic multum fleti ad superos belloque caduci  
 Dardanidæ : quos ille omnes longo ordine cernens  
 Ingemuit, Glaucumque, Medontaque, Thersilochumque,  
 Tres Antenoridas, Cererique sacrum Polyphœten,  
 Idæumque, etiam currus, etiam arma tenentem.  
 Circumstant animæ dextra lævaque frequentes.  
 Nec vidisse semel satis est ; juvat usque morari,  
 Et conferre gradum, et veniendi discere causas.  
 At Danaum procures Agamemnoniæque phalanges,  
 Ut videre virum fulgentiaque arma per umbras, 490  
 Ingenti trepidare metu : pars vertere terga,

Ceu quondam petiere rates ; pars tollere vocem  
Exiguam : inceptus clamor frustratur hiantes.

Atque hic Priamiden laniatum corpore toto  
Deïphobum vidit, lacerum crudeliter ora,  
Ora manusque ambas, populataque tempora raptis  
Auribus, et truncas inhonesto vulnere nares.  
Vix adeo agnovit pavitantem, et dira tegentem  
Supplicia ; et notis compellat vocibus ultro :  
“Deïphobe armipotens, genus alto a sanguine Teuceri, 500  
Quis tam crudeles optavit sumere pœnas ?  
Cui tantum de te licuit ? Mihi fama suprema  
Nocte tulit fessum vasta te cæde Pelasgum  
Procubuisse super confusæ stragis acervum.  
Tunc egomet tumulum Rhoeteo in litore inanem  
Constitui, et magna manes ter voce vocavi.  
Nomen et arma locum servant : te, amice, nequivi  
Conspicere, et patria decedens ponere terra.”  
Ad quæ Priamides : “Nihil o tibi amice relictum ;  
Omnia Deïphobo solvisti et funeris umbris. 510  
Sed me fata mea et scelus exitiale Lacœnæ  
His mersere malis : illa hæc monumenta reliquit.  
Namque, ut supremam falsa inter gaudia noctem  
Egerimus, nosti ; et nimium meminisse necesse est.  
Quum fatalis equus saltu super ardua venit  
Pergama, et armatum peditem gravis attulit alvo :  
Illa, chorum simulans, evantes orgia circum  
Ducebat Phrygias ; flammam media ipsa tenebat  
Ingentem, et summa Danaos ex arce vocabat.  
Tum me, confectum curis somnoque gravatum, 520  
Infelix habuit thalamus, pressitque jacentem  
Dulcis et alta quies placidæque simillima morti.  
Egregia interea conjux arma omnia tectis  
Emovet, et fidum capiti subduxerat ensem ;  
Intra tecta vocat Menelaum, et limina pandit :  
Scilicet id magnum sperans fore munus amanti,  
Et famam exstingui veterum sic posse malorum.

Quid moror? irrumpunt thalamo; comes additus una  
 Hortator scelorum Æolides. Di, talia Graiis  
 Instauratione; pio si pœnas ore reposito.

530

Sed te qui vivum casus, age fare vicissim,  
 Attulerint. Pelagine venis erroribus actus,  
 An monitu divum? an quæ te fortuna fatigat,  
 Ut tristes sine sole domos, loca turbida, adires?"  
 Hac vice sermonum roseis Aurora quadrigis  
 Jam medium ætherio cursu trajecerat axem;  
 Et fors omne datum traherent per talia tempus:  
 Sed comes admonuit, breviterque affata Sibylla est:  
 "Nox ruit, Ænea; nos flendo ducimus horas.

Hic locus est, partes ubi se via findit in ambas:

540

Dextera, quæ Ditis magni sub mœnia tendit,  
 Hac iter Elysium nobis: at læva malorum  
 Exercet pœnas, et ad impia Tartara mittit."  
 Deiphobus contra: "Ne sævi, magna sacerdos;  
 Discedam, explebo numerum, reddarque tenebris.  
 I decus, i, nostrum; melioribus utere fatis."  
 Tantum effatus, et in verbo vestigia torsit.

Respicit Æneas subito, et sub rupe sinistra

Mœnia lata videt, triplici circumdata muro:

Quæ rapidus flammis ambit torrentibus amnis

550

Tartareus Phlegethon, torquetque sonantia saxa.

Porta adversa, ingens, solidoque adamante columnæ:

Vis ut nulla virum, non ipsi excindere ferro

Cœlicolæ valeant. Stat ferrea turris ad auras;

Tisiphoneque sedens, palla succincta cruenta,

Vestibulum exsomnia servat noctesque diesque.

Hinc exaudiri gemitus, et sæva sonare

Verbera; tum stridor ferri, tractæque catenæ.

Constitit Æneas, strepitumque exterritus hausit.

"Quæ scelerum facies? o virgo, effare: quibusve

560

Urgentur pœnis? qui tantus plangor ad auras?"

Tum vates sic orsa loqui: "Dux inclyte Teucrum,

Nulli fas casto sceleratum insistere limen;

Sed me quum lucis Hecate præfecit Avernis,  
 Ipsa deum pœnas docuit, perque omnia duxit.  
 Gnosius hæc Rhadamanthus habet durissima regna,  
 Castigatque auditque dolos; subigitque fateri,  
 Quæ quis apud superos, furto lætatus inani,  
 Distulit in seram commissa piacula mortem.

Continuo sontes ultrix accincta flagello 570

Tisiphone quatit insultans, torvosque sinistra  
 Intentans angues, vocat agmina sæva sororum.  
 Tum demum horrissono stridentes cardine sacræ  
 Panduntur portæ. Cernis, custodia qualis  
 Vestibulo sedeat? facies quæ limina servet?

Quinquaginta atris immanis hiatibus Hydra  
 Sævior intus habet sedem. Tum Tartarus ipse  
 Bis patet in præceps tantum tenditque sub umbras,  
 Quantus ad ætherium cœli suspectus Olympum.  
 Hic genus antiquum Terræ, Titania pubes, 580

Fulmine dejecti, fundo volvuntur in imo:  
 Hic et Aloïdas geminos, immania vidi  
 Corpora: qui manibus magnum rescindere cœlum  
 Aggressi, superisque Jovem detrudere regnis.

Vidi et crudeles dantem Salmonea pœnas,  
 Dum flammæ Jovis et sonitus imitatur Olympi.  
 Quatuor hic invectus equis et lampada quassans,  
 Per Graium populos mediæque per Elidis urbem  
 Ibat ovans, divumque sibi poscebat honorem,  
 Demens! qui nimbos et non imitabile fulmen 590

Ære et cornipedum pulsu simularat equorum.  
 At pater omnipotens densa inter nubila telum  
 Contorsit; non ille faces, nec fumea tædis  
 Lumina; præcipitemque immani turbine adegit.  
 Nec non et Tityon, Terræ omniparentis alumnum,  
 Cernere erat, per tota novem cui jugera corpus  
 Porrigitur; rostroque immanis vultur obunco  
 Immortale jecur tondens, fecundaque pœnis  
 Viscera, rimaturque epulis, habitatque sub alto

Pectore; nec fibris requies datur ulla renatis. 600

Quid memorem Lapithas, Ixiona Pirithoumque?

Quos super atra silex jam jam lapsura cadentique

Imminet assimilis. Lucent genialibus altis

Aurea fulcra toris, epulæque ante ora paratæ

Regifico luxu; Furiarum maxima juxta

Accubat, et manibus prohibet contingere mensas,

Exsurgitque facem attollens, atque intonat ore.

Hic, quibus invisi fratres, dum vita manebat,

Pulsatusve parens, et fraus innexa clienti;

Aut qui divitiis soli incubuere repertis, 610

Nec partem posuere suis, quæ maxima turba est;

Quique ob adulterium cæsi; quique arma secuti

Impia, nec veriti dominorum fallere dextas,—

Inclusi pœnam exspectant. Ne quære doceri,

Quam pœnam; aut quæ forma viros fortunave mersit.

Saxum ingens volvunt alii, radiisve rotarum

Districti pendent; sedet, æternumque sedebit,

Infelix Theseus; Phlegyasque miserrimus omnes

Admonet, et magna testatur voce per umbras:

‘Discite justitiam moniti, et non temnere divos.’ 620

Vendidit hic auro patriam, dominumque potentem

Imposuit; fixit leges pretio atque refixit:

Hic thalamum invasit natæ vetitosque hymenæos:

Ausi omnes immane nefas, ausoque potiti.

Non, mihi si linguæ centum sint, oraque centum,

Ferrea vox, omnes scelerum comprehendere formas,

Omnia pœnarum percurrere nomina possim.”

Hæc ubi dicta dedit Phœbi longæva sacerdos:

“Sed jam age, carpe viam, et susceptum perfice munus;

Acceleremus,” ait: “Cyclopum educta caminis 630

Mœnia conspicio, atque adverso fornice portas,

Hæc ubi nos præcepta jubent deponere dona.”

Dixerat, et pariter gressi per opaca viarum

Corripiunt spatium medium, foribusque propinquant.

Occupat Æneas aditum, corpusque recenti  
Spargit aqua, ramumque adverso in limine figit.

His demum exactis, perfecto munere divæ,  
Devenere locos lætos, et amœna vireta  
Fortunatorum nemorum, sedesque beatas.  
Largior hic campos æther et lumine vestit 640  
Purpureo, solemque suum, sua sidera norunt.  
Pars in gramineis exercent membra palæstris,  
Contendunt ludo, et fulva luctantur arena;  
Pars pedibus plaudunt choreas, et carmina dicunt :  
Nec non Threïcius longa cum veste sacerdos  
Obloquitur numeris septem discrimina vocum ;  
Jamque eadem digitis, jam pectine pulsat eburno.  
Hic genus antiquum Teucris, pulcherrima proles,  
Magnanimi heroës, nati melioribus annis,  
Ilusque, Assaracusque, et Trojæ Dardanus auctor. 650  
Arma procul currusque virum miratur inanes.  
Stant terra defixæ hastæ, passimque soluti  
Per campos pascuntur equi. Quæ gratia curruum  
Armorumque fuit vivis, quæ cura nitentes  
Pascere equos, eadem sequitur tellure repostos.  
Conspicit ecce alios dextra lævaque per herbam  
Vescentes, lætumque choro Pæana canentes,  
Inter odoratum lauri nemus : unde superne  
Plurimus Eridani per silvam volvitur amnis.  
Hic manus, ob patriam pugnando vulnera passi, 660  
Quique sacerdotes casti, dum vita manebat,  
Quique pii vates, et Phœbo digna locuti,  
Inventas aut qui vitam excoluere per artes,  
Quique sui memores alios fecere merendo :  
Omnibus his nivea cinguntur tempora vitta.  
Quos circumfusus sic est affata Sibylla,—  
Musæum ante omnes ; medium nam plurima turba  
Hunc habet, atque humeris exstantem suspicit altis :—  
“ Dicite, felices animæ, tuque, optime vates ;

Quæ regio Anchisen, quis habet locus ? illius ergo 670  
Venimus, et magnos Erebi tranavimus amnes."

Atque huic responsum paucis ita reddidit heros :  
"Nulli certa domus : lucis habitamus opacis,  
Riparumque toros et prata recentia rivis  
Incolimus. Sed vos, si fert ita corde voluntas,  
Hoc superate jugum : et facili jam tramite sistam."  
Dixit, et ante tulit gressum, camposque nitentes  
Desuper ostentat ; dehinc summa cacumina linquunt.

At pater Anchises penitus convalle virenti  
Inclusas animas, superumque ad lumen ituras, 680  
Lustrabat studio recolens, omnemque suorum  
Forte recensebat numerum, carosque nepotes,  
Fataque, fortunasque virum, moresque, manusque.  
Isque ubi tendentem adversum per gramina vidit  
Ænean, alacris palmas utrasque tetendit ;  
Effusæque genis lacrimæ ; et vox excidit ore :  
"Venisti tandem, tuaque spectata parenti  
Vicit iter durum pietas ? datur ora tueri,  
Nate, tua, et notas audire et reddere voces ?  
Sic equidem ducebam animo, rebarque futurum, 690  
Tempora dinumerans ; nec me mea cura fefellit.  
Quas ego te terras et quanta per æquora vectum  
Accipio ! quantis jactatum, nate, periclis !

Quam metui, ne quid Libyæ tibi regna nocerent !"  
Ille autem : "Tua me, genitor, tua tristis imago,  
Sæpius occurrens, hæc limina tendere adegit.

Stant sale Tyrrheno classes. Da jungere dextram,  
Da, genitor ; teque amplexu ne subtrahe nostro."

Sic memorans largo fletu simul ora rigabat.

Ter conatus ibi collo dare brachia circum :

Ter frustra comprehensa manus effugit imago,

Par levibus ventis, volucrique simillima somno.

Interea videt Æneas in valle reducta

Seclusum nemus, et virgulta sonantia silvis,

Lethæumque, domos placidas qui prænatat, amnem.

Hunc circum innumeræ gentes populique volabant :  
 Ac velut in pratis ubi apes æstate serena  
 Floribus insidunt variis, et candida circum  
 Lilia funduntur ; strepit omnis murmure campus.

Horrescit visu subito, causasque requirit 710

Inscius Æneas, quæ sint ea flumina porro,  
 Quive viri tanto complerint agmine ripas.  
 Tum pater Anchises : " Animæ, quibus altera fato  
 Corpora debentur, Lethæi ad fluminis undam  
 Securos latices et longa oblivia potant.

Has equidem memorare tibi atque ostendere coram,  
 Jampridem hanc prolem cupio enumerare meorum :  
 Quo magis Italia mecum lætere reperta.

O pater, anne aliquas ad cælum hinc ire putandum est  
 Sublimes animas, iterumque in tarda reverti 720

Corpora ? quæ lucis miseris tam dira cupido ?  
 Dicam equidem ; nec te suspensum, nate, tenebo :"  
 Suscipit Anchises, atque ordine singula pandit.

" Principio cælum ac terras, camposque liquentes,  
 Lucentemque globum Lunæ Titaniaque astra,  
 Spiritus intus alit, totamque infusa per artus  
 Mens agitat molem, et magno se corpore miscet.  
 Inde hominum pecudumque genus, vitæque volantum,  
 Et quæ marmoreo fert monstra sub æquore pontus.

Igneus est ollis vigor et cœlestis origo 730

Seminibus, quantum non noxia corpora tardant,  
 Terrenique hebetant artus moribundaque membra.

Hinc metuunt, cupiuntque ; dolent, gaudentque ; neque  
 auras

Despiciunt clausæ tenebris et carcere cæco.  
 Quin et supremo quum lumine vita reliquit,  
 Non tamen omne malum miseris, nec funditus omnes  
 Corporeæ excedunt pestes ; penitusque necesse est  
 Multa diu concreta modis inolescere miris.

Ergo exercentur pœnis, veterumque malorum  
 Supplicia expendunt. Aliæ panduntur inanes 740



Suspensæ ad ventos ; aliis sub gurgite vasto  
 Infectum eluitur scelus, aut exuritur igni ;  
 Quisque suos patimur manes ; exinde per amplum  
 Mittimur Elysium, et pauci læta arva tenemus :  
 Donec longa dies, perfecto temporis orbe,  
 Concretam exemit labem, purumque reliquit  
 Ætherium sensum, atque auræ simplicis ignem.  
 Has omnes, ubi mille rotam volvere per annos,  
 Lethæum ad fluvium deus evocat agmine magno :  
 Scilicet immemores, supera ut convexa revisant 750  
 Rursus, et incipiant in corpora velle reverti.”  
 Dixerat Anchises ; natumque unaque Sibyllam  
 Conventus trahit in medios, turbamque sonantem :  
 Et tumultum capit, unde omnes longo ordine possit  
 Adversos legere, et venientum discere vultus.

“Nunc age, Dardaniam prolem quæ deinde sequatur  
 Gloria, qui maneant Itala de gente nepotes,  
 Illustres animas, nostrumque in nomen ituras,  
 Expediam dictis, et te tua fata docebo. 760  
 Ille, vides, pura juvenis qui nititur hasta,  
 Proxima sorte tenet lucis loca, primus ad auras  
 Ætherias Italo commixtus sanguine surget  
 Silvius, Albanum nomen, tua postuma proles :  
 Quem tibi longævo serum Lavinia conjux  
 Educet silvis regem, regumque parentem :  
 Unde genus Longa nostrum dominabitur Alba.  
 Proximus ille Procas, Trojanæ gloria gentis,  
 Et Capys, et Numitor, et qui te nomine reddet  
 Silvius Æneas, pariter pietate vel armis  
 Egregius, si unquam regnandam acceperit Albam. 770  
 Qui juvenes ! quantas ostentant, aspice, vires !  
 At, qui umbrata gerunt civili tempora quercu,  
 Hi tibi Nomentum, et Gabios, urbemque Fidenam,  
 Hi Collatinas imponent montibus arces,  
 [Laude pudicitiae celebres, addentque superbos]  
 Pometios, Castrumque Inui, Bolamque, Coramque.

Hæc tum nomina erunt, nunc sunt sine nomine terræ.  
 Quin et avo comitem sese Mavortius addet  
 Romulus ; Assaraci quem sanguinis Ilia mater  
 Educet. Viden' ut geminæ stant vertice cristæ, 780  
 Et pater ipse suo superûm jam signat honore ?  
 En hujus, nate, auspiciis illa inclyta Roma  
 Imperium terris, animos æquabit Olympo,  
 Septemque una sibi muro circumdabit arces,  
 Felix prole virum : qualis Berecynthia mater  
 Invehitur curru Phrygiæ turrita per urbes,  
 Læta deum partu, centum complexa nepotes,  
 Omnes cœlicolas, omnes supera alta tenentes.  
 Huc geminas nunc flecte acies ; hanc aspice gentem,  
 Romanosque tuos. Hic Cæsar, et omnis Iuli 790  
 Progenies, magnum cœli ventura sub axem.  
 Hic vir, hic est, tibi quem promitti sæpius audis,  
 Augustus Cæsar, Divi genus : aurea condet  
 Sæcula qui rursus Latio, regnata per arva  
 Saturno quondam ; super et Garamantas et Indos  
 Proferet imperium : jacet extra sidera tellus,  
 Extra anni Solisque vias, ubi cœlifer Atlas  
 Axem humero torquet stellis ardentibus aptum.  
 Hujus in adventum jam nunc et Caspia regna  
 Responsis horrent divûm, et Mæotia tellus, ~ 800  
 Et septemgemini turbant trepida ostia Nili.  
 Nec vero Alcides tantum telluris obivit ;  
 Fixerit æripedem cervam licet, aut Erymanthi  
 Pacarit nemora, et Lernam tremefecerit arcu :  
 Nec qui pampineis victor juga flectit habenis  
 Liber, agens celso Nysæ de vertice tigres.  
 Et dubitamus adhuc virtutem extendere factis ?  
 Aut metus Ausonia prohibet consistere terra ?  
 Quis procul ille autem ramis insignis olivæ  
 Sacra ferens ? Nosco crines incanaque menta 810  
 Regis Romani, primus qui legibus urbem  
 Fundabit, Curibus parvis et paupere terra

Missus in imperium magnum. Cui deinde subibit,  
 Otia qui rumpet patriæ, residesque movebit  
 Tullus in arma viros, et jam desueta triumphis  
 Agmina. Quem juxta sequitur jactantior Ancus,  
 Nunc quoque jam nimium gaudens popularibus auris.  
 Vis et Tarquinius reges, animamque superbam  
 Ultoris Bruti, fascesque videre receptos ?  
 Consulis imperium hic primus sævasque secures 820  
 Accipiet ; natosque pater, nova bella moventes,  
 Ad pœnam pulchra pro libertate vocabit,  
 Infelix ! Utcumque ferent ea facta minores :  
 Vincet amor patriæ laudumque immensa cupido.  
 Quin Decios, Drususque procul, sævumque securi  
 Aspice Torquatum, et referentem signa Camillum.  
 Illæ autem, paribus quas fulgere cernis in armis,  
 Concordes animæ nunc, et dum nocte prementur,  
 Heu quantum inter se bellum, si lumina vitæ  
 Attigerint, quantas acies stragemque ciebunt ! 830  
 Aggeribus socer Alpinis atque arce Monœci  
 Descendens ; gener adversis instructus Eois.  
 Ne, pueri, ne tanta animis assuescite bella ;  
 Neu patriæ validas in viscera vertite vires.  
 Tuque prior, tu parce, genus qui ducis Olympo ;  
 Projice tela manu, sanguis meus.  
 Ille triumphata Capitolia ad alta Corinθο  
 Victor aget currum, cæsis insignis Achivis.  
 Eruet ille Argos, Agamemnoniasque Mycenæ,  
 Ipsumque Æaciden, genus armipotentis Achilli ; 840  
 Ultus avos Trojæ, templa et temerata Minervæ.  
 Quis te, magne Cato, tacitum, aut te, Cosse, relinquat ?  
 Quis Gracchi genus, aut geminos, duo fulmina belli,  
 Scipiadas, cladem Libyæ, parvoque potentem  
 Fabricium ? vel te sulco, Serrane, serentem ?  
 Quo fessum rapitis, Fabii ? tu Maximus ille es,  
 Unus qui nobis cunctando restituis rem.  
 Excudent alii spirantia mollius æra,

Credo equidem, vivos ducent de marmore vultus ;  
 Orabunt causas melius, cœlique meatus 850  
 Describent radio, et surgentia sidera dicent :  
 Tu regere imperio populos, Romane, memento ;  
 Hæc tibi erunt artes : pacisque imponere morem,  
 Parcere subjectis, et debellare superbos."

Sic pater Anchises, atque hæc mirantibus addit ;  
 "Aspice, ut insignis spoliis Marcellus opimis  
 Ingreditur, victorque viros supereminet omnes !  
 Hic rem Romanam, magno turbante tumultu,  
 Sistet, eques sternet Pœnos, Gallumque rebellem,  
 Tertiaque arma patri suspendet capta Quirino. 860  
 Atque hic Æneas—una namque ire videbat  
 Egregium forma juvenem et fulgentibus armis,  
 Sed frons læta parum, et dejecto lumina vultu :—  
 "Quis, pater, ille virum qui sic comitatur euntem ?  
 Filius, anne aliquis magna de stirpe nepotum ?  
 Qui strepitus circa comitum ! quantum instar in ipso est !  
 Sed Nox atra caput tristi circumvolat umbra."  
 Tum pater Anchises, lacrimis ingressus obortis :  
 "O nate, ingentem luctum ne quære tuorum ;  
 Ostendent terris hunc tantum fata, neque ultra 870  
 Esse sinent. Nimum vobis Romana propago  
 Visa potens, Superi, propria hæc si dona fuissent.  
 Quantos ille virum magnam Mavortis ad urbem  
 Campus aget gemitus ! vel quæ, Tiberine, videbis  
 Funera, quum tumulum præterlabere recentem !  
 Nec puer Iliaca quisquam de gente Latinos  
 In tantum spe tollet avos ; nec Romula quondam  
 Ullo se tantum tellus jactabit alumno.  
 Heu pietas, heu prisca fides, invictaque bello  
 Dexterâ ! non illi se quisquam impune tulisset 880  
 Obvius armato, seu quum pedes iret in hostem,  
 Seu spumantis equi foderet calcaribus armos.  
 Heu miserande puer ! si qua fata aspera rumpas,  
 Tu Marcellus eris. Manibus date lilia plenis :

Purpureos spargam flores, animamque nepotis  
His saltem accumulem donis, et fungar inani  
Munere." Sic tota passim regione vagantur  
Aëris in campis latis, atque omnia lustrant.  
Quæ postquam Anchises natum per singula duxit,  
Incenditque animum famæ venientis amore :  
Exin bella viro memorat quæ deinde gerenda,  
Laurentesque docet populos, urbemque Latini ;  
Et quo quemque modo fugiatque feratque laborem.

890

Sunt geminæ Somni portæ : quarum altera fertur  
Cornea, qua veris facilis datur exitus umbris ;  
Altera candenti perfecta nitens elephanto ;  
Sed falsa ad cælum mittunt insomnia manes.  
His ubi tum natum Anchises unaque Sibyllam  
Prosequitur dictis, portaque emittit eburna :  
Ille viam secat ad naves sociosque revisit.  
Tum se ad Caietæ recto fert limite portum.  
Ancora de prora jacitur ; stant litore puppes.

900

P. VIRGILII MARONIS

Æ N E I D O S

LIBER SEPTIMUS.



Tu quoque litoribus nostris, Æneïa nutrix,  
Æternam moriens famam, Caieta, dedisti ;  
Et nunc servat honos sedem tuus, ossaque nomen  
Hesperia in magna, si qua est ea gloria, signat.  
At pius exsequiis Æneas rite solutis,  
Aggere composito tumuli, postquam alta quierunt  
Æquora, tendit iter velis, portumque relinquit.  
Aspirant auræ in noctem, nec candida cursus  
Luna negat ; splendet tremulo sub lumine pontus.  
Proxima Circææ raduntur litora terræ,  
Dives inaccessos ubi Solis filia lucos  
Assiduo resonat cantu, tectisque superbis  
Urit odoratam nocturna in lumina cedrum,  
Arguto tenues percurrens pectine telas.  
Hinc exaudiri gemitus iræque leonum,  
Vincla recusantum, et sera sub nocte rudentum ;  
Sætigerique sues, atque in præsepibus ursi  
Sævire, ac formæ magnorum ululare luporum ;  
Quos hominum ex facie dea sæva potentibus herbis  
Induerat Circe in vultus ac terga ferarum.  
Quæ ne monstra pii paterentur talia Troës,  
Delati in portus, neu litora dira subirent :  
Neptunus ventis implevit vela secundis,  
Atque fugam dedit, et præter vada fervida vexit.  
Jamque rubescebat radiis mare, et æthere ab alto

10

20

Aurora in roseis fulgebat lutea bigis ;  
 Quum venti posuere, omnisque repente resedit  
 Flatus et in lento luctantur marmore tonsæ.  
 Atque hic Æneas ingentem ex æquore lucum  
 Prospicit. Hunc inter fluvio Tiberinus amœno, 30  
 Verticibus rapidis, et multa flavus arena,  
 In mare prorumpit. Variæ circumque supraque  
 Assuetæ ripis volucres et fluminis alveo  
 Æthera mulcebant cantu, lucoque volabant.  
 Flectere iter sociis terræque advertere proras  
 Imperat, et lætus fluvio succedit opaco.

Nunc age, qui reges, Erato, quæ tempora rerum,  
 Quis Latio antiquo fuerit status, advena classem  
 Quum primum Ausoniis exercitus appulit oris,  
 Expediam, et primæ revocabo exordia pugnæ. 40  
 Tu vatem, tu diva, mone. Dicam horrida bella ;  
 Dicam acies, actosque animis in funera reges,  
 Tyrrhenamque manum, totamque sub arma coactam  
 Hesperiam. Major rerum mihi nascitur ordo ;  
 Majus opus moveo. Rex arva Latinus et urbes  
 Jam senior longa placidas in pace regebat.  
 Hunc Fauno et nympha genitum Laurente Marica  
 Accipimus : Fauno Picus pater : isque parentem  
 Te, Saturne, refert ; tu sanguinis ultimus auctor. 50  
 Filius huic, fato divum, prolesque virilis  
 Nulla fuit, primaque oriens erepta juventa est.  
 Sola domum et tantas servabat filia sedes,  
 Jam matura viro, jam plenis nubilis annis.  
 Multi illam magno e Latio totaque petebant  
 Ausonia ; petit ante alios pulcherrimus omnes  
 Turnus, avis atavisque potens ; quem regia conjux  
 Adjungi generum miro properabat amore ;  
 Sed variis portenta deum terroribus obstant.  
 Laurus erat tecti medio in penetralibus altis,  
 Sacra comam, multosque metu servata per annos : 60  
 Quam pater inventam, primas quum conderet arces,

Ipse ferebatur Phœbo sacrasse Latinus,  
 Laurentisque ab ea nomen posuisse colonis.  
 Hujus apes summum densæ, mirabile dictu,  
 Stridore ingenti liquidum trans æthera vectæ,  
 Obsedere apicem ; et, pedibus per mutua nexis,  
 Examen subitum ramo frondente pependit.  
 Continuo vates, "Externum cernimus," inquit,  
 "Adventare virum, et partes petere agmen easdem  
 Partibus ex isdem, et summa dominarier arce." 70  
 Præterea, castis adolet dum altaria tædis,  
 Ut juxta genitorem adstat Lavinia virgo,  
 Visa, nefas ! longis comprehendere crinibus ignem,  
 Atque omnem ornatum flamma crepitante cremari,  
 Regalesque accensa comas, accensa coronam,  
 Insignem gemmis ; tum fumida lumine fulvo  
 Involvi, ac totis Vulcanum spargere tectis.  
 Id vero horrendum ac visu mirabile ferri :  
 Namque fore illustrem fama fatisque canebant  
 Ipsam ; sed populo magnum portendere bellum. 80  
 At rex sollicitus monstris oracula Fauni,  
 Fatidici genitoris, adit, lucosque sub alta  
 Consulit Albunea : nemorum quæ maxima sacro  
 Fonte sonat, sævamque exhalat opaca mephitim.  
 Hinc Italæ gentes, omnisque Ænotria tellus,  
 In dubiis responsa petunt. Huc dona sacerdos  
 Quum tulit, et cæsarum ovium sub nocte silenti  
 Pellibus incubuit stratis, somnosque petivit :  
 Multa modis simulacra videt volitantia miris,  
 Et varias audit voces, fruiturque deorum 90  
 Colloquio, atque imis Acheronta affatur Avernis.  
 Hic et tum pater ipse petens responsa Latinus  
 Centum lanigeras mactabat rite bidentes,  
 Atque harum effultus tergo stratisque jacebat  
 Velleribus : subita ex alto vox reddita luco est :  
 "Ne pete connubiis natam sociare Latinis,  
 O mea progenies, thalamis neu crede paratis ;



Externi veniunt generi, qui sanguine nostrum  
 Nomen in astra ferant, quorumque ab stirpe nepotes  
 Omnia sub pedibus, qua Sol utrumque recurrens 100  
 Aspicit Oceanum, vertique regique videbunt."

Hæc responsa patris Fauni, monitusque silenti  
 Nocte datos, non ipse suo premit ore Latinus :  
 Sed circum late volitans jam Fama per urbes  
 Ausonias tulerat, quum Laomedontia pubes  
 Gramineo ripæ religavit ab aggere classem.

Æneas primique duces et pulcher Iulus  
 Corpora sub ramis deponunt arboris altæ ;  
 Instituuntque dapes, et adorea liba per herbam  
 Subjiciunt epulis,—sic Jupiter ille monebat— 110  
 Et Cereale solum pomis agrestibus augent.

Consumtis hic forte aliis, ut vertere morsus  
 Exiguam in Cererem penuria adegit edendi,  
 Et violare manu malisque audacibus orbem  
 Fatalis crusti, patulis nec parcere quadris :  
 "Heus ! etiam mensas consumimus ?" inquit Iulus.

Nec plura alludens. Ea vox audita laborum  
 Prima tulit finem, primamque loquentis ab ore  
 Eripuit pater, ac stupefactus numine pressit.  
 Continuo, "Salve fatis mihi debita Tellus, 120  
 Vosque," ait, "o fidi Trojæ salvete Penates.

Hic domus, hæc patria est. Genitor mihi talia, namque  
 Nunc repeto, Anchises fatorum arcana reliquit :  
 Quum te, nate, fames ignota ad litora vectum  
 Accisis coget dapibus consumere mensas :  
 Tum sperare domos defessus, ibique memento  
 Prima locare manu molirique aggere tecta.  
 Hæc erat illa fames ; hæc nos suprema manebat,  
 Exitii positura modum.

Quare agite, et primo læti cum lumine solis, 130  
 Quæ loca, quive habeant homines, ubi mœnia gentis,  
 Vestigemus, et a portu diversa petamus.  
 Nunc pateras libate Jovi, precibusque vocate

Anchisen genitorem, et vina reponite mensis."  
 Sic deinde effatus frondenti tempora ramo  
 Implicat, et Geniumque loci, primamque deorum  
 Tellurem, Nymphasque, et adhuc ignota precatur  
 Flumina; tum Noctem, Noctisque orientia signa,  
 Idæumque Jovem, Phrygiamque ex ordine Matrem,  
 Invocat, et duplices Cœloque Ereboque parentes. 140

Hic Pater omnipotens ter cœlo clarus ab alto  
 Intonuit, radiisque ardentem lucis et auro  
 Ipse manu quatiens ostendit ab æthere nubem.  
 Diditur hic subito Trojana per agmina rumor,  
 Advenisse diem, quo debita mœnia condant.  
 Certatim instaurant epulas, atque omine magno  
 Crateras læti statuunt, et vina coronant.

Postera quum prima lustrabat lampade terras  
 Orta dies, urbem et fines et litora gentis  
 Diversi explorant; hæc fontis stagna Numici, 150  
 Hunc Thybrim fluvium, hic fortes habitare Latinos.

Tum satus Anchisa delectos ordine ab omni  
 Centum oratores augusta ad mœnia regis  
 Ire jubet, ramis velatos Palladis omnes,  
 Donaue ferre viro, pacemque exposcere Teucris.  
 Haud mora: festinant jussi, rapidisque feruntur  
 Passibus. Ipse humili designat mœnia fossa,  
 Moliturque locum; primasque in litore sedes,  
 Castrorum in morem, pinnis atque aggere cingit.  
 Jamque iter emensi, turres ac tecta Latinorum 160

Ardua cernebant juvenes, muroque subibant:  
 Ante urbem pueri et primævo flore juventus  
 Exercentur equis, domitantque in pulvere currus;  
 Aut acres tendunt arcus, aut lenta lacertis  
 Spicula contorquent, cursuque ictuque lacesunt:  
 Quum prævectus equo longævi regis ad aures  
 Nuncius ingentes ignota in veste reportat  
 Advenisse viros. Ille intra tecta vocari  
 Imperat, et solio medius consedit avito.

Tectum augustum, ingens, centum sublime columnis, 170  
 Urbe fuit summa, Laurentis regia Pici,  
 Horrendum silvis et religione parentum.  
 Hic sceptrâ accipere, et primos attollere fasces  
 Regibus omen erat; hoc illis curia templum,  
 Hæ sacris sedes epulis; hic ariete cæso  
 Perpetuis soliti patres considerare mensis.

Quin etiam veterum effigies ex ordine avorum  
 Antiqua e cedro, Italusque, paterque Sabinus  
 Vitisator curvam servans sub imagine falcem, 180  
 Saturnusque senex, Janique bifrontis imago,  
 Vestibulo adstabant; aliique ab origine reges,  
 Martiaque ob patriam pugnando vulnera passi.  
 Multaque præterea sacris in postibus arma,  
 Captivi pendent currus, curvæque secures,  
 Et cristæ capitum, et portarum ingentia claustra,  
 Spiculaque, clipeiue, ereptaue rostra carinis.

Ipse Quirinali lituo parvaque sedebat  
 Succinctus trabea, lævaque ancile gerebat  
 Picus, equum domitor: quem capta cupidine conjux 190  
 Aurea percutsum virga, versumque venenis,  
 Fecit avem Ciree, sparsitque coloribus alas.  
 Tali intus templo divum patriaue Latinus  
 Sede sedens Teucros ad sese in tecta vocavit;  
 Atque hæc ingressis placido prior edidit ore:

“Dicite, Dardanidæ, neque enim nescimus et urbem  
 Et genus, auditique advertitis æquore cursum,  
 Quid petitis? quæ causa rates, aut cujus egentes  
 Litus ad Ausonium tot per vada cærula vexit?

Sive errore viæ, seu tempestatibus acti,—  
 Qualia multa mari naute patiuntur in alto— 200  
 Fluminis intrastis ripas, portuque sedetis:  
 Ne fugite hospitium, neve ignorete Latinos  
 Saturni gentem, haud vinclo nec legibus æquam,  
 Sponte sua veterisque dei se more tenentem.  
 Atque equidem memini—fama est obscurior annis—

Auruncos ita ferre senes, his ortus ut agris  
 Dardanus Idæas Phrygiæ penetrarit ad urbes,  
 Threiciamque Samum, quæ nunc Samothracia fertur.  
 Hinc illum Corythi Tyrrhena ab sede profectum  
 Aurea nunc solio stellantis regia cœli 210  
 Accipit, et numerum divorum altaribus addit."

Dixerat. Et dicta Ilioneus sic voce secutus :  
 " Rex, genus egregium Fauni, nec fluctibus actos  
 Atra subegit hiems vestris succedere terris,  
 Nec sidus regione viæ litusve fefellit :  
 Consilio hanc omnes animisque volentibus urbem  
 Afferimur, pulsī regnis, quæ maxima quondam  
 Extremo veniens Sol aspiciebat Olympo.  
 Ab Jove principium generis ; Jove Dardana pubes  
 Gaudet avo : Rex ipse, Jovis de gente suprema, 220  
 Troiūs Æneas tua nos ad limina misit.  
 Quanta per Idæos sævis effusa Mycenis  
 Tempestas ierit campos ; quibus actus uterque  
 Europæ atque Asiæ fatis concurrerit orbis :  
 Audiit, et si quem tellus extrema refuso  
 Submovet Oceano, et si quem extenta plagarum  
 Quatuor in medio dirimit plaga Solis iniqui.  
 Diluvio ex illo tot vasta per æquora vecti  
 Dis sedem exiguam patriis litusque rogamus  
 Innocuum, et cunctis undamque auramque patentem. 230  
 Non erimus regno indecores : nec vestra feretur  
 Fama levis, tantive abolescet gratia facti ;  
 Nec Trojam Ausonios gremio excepisse pigebit.  
 Fata per Æneæ juro, dextramque potentem,  
 Sive fide, seu quis bello est expertus et armis ;  
 Multi nos populi, multæ—ne temne, quod ultro  
 Præferimus manibus vittas ac verba precantia—  
 Et petiere sibi et voluere adjungere gentes.  
 Sed nos fata deum vestras exquirere terras  
 Imperiis egere suis. Hinc Dardanus ortus : 240  
 Huc repetit, jussisque ingentibus urget Apollo

Tyrrhenum ad Thybrim et fœntis vada sacra Numici.  
 Dat tibi præterea fortunæ parva prioris  
 Munera, reliquias Troja ex ardente receptas.  
 Hoc pater Anchises auro libabat ad aras :  
 Hoc Priami gestamen erat, quum jura vocatis  
 More daret populis, sceptrumque sacerque tiaras,  
 Iliadumque labor vestes."

Talibus Ilionei dictis defixa Latinus  
 Obtutu tenet ora, soloque immobilis hæret, 250  
 Intentos volvens oculos. Nec purpura regem  
 Picta movet, nec sceptrum movent Priameia tantum,  
 Quantum in connubio natæ thalamoque moratur ;  
 Et veteris Fauni volvit sub pectore sortem.  
 Hunc illum fatis externa ab sede profectum  
 Portendi generum, paribusque in regna vocari  
 Auspiciis ; huic progeniem virtute futuram  
 Egregiam, et totum quæ viribus occupet orbem.  
 Tandem lætus ait : " Di nostra incepta secundent,  
 Auguriumque suum ! Dabitur, Trojane, quod optas : 260  
 Munera nec sperno. Non vobis, rege Latino,  
 Divitis uber agri Trojæve opulentia deerit.  
 Ipse modo Æneas, nostri si tanta cupido est,  
 Si jungi hospitio properat sociusque vocari,  
 Adveniat ; vultus neve exhorrescat amicos.  
 Pars mihi pacis erit dextram tetigisse tyranni.  
 Vos contra regi mea nunc mandata referte.  
 Est mihi nata, viro gentis quam jungere nostræ,  
 Non patrio ex adyto sortes, non plurima cœlo  
 Monstra sinunt : generos externis affore ab oris, 270  
 Hoc Latio restare canunt, qui sanguine nostrum  
 Nomen in astra ferant. Hunc illum poscere fata  
 Et reor, et, si quid veri mens augurat, opto."  
 Hæc effatus, equos numero pater eligit omni.  
 Stabant ter centum nitidi in præsepibus altis :  
 Omnibus extemplo Teucris jubet ordine duci  
 Instratos ostro alipedes pictisque tapetis :

Aurea pectoribus demissa monilia pendent ;  
 Tecti auro, fulvum mandunt sub dentibus aurum ;  
 Absenti Æneæ currum geminosque jugales 280  
 Semine ab ætherio spirantes naribus ignem,  
 Illorum de gente, patri quos dædala Circe  
 Supposita de matre nothos furata creavit.  
 Talibus Æneadæ donis dictisque Latini  
 Sublimes in equis redeunt, pacemque reportant.

Ecce autem Inachiis sese referebat ab Argis  
 Sæva Jovis conjux, aurasque invecta tenebat ;  
 Et lætum Æneam classemque ex æthere longo  
 Dardaniam Siculo prospexit ab usque Pachyno.  
 Moliri jam tecta videt, jam fidere terræ ; 290  
 Deservisse rates. Stetit acri fixa dolore.

Tum quassans caput, hæc effundit pectore dicta :  
 “ Heu stirpem invisam, et fatis contraria nostris  
 Fata Phrygum ! num Sigeis occumbere campis,  
 Num capti potuere capi ? num incensa cremavit  
 Troja viros ! medias acies mediosque per ignes  
 Invenere viam. At, credo, mea numina tandem  
 Fessa jacent, odiis aut exsaturata quievi—  
 Quin etiam patria excussos infesta per undas  
 Ausa sequi, et profugis toto me opponere ponto : 300  
 Absumtæ in Teucros vires coelique marisque.

Quid Syrtes, aut Scylla mihi, quid vasta Charybdis  
 Profuit ? optato conduntur Thybridis alveo,  
 Securi pelagi atque mei. Mars perdere gentem  
 Immanem Lapithum valuit ; concessit in iras  
 Ipse deum antiquam genitor Calydonæ Dianæ ;  
 Quod scelus aut Lapithas tantum, aut Calydonæ merentem ?  
 Ast ego, magna Jovis conjux, nil linquere inausum  
 Quæ potui infelix, quæ memet in omnia verti,  
 Vincor ab Ænea. Quod si mea numina non sunt 310  
 Magna satis : dubitem haud equidem implorare quod  
 usquam est.

Flectere si nequeo superos, Acheronta movebo.

Non dabitur regnis, esto, prohibere Latinis,  
 Atque immota manet fatis Lavinia conjux :  
 At trahere, atque moras tantis licet addere rebus ;  
 At licet amborum populos excindere regum.

Hac gener atque socer coëant mercede suorum.  
 Sanguine Trojano et Rutulo dotabere, virgo :  
 Et Bellona manet te pronuba. Nec face tantum  
 Cisseis prægnans ignes enixa jugales :

320

Quin idem Veneri partus suus, et Paris alter,  
 Funestæque iterum recidiva in Pergama tædæ."

Hæc ubi dicta dedit, terras horrenda petivit.

Luctificam Allecto Dirarum ab sede sororum

Infernisque ciet tenebris : cui tristia bella,

Iræque, insidiæque, et crimina noxia cordi.

Odit et ipse pater Pluton, odere sorores

Tartaræ monstrum : tot sese vertit in ora,

Tam sævæ facies, tot pullulat atra colubris.

Quam Juno his acuit verbis, ac talia fatur :

330

"Hunc mihi da proprium, virgo sata Nocte, laborem,

Hanc operam, ne noster honos infractave cedat

Fama loco ; neu connubiis ambire Latinum

Æneadæ possint, Italosve obsidere fines.

Tu potes unanimos armare in prælia fratres,

Atque odiis versare domos ; tu verbera tectis

Funereasque inferre faces ; tibi nomina mille,

Mille nocendi artes. Fecundum concute pectus,

Disjice compositam pacem, sere crimina belli ;

Arma velit poscatque simul, rapiatque juvenus."

340

Exin Gorgoneis Allecto infecta venenis

Principio Latium et Laurentis tecta tyranni

Celsa petit, tacitumque obsedit limen Amatæ,

Quam super adventu Teucrum Turnique hymenæis

Femineæ ardentem curæque iræque coquebant.

Huic dea cæruleis unum de crinibus anguem

Conjicit, inque sinum præcordia ad intima subdit,

Quo furibunda domum monstro permisceat omnem.

Ille inter vestes et levia pectora lapsus  
 Volvitur attactu nullo, fallitque furem,  
 Vipeream inspirans animam; fit tortile collo  
 Aurum ingens coluber, fit longæ tænia vittæ,  
 Innectitque comas, et membris lubricus errat.  
 Ac dum prima lues udo sublapsa veneno  
 Pertentat sensus, atque ossibus implicat ignem,  
 Necdum animus toto percepit pectore flammam:  
 Mollius, et solito matrum de more, locuta est,  
 Multa super nata lacrimans Phrygiisque hymenæis:

350

“Exsulibusne datur ducenda Lavinia Teucris,  
 O genitor? nec te miseret natæque tuique?  
 Nec matris miseret, quam primo aquilone relinquet  
 Perfidus, alta petens abducta virgine prædo?  
 At non sic Phrygius penetrat Lacedæmona pastor,  
 Ledæamque Helenam Trojanas vexit ad urbes.  
 Quid tua sancta fides? quid cura antiqua tuorum,  
 Et consanguineo toties data dextera Turno?  
 Si gener externa petitur de gente Latinis,  
 Idque sedet, Faunique premunt te iussa parentis:  
 Omnem equidem sceptris terram quæ libera nostris  
 Dissidet, externam reor, et sic dicere divos.  
 Et Turno, si prima domus repetatur origo,  
 Inachus Acrisiusque patres, mediæque Mycenæ.”

360

370

His ubi nequidquam dictis experta, Latinum  
 Contra stare videt, penitusque in viscera lapsum  
 Serpentis furiale malum, totamque pererrat:  
 Tum vero infelix, ingentibus excita monstribus,  
 Immensam sine more furi lymphata per urbem:  
 Ceu quondam torto volitans sub verbere turbo,  
 Quem pueri magno in gyro vacua atria circum  
 Intenti ludo exercent; ille actus habena  
 Curvatis fertur spatiis; stupet inscia supra  
 Impubesque manus, mirata volubile buxum;  
 Dant animos plagæ: Non cursu segnior illo  
 Per medias urbes agitur populosque feroces.

380



Quin etiam in silvas, simulato numine Bacchi,  
 Majus adorta nefas, majoremque orsa furorem  
 Evolat, et natam frondosis montibus abdit ;  
 Quo thalamum eripiat Teucris, tædasque moretur :  
 Evæ Bacche, fremens, solum te virgine dignum,  
 Vociferans ; etenim molles tibi sumere thyrsos, 390  
 Te lustrare choro, sacrum tibi pascere crinem.

Fama volat ; Furiisque accensas pectore matres  
 Idem omnes simul ardor agit, nova quærere tecta.  
 Deseruere domos ; ventis dant colla comasque.  
 Ast aliæ tremulis ululatibus æthera complent,  
 Pampineasque gerunt incinctæ pellibus hastas.  
 Ipsa inter medias flagrantem fervida pinum  
 Sustinet, ac natæ Turnique canit hymenæos,  
 Sanguineam torquens aciem ; torvumque repente  
 Clamat : “ Io matres, audite, ubi quæque, Latinæ : 400  
 Si qua piis animis manet infelicis Amatæ  
 Gratia, si juris materni cura remordet ;  
 Solvite crinales vittas, capite orgia mecum.”

Talem inter silvas, inter deserta ferarum,  
 Reginam Allecto stimulis agit undique Bacchi.  
 Postquam visa satis primos acuisse furores,  
 Consiliumque omnemque domum vertisse Latini :  
 Protenus hinc fuscis tristis dea tollitur alis  
 Audacis Rutuli ad muros : quam dicitur urbem  
 Acrisioneis Danaë fundasse colonis, 410  
 Præcipiti delata noto. Locus Ardea quondam  
 Dictus avis ; et nunc magnum manet Ardea nomen ;  
 Sed fortuna fuit. Tectis hic Turnus in altis  
 Jam mediam nigra carpebat nocte quietem.  
 Allecto torvam faciem et furialia membra  
 Exuit ; in vultus sese transformat aniles,  
 Et frontem obscenam rugis arat ; induit albos  
 Cum vitta crines ; tum ramum innectit olivæ ;  
 Fit Calybe Junonis anus templique sacerdos ;  
 Et juveni ante oculos his se cum vocibus offert : 420

"Turne, tot incassum fusos patiere labores,  
 Et tua Dardaniis transcribi sceptrā colonis?  
 Rex tibi conjugium et quæsitā sanguine dotes  
 Abnegat, externusque in regnum quæritur heres.  
 I nunc, ingratis offer te, irrise, periclis;  
 Tyrrhenas, i, sterne acies; tege pace Latinos.  
 Hæc adeo tibi me, placida quum nocte jaceres,  
 Ipsa palam fari omnipotens Saturnia jussit.  
 Quare age, et armari pubem portisque moveri  
 Lætus in arma para, et Phrygios, qui flumine pulchro 430  
 Consedere, duces pictasque exure carinas.  
 Cœlestum vis magna jubet. Rex ipse Latinus,  
 Ni dare conjugium et dicto parere fatetur,  
 Sentiat et tandem Turnum experiatur in armis."

Hic juvenis, vatem irridens, sic orsa vicissim  
 Ore refert: "Classes invectas Thybridis alveo,  
 Non, ut rere, meas effugit nuncius aures.  
 Ne tantos mihi finge metus: nec regia Juno  
 Immemor est nostri.

Sed te victa situ verique effeta senectus, 440  
 O mater, curis nequidquam exercet, et arma  
 Regum inter falsa vatem formidine ludit.  
 Cura tibi, divum effigies et templa tueri;  
 Bella viri pacemque gerent, [queis bella gerenda.]"

Talibus Allecto dictis exarsit in iras.  
 At juveni oranti subitus tremor occupat artus;  
 Deriguere oculi: tot Erinys sibilat hydrys,  
 Tantaque se facies aperit. Tum flammea torquens  
 Lumina cunctantem et quærentem dicere plura  
 Repulit, et geminos erexit crinibus angues, 450  
 Verberaque insonuit, rabidoque hæc addidit ore:  
 "En ego victa situ, quam veri effeta senectus  
 Arma inter regum falsa formidine ludit;  
 Respice ad hæc: adsum dirarum ab sede sororum;  
 Bella manu letumque gero."

Sic effata facem juveni conjecit, et atro

Lumine fumantes fixit sub pectore tædas.  
 Olli somnum ingens rumpit pavor, ossaque et artus  
 Perfundit toto proruptus corpore sudor.  
 Arma amens fremit ; arma toro tectisque requirit. 460  
 Sævit amor ferri, et scelerata insania belli,  
 Ira super : magno veluti quum flamma sonore  
 Virgea suggeritur costis undantis aheni,  
 Exsultantque æstu latices ; furit intus aquai  
 Fumidus atque alte spumis exuberat amnis ;  
 Nec jam se capit unda ; volat vapor ater ad auras.  
 Ergo iter ad regem polluta pace Latinum  
 Indicit primis juvenum, et jubet arma parari,  
 Tutari Italiam, detrudere finibus hostem ;  
 Se satis ambobus Teucrisque venire Latinisque. 470  
 Hæc ubi dicta dedit, divosque in vota vocavit :  
 Certatim sese Rutuli exhortantur in arma.  
 Hunc decus egregium formæ movet atque juventæ ;  
 Hunc atavi reges, hunc claris dextera factis.”  
 Dum Turnus Rutulos animis audacibus implet,  
 Allecto in Teucros Stygiis se concitat alis.  
 Arte nova speculata locum, quo litore pulcher  
 Insidiis cursuque feras agitabat Iulus,  
 Hic subitam canibus rabiem Cocytia virgo  
 Objicit, et noto nares contingit odore, 480  
 Ut cervum ardentes agerent : quæ prima laborum  
 Causa fuit, belloque animos accendit agrestes.  
 Cervus erat forma præstanti et cornibus ingens,  
 Tyrrhidæ pueri quem matris ab ubere raptum  
 Nutribant, Tyrrheusque pater, cui regia parent  
 Armenta, et late custodia credita campi.  
 Assuetum imperiis soror omni Silvia cura  
 Mollibus intexens ornabat cornua sertis,  
 Pectebatque ferum, puroque in fonte lavabat.  
 Ille manum patiens, mensæque assuetus herili, 490  
 Errabat silvis ; rursusque ad limina nota  
 Ipse domum sera quamvis se nocte ferebat.

Hunc procul errantem rabidæ venantis Iuli  
 Commovere canes, fluvio quum forte secundo  
 Deflueret, ripaque æstus viridante levaret.  
 Ipse etiam, eximiæ laudis succensus amore,  
 Ascanius curvo direxit spicula cornu :  
 Nec dextræ erranti deus afuit : actaque multo  
 Perque uterum sonitu perque ilia venit arundo.  
 Saucius at quadrupes nota intra tecta refugit, 500  
 Successitque gemens stabulis, questuque cruentus  
 Atque imploranti similis tectum omne replebat.  
 Silvia prima soror, palmis percussa lacertos,  
 Auxilium vocat et duros conclamat agrestes.  
 Olli, pestis enim tacitis latet aspera silvis,  
 Improvisi adsunt : hic torre armatus obusto,  
 Stipitis hic gravidi nodis : quod cuique repertum  
 Rimanti, telum ira facit. Vocat agmina Tyrreus,  
 Quadrifidam quercum cuneis ut forte coactis  
 Scindebat, rapta spirans immane securi. 510  
 At sæva e speculis tempus dea nacta nocendi  
 Ardua tecta petit stabuli, et de culmine summo  
 Pastorale canit signum, cornuque recurvo  
 Tartaream intendit vocem : qua protenus omne  
 Contremuit nemus, et silvæ intonuere profundæ,  
 Audiit et Triviæ longe lacus ; audiit amnis  
 Sulfurea Nar albus aqua fontesque Velini ;  
 Et trepidæ matres pressere ad pectora natos.  
 Tum vero ad vocem celeres, qua buccina signum  
 Dira dedit, raptis concurrunt undique telis 520  
 Indomiti agricolæ ; nec non et Troia pubes  
 Ascanio auxilium castris effundit apertis.  
 Direxere acies. Non jam certamine agresti,  
 Stipitibus duris agitur sudibusve præustis ;  
 Sed ferro ancipiti decernunt, atraque late  
 Horrescit strictis seges ensibus, æraque fulgent  
 Sole lacessita, et lucem sub nubila jactant :  
 Fluctus uti primo cœpit quum albescere vento,

Paulatim sese tollit mare, et altius undas  
 Erigit, inde imo consurgit ad æthera fundo. 530  
 Hic juvenis primam ante aciem stridente sagitta,  
 Natorum Tyrrhei fuerat qui maximus, Almo  
 Sternitur; hæsit enim sub gutture vulnus, et udæ  
 Vocis iter tenuemque inclusit sanguine vitam.  
 Corpora multa virum circa, seniorque Galæsus,  
 Dum paci medium se offert; justissimus unus  
 Qui fuit, Ausoniisque olim ditissimus arvis:  
 Quinque greges illi balantum, quina redibant  
 Armenta, et terram centum vertebat aratris.

Atque ea per campos æquo dum Marte geruntur, 540  
 Promissi dea facta potens, ubi sanguine bellum  
 Imbuit et primæ commisit funera pugnæ,  
 Deserit Hesperiam, et cœli convexa per auras  
 Junonem victrix affatur voce superba:  
 "En, perfecta tibi bello discordia tristi;  
 Dic, in amicitiam coëant, et fœdera jungant.  
 Quandoquidem Ausonio respersi sanguine Teucros,  
 Hoc etiam his addam, tua si mihi certa voluntas:  
 Finitimas in bella feram rumoribus urbes,  
 Accendamque animos insani Martis amore, 550  
 Undique ut auxilio veniant; spargam arma per agros."  
 Tum contra Juno: "Terrorum et fraudis abunde est.  
 Stant belli causæ; pugnatur cominus armis:  
 Quæ fors prima dedit, sanguis novus imbuit arma.  
 Talia connubia et tales celebrent hymenæos  
 Egreium Veneris genus et rex ipse Latinus.  
 Te super ætherias errare licentius auras  
 Haud Pater ille velit, summi regnator Olympi.  
 Cede locis. Ego, si qua super fortuna laborum est,  
 Ipsa regam." Tales dederat Saturnia voces. 560  
 Illa autem attollit stridentes anguibus alas,  
 Cocytique petit sedem, supera ardua linquens.  
 Est locus Italiæ medio sub montibus altis,  
 Nobilis et fama multis memoratus in oris,

Amsancti valles ; densis hunc frondibus atrum  
 Urget utrimque latus nemoris, medioque fragosus  
 Dat sonitum saxis et torto vertice torrens.  
 Hic specus horrendum, sævi spiracula Ditis,  
 Monstratur, ruptoque ingens Acheronte vorago  
 Pestiferas aperit fauces : queis condita Erinys,  
 Invisum numen, terras cœlumque levabat.

570

Nec minus interea extremam Saturnia bello  
 Imponit regina manum. Ruit omnis in urbem  
 Pastorum ex acie numerus, cæsosque reportant  
 Almonem puerum fœdatique ora Galæsi ;  
 Implorantque deos, obtestanturque Latinum.  
 Turnus adest, medioque in crimine cædis et ignis  
 Terrorem ingeminat : Teucros in regna vocari ;  
 Stirpem admisceri Phrygiam ; se limine pelli.  
 Tum, quorum attonitæ Baccho nemora avia matres  
 Insultant thiasis, neque enim leve nomen Amatæ,  
 Undique collecti coeunt, Martemque fatigant.  
 Illicet infandum cuncti contra omina bellum,  
 Contra fata deum, perverso numine poscunt :  
 Certatim regis circumstant tecta Latini.  
 Ille, velut pelagi rupes immota, resistit ;  
 [Ut pelagi rupes, magno veniente fragore,]  
 Quæ sese, multis circum latrantibus undis,  
 Mole tenet ; scopuli nequidquam et spumea circum  
 Saxa fremunt, laterique illisa refunditur alga.

580

590

Verum ubi nulla datur cæcum exsuperare potestas  
 Consilium, et sævæ nutu Junonis eunt res ;  
 Multa deos aurasque pater testatus inanes,  
 “Frangimur heu fatis,” inquit, “ferimurque procella !  
 Ipsi has sacrilego pendetis sanguine pœnas,  
 O miseri. Te, Turne, nefas, te triste manebit  
 Supplicium ; votisque deos venerabere seris.  
 Nam mihi parta quies, omnisque in limine portus ;  
 Funere felici spoliior.” Nec plura locutus  
 Sepsit se tectis, rerumque reliquit habenas.

600

Mos erat Hesperio in Latio, quem protinus urbes  
 Albanæ coluere sacrum, nunc maxima rerum  
 Roma colit, quum prima movent in prælia Martem,  
 Sive Getis inferre manu lacrimabile bellum,  
 Hyrcanisve Arabisve parant, seu tendere ad Indos,  
 Auroramque sequi, Parthosque reposcere signa.  
 Sunt geminæ Belli portæ—sic nomine dicunt—  
 Religione sacræ et sævi formidine Martis :  
 Centum ærei claudunt vectes, æternaque ferri  
 Robora ; nec custos absistit limine Janus.  
 Has, ubi certa sedet patribus sententia pugnæ,  
 Ipse Quirinali trabea cinctuque Gabino  
 Insignis reserat stridentia limina Consul :  
 Ipse vocat pugnas ; sequitur tum cetera pubes,  
 Æreaque assensu conspirant cornua rauco.  
 Hoc et tum Æneadis indicere bella Latinus  
 More jubebatur, tristesque recludere portas.  
 Abstinit tactu pater, aversusque refugit  
 Fœda ministeria, et cæcis se condidit umbris.  
 Tum regina deum cœlo delapsa morantes  
 Impulit ipsa manu portas, et cardine verso  
 Belli ferratos rupit Saturnia postes.  
 Ardet inexcita Ausonia atque immobilis ante ;  
 Pars pedes ire parat campis ; pars arduus altis  
 Pulverulentus equis furit : omnes arma requirunt.  
 Pars leves clipeos et spicula lucida tergunt  
 Arvina pingui, subiguntque in cote secures ;  
 Signaque ferre juvat, sonitusque audire tubarum.  
 Quinque adeo magnæ positis incudibus urbes  
 Tela novant, Atina potens, Tiburque superbum,  
 Ardea, Crustumérique, et turrigeræ Antemnæ.  
 Tegmina tuta cavant capitum, flectuntque salignas  
 Umbonum crates ; alii thoracas ahenos,  
 Aut leves ocreas lento ducunt argento :  
 Vomeris huc et falcis honos, huc omnis aratri  
 Cessit amor : recoquunt patrios fornacibus enses.

610

620

630

Classica jamque sonant ; it bello tessera signum.  
 Hic galeam tectis trepidus rapit ; ille frementes  
 Ad juga cogit equos ; clipeumque auroque trilicem  
 Loricam induitur fidoque accingitur ense.

640

Pandite nunc Helicon, deæ, cantusque movete,  
 Qui bello exciti reges, quæ quemque secutæ  
 Complerint campos acies ; quibus Itala jam tum  
 Floruerit terra alma viris, quibus arserit armis.  
 Et meministis enim, divæ, et memorare potestis ;  
 Ad nos vix tenuis famæ perlabitur aura.

Primus init bellum Tyrrhenis asper ab oris  
 Contemtor divum Mezentius, agminaque armat.  
 Filius huic juxta Lausus, quo pulchrior alter  
 Non fuit, excepto Laurentis corpore Turni.  
 Lausus, equum domitor debellatorque ferarum,  
 Ducit Agyllina nequidquam ex urbe secutos  
 Mille viros ; dignus, patriis qui lætior esset  
 Imperiis, et cui pater haud Mezentius esset.

650

Post hos insignem palma per gramina currum  
 Victoresque ostentat equos satus Hercule pulchro  
 Pulcher Aventinus ; clipeoque insigne paternum  
 Centum angues cinctamque gerit serpentibus Hydram ;  
 Collis Aventini silva quem Rhea sacerdos  
 Furtivum partu sub luminis edidit oras,  
 Mixta deo mulier, postquam Laurentia victor,  
 Geryone extincto, Tirynthius attigit arva,  
 Tyrrhenoque boves in flumine lavit Iberas.  
 Pila manu sævosque gerunt in bella dolones ;  
 Et tereti pugnant mucrone veruque Sabello.  
 Ipse pedes, tegumen torquens immane leonis,  
 Terribili impexum sæta, cum dentibus albis,  
 Indutus capiti, sic regia tecta subibat  
 Horridus, Herculeoque humeros innexus amictu.

660

Tum gemini fratres Tiburtia mœnia linquunt,  
 Fratrís Tiburti dictam cognomine gentem,  
 Catillusque acerque Coras, Argiva juvenus ;

670



Et primam ante aciem densa inter tela feruntur,  
 Ceu duo nubigenæ quum vertice montis ab alto  
 Descendunt Centauri, Homolen Othrymque nivalem  
 Linquentes cursu rapido ; dat euntibus ingens  
 Silva locum, et magno cedunt virgulta fragore.

Nec Prænestinæ fundator defuit urbis,  
 Vulcano genitum pecora inter agrestia regem,  
 Inventumque focis omnis quem credidit ætas, 680  
 Cæculus. Hunc legio late comitatur agrestis ;  
 Quique altum Præneste viri, quique arva Gabinæ  
 Junonis, gelidumque Anienem, et roscida rivis  
 Hernica saxa colunt ; quos, dives Anagnia, pascis,  
 Quos, Amasene pater. Non illis omnibus arma  
 Nec clipei currusve sonant : pars maxima glandes  
 Liventis plumbi spargit ; pars spicula gestat  
 Bina manu, fulvosque lupi de pelle galeros  
 Tegmen habent capiti : vestigia nuda sinistri  
 Instituire pedis ; crudus tegit altera pero. 690

At Messapus, equum domitor, Neptunia proles,  
 Quem neque fas igni cuiquam nec sternere ferro,  
 Jam pridem resides populos, desuetaque bello  
 Agmina, in arma vocat subito, ferrumque retractat.  
 Hi Fescenninas acies Æquosque Faliscos,  
 Hi Soractis habent arces Flaviniaque arva,  
 Et Cimini cum monte lacum lucosque Capenos.  
 Ibant æquati numero, regemque canebant ;  
 Ceu quondam nivei liquida inter nubila cycni  
 Quum sese e pastu referunt, et longa canoros 700  
 Dant per colla modos ; sonat amnis et Asia longe  
 Pulsa palus.

Nec quisquam æratas acies ex agmine tanto  
 Misceri putet : aëriam sed gurgite ab alto  
 Urgeri volucrum raucarum ad litora nubem.

Ecce, Sabinorum prisco de sanguine, magnum  
 Agmen agens Clausus, magnique ipse agminis instar,  
 Claudia nunc a quo diffunditur et tribus et gens  
 Per Latium, postquam in partem data Roma Sabinis.

Una ingens Amiterna cohors, priscique Quirites, 710  
 Ereti manus omnis, oliviferæque Mutusæ ;  
 Qui Nomentum urbem, qui Rosea rura Velini,  
 Qui Tetricæ horrentis rupes, montemque Severum,  
 Casperiamque colunt, Forulosque, et flumen Himellæ ;  
 Qui Thybrim Fabarimque bibunt, quos frigida misit  
 Nursia, et Hortinæ classes, populique Latini,  
 Quosque secans infaustum interluit Allia nomen :  
 Quam multi Libyco volvuntur marmore fluctus,  
 Sævus ubi Orion hibernis conditur undis ;  
 Vel quum sole novo densæ torrentur aristæ, 720  
 Aut Hermi campo, aut Lyciæ flaventibus arvis.  
 Scuta sonant, pulsuque pedum conterrita tellus.

Hinc Agamemnonius, Trojani nominis hostis,  
 Curru jungit Halæsus equos, Turnoque feroces  
 Mille rapit populos ; vertunt felicia Baccho  
 Massica qui rastris, et quos de collibus altis  
 Aurunci misere patres, Sidicinaque juxta  
 Æquora ; quique Cales linquunt, amnisque vadosi  
 Accola Vulturni, pariterque Saticulus asper,  
 Oscorumque manus. Teretes sunt aclydes illis 730  
 Tela : sed hæc lento mos est aptare flagello.  
 Lævas cætra tegit ; falcati cominus enses.

Nec tu carminibus nostris indictus abibis,  
 Cebale, quem generasse Telon Sebethide nympba  
 Fertur, Teleboum Capreas quum regna teneret  
 Jam senior ; patriis sed non et filius arvis  
 Contentus, late jam tum ditioe premebat  
 Sarrastes populos, et quæ rigat æquora Sarnus,  
 Quique Rufras Batulumque tenent atque arva Celennæ,  
 Et quos maliferæ despectant mœnia Abellæ : 740  
 Teutonico ritu soliti torquere cateias ;  
 Tegmina queis capitum raptus de subere cortex,  
 Æratæque micant peltæ, micat æreus ensis.

Et te montosæ misere in prælia Nersæ,  
 Ufens, insignem fama et felicibus armis :  
 Horrida præcipue cui gens, assuetaque multo

Venatu nemorum, duris Æquicula glebis.  
 Armati terram exercent, semperque recentes  
 Convectare juvat prædas, et vivere raptō.

Quin et Marrubia venit de gente sacerdos, 750  
 Fronde super galeam et felici comtus oliva,  
 Archippi regis missu, fortissimus Umbro :  
 Vipereo generi et graviter spirantibus hydrys  
 Spargere qui somnos cantuque manuque solebat,  
 Mulcebatque iras, et morsus arte levabat.  
 Sed non Dardaniæ medicari cuspidis ictum  
 Evaluit ; neque eum juvere in vulnera cantus  
 Somniferi, et Marsis quæsitæ montibus herbæ.  
 Te nemus Anguitiæ, vitrea te Fucinus unda,  
 Te liquidi flevere lacus. 760

Ibat et Hippolyti proles pulcherrima bello  
 Virbius, insignem quem mater Aricia misit,  
 Eductum Egeriæ lucis, humentia circum  
 Litora, pinguis ubi et placabilis ara Dianæ.  
 Namque ferunt fama Hippolytum, postquam arte novercæ  
 Occiderit, patriasque explerit sanguine pœnas  
 Turbatus distractus equis, ad sidera rursus  
 Ætheria et superas cœli venisse sub auras,  
 Pæoniis revocatum herbis et amore Dianæ.  
 Tum Pater omnipotens, aliquem indignatus ab umbris 770  
 Mortalem infernis ad lumina surgere vitæ,  
 Ipse repertorem medicinæ talis et artis  
 Fulmine Phœbigenam Stygias detrusit in undas.  
 At Trivia Hippolytum secretis alma recondit  
 Sedibus, et nymphæ Egeriæ nemorique relegat :  
 Solus ubi in silvis Italis ignobilis ævum  
 Exigeret, versoque ubi nomine Virbius esset.  
 Unde etiam templo Triviæ lucisque sacratis  
 Cornipedes arcentur equi ; quod litore currum  
 Et juvenem monstris pavidi effudere marinis. 780  
 Filius arduos haud secius æquore campi  
 Exercebat equos, curruque in bella ruebat.

Ipse inter primos præstanti corpore Turnus  
 Vertitur arma tenens, et toto vertice supra est :  
 Cui triplici crinita juba galea alta Chimæram .  
 Sustinet, Ætnæos efflantem faucibus ignes ;  
 Tam magis illa fremens, et tristibus effera flammis,  
 Quam magis effuso crudescunt sanguine pugna.  
 At levem clipeum sublatis cornibus Io

Auro insignibat, jam sætis obsita, jam bos,  
 Argumentum ingens, et custos virginis Argus,  
 Cælataque amnem fundens pater Inachus urna.  
 Insequitur nimbus peditum, clipeataque totis  
 Agmina densentur campis, Argivaque pubes,  
 Auruncæque manus, Rutuli, veteresque Sicani,  
 Et Sacranæ acies, et picti scuta Labici :  
 Qui saltus, Tiberine, tuos, sacrumque Numici  
 Litus arant, Rutulosque exercent vomere colles,  
 Circæumque jugum ; queis Jupiter Anxurus arvis  
 Præsidet, et viridi gaudens Feronia luco ;  
 Qua Saturæ jacet atra palus, gelidusque per imas  
 Quærit iter valles atque in mare conditur Ufens.

Hos super advenit Volsca de gente Camilla,  
 Agmen agens equitum et florentes ære catervas,  
 Bellatrix : non illa colo calathisve Minervæ  
 Femineas assueta manus, sed prælia virgo  
 Dura pati, cursuque pedum prævertere ventos.  
 Illa vel intactæ segetis per summa volaret  
 Gramina, nec teneras cursu læsisset aristas ;  
 Vel mare per medium, fluctu suspensa tumentis,  
 Ferret iter, celeres nec tingeret æquore plantas.  
 Illam omnis tectis agrisque effusa juvenus  
 Turbaque miratur matrum, et prospectat euntem,  
 Attonitis inhians animis : ut regius ostro  
 Velet honos leves humeros, ut fibula crinem  
 Auro internectat ; Lyciam ut gerat ipsa pharetram,  
 Et pastorem præfixa cuspide myrtum.

790

800

810

P. VIRGILII MARONIS

Æ N E I D O S

LIBER OCTAVUS.

---

UT belli signum Laurenti Turnus ab arce  
Extulit, et rauco strepuerunt cornua cantu ;  
Utque acres concussit equos, utque impulit arma ;  
Extemplo turbati animi, simul omne tumultu  
Conjurat trepido Latium, sævitque Juventus  
Effera. Ductores primi Messapus et Ufens,  
Contemtorque deum Mezentius, undique cogunt  
Auxilia, et latos vastant cultoribus agros.  
Mittitur et magni Venulus Diomedis ad urbem,  
Qui petat auxilium, et, Latio consistere Teucros, 10  
Advectum Ænean classi, victosque penates  
Inferre, et fatis regem se dicere posci,  
Edoceat, multasque viro se adjungere gentes  
Dardanio, et late Latio increbrescere nomen.  
Quid struat his cœptis, quem, si fortuna sequatur,  
Eventum pugnæ cupiat, manifestius ipsi,  
Quam Turno regi, aut regi apparere Latino.  
Talia per Latium: quæ Laomedontius heros  
Cuncta videns magno curarum fluctuat æstu ;  
Atque animum nunc huc celerem, nunc dividit illuc, 20  
In partesque rapit varias, perque omnia versat.  
Sicut aquæ tremulum labris ubi lumen ahenis  
Sole repperctum, aut radiantis imagine Lunæ,  
Omnia pervolitat late loca, jamque sub auras

Erigitur, summique ferit laquearia tecti.  
 Nox erat, et terras animalia fessa per omnes  
 Alituum pecudumque genus sopor altus habebat :  
 Quum pater in ripa gelidique sub ætheris axe  
 Æneas, tristi turbatus pectora bello,  
 Procubuit, seramque dedit per membra quietem. 30  
 Huic deus ipse loci fluvio Tiberinus amœno  
 Populeas inter senior se attollere frondes  
 Visus ; eum tenuis glauco velabat amictu  
 Carbasus, et crines umbrosa tegebat arundo ;  
 Tum sic affari, et curas his demere dictis :

“O sate gente deum, Trojanam ex hostibus urbem  
 Qui revehis nobis, æternaque Pergama servas,  
 Expectate solo Laurenti arvisque Latinis,  
 Hic tibi certa domus, certi, ne absiste, penates ;  
 Neu belli terrere minis. Tumor omnis et iræ 40  
 Concessere deûm.

Jamque tibi, ne vana putes hæc fingere somnum,  
 Litoreis ingens inventa sub ilicibus sus,  
 Triginta capitum fetus enixa, jacebit ;  
 Alba, solo recubans, albi circum ubera nati.  
 Hic locus urbis erit, requies ea certa laborum :  
 Ex quo ter denis urbem redeuntibus annis  
 Ascanius clari condet cognominis Albam.  
 Haud incerta cano. Nunc qua ratione quod instat  
 Expedias victor, paucis, adverte, docebo. 50  
 Arcades his oris, genus a Pallante profectum,  
 Qui regem Evandrum comites, qui signa secuti,  
 Delegere locum, et posuere in montibus urbem,  
 Pallantis proavi de nomine Pallanteum :  
 Hi bellum assidue ducunt cum gente Latina ;  
 Hos castris adhibe socios, et fœdera junge.  
 Ipse ego te ripis et recto flumine ducam,  
 Adversum remis superes subvectus ut amnem.  
 Surge age, nate dea ; primisque cadentibus astris  
 Junoni fer rite preces, iramque minasque 60

Supplicibus supera votis. Mihi victor honorem  
 Persolves. Ego sum, pleno quem flumine cernis  
 Stringentem ripas, et pingua culta secantem,  
 Cæruleus Thybris, cœlo gratissimus amnis.  
 Hic mihi magna domus, celsis caput urbibus, exit."

Dixit, deinde lacu Fluvius se condidit alto,  
 Ima petens. Nox Ænean somnusque reliquit :  
 Surgit, et ætherii spectans orientia Solis  
 Lumina, rite cavis undam de flumine palmis  
 Sustulit, ac tales effundit ad æthera voces : 70  
 " Nymphæ, Laurentes Nymphæ, genus amnibus unde est,  
 Tuque, o Thybri tuo genitor cum flumine sancto,  
 Accipite Ænean, et tandem arcete periclis.  
 Quo te cumque lacus, miserantem incommoda nostra,  
 Fonte tenet, quocumque solo pulcherrimus exis ;  
 Semper honore meo, semper celebrabere donis,  
 Corniger Hesperidum fluvius regnator aquarum :  
 Adsis o tantum, et propius tua numina firmes."  
 Sic memorat, geminasque legit de classe biremes,  
 Remigioque aptat ; socios simul instruit armis. 80

Ecce autem subitum atque oculis mirabile monstrum,  
 Candida per silvam cum fetu concolor albo  
 Procubuit, viridique in litore conspicitur sus :  
 Quam pius Æneas tibi enim, tibi, maxima Juno,  
 Mactat, sacra ferens, et cum grege sistit ad aram.  
 Thybris ea fluvium, quam longa est, nocte tumentem  
 Leniit, et tacita refluens ita substitit unda,  
 Mitis ut in morem stagni placidæque paludis  
 Sterneret æquor aquis, remo ut luctamen abesset.  
 Ergo iter inceptum celerant ; rumore secundo 90  
 Labitur uncta vadis abies : mirantur et undæ,  
 Miratur nemus insuetum fulgentia longe.  
 Scuta virum fluvio, pictasque innare carinas.  
 Olli remigio noctemque diemque fatigant,  
 Et longos superant flexus, variisque teguntur  
 Arboribus, viridesque secant placido æquore silvas.

Sol medium cœli conscenderat igneus orbem,  
 Quum muros arcemque procul ac rara domorum  
 Tecta vident, quæ nunc Romana potentia cœlo  
 Æquavit; tum res inopes Evandrus habebat. 100  
 Ocius advertunt proras, urbique propinquant.

Forte die solemnem illo rex Arcas honorem  
 Amphitryoniadæ magno divisque ferebat  
 Ante urbem in luco. Pallas huic filius una,  
 Una omnes juvenum primi, pauperque senatus,  
 Thura dabant; tepidusque cruor fumabat ad aras.  
 Ut celsas videre rates, atque inter opacum  
 Allabi nemus, et tacitis incumbere remis:  
 Terrentur visu subito, cunctique relictis  
 Consurgunt mensis. Audax quos rumpere Pallas 110  
 Sacra vetat, raptoque volat telo obvius ipse;  
 Et procul e tumultu: "Juvenes, quæ causa subegit  
 Ignotas tentare vias? quo tenditis?" inquit.  
 "Qui genus? unde domo? pacemne huc fertis, an arma?"  
 Tum pater Æneas puppi sic fatur ab alta,  
 Paciferæque manu ramum prætendit olivæ:  
 "Trojugenas ac tela vides inimica Latinis;  
 Quos illi bello profugos egere superbo.  
 Evandrum petimus. Ferte hæc et dicite, lectos  
 Dardaniæ venisse duces, socia arma rogantes." 120

Obstupuit tanto percussus nomine Pallas:  
 "Egredere o quicumque es," ait, "coramque parentem  
 Alloquere, ac nostris succede penatibus hospes."  
 Excepitque manu, dextramque amplexus inhæsit.  
 Progressi subeunt luco, fluviumque relinquunt.  
 Tum regem Æneas dictis affatur amicis:  
 "Optime Grajugenum, cui me fortuna precari,  
 Et vitta comtos voluit prætendere ramos;  
 Non equidem extimui, Danaum quod ductor, et Arcas,  
 Quodque ab stirpe fores geminis conjunctus Atridis; 130  
 Sed mea me virtus, et sancta oracula divum,  
 Cognatique patres, tua terris didita fama,



Coniunxere tibi, et fatis egere volentem.  
 Dardanus, Iliacæ primus pater urbis et auctor,  
 Electra, ut Graii perhibent, Atlantide cretus,  
 Advehitur Teucros; Electram maximus Atlas  
 Edidit, ætherios humero qui sustinet orbes.  
 Vobis Mercurius pater est, quem candida Maia  
 Cyllenæ gelido conceptam vertice fudit;  
 At Maiam, auditis si quidquam credimus, Atlas, 140  
 Idem Atlas generat, cœli qui sidera tollit.  
 Sic genus amborum scindit se sanguine ab uno.  
 His fretus, non legatos, neque prima per artem  
 Tentamenta tui pepigi: me, me ipse, meumque  
 Objeci caput, et supplex ad limina veni.  
 Gens eadem, quæ te, crudeli Daunia bello  
 Insequitur; nos si pellant, nihil afore credunt,  
 Quin omnem Hesperiam penitus sua sub juga mittant,  
 Et mare, quod supra, teneant, quodque alluit infra.  
 Accipe, daque fidem. Sunt nobis fortia bello 150  
 Pectora, sunt animi, et rebus spectata Juventus.”  
 Dixerat Æneas. Ille os, oculosque loquentes  
 Jamdudum, et totum lustrabat lumine corpus.  
 Tum sic pauca refert: “ Ut te, fortissime Teucrum,  
 Accipio agnoscoque libens! ut verba parentis,  
 Et vocem Anchisæ magni vultumque recordor!  
 Nam memini Hesionæ visentem regna sororis  
 Laomedontiaden Priamum, Salamina petentem,  
 Protenus Arcadiæ gelidos invisere fines.  
 Tum mihi prima genas vestibat flore juventa: 160  
 Mirabarque duces Teucros, mirabar et ipsum  
 Laomedontiaden; sed cunctis altior ibat  
 Anchises. Mihi mens juvenali ardebat amore  
 Compellare virum, et dextræ conjungere dextram:  
 Accessi, et cupidus Pheneï sub mœnia duxi.  
 Ille mihi insignem pharetram Lyciasque sagittas  
 Discedens chlamydemque auro dedit intertextam,  
 Frenaque bina, meus quæ nunc habet, aurea, Pallas.

Ergo et, quam petitis, juncta est mihi fœdere dextra :  
 Et lux quum primum terris se crastina reddet, 170  
 Auxilio lætos dimittam, opibusque juvabo.  
 Interea sacra hæc, quando huc venistis amici,  
 Annua, quæ differre nefas, celebrate faventes  
 Nobiscum, et jam nunc sociorum assuescite mensis."

Hæc ubi dicta, dapes jubet et sublata reponi  
 Pocula, gramineoque viros locat ipse sedili ;  
 Præcipuumque toro et villosi pelle leonis  
 Accipit Ænean, solioque invitat acerno.  
 Tum lecti juvenes certatim aræque sacerdos  
 Viscera tosta ferunt taurorum, onerantque canistris 180  
 Dona laboratæ Cereris, Bacchumque ministrant.  
 Vescitur Æneas, simul et Trojana juvenus,  
 Perpetui tergo bovis, et lustralibus extis.

Postquam exempta fames, et amor compressus edendi,  
 Rex Evandrus ait : " Non hæc solemnia nobis,  
 Has ex more dapes, hanc tanti numinis aram  
 Vana superstitio veterumque ignara deorum  
 Imposuit : sævis, hospes Trojane, periclis  
 Servati facimus, meritosque novamus honores.  
 Jam primum saxis suspensam hanc aspice rupem : 190  
 Disjectæ procul ut moles, desertaque montis  
 Stat domus, et scopuli ingentem traxere ruinam.  
 Hic spelunca fuit, vasto submota recessu,  
 Semihominis Caci facies quam dira tenebat,  
 Solis inaccessam radiis ; semperque recenti  
 Cæde tepebat humus ; foribusque affixa superbis  
 Ora virum tristi pendebant pallida tabo.  
 Huic monstro Vulcanus erat pater : illius atros  
 Ore vomens ignes, magna se mole ferebat.  
 Attulit et nobis aliquando optantibus ætas 200  
 Auxilium adventumque dei. Nam maximus ultor,  
 Tergemini nece Geryonæ spoliisque superbus,  
 Alcides aderat, taurosque hac victor agebat  
 Ingentes ; vallemque boves amnemque tenebant.

At furiis Caci mens effera, ne quid inausum  
 Aut intractatum scelerisve dolive fuisset,  
 Quatuor a stabulis præstanti corpore tauros  
 Avertit, totidem forma superante juvencas.  
 Atque hos, ne qua forent pedibus vestigia rectis,  
 Cauda in speluncam tractos, versisque viarum 210  
 Indiciis raptos, saxo occultabat opaco.  
 Quærenti nulla ad speluncam signa ferebant.  
 Interea, quum jam stabulis saturata moveret  
 Amphitryoniades armenta, abitumque pararet,  
 Discessu mugire boves, atque omne querelis  
 Impleri nemus, et colles clamore relinqui.  
 Reddidit una boum vocem, vastoque sub antro  
 Mugiit, et Caci spem custodita fefellit.  
 Hic vero Alcidiæ furiis exarserat atro  
 Felle dolor: rapit arma manu nodisque gravatum 220  
 Robur; et ætherii cursu petit ardua montis.  
 Tum primum nostri Cacum videre timentem  
 Turbatumque oculis. Fugit ilicet ocior euro,  
 Speluncamque petit; pedibus timor addidit alas.  
 Ut sese inclusit, ruptisque immane catenis  
 Dejecit saxum, ferro quod et arte paterna  
 Pendebat, fultosque emuniit objice postes:  
 Ecce furens animis aderat Tirynthius; omnemque  
 Accessum lustrans huc ora ferebat et illuc,  
 Dentibus infrendens. Ter totum fervidus ira 230  
 Lustrat Aventini montem; ter saxeâ tentat  
 Limina nequidquam; ter fessus valle resedit.  
 Stabat acuta silex, præcisis undique saxis  
 Speluncæ dorso insurgens, altissima visu;  
 Dirarum nidis domus opportuna volucrum.  
 Hanc, ut prona jugo lævum incumbibat ad amnem,  
 Dexter in adversum nitens concussit, et imis  
 Avulsam solvit radicibus; inde repente  
 Impulit: impulsu quo maximus insonat æther;  
 Dissultant ripæ, refluitque exterritus amnis. 240

At specus et Caci detecta apparuit ingens  
 Regia, et umbrosæ penitus patuere cavernæ:  
 Non secus ac si qua penitus vi terra dehiscens  
 Infernas reseret sedes, et regna recludat  
 Pallida, dis invisâ; superque immane barathrum  
 Cernatur, trepidentque immisso lumine manes.  
 Ergo insperata deprensus in luce repente,  
 Inclusumque cavo saxo, atque insueta rudentem,  
 Desuper Alcides telis premit, omniaque arma  
 Advocat, et ramis vastisque molaribus instat. 250  
 Ille autem, neque enim fuga jam super ulla pericli,  
 Faucibus ingentem fumum, mirabile dictu,  
 Evomit, involvitque domum caligine cæca,  
 Prospectum eripiens oculis; glomeratque sub antro  
 Fumiferam noctem commixtis igne tenebris.  
 Non tulit Alcides animis, seque ipse per ignem  
 Præcipiti injecit saltu, qua plurimus undam  
 Fumus agit, nebulaque ingens specus æstuat atra.  
 Hic Cacum in tenebris incendia vana vomentem  
 Corripit in nodum complexus, et angit inhærens 260  
 Elisos oculos, et siccum sanguine guttur.  
 Panditur extemplo foribus domus atra revulsis,  
 Abstractæque boves abjuratæque rapinæ  
 Cœlo ostenduntur, pedibusque informe cadaver  
 Protrahitur. Nequeunt expleri corda tuendo  
 Terribiles oculos, vultum, villosaque sætis  
 Pectora semiferi, atque extinctos faucibus ignes.  
 Ex illo celebratus honos, lætique minores  
 Servavere diem, primusque Potitius auctor,  
 Et domus Herculei custos Pinaria sacri. 270  
 [Hanc aram luco statuit, quæ Maxima semper  
 Dicetur nobis, et erit quæ maxima semper.]  
 Quare agite, o juvenes, tantarum in munere laudum  
 Cingite fronde comas, et pocula porgite dextris,  
 Communemque vocate deum, et date vina volentes."  
 Dixerat: Herculeæ bicolor quum populus umbra

Velavitque comas, foliisque innexa pependit,  
Et sacer implevit dextram scyphus. Ocius omnes  
In mensam læti libant, divosque precantur.

Devezo interea propior fit Vesper Olympo. 280

Jamque sacerdotes primusque Potitius ibant  
Pellibus in morem cincti, flammasque ferebant.

[Instaurant epulas, et mensæ grata secundæ  
Dona ferunt, cumulantque oneratis lancibus aras.]

Tum Salii ad cantus incensa altaria circum

Populeis adsunt evincti tempora ramis ;

Hic juvenum chorus, ille senum, qui carmine laudes

Herculeas et facta ferunt : ut prima novercæ

Monstra manu geminosque premens eliserit angues ;

Ut bello egregias idem disjecerit urbes, 290

Trojamque Œchaliamque ; ut duros mille labores

Rege sub Eurystheo, fatis Junonis iniquæ,

Pertulerit. "Tu nubigenas, invicte, bimembres

Hylæumque Pholumque manu tu Cresia mactas

Prodigia, et vastum Nemea sub rupe leonem.

Te Stygii tremuere lacus, te janitor Orci

Ossa super recubans antro semesa cruento ;

Nec te ullæ facies, non terruit ipse Typhœus

Arduus arma tenens ; non te rationis egentem

Lernæus turba capitem circumstetit anguis. 300

Salve, vera Jovis proles, decus addite divis ;

Et nos et tua dexter adi pede sacra sêcundo."

Talia carminibus celebrant : super omnia Caci

Speluncam adjiciunt, spirantemque ignibus ipsum.

Consonat omne nemus strepitu, collesque resultant.

Exin se cuncti divinis rebus ad urbem

Perfectis referunt. Ibat rex obsitus ævo,

Et comitem Ænean juxta natumque tenebat

Ingrediens, varioque viam sermone levabat.

Miratur, facilesque oculos fert omnia circum 310

Æneas, capiturque locis ; et singula lætus

Exquirisque auditque virum monumenta priorum.

Tum rex Evandrus, Romanæ conditor arcis :  
 "Hæc nemora indigenæ Fauni Nymphæque tenebant,  
 Gensque virum truncis et duro robore nata :  
 Queis neque mos neque cultus erat ; nec jungere tauros,  
 Aut componere opes norant, aut parcere parto :  
 Sed ramî atque asper victu venatus alebat.  
 Primus ab ætherio venit Saturnus Olympo,  
 Arma Jovis fugiens et regnis exsul ademptis. 320  
 Is genus indocile ac dispersum montibus altis  
 Composuit, legesque dedit, Latiumque vocari  
 Maluit, his quoniam latuisset tutus in oris.  
 Aurea quæ perhibent, illo sub rege fuerunt  
 Sæcula : sic placida populos in pace regebat ;  
 Deterior donec paulatim ac decolor ætas  
 Et belli rabies et amor successit habendi.  
 Tum manus Ausonia et gentes venere Sicanæ ;  
 Sæpius et nomen posuit Saturnia tellus.  
 Tum reges, asperque immani corpore Thybris, 330  
 A quo post Itali fluvium cognomine Thybrim  
 Diximus ; amisit verum vetus Albula nomen.  
 Me pulsum patria, pelagique extrema sequentem,  
 Fortuna omnipotens et ineluctabile fatum  
 His posuere locis ; matrisque egere tremenda  
 Carmentis nymphæ monita, et deus auctor Apollo.  
 Vix ea dicta ; dehinc progressus monstrat et aram,  
 Et Carmentalem Romano nomine portam  
 Quam memorant, nymphæ priscum Carmentis honorem  
 Vatis fatidicæ : cecinit quæ prima futuros 340  
 Æneadas magnos et nobile Pallanteum.  
 Hinc lucum ingentem, quem Romulus acer Asylum  
 Retulit, et gelida monstrat sub rupe Lupercal,  
 Parrhasio dictum Panos de more Lycæi.  
 Nec non et sacri monstrat nemus Argileti,  
 Testaturque locum, et letum docet hospitibus Argi.  
 Hinc ad Tarpeiam sedem et Capitolia ducit,  
 Aurea nunc, olim silvestribus horrida dumis.

Jam tum religio pavidos terrebat agrestes  
 Dira loci ; jam tum silvam saxumque tremebant. 350  
 Hoc nemus, hunc, inquit, frondoso vertice collem—  
 Quis deus, incertum est—habitat deus ; Arcades ipsum  
 Credunt se vidisse Jovem, quum sæpe nigrantem  
 Ægida concuteret dextra nimbosque cieret.  
 Hæc duo præterea disjectis oppida muris,  
 Reliquias veterumque vides monumenta virorum.  
 Hanc Janus pater, hanc Saturnus condidit arcem :  
 Janiculum huic, illi fuerat Saturnia nomen.”  
 Talibus inter se dictis ad tecta subibant  
 Pauperis Evandri, passimque armenta videbant 360  
 Romanoque foro et lautis mugire Carinis.  
 Ut ventum ad sedes, “ Hæc,” inquit, “ limina victor  
 Alcides subiit ; hæc illum regia cepit.  
 Aude, hospes, contemnere opes, et te quoque dignum  
 Finge deo : rebusque veni non asper egenis.”  
 Dixit, et angusti subter fastigia tecti  
 Ingentem Ænean duxit, stratisque locavit  
 Effultum foliis et pelle Libystidis ursæ.  
 Nox ruit, et fuscis tellurem amplectitur alis.  
 At Venus haud animo nequidquam exterrita mater, 370  
 Laurentumque minis et duro mota tumultu,  
 Vulcanum alloquitur, thalamoque hæc conjugis aureo  
 Incipit, et dictis divinum aspirat amorem :  
 “ Dum bello Argolici vastabant Pergama reges  
 Debita casurasque inimicis ignibus arces,  
 Non ullum auxilium miseris, non arma rogavi  
 Artis opisque tuæ ; nec te, carissime conjux,  
 Incassumve tuos volui exercere labores :  
 Quamvis et Priami deberem plurima natis,  
 Et durum Æneæ flevissem sæpe laborem. 380  
 Nunc Jovis imperiis Rutulorum constitit oris :  
 Ergo eadem supplex venio, et sanctum mihi numen  
 Arma rogo, genetrix nato. Te filia Nerei,  
 Te potuit lacrimis Tithonia flectere conjux.

Aspice, qui coëant populi, quæ mœnia clausis  
 Ferrum acuant portis in me excidiumque meorum."  
 Dixerat ; et niveis hinc atque hinc diva lacertis  
 Cunctantem amplexu molli fovet. Ille repente  
 Accepit solitam flammam ; notusque medullas  
 Intravit calor, et labefacta per ossa cucurrit :  
 Non secus atque olim, tonitru quum rupta corusco  
 Ignea rima micans percurrit lumine nimbos.  
 Sensit læta dolis et formæ conscia conjux.  
 Tum pater æterno fatur devinctus amore :  
 " Quid causas petis ex alto ? fiducia cessit  
 Quo tibi, diva, mei ? Similis si cura fuisset,  
 Tum quoque fas nobis Teucros armare fuisset ;  
 Nec Pater omnipotens Trojam, nec fata vetabant  
 Stare, decemque alios Priamum superesse per annos.  
 Et nunc, si bellare paras, atque hæc tibi mens est,  
 Quidquid in arte mea possum promittere curæ,  
 Quod fieri ferro liquidove potest electro,  
 Quantum ignes animæque valent ; absiste precando  
 Viribus indubitare tuis." Ea verba locutus  
 Optatos dedit amplexus, placidumque petivit  
 Conjugis infusus gremio per membra soporem.

390

400

Inde ubi prima quies medio jam noctis abactæ  
 Curriculo expulerat somnum ; quum femina primum,  
 Cui tolerare colo vitam tenuique Minerva  
 Impositum, cinerem et sopitos suscitât ignes  
 Noctem addens operi ; famulasque ad lumina longo  
 Exercet penso, castum ut servare cubile  
 Conjugis, et possit parvos educere natos :  
 Haud secus ignipotens nec tempore segnior illo  
 Mollibus e stratis opera ad fabrilia surgit.  
 Insula Sicaniùm juxta latus Æoliamque  
 Erigitur Liparen, fumantibus ardua saxis :  
 Quam subter specus et Cyclopum exesa caminis  
 Antra Ætnæa tonant, validique incudibus ictus  
 Auditi referunt gemitum, striduntque cavernis

410

420



Stricturæ Chalybum, et fornacibus ignis anhelat ;  
 Vulcani domus, et Vulcania nomine tellus.  
 Hoc tunc ignipotens cœlo descendit ab alto.  
 Ferrum exercebant vasto Cyclopes in antro,  
 Brontesque, Steropesque, et nudus membra Pyracmon.  
 His informatum manibus jam parte polita  
 Fulmen erat ; toto genitor quæ plurima cœlo  
 Deiecit in terras ; pars imperfecta manebat.  
 Tres imbris torti radios, tres nubis aquosæ  
 Addiderant, rutili tres ignis et alitis austri. 430  
 Fulgores nunc horridos, sonitumque, metumque  
 Miscebant operi, flammisque sequacibus iras.  
 Parte alia Marti currumque rotasque volucres  
 Instabant, quibus ille viros, quibus excitat urbes ;  
 Ægidaque horriferam, turbatæ Palladis arma,  
 Certatim squamis serpentum auroque polibant,  
 Connexosque angues, ipsamque in pectore divæ  
 Gorgona, desecto vertentem lumina collo.  
 " Tollite cuncta," inquit, " cœptosque auferte labores,  
 Ætnæi Cyclopes, et huc advertite mentem : 440  
 Arma acri facienda viro. Nunc viribus usus,  
 Nunc manibus rapidis, omni nunc arte magistra.  
 Præcipitate moras." Nec plura effatus ; et illi  
 Ocius incubuere omnes, pariterque laborem  
 Sortiti : fluit æs rivis, aurique metallum ;  
 Vulnificusque chalybs vasta fornace liquescit.  
 Ingentem clipeum informant, unum omnia contra  
 Tela Latinorum ; septenosque orbibus orbes  
 Impediunt. Alii ventosis follibus auras  
 Accipiunt redduntque ; alii stridentia tingunt 450  
 Æra lacu : gemit impositis incudibus antrum.  
 Illi inter sese multa vi brachia tollunt  
 In numerum, versantque tenaci forcipe massam.  
 Hæc pater Æoliis properat dum Lemnius oris,  
 Evandrum ex humili tecto lux suscitât alma,  
 Et matutini volucrum sub culmine cantus.

Consurgit senior, tunicaque inducitur artus,  
 Et Tyrrhena pedum circumdat vincula plantis :  
 Tum lateri atque humeris Tegearum subligat ensem,  
 Demissa ab læva pantheræ terga retorquens. 460  
 Nec non et gemini custodes limine ab alto  
 Præcedunt gressumque canes comitantur herilem.  
 Hospitis Æneæ sedem et secreta petebat  
 Sermonum memor et promissi muneris heros :  
 Nec minus Æneas se matutinus agebat.  
 Filius huic Pallas, illi comes ibat Achates.  
 Congressi jungunt dextras, mediisque residunt  
 Ædibus, et licito tandem sermone fruuntur.  
 Rex prior hæc :  
 "Maxime Teucrorum ductor, quo sospite nunquam 470  
 Res equidem Trojæ victas aut regna fatebor,  
 Nobis ad belli auxilium pro nomine tanto  
 Exiguæ vires. Hinc Tusco claudimur amni,  
 Hinc Rutulus premit, et murum circumsonat armis.  
 Sed tibi ego ingentes populos opulentaque regnis  
 Jungere castra paro : quam fors inopina salutem  
 Ostentat. Fatis huc te poscentibus affers.  
 Haud procul hinc saxo incolitur fundata vetusto  
 Urbis Agyllinæ sedes : ubi Lydia quondam  
 Gens, bello præclara, jugis insedit Etruscis. 480  
 Hanc multos florentem annos rex deinde superbo  
 Imperio et sævis tenuit Mezentius armis.  
 Quid memorem infandas cædes ! quid facta tyranni  
 Effera ! Di capiti ipsius generique reservent !  
 Mortua quin etiam jungebat corpora vivis,  
 Componens manibusque manus atque oribus ora,  
 Tormenti genus ! et sanie taboque fluentes  
 Complexu in misero longa sic morte necabat.  
 At fessi tandem cives infanda furentem  
 Armati circumstant ipsumque domumque ; 490  
 Obtruncant socios, ignem ad fastigia jactant.  
 Ille inter cædes Rutulorum elapsus in agros

Confugere, et Turni defendier hospitibus armis.  
 Ergo omnis furiis surrexit Etruria justis ;  
 Regem ad supplicium præsentibus Marte repossunt.  
 His ego te, Ænea, ductorem millibus addam.  
 Toto namque fremunt condensæ litore puppes,  
 Signaque ferre jubent ; retinet longævus haruspex  
 Fata canens : O Mæoniæ delecta juvenus,  
 Flos veterum virtusque virum, quos justus in hostem 500  
 Fert dolor, et merita accendit Mezentius ira,  
 Nulli fas Italo tantam subjungere gentem :  
 Externos optate duces. Tum Etrusca resedit  
 Hoc acies campo, monitis exterrita divum.  
 Ipse oratores ad me regnique coronam  
 Cum sceptro misit, mandatque insignia Tarchon,  
 Succedam castris, Tyrrhenaque regna capessam.  
 Sed mihi tarda gelu sæclisque effeta senectus  
 Invidet imperium, seræque ad fortia vires.  
 Natum exhortarer, ni mixtus matre Sabella 510  
 Hinc partem patriæ traheret. Tu, cujus et annis  
 Et generi fata indulgent, quem numina possunt,  
 Ingredere, o Teucrum atque Italum fortissime ductor.  
 Hunc tibi præterea, spes et solatia nostri,  
 Pallanta adjungam ; sub te tolerare magistro  
 Militiam et grave Martis opus, tua cernere facta  
 Assuescat, primis et te miretur ab annis.  
 Arcadas huic equites bis centum, robora pubis  
 Lecta, dabo ; totidemque suo tibi nomine Pallas."  
 Vix ea fatus erat ; defixique ora tenebant 520  
 Æneas Anchisiades et fidus Achates,  
 Multaque dura suo tristi cum corde putabant :  
 Ni signum cœlo Cytherea dedisset aperto.  
 Namque improvise vibratus ab æthere fulgor  
 Cum sonitu venit, et ruere omnia visa repente,  
 Tyrrhenusque tubæ mugire per æthera clangor.  
 Suspiciunt : iterum atque iterum fragor increpat ingens.  
 Arma inter nubem cœli in regione serena

Per sudum rutilare vident, et pulsa tonare.  
 Obstupuere animis alii ; sed Troïus heros 530  
 Agnovit sonitum et divæ promissa parentis.  
 Tum memorat : " Ne vero, hospes, ne quære profecto,  
 Quem casum portenta ferant ; ego poscor Olympo.  
 Hoc signum cecinit missuram diva creatrix,  
 Si bellum ingrueret ; Vulcaniaque arma per auras  
 Laturam auxilio.

Heu quantæ miseris cædes Laurentibus instant !  
 Quas pœnas mihi, Turne, dabis ! quam multa sub undas  
 Scuta virum galeasque et fortia corpora volves,  
 Thybri pater ! Poscant acies, et fœdera rumpant." 540

Hæc ubi dicta dedit, solio se tollit ab alto ;  
 Et primum Herculeis sopitas ignibus aras  
 Excitat, hesternumque Larem parvosque penates  
 Lætus adit ; mactant lectas de more bidentes  
 Evandrus pariter, pariter Trojana juvenus.  
 Post hinc ad naves graditur, sociosque revisit :  
 Quorum de numero, qui sese in bella sequantur,  
 Præstantes virtute legit ; pars cetera prona  
 Fertur aqua, segnisque secundo defluit amni,  
 Nuncia ventura Ascanio rerumque patrisque. 550  
 Dantur equi Teucris Tyrrhena petentibus arva :  
 Ducunt exsortem Æneæ, quem fulva leonis  
 Pellis obit totum, præfulgens unguibus aureis.

Fama volat parvam subito vulgata per urbem,  
 Ocius ire equites Tyrrheni ad limina regis.  
 Vota metu duplicant matres, propiusque periclo  
 It timor, et major Martis jam apparet imago.  
 Tum pater Evandrus, dextram complexus euntis,  
 Hæret, inexpletum lacrimans, ac talia fatur :  
 " O mihi præteritos referat si Jupiter annos ! 560  
 Qualis eram, quum primam aciem Præneste sub ipsa  
 Stravi scutorumque incendi victor acervos,  
 Et regem hac Herilum dextra sub Tartara misi :  
 Nascenti cui tres animas Feronia mater,

Horrendum dictu, dederat, terna arma movenda ;  
 Ter leto sternendus erat ; cui tunc tamen omnes  
 Abstulit hæc animas dextra, et totidem exuit armis.  
 Non ego nunc dulci amplexu divellerer usquam.

Nate, tuo ; neque finitimus Mezentius usquam  
 Huic capiti insultans, tot ferro sæva dedisset 570  
 Funera, tam multis viduasset civibus urbem.

At vos, o superi, et divum tu maxime rector  
 Jupiter, Arcadii, quæso, miserescite regis,  
 Et patrias audite preces : Si numina vestra  
 Incolumem Pallanta mihi, si fata reservant,  
 Si visurus eum vivo, et venturus in unum,  
 Vitam oro ; patiar quemvis durare laborem :  
 Sin aliquem infandum casum, Fortuna, minaris,  
 Nunc, o nunc liceat crudelem abrumperè vitam,  
 Dum curæ ambiguæ, dum spes incerta futuri, 580

Dum te, care puer, mea sera et sola voluptas,  
 Complexu teneo ; gravior ne nuncius aures  
 Vulneret." Hæc genitor digressu dicta supremo  
 Fundebat : famuli collapsum in tecta ferebant.

Jamque adeo exierat portis equitatus apertis ;  
 Æneas inter primos et fidus Achates ;  
 Inde alii Trojæ proceres ; ipse agmine Pallas  
 In medio, chlamyde et pictis conspectus in armis :  
 Qualis ubi oceani perfusus Lucifer unda,  
 Quem Venus ante alios astrorum diligit ignes, 590  
 Extulit os sacrum cœlo, tenebrasque resolvit.

Stant pavidæ in muris matres, oculisque sequuntur  
 Pulveream nubem et fulgentes ære catervas.  
 Olli per dumos, qua proxima meta viarum,  
 Armati tendunt. It clamor, et agmine facto  
 Quadrupedante putrem sonitu quatit ungula campum.  
 Est ingens gelidum lucus prope Cæritis amnem,  
 Religione patrum late sacer ; undique colles  
 Inclusere cavi et nigra nemus abiete cingunt.  
 Silvano fama est veteres sacrasse Pelasgos, 600

Arvorum pecorisque deo, lucumque diemque,  
 Qui primi fines aliquando habuere Latinos.  
 Haud procul hinc Tarcho et Tyrrheni tuta tenebant  
 Castra locis, celsoque omnis de colle videri  
 Jam poterat legio, et latis tenebat in arvis.  
 Huc pater Æneas et bello lecta juvenus  
 Succedunt, fessique et equos et corpora curant.

At Venus ætherios inter dea candida nimbos  
 Dona ferens aderat ; natumque in valle reducta  
 Ut procul egelido secretum flumine vidit, 610  
 Talibus affata est dictis, seque obtulit ultro :  
 “En perfecta mei promissa conjugis arte  
 Munera ; ne mox aut Laurentes, nate, superbos,  
 Aut acrem dubites in prælia poscere Turnum.”  
 Dixit, et amplexus nati Cytherca petivit ;  
 Arma sub adversa posuit radiantia quercu.  
 Ille deæ donis et tanto lætus honore  
 Expleri nequit, atque oculos per singula volvit,  
 Miraturque, interque manus et brachia versat  
 Terribilem cristis galeam flammisque vomentem, 620  
 Fatiferumque ense, lorica ex ære rigentem,  
 Sanguineam, ingentem ; qualis quum cærule nubes  
 Solis inardescit radiis longeque refulget ;  
 Tum leves ocreas electro auroque recocto,  
 Hastamque, et clipei non enarrabile textum.  
 Illic res Italas Romanorumque triumphos,  
 Haud vatum ignarus venturique inscius ævi,  
 Fecerat ignipotens ; illic genus omne futuræ  
 Stirpis ab Ascanio, pugnataque in ordine bella.  
 Fecerat et viridi fetam Mavortis in antro 630  
 Procubuisse lupam : geminos huic ubera circum  
 Ludere pendentes pueros, et lambere matrem  
 Impavidos ; illam tereti cervice reflexam  
 Mulcere alternos, et corpora fingere lingua.  
 Nec procul hinc Romam, et raptas sine more Sabinas  
 Consessu cavæ, magnis Circensibus actis,

Addiderat, subitoque novum consurgere bellum  
 Romulidis, Tatioque seni, Curibusque severis.  
 Post idem, inter se posito certamine, reges  
 Armati Jovis ante aram paterasque tenentes 640  
 Stabant, et cæsa jungebant fœdera porca.  
 Haud procul inde citæ Metum in diversa quadrigæ  
 Distulerant, at tu dictis, Albane, maneres !  
 Raptabatque viri mendacis viscera Tullus  
 Per silvam, et sparsi rorabant sanguine vepres.  
 Nec non Tarquinius ejectum Porsena jubebat  
 Accipere, ingentique urbem obsidione premebat ;  
 Æneadæ in ferrum pro libertate ruebant.  
 Illum indignanti similem, similemque minanti  
 Aspiceres ; pontem auderet quod vellere Cocles, 650  
 Et fluvium vinclis innaret Clœlia ruptis.  
 In summo custos Tarpeiæ Manlius arcis  
 Stabat pro templo, et Capitolia celsa tenebat,  
 [Romuleoque recens horrebat regia culmo.]  
 Atque hic auratis volitans argenteus anser  
 Porticibus, Gallos in limine adesse, canebat ;  
 Galli per dumos aderant, arcemque tenebant,  
 Defensi tenebris et dono noctis opacæ :  
 Aurea cæsaries ollis, atque aurea vestis ;  
 Virgatis lucent sagulis ; tum lactea colla 660  
 Auro innectuntur ; duo quisque Alpina coruscant  
 Gæsa manu, scutis protecti corpora longis.  
 Hic exsultantes Salios, nudosque Lupercos,  
 Lanigerosque apices, et lapsa ancilia cœlo  
 Extuderat ; castæ ducebant sacra per urbem  
 Pilentis matres in mollibus. Hinc procul addit  
 Tartareas etiam sedes, alta ostia Ditis,  
 Et scelerum pœnas, et te, Catilina, minaci  
 Pendentem scopulo, Furiarumque ora trementem,  
 Secretosque pios ; his dantem jura Catonem. 670  
 Hæc inter tumidi late maris ibat imago  
 Aurea, sed fluctu spumabant cærula cano ;

Et circum argento clari delphines in orbem  
 Æquora verrebant caudis, æstumque secabant.  
 In medio classes æratas, Actia bella,  
 Cernere erat; totumque instructo Marte videres  
 Fervere Leucaten, auroque effulgere fluctus.  
 Hinc Augustus agens Italos in prœlia Cæsar  
 Cum patribus, populoque, penatibus et magnis dis,  
 Stans celsa in puppi: geminas cui tempora flammæ 680  
 Lætæ vomunt, patriumque aperitur vertice sidus.  
 Parte alia ventis et dis Agrippa secundis  
 Arduus agmen agens: cui, belli insigne superbum,  
 Tempora navali fulgent rostrata corona.  
 Hinc ope barbarica variisque Antonius armis  
 Victor ab Auroræ populis et litore rubro  
 Ægyptum viresque Orientis et ultima secum  
 Bactra vehit; sequiturque, nefas! Ægyptia conjux.  
 Una omnes ruere, ac totum spumare, reductis  
 Convulsum remis rostrisque tridentibus, æquor. 690  
 Alta petunt: pelago credas innare revulsas  
 Cycladas, aut montes concurrere montibus altos:  
 Tanta mole viri turritis puppibus instant.  
 Stuppea flamma manu telisque volatile ferrum  
 Spargitur; arva nova Neptunia cæde rubescunt.  
 Regina in mediis patrio vocat agmina sistro;  
 Necdum etiam geminos a tergo respicit angues.  
 Omnigenumque deum monstra et latrator Anubis  
 Contra Neptunum et Venerem contraque Minervam  
 Tela tenent. Sævitur medio in certamine Mavors 700  
 Cælatus ferro, tristesque ex æthere Diræ;  
 Et scissa gaudens vadit Discordia palla:  
 Quam cum sanguineo sequitur Bellona flagello.  
 Actius hæc cernens arcum intendebat Apollo  
 Desuper: omnis eo terrore Ægyptus et Indi,  
 Omnis Arabs, omnes vertebant terga Sabæi.  
 Ipsa videbatur ventis regina vocatis  
 Vela dare, et laxos jam jamque immittere funes.



Illam inter cædes pallentem morte futura  
Fecerat ignipotens undis et Iapyge ferri ; 710  
Contra autem magno mærentem corpore Nilum,  
Pandentemque sinus, et tota veste vocantem  
Cæruleum in gremium latebrosaue flumina victos.  
At Cæsar, triplici invectus Romana triumpho  
Mœnia, dis Italis votum immortale sacrabat,  
Maxima tercentum totam delubra per Urbem.  
Lætitia ludisque viæ plausuque fremebant ;  
Omnibus in templis matrum chorus, omnibus aræ ;  
Ante aras terram cæsi stravere juvenci.  
Ipse sedens niveo candentis limine Phœbi 720  
Dona recognoscit populorum, aptatque superbis  
Postibus ; incedunt victæ longo ordine gentes,  
Quam variæ linguis, habitu tam vestis et armis.  
Hic Nomadum genus et discinctos Mulciber Afros,  
Hic Lelegas Carasque sagittiferosque Gelonos  
Finxerat : Euphrates ibat jam mollior undis,  
Extremique hominum Morini, Rhenusque bicornis ;  
Indomitique Dahæ, et pontem indignatus Araxes.  
Talia per clipeum Vulcani dona parentis  
Miratur, rerumque ignarus imagine gaudet, 730  
Attollens humero famamque et fata nepotum.

P. VIRGILII MARONIS

Æ N E I D O S

LIBER NONUS.

~~~~~

Atque ea diversa penitus dum parte geruntur,  
Irim de cœlo misit Saturnia Juno  
Audacem ad Turnum. Luco tum forte parentis  
Pilumni Turnus sacrata valle sedebat.  
Ad quem sic roscō Thaumantias ore locuta est :  
“ Turne, quod optanti divum promittere nemo  
Auderet, volvenda dies en attulit ultro.  
Æneas, urbe et sociis et classe relicta,  
Sceptra Palatini sedemque petivit Evandri  
Nec satis : extremas Corythi penetravit ad urbes, 10  
Lydorumque manum, collectos armat agrestes.  
Quid dubitas ? nunc tempus equos, nunc poscere currus.  
Rumpe moras omnes, et turbata arripe castra.”  
Dixit, et in cœlum paribus se sustulit alis ;  
Ingentemque fuga secuit sub nubibus arcum.  
Agnovit juvenis, duplicesque ad sidera palmas  
Sustulit, et tali fugientem est voce secutus :  
“ Iri, decus cœli, quis te mihi nubibus actam  
Detulit in terras ? unde hæc tam clara repente 20  
Tempestas ? medium video discedere cœlum,  
Palantesque polo stellas. Sequor omina tanta,  
Quisquis in arma vocas.” Et sic effatus ad undam  
Processit summoque hausit de gurgite lymphas,  
Multa deos orans, oneravitque æthera votis.  
Jamque omnis campis exercitus ibat apertis,

Dives equum, dives pictaï vestis et auri.  
 Messapus primas acies, postrema coërcent  
 Tyrrhidæ juvenes, medio dux agmine Turnus  
 [Vertitur arma tenens, et toto vertice supra est :]  
 Ceu septem surgens sedatis amnibus altus 30  
 Per tacitum Ganges, aut pingui flumine Nilus  
 Quum refluit campis et jam se condidit alveo.  
 Hic subitam nigro glomerari pulvere nubem  
 Prospiciunt Teucri, ac tenebras insurgere campis.  
 Primus ab adversa conclamat mole Caiçus :  
 " Quis globus, o cives, caligine volvitur atra !  
 Ferte citi ferrum, date tela, scandite muros :  
 Hostis adest, eja." Ingenti clamore per omnes  
 Condunt se Teucri portas, et moenia complent.  
 Namque ita discedens præceperat optimus armis 40  
 Æneas : Si qua interea fortuna fuisset,  
 Neu struere auderent aciem, neu credere campo ;  
 Castra modo et tutos servarent aggere muros.  
 Ergo, etsi conferre manum pudor iraque monstrat,  
 Objiciunt portas tamen, et præcepta facessunt,  
 Armatique cavis expectant turribus hostem.  
 Turnus, ut ante volans tardum præcesserat agmen,  
 Viginti lectis equitum comitatus et urbi  
 Improvisus adest : maculis quem Thracius albis  
 Portat equus, cristaque tegit galea aurea rubra. 50  
 " Ecquis erit mecum, juvenes ? qui primus in hostem ?  
 En," ait. Et jaculum attorquens emittit in auras,  
 Principium pugnae, et campo sese arduus infert.  
 Clamore excipiunt socii, fremituque sequuntur  
 Horrisono ; Teucrum mirantur inertia corda :  
 Non æquo dare se campo, non obvia ferre  
 Arma viros, sed castra fovere. Huc turbidus atque huc  
 Lustrat equo muros, aditumque per avia quaerit.  
 Ac veluti pleno lupus insidiatus ovili  
 Quum fremit ad caulas, ventos perpessus et imbres, 60  
 Nocte super media ; tuti sub matribus agni

Balatum exercent : ille asper et improbus, ira  
 Sævit in absentes ; collecta fatigat edendi  
 Ex longo rabies, et siccæ sanguine fauces.  
 Haud aliter Rutulo, muros et castra tuenti,  
 Ignescunt iræ ; duris dolor ossibus ardet ;  
 Qua tentet ratione aditus, et quæ via clausos  
 Excutiat Teucros vallo, atque effundat in æquor.  
 Classem, quæ lateri castrorum adjuncta latebat,  
 Aggeribus septam circum et fluvialibus undis,  
 Invadit ; sociosque incendia poscit ovantes ;  
 Atque manum pinu flagranti fervidus implet.  
 Tum vero incumbunt ; urget præsentia Turni ;  
 Atque omnis facibus pubes accingitur atris.  
 Diripuerunt focos ; piceum fert fumida lumen  
 Tæda, et commixtam Vulcanus ad astra favillam.

70

Quis deus, o Musæ, tam sæva incendia Teucris  
 Avertit ? tantos ratibus quis depulit ignes ?

Dicite. Prisca fides facta, sed fama perennis.

Tempore quo primum Phrygia formabat in Ida

80

Æneas classem, et pelagi petere alta parabat,

Ipsa deum fertur genetrix Berecynthia magnum

Vocibus his affata Jovem : " Da, nate, petenti,

Quod tua cara parens domito te poscit Olympo.

Pinea silva mihi multos dilecta per annos :

[Lucus in arce fuit summa, quo sacra ferebant,

Nigranti picea trabibusque obscurus acernis :]

Has ego Dardanio juveni, quum classis egeret,

Læta dedi ; nunc sollicitam timor anxius urget.

Solve metus, atque hoc precibus sine posse parentem, 90

Ne cursu quassatæ ullo neu turbine venti

Vincantur : prosit nostris in montibus ortas."

Filius huic contra, torquet qui sidera mundi :

" O genetrix, quo fata vocas ? aut quid petis istis ?

Mortaline manu factæ immortale carinæ

Fas habeant ? certusque incerta pericula lustret

Æneas ? cui tanta deo permissa potestas ?

Immo, ubi defunctæ finem portusque tenebunt  
 Ausonios olim, quæcumque evaserit undis  
 Dardaniumque ducem Laurentia vexerit arva, 100  
 Mortalem eripiam formam, magnique jubebo  
 Æquoris esse deas : qualis Nercia Doto  
 Et Galatea secant spumantem pectore pontum."  
 Dixerat : idque ratum Stygii per flumina fratris,  
 Per pice torrentes atraque voragine ripas  
 Annuit, et totum nutu tremefecit Olympum.

Ergo aderat promissa dies, et tempora Parcæ  
 Debita complerant ; quum Turni injuria Matrem  
 Admonuit, ratibus sacris depellere tædas.  
 Hic primum nova lux oculis offulsit, et ingens 110  
 Visus ab Aurora cælum transcurrere nimbus,  
 Idæique chori : tum vox horrenda per auras  
 Excidit, et Troum Rutulorumque agmina complet :  
 " Ne trepidate meas, Teucris, defendere naves ;  
 Neve armate manus : maria ante exurere Turno  
 Quam sacras dabitur pinus. Vos ite solutæ,  
 Ite, deæ pelagi ; genetrix jubet." Et sua quæque  
 Continuo puppes abrumpunt vincula ripis,  
 Delphinumque modo demersis æquora rostris  
 Ima petunt. Hinc virgineæ, mirabile monstrum, 120  
 [Quot prius æratæ steterant ad litora proræ,]  
 Reddunt se totidem facies, pontoque feruntur.

Obstupuere animis Rutuli ; conterritus ipse  
 Turbatus Messapus equis ; cunctatur et amnis  
 Rauca sonans, revocatque pedem Tiberinus ab alto.  
 At non audaci cessit fiducia Turno ;  
 Ultro animos tollit dictis, atque increpat ultro :  
 "Trojanos hæc monstra petunt ; his Jupiter ipse  
 Auxilium solitum eripuit ; non tela, nec ignes  
 Expectant Rutulos. Ergo maria invia Teucris, 130  
 Nec spes ulla fugæ ; rerum pars altera adempta est.  
 Terra autem in nostris manibus : tot millia, gentes  
 Arma ferunt Italæ. Nil me fatalia terrent,

Si qua Phryges præ se jactant, responsa deorum.  
 Sat fatis Venerique datum, tetigere quod arva  
 Fertilis Ausoniæ Troës. Sunt et mea contra  
 Fata mihi, ferro sceleratam excindere gentem,  
 Conjuge prærepta; nec solos tangit Atridas  
 Iste dolor, solisque licet capere arina Mycenis.  
 Sed periisse semel satis est. Peccare fuisset 140  
 Ante satis, penitus modo non genus omne perosos  
 Feminæ. Quibus hæc medii fiducia valli,  
 Fossarumque moræ, leti discrimina parva,  
 Dant animos. At non viderunt mœnia Trojæ  
 Neptuni fabricata manu considerare in ignes?  
 Sed vos, o lecti, ferro qui scindere vallum  
 Apparat, et mecum invadit trepidantia castra?  
 Non armis mihi Vulcani, non mille carinis  
 Est opus in Teucros. Addant se protenus omnes 150  
 Etrusci socios. Tenebras et inertia furta  
 [Palladii, cæsis summæ custodibus arcis,]  
 Ne timeant; nec equi cæca condemur in alvo;  
 Luce palam certum est igni circumdare muros.  
 Haud sibi cum Danais rem faxo et pube Pelasga  
 Esse putent, decimum quos distulit Hector in annum.  
 Nunc adeo, melior quoniam pars acta diei,  
 Quod superest, læti bene gestis corpora rebus  
 Procurate, viri, et pugnam sperate parati."  
 Interea vigilum excubiis obsidere portas  
 Cura datur Messapo, et mœnia cingere flammis. 160  
 Bis septem, Rutulo muros qui milite servant,  
 Delecti; ast illos centeni quemque sequuntur  
 Purpurei cristis juvenes auroque corusci.  
 Discurrunt, variantque vices, fusique per herbam  
 Indulgent vino, et vertunt crateras ahenos.  
 Collucent ignes: noctem custodia ducit  
 Insomnem ludo.

Hæc super e vallo prospectant Troës, et armis  
 Alta tenent; nec non trepidi formidine portas

Explorant, pontesque et propugnacula jungunt ; 170  
 Tela gerunt. Instant Mnestheus acerque Serestus :  
 Quos pater Æneas, si quando adversa vocarent,  
 Rectores juvenum et rerum dedit esse magistros.  
 Omnis per muros legio sortita periculum  
 Excubat, exercetque vices, quod cuique tuendum est.

Nisus erat portæ custos, acerrimus armis,  
 Hyrtacides ; comitem Æneæ quem miserat Ida  
 Venatrix, jaculo celerem levibusque sagittis :  
 Et juxta comes Euryalus, quo pulchrior alter  
 Non fuit Æneadum, Trojana neque induit arma ; 180  
 Ora puer prima signans intonsa juvena.  
 His amor unus erat, pariterque in bella ruebant ;  
 Tum quoque communi portam statione tenebant.  
 Nisus ait : “ Dîne hunc ardorem mentibus addunt,  
 Euryale ? an sua cuique deus fit dira cupido ?  
 Aut pugnam, aut aliquid jamdudum invadere magnum  
 Mens agitat mihi ; nec placida contenta quiete est.  
 Cernis, quæ Rutulos habeat fiducia rerum.  
 Lumina rara micant ; somno vinoque sepulti  
 Procubuere ; silent late loca. Percipe porro 190  
 Quid dubitem, et quæ nunc animo sententia surgat.  
 Ænean acciri omnes, populusque patresque,  
 Exposcunt, mittique viros, qui certa reportent.  
 Si tibi quæ posco promittunt—nam mihi facti  
 Fama sat est—tumulo videor reperire sub illo  
 Posse viam ad muros et mœnia Pallantea.”  
 Obstupuit magno laudum percussus amore  
 Euryalus ; simul his ardentem affatur amicum :  
 “ Mene igitur socium summis adjungere rebus,  
 Nise, fugis ? solum te in tanta pericula mittam ? 200  
 Non ita me genitor bellis assuetus Opheltes  
 Argolicum terrorem inter Trojæque labores  
 Sublatum erudiit ; nec tecum talia gessi,  
 Magnanimum Ænean et fata extrema secutus.  
 Est hic, est animus lucis contemtor, et istum

Qui vita bene credat emi, quo tendis, honorem."  
 Nisus ad hæc : " Equidem de te nil tale verebar :  
 Nec fas—non. Ita me referat tibi magnus ovantem  
 Jupiter, aut quicumque oculis hæc aspicit æquis.  
 Sed si quis—quæ multa vides discrimine tali—

210

Si quis in adversum rapiat casusve deusve,  
 Te superesse velim ; tua vita dignior ætas.  
 Sit, qui me raptum pugna pretiove redemptum  
 Mandet humo ; solita aut si qua id fortuna vetabit,  
 Absenti ferat inferias, decoretque sepulcro.  
 Neu matri miseræ tanti sim causa doloris :  
 Quæ te sola, puer, multis e matribus ausa  
 Persequitur, magni nec mœnia curat Accestæ."  
 Ille autem : " Causas nequidquam nectis inanes,  
 Nec mea jam mutata loco sententia cedit.

220

Acceleremus," ait. Vigiles simul excitat. Illi  
 Succedunt, servantque vices : statione relicta  
 Ipse comes Niso graditur, regemque requirunt.

Cetera per terras omnes animalia somno  
 Laxabant curas et corda oblita laborum :  
 Ductores Teucrum primi, delecta juvenus,  
 Consilium summis regni de rebus habebant,  
 Quid facerent, quisve Æneæ jam nuncius esset :  
 Stant longis adnixa hastis, et scuta tenentes,  
 Castrorum et campi medio. Tum Nisus et una  
 Euryalus confestim alacres admittier orant :  
 Rem magnam, pretiumque moræ fore. Primus Iulus  
 Accepit trepidos, ac Nisum dicere jussit.

230

Tum sic Hyrtacides : " Audite o mentibus æquis  
 Æneadæ, neve hæc nostris spectentur ab annis,  
 Quæ ferimus. Rutuli somno vinoque soluti  
 Conticuere ; locum insidiis conspeximus ipsi,  
 Qui patet in bivio portæ, quæ proxima ponto ;  
 Interrupti ignes, aterque ad sidera fumus  
 Erigitur ; si fortuna permittitis uti,  
 Quæsitum Ænean ad mœnia Pallantea

240



Mox hic cum spoliis, ingenti cæde peracta,  
 Affore cernetis. Nec nos via fallit euntes :  
 Vidimus obscuris primam sub vallibus urbem  
 Venatu assiduo et totum cognovimus amnem.  
 Hic annis gravis atque animi maturus Aletes :  
 Di patrii, quorum semper sub numine Troja est,  
 Non tamen omnino Teucros delere paratis,  
 Quum tales animos juvenum et tam certa tulistis  
 Pectora." Sic memorans, humeros dextrasque tenebat 250  
 Amborum, et vultum lacrimis atque ora rigabat :  
 " Quæ vobis, quæ digna, viri, pro laudibus istis  
 Præmia posse rear solvi ? pulcherrima primum  
 Di moresque dabunt vestri ; tum cetera reddet  
 Actutum pius Æneas, atque integer ævi  
 Ascanius, meriti tanti non immemor unquam.  
 Immo ego vos, cui sola salus genitore reducto,  
 Excipit Ascanius, per magnos, Nise, Penates,  
 Assaracique Larem, et canæ penetralia Vestæ,  
 Obtestor :—quæcumque mihi fortuna fidesque est 260  
 In vestris pono gremiis—revocate parentem ;  
 Reddite conspectum ; nihil illo triste recepto.  
 Bina dabo argento perfecta atque aspera signis  
 Pocula, devicta genitor quæ cepit Arisba ;  
 Et tripodas geminos, auri duo magna talenta ;  
 Cratera antiquum, quem dat Sidonia Dido.  
 Si vero capere Italiam sceptrisque potiri  
 Contigerit victori, et prædæ ducere sortem :  
 Vidisti, quo Turnus equo, quibus ibat in armis.  
 Aureus ; ipsum illum, clipeum cristasque rubentes 270  
 Excipiam sorti, jam nunc tua præmia, Nise.  
 Præterea bis sex genitor lectissima matrum  
 Corpora, captivosque dabit, suaque omnibus arma ;  
 Insuper his, campi quod rex habet ipse Latinus.  
 Te vero, mea quem spatiis propioribus ætas  
 Insequitur, venerande puer, jam pectore toto  
 Accipio, et comitem casus complector in omnes.

Nulla meis sine te quæretur gloria rebus ;  
 Seu pacem seu bella geram ; tibi maxima rerum  
 Verborumque fides." Contra quem talia fatur 280  
 Euryalus : " Me nulla dies tam fortibus ausis  
 Dissimilem arguerit ; tantum—fortuna secunda  
 Aut adversa cadat. Sed te super omnia dona  
 Unum oro : genetrix Priami de gente vetusta  
 Est mihi, quam miseram tenuit non Ilia tellus  
 Mecum excedentem, non mœnia regis Acestæ.  
 Hanc ego nunc ignaram hujus quodcumque pericli est  
 Inque salutatam linquò ; Nox et tua testis  
 Dexterâ, quod nequeam lacrimas perferre parentis.  
 At tu, oro, solare inopem, et succurre relictæ. 290  
 Hanc sine me spem ferre tui : audentior ibo  
 In casus omnes." Percussa mente dederunt  
 Dardanidæ lacrimas ; ante omnes pulcher Iulus ;  
 Atque animum patriæ strinxit pietatis imago.  
 Tum sic effatur :  
 " Spondeo digna tuis ingentibus omnia cœptis.  
 Namque erit ista mihi genetrix, nomenque Creüsæ  
 Solum defuerit, nec partum gratia talem  
 Parva manet. Casus factum quicumque sequuntur :  
 Per caput hoc juro, per quod pater ante solebat : 300  
 Quæ tibi polliceor reduci, rebusque secundis,  
 Hæc eadem matrique tuæ generique manebunt."  
 Sic ait illacrimans ; humero simul exuit ensem  
 Auratum, mira quem fecerat arte Lycaon  
 Gnosius atqueabilem vagina aptarat eburna :  
 Dat Niso Mnestheus pellem horrentesque leonis  
 Exuvias ; galeam fidus permutat Aletes.  
 Protenus armati incedunt : quos omnis euntes  
 Primorum manus ad portas juvenumque senumque  
 Prosequitur votis. Nec non et pulcher Iulus, 310  
 Ante annos animumque gerens curamque virilem,  
 Multa patri portanda dabat mandata. Sed auræ  
 Omnia discerpunt, et nubibus irrita donant.

Egressi superant fossas, noctisque per umbram  
Castra inimica petunt, multis tamen ante futuri  
Exitio. Passim somno vinoque per herbam  
Corpora fusa vident, arrectos litore currus,  
Inter lora rotasque viros, simul arma jacere,  
Vina simul. Prior Hyrtacides sic ore locutus :  
“Euryale, audendum dextra. Nunc ipsa vocat res. 320  
Hac iter est. Tu, ne qua manus se attollere nobis  
A tergo possit, custodi et consule longe.  
Hæc ego vasta dabo, et lato te limite ducam.”  
Sic memorat, vocemque premit ; simul ense superbum  
Rhamnetem aggreditur, qui forte tapetibus altis  
Exstructus toto proflabat pectore somnum ;  
Rex idem, et regi Turno gratissimus augur :  
Sed non augurio potuit depellere pestem.  
Tres juxta famulos temere inter tela jacentes,  
Armigerumque Remi premit, aurigamque sub ipsis 330  
Nactus equis ; ferroque secat pendentia colla.  
Tum caput ipsi aufert domino truncumque relinquit  
Sanguine singultantem ; atro tepefacta cruore  
Terra torique madent. Nec non Lamyrumque Lamumque,  
Et juvenem Sarranum, illa qui plurima nocte  
Luserat, insignis facie, multoque jacebat  
Membra deo victus : felix, si protenus illum  
Æquasset nocti ludum in lucemque tulisset.  
Impastus ceu plena leo per ovilia turbans ;  
Suadet enim vesana fames ; manditque trahitque 340  
Molle pecus mutumque metu ; fremit ore cruento.  
Nec minor Euryali cædes : incensus et ipse  
Perfurit ; ac multam in medio sine nomine plebem,  
Fadumque Herbesumque subit, Rhætumque, Abarimque,  
Ignaros ; Rhætum vigilantem, et cuncta videntem ;  
Sed magnum metuens se post cratera tegebat :  
Pectore in adverso totum cui cominus ensem  
Condidit assurgenti, et multa morte recepit.  
Purpuream vomit ille animam, et cum sanguine mixta

Vina refert moriens ; hic furto fervidus instat. 350  
 Jamque ad Messapi socios tendebat, ubi ignem  
 Deficere extremum, et religatos rite videbat  
 Carpere gramen equos : breviter cum talia Nisus,—  
 Sensit enim nimia cæde atque cupidine ferri—  
 “ Absistamus,” ait : “ nam lux inimica propinquat.  
 Pœnarum exhaustum satis est ; via facta per hostes.”  
 Multa virum solido argento perfecta relinquunt  
 Armaque, craterasque simul, pulchrosque tapetas.  
 Euryalus phaleras Rhamnetis et aurea bullis  
 Cingula, Tiburti Remulo ditissimus olim 360  
 Quæ mittit dona, hospitio quum jungeret absens,  
 Cædicus ; ille suo moriens dat habere nepoti ;  
 Post mortem bello Rutuli pugnaque potiti :  
 Hæc rapit, atque humeris nequidquam fortibus aptat.  
 Tum galeam Messapiabilem cristisque decoram  
 Induit. Excedunt castris, et tuta capessunt.  
 Interea præmissi equites ex urbe Latina,  
 Cetera dum legio campis instructa moratur,  
 Ibant, et Turno regis responsa ferebant,  
 Tercentum, scutati omnes Volscente magistro. 370  
 Jamque propinquabant castris, murosque subibant,  
 Quum procul hos lævo flectentes limite cernunt ;  
 Et galea Euryalum sublustri noctis in umbra  
 Prodidit immemorem, radiisque adversa refulsit.  
 Haud temere est visum. Conclamat ab agmine Volscens :  
 “ State, viri ; quæ causa viæ ? quive estis in armis !  
 Quove tenetis iter ?” Nihil illi tendere contra ;  
 Sed celerare fugam in silvas, et fidere nocti.  
 Objiciunt equites sese ad divortia nota  
 Hinc atque hinc, omnemque abitum custode coronant. 380  
 Silva fuit, late dumis atque ilice nigra  
 Horrida, quam densi complerant undique sentes ;  
 Rara per occultos lucebat semita calles.  
 Euryalum tenebræ ramorum onerosaque præda  
 Impediunt, fallitque timor regione viarum.

Nisus abit : jamque imprudens evaserat hostes,  
 Atque lacus, qui post Albæ de nomine dicti  
 Albani : tum rex stabula alta Latinus habebat.  
 Ut stetit, et frustra absentem respexit amicum :  
 “ Euryale, infelix qua te regione reliqui ? 390  
 Quave sequar, rursus perplexum iter omne revolvens  
 Fallacis silvæ ? ” Simul et vestigia retro  
 Observata legit, dumisque silentibus errat.  
 Audit equos, audit strepitus et signa sequentum.  
 Nec longum in medio tempus ; quum clamor ad aures  
 Pervenit, ac videt Euryalum ; quem jam manus omnis  
 Fraude loci et noctis, subito turbante tumultu,  
 Oppressum rapit, et conantem plurima frustra.  
 Quid faciat ? qua vi juvenem, quibus audeat armis  
 Eripere ? an sese medios moriturus in enses 400  
 Inferat, et pulchram properet per vulnera mortem ?  
 Ocius adducto torquens hastile lacerto,  
 Suspiciens altam Lunam, sic voce precatur :  
 “ Tu, dea, tu præsens nostro succurre labori,  
 Astrorum decus, et nemorum Latonia custos ;  
 Si qua tuis unquam pro me pater Hyrtacus aris  
 Dona tulit, si qua ipse meis venatibus auxi,  
 Suspendive tholo, aut sacra ad fastigia fixi :  
 Hunc sine me turbare globum, et rege tela per auras.”  
 Dixerat : et toto connixus corpore ferrum 410  
 Conjicit : hasta volans noctis diverberat umbras,  
 Et venit aversi in tergum Sulmonis, ibique  
 Frangitur, ac fisso transit præcordia ligno.  
 Volvitur ille vomens calidum de pectore flumen  
 Frigidus, et longis singultibus ilia pulsat.  
 Diversi circumspiciunt. Hoc acrior idem  
 Ecce aliud summa telum librabat ab aure.  
 Dum trepidant, iit hasta Tago per tempus utrumque  
 Stridens, trajectoque hæsit tepefacta cerebro.  
 Sæviti atrox Volscens, nec teli conspicit usquam 420  
 Auctorem, nec quo se ardens immittere possit.

"Tu tamen interea calido mihi sanguine pœnas  
 Persolves amborum," inquit : simul ense recluso  
 Ibat in Euryalum. Tum vero exterritus, amens,  
 Conclamat Nisus ; nec se celare tenebris  
 Amplius, aut tantum potuit perferre dolorem :  
 "Me, me,—adsum, qui feci,—in me convertite ferrum,  
 O Rutuli ! mea fraus omnis ; nihil iste nec ausus,  
 Nec potuit : cœlum hoc et conscia sidera testor."  
 Tantum infelicem nimium dilexit amicum. 430  
 Talia dicta dabat : sed viribus ensis adactus  
 Transabiit costas, et candida pectora rumpit.  
 Volvitur Euryalus leto, pulchrosque per artus  
 It cruor, inque humeros cervix collapsa recumbit :  
 Purpureus veluti quum flos, succisus aratro,  
 Languescit moriens : lassove papavera collo  
 Demisere caput, pluvia quum forte gravantur.  
 At Nisus ruit in medios, solumque per omnes  
 Volscentem petit ; in solo Volscente moratur.  
 Quem circum glomerati hostes, hinc cominus atque  
 hinc 440

Proturbant. Instat non secius, ac rotat ensem  
 Fulmineum ; donec Rutuli clamantis in ore  
 Condidit adverso, et moriens animam abstulit hosti.  
 Tum super exanimem sese projecit amicum  
 Confossus, placidaque ibi demum morte quievit.

Fortunati ambo ! si quid mea carmina possunt,  
 Nulla dies unquam memori vos eximet ævo ;  
 Dum domus Æneæ Capitoli immobile saxum  
 Accolet, imperiumque pater Romanus habebit.

Victores præda Rutuli spoliisque potiti, 450  
 Volscentem exanimem flentes in castra ferebant.  
 Nec minor in castris luctus, Rhamnete reperto  
 Exsanguis, et primis una tot cæde peremptis,  
 Sarranoque Numaque. Ingens concursus ad ipsa  
 Corpora, seminecesque viros, tepidaque recentem  
 Cæde locum, et plenos spumanti sanguine rivos.

Agnoscent spolia inter se, galeamque nitentem  
Messapi, et multo phaleras sudore receptas.

Et jam prima novo spargebat lumine terras

Tithoni croceum linquens Aurora cubile :

460

Jam sole infuso, jam rebus luce relectis,

Turnus in arma viros, armis circumdatus ipse,

Suscitat ; æratasque acies in prælia cogit

Quisque suas, variisque acuunt rumoribus iras.

Quin ipsa arrectis, visu miserabile, in hastis

Præfigunt capita, et multo clamore sequuntur,

Euryali et Nisi.

Æneadæ duri murorum in parte sinistra

Opposuerunt aciem, nam dextera cingitur amni,

Ingentesque tenent fossas, et turribus altis

470

Stant mæsti : simul ora virum præfixa movebant,

Nota nimis miseris, atroque fluentia tabo.

Interea pavidam volitans pennata per urbem

Nuncia Fama ruit, matrisque allabitur aures

Euryali. At subitus miseræ calor ossa reliquit :

Excussi manibus radii, revolutaque pensa.

Evolat infelix, et femineo ululatu,

Scissa comam, muros amens atque agmina cursu

Prima petit : non illa virum, non illa pericli,

Telorumque mæmor : cælum dehinc questibus implet : 480

“ Hunc ego te, Euryale, aspicio ? tunc illa senectæ

Sera meæ requies, potuisti linquere solam,

Crudelis ? nec te, sub tanta pericula missum,

Affari extremum miseræ data copia matri ?

Heu, terra ignota canibus date præda Latinis

Alitibusque jaces ! nec te tua funera mater

Produxit, pressive oculos, aut vulnera lavi,

Veste tegens ; tibi quam noctes festina diesque

Urgebam, et tela curas solabar aniles.

Quo sequar ? aut quæ nunc artus, avulsaque membra, 490

Et funus lacerum tellus habet ? hoc mihi de te,

Nate, refers ? hoc sum terraque marique secuta ?

Figite me, si qua est pietas ; in me omnia tela

Conjicite, o Rutuli; me primam absumite ferro;  
 Aut tu, magne pater divum, miscrere, tuoque  
 Invisum hoc detrude caput sub Tartara telo:  
 Quando aliter nequeo crudelem abrumpere vitam.”  
 Hoc fletu concussi animi, mæstusque per omnes  
 It gemitus; torpent infractæ ad prælia vires.  
 Illam incendentem luctus Idæus et Actor,  
 Ilionei monitu et multum lacrimantis Iuli,  
 Corripiunt, interque manus sub tecta reponunt.

500

At tuba terribilem sonitum procul ære canoro  
 Increpuit: sequitur clamor, cœlumque remugit.  
 Accelerant acta pariter testudine Volsci;  
 Et fossas implere parant, ac vellere vallum.  
 Quærent pars aditum, et scalis ascendere muros,  
 Qua rara est acies, interlucetque corona  
 Non tam spissa viris. Telorum effundere contra  
 Omne genus Teuceri, ac duris detrudere contis,  
 Assueti longo muros defendere bello.

510

Saxa quoque infestoolvebant pondere, si qua  
 Possent tectam aciem perrumpere: quum tamen omnes  
 Ferre juvat subter densa testudine casus.  
 Nec jam sufficiunt: nam qua globus imminet ingens,  
 Immanem Teuceri molem volvuntque ruuntque;  
 Quæ stravit Rutulos late, armorumque resolvit  
 Tegmina. Nec curant cæco contendere Marte  
 Amplius audaces Rutuli, sed pellere vallo  
 Missilibus certant.

520

Parte alia horrendus visu quassabat Etruscam  
 Pinum, et fumiferos infert Mezentius ignes;  
 At Messapus equum domitor, Neptunia proles,  
 Rescindit vallum, et scalas in mœnia poscit.

Vos, o Calliope, precor, aspirate canenti,  
 Quas ibi tunc ferro strages, quæ funera Turnus  
 Ediderit, quem quisque virum demiserit Orco;  
 Et mecum ingentes oras evolvite belli.

[Et meministis enim, divæ, et memorare potestis.]

Turris erat vasto suspectu et pontibus altis,

530



Opportuna loco ; summis quam viribus omnes  
 Expugnare Itali, summaque evertere opum vi  
 Certabant : Troës contra defendere saxis,  
 Perque cavas densi tela intorquere fenestras.  
 Princeps ardentem conjecit lampada Turnus,  
 Et flammam affixit lateri ; quæ plurima vento  
 Corripuit tabulas, et postibus hæsit adesis.  
 Turbati trepidare intus, frustra que malorum  
 Velle fugam. Dum se glomerant, retroque residunt  
 In partem quæ peste caret, tum pondere turris 540  
 Procubuit subito, et cælum tonat omne fragore.  
 Semineces ad terram, immani mole secuta,  
 Confixique suis telis et pectora duro  
 Transfossi ligno veniunt. Vix unus Helenor,  
 Et Lycus elapsi ; quorum primævus Helenor,  
 Mæonio regi quem serva Licymnia furtim  
 Sustulerat, vetitisque ad Trojam miserat armis,  
 Ense levis nudo, parmaque inglorius alba.  
 Isque ubi se Turni media inter millia vidit,  
 Hinc acies, atque hinc acies adstare Latinas ; 550  
 Ut fera, quæ densa venantum septa corona  
 Contra tela furit, seseque haud nescia morti  
 Injicit, et saltu supra venabula fertur :  
 Haud aliter juvenis medios moriturus in hostes  
 Irruit ; et, qua tela videt densissima, tendit.  
 At pedibus longe melior Lycus inter et hostes,  
 Inter et arma, fuga muros tenet, altaque certat  
 Prendere tecta manu, sociûmque attingere dextras.  
 Quem Turnus, pariter cursu teloque secutus,  
 Increpat his victor : “ Nostrasne evadere, demens, 560  
 Sperasti te posse manus ? ” simul arripit ipsum  
 Pendentem, et magna muri cum parte revellit :  
 Qualis ubi aut leporem, aut candenti corpore cycnum,  
 Sustulit alta petens pedibus Jovis armiger uncis ;  
 Quæsitum aut matri multis balatibus agnum  
 Martius a stabulis rapuit lupus. Undique clamor

Tollitur. Invadunt, et fossas aggere complent ;  
 Ardentes tãdas alii ad fastigia jactant.  
 Ilioneus saxo atque ingenti fragmine montis  
 Lucetium, portæ subeuntem ignesque ferentem ; 570  
 Emathiona Liger, Corynæum sternit Asylas,—  
 Hic jaculo bonus, hic longe fallente sagitta :  
 Ortygium Cæneus, victorem Cænca Turnus ;  
 Turnus Itym Cloniumque, Dioxippum Promolumque,  
 Et Sagarim, et summis stantem pro turribus Idan ;  
 Privernum Capys. Hunc primo levis hasta Temillæ  
 Strinxerat : ille manum projecto tegmine demens  
 Ad vulnus tulit ; ergo alis allapsa sagitta,  
 Et lævo affixa est lateri manus, abditaque intus 580  
 Spiramenta animæ letali vulnere rumpit.  
 Stabat in egregiis Arcentis filius armis,  
 Pictus acu chlamydem et ferrugine clarus Hibera,  
 Insignis facie ; genitor quem miserat Arcens,  
 Eductum matris luco, Symæthia circum  
 Flumina, pinguis ubi et placabilis ara Palici.  
 Stridentem fundam, positis Mezentius hastis,  
 Ipse ter adducta circum caput egit habena ;  
 Et media adversi liquefacto tempora plumbo  
 Diffidit, ac multa porrectum extendit arena.  
 Tum primum bello celerem intendisse sagittam 590  
 Dicitur, ante feras solitus terrere fugaces,  
 Ascanius, fortemque manu fudisse Numanum ;  
 Cui Remulo cognomen erat ; Turnique minorem  
 Germanam nuper thalamo sociatus habebat.  
 Is primam ante aciem digna atque indigna relatu  
 Vociferans, tumidusque novo præcordia regno  
 Ibat, et ingentem sese clamore ferebat :  
 “ Non pudet obsidione iterum valloque teneri,  
 Bis capti Phryges, et Marti prætereundum muros ?  
 En qui nostra sibi bello connubia poscunt ! 600  
 Quis deus Italiam, quæ vos dementia adegit ?  
 Non hic Atridæ, nec fandi fictor Ulixes.

Durum ab stirpe genus natos ad flumina primum  
 Deferimus, sævoque gelu duramus et undis ;  
 Venatu invigilant pueri, silvasque fatigant ;  
 Flectere ludus equos, et spicula tendere cornu.  
 At patiens operum parvoque assueta Juventus  
 Aut rastris terram domat, aut quatit oppida bello.  
 Omne ævum ferro teritur, versaque juvencum  
 Terga fatigamus hasta ; nec tarda senectus 610  
 Debilitat vires animi, mutatque vigorem.  
 Canitiem galea premimus ; semperque recentes  
 Comportare juvat prædas, et vivere raptō.  
 Vobis picta croco et fulgenti murice vestis,  
 Desidiæ cordi ; juvat indulgere choreis ;  
 Et tunicæ manicas, et habent redimicula mitræ.  
 O vere Phrygiæ, neque enim Phryges, ite per alta  
 Dindyma, ubi assuetis biforem dat tibia cantum.  
 Tympana vos buxusque vocant Berecynthia matris  
 Idææ : sinite arma viris, et cedit ferro." 620

Talia jactantem dictis, ac dira canentem  
 Non tulit Ascanius ; nervoque obversus equino  
 Intendit telum, diversaque brachia ducens  
 Constitit, ante Jovem supplex per vota precatus :  
 " Jupiter omnipotens, audacibus annue cœptis.  
 Ipse tibi ad tua templa feram solemnia dona,  
 Et statuam ante aras aurata fronte juvencum  
 Candentem, pariterque caput cum matre ferentem,  
 Jam cornu petat et pedibus qui spargat arenam." 630  
 Audiit et cœli Genitor de parte serena  
 Intonuit lævum : sonat una fatifer arcus.  
 Effugit horrendum stridens adducta sagitta ;  
 Perque caput Remuli venit, et cava tempora ferro  
 Trajicit. " I, verbis virtutem illude superbis.  
 Bis capti Phryges hæc Rutulis responsa remittunt."  
 Hoc tantum Ascanius. Teuceri clamore sequuntur,  
 Lætitiæque fremunt, animosque ad sidera tollunt.  
 Ætheria tum forte plaga crinitus Apollo

Desuper Ausonias acies urbemque videbat,  
 Nube sedens, atque his victorem affatur Iulum : 640  
 " Macte nova virtute, puer ; sic itur ad astra,  
 Dis genite, et geniture deos. Jure omnia bella  
 Gente sub Assaraci fato ventura resident :  
 Nec te Troja capit." Simul hæc effatus ab alto  
 Æthere se mittit, spirantes dimovet auras,  
 Ascaniumque petit. Formam tum vertitur oris  
 Antiquum in Buten. Illic Dardanio Anchisæ  
 Armiger ante fuit, fidusque ad limina custos ;  
 Tum comitem Ascanio pater addidit. Ibat Apollo  
 Omnia longævo similis, vocemque coloremque, 650  
 Et crines albos et sæva sonoribus arma ;  
 Atque his ardentem dictis affatur Iulum :  
 " Sit satis, Æneada, telis impune Numanum  
 Oppetiisse tuis ; primam hanc tibi magnus Apollo  
 Concedit laudem, et paribus non invidet armis ;  
 Cetera parce, puer, bello." Sic orsus Apollo  
 Mortales medio aspectus sermone reliquit,  
 Et procul in tenuem ex oculis evanuit auram.  
 Agnovere deum procures divinaque tela  
 Dardanidæ, pharetramque fuga sensere sonantem. 660  
 Ergo avidum pugnae, dictis ac numine Phœbi,  
 Ascanium prohibent ; ipsi in certamina rursus  
 Succedunt, animasque in aperta pericula mittunt.  
 It clamor totis per propugnacula muris :  
 Intendunt acres arcus, amentaque torquent.  
 Sternitur omne solum telis ; tum scuta cavæque  
 Dant sonitum flictu galeæ ; pugna aspera surgit :  
 Quantus ab occasu veniens pluvialibus Hædis  
 Verberat imber humum ; quam multa grandine nimbi  
 In vada præcipitant, quum Jupiter horridus austris 670  
 Torquet aquosam hiemem, et cœlo cava nubila rumpit.  
 Pandarus et Bitias, Idæo Alcanore creti,  
 Quos Jovis eduxit luco silvestris Iæra,  
 Abietibus juvenes patriis et montibus æquos,

Portam, quæ ducis imperio commissa, recludunt  
 Freti armis, ultroque invitant mœnibus hostem.  
 Ipsi intus dextra ac læva pro turribus adstant  
 Armati ferro, et cristis capita alta corusci ;  
 Quales aëriæ liquentia flumina circum,  
 Sive Padi ripis Athesim seu propter amœnum, 680  
 Consurgunt geminæ quercus, intonsaque cœlo  
 Attollunt capita, et sublimi vertice nutant.  
 Irrumpunt, aditus Rutuli ut videre patentes.  
 Continuo Quercens, et pulcher Aquicolus armis,  
 Et præceps animi Tmarus, et Mavortius Hæmon,  
 Agminibus totis aut versi terga dedere,  
 Aut ipso portæ posuere in limine vitam.  
 Tum magis increscunt animis discordibus iræ,  
 Et jam collecti Troes glomerantur eodem,  
 Et conferre manum et procurrere longius audent. 690

Ductori Turno, diversa in parte furenti  
 Turbantique viros, perfertur nuncius, hostem  
 Fervere cæde nova, et portas præbere patentes.  
 Deserit inceptum, atque immani concitus ira  
 Dardanium ruit ad portam fratresque superbos :  
 Et primum Antiphaten, is enim se primus agebat,  
 Thebana de matre nothum Sarpedonis alti,  
 Conjecto sternit jaculo : volat Ætala cornus  
 Aëra per tenerum, stomachoque infixæ sub altum  
 Pectus abit ; reddit specus atri vulneris undam 700  
 Spumantem, et fixo ferrum in pulmone tepescit.  
 Tum Meropem atque Erymanta manu, tum sternit  
 Aphidnum ;

Tum Bitian ardentem oculis, animisque frementem,  
 Non jaculo—neque enim jaculo vitam ille dedisset—  
 Sed magnum stridens contorta phalarica venit,  
 Fulminis acta modo : quam nec duo taurea terga,  
 Nec duplici squama lorica fidelis et auræ  
 Sustinuit ; collapsa ruunt immania membra.  
 Dat tellus gemitum, et clipeum super intonat ingens :

Qualis in Euboico Baiarum litore quondam  
 Saxeæ pila cadit, magnis quam molibus ante  
 Constructam ponto jaciunt; sic illa ruinam  
 Prona trahit, penitusque vadis illisa recumbit;  
 Miscent se maria, et nigræ attolluntur arenæ.  
 Tum sonitu Prochyta alta tremit, durumque cubile  
 Inarime Jovis imperiis imposita Typhœo.

710

Hic Mars armipotens animum viresque Latinis  
 Addidit, et stimulos acres sub pectore vertit;  
 Immisitque fugam Teucris atrumque timorem.  
 Undique conveniunt; quoniam data copia pugnae,  
 Bellatorque animos deus incidit.

720

Pandarus ut fuso germanum corpore cernit,  
 Et quo sit fortuna loco, qui casus agat res;  
 Portam vi multa converso cardine torquet,  
 Obnixus latis humeris, multosque suorum  
 Mœnibus exclusos duro in certamine linquit;  
 Ast alios secum includit recipitque ruentes,  
 Demens! qui Rutulum in medio non agmine regem  
 Viderit irrumpentem, ultroque incluserit urbi:  
 Immanem veluti pecora inter inertia tigrim.

730

Continuo nova lux oculis effulsit, et arma  
 Horrendum sonuere: tremunt in vertice cristæ  
 Sanguineæ, clipeoque micantia fulmina mittunt.  
 Agnoscunt faciem invisam atque immania membra  
 Turbati subito Æneadæ. Tum Pandarus ingens  
 Emicat, et mortis fraternæ fervidus ira  
 Effatur: "Non hæc dotalis regia Amatæ;  
 Nec muris cohibet patriis media Ardea Turnum.  
 Castra inimica vides; nulla hinc exire potestas."  
 Olli subridens sedato pectore Turnus:

740

Incipe, si qua animo virtus, et consere dextram;  
 Hic etiam inventum Priamo narrabis Achillem."  
 Dixerat. Ille rudem nodis et cortice crudo  
 Intorquet summis adnixus viribus hastam.  
 Excepere auræ; vulnus Saturnia Juno

Detorsit veniens ; portæque infigitur hasta.  
 " At non hoc telum, mea quod vi dextera versat,  
 Effugies ; neque enim is teli nec vulneris auctor."  
 Sic ait, et sublatum alte consurgit in ensem,  
 Et mediam ferro gemina inter tempora frontem 750  
 Dividit, impubesque immani vulnere malas.  
 Fit sonus ; ingenti concussa est pondere tellus.  
 Collapsos artus atque arma cruenta cerebro  
 Sternit humi moriens ; atque illi partibus æquis  
 Huc caput atque illuc humero ex utroque pependit.  
 Diffugiunt versi trepida formidine Troës.  
 Et si continuo victorem ea cura subisset,  
 Rumpere claustra manu sociosque immittere portis :  
 Ultimus ille dies bello gentique fuisset.  
 Sed furor ardentem cædisque insana cupido 760  
 Egit in adversos.  
 Principio Phalerim et succiso poplite Gygen  
 Excipit ; hinc raptas fugientibus ingerit hastas  
 In tergum : Juno vires animumque ministrat.  
 Addit Halym comitem, et confixa Phegea parma ;  
 Ignaros deinde in muris Martemque cientes,  
 Alcandrumque Haliumque Noëmonaque Prytanimque ;  
 Lyncea tendentem contra, sociosque vocantem,  
 Vibranti gladio connixus ab aggere dexter  
 Occupat : huic uno dejectum cominus ictu 770  
 Cum galea longe jacuit caput. Inde ferarum  
 Vastatorem Amycum, quo non felicius alter  
 Ungere tela manu, ferrumque armare veneno ;  
 Et Clytium Æoliden, et amicum Crethea Musis ;  
 Crethea Musarum comitem, cui carmina semper  
 Et citharæ cordi, numerosque intendere nervis ;  
 Semper equos atque arma virum, pugnasque canebat.  
 Tandem ductores, audita cæde suorum,  
 Conveniunt Teucri, Mnestheus acerque Serestus ;  
 Palantesque vident socios, hostemque receptum. 780  
 Et Mnestheus, " Quo deinde fugam, quo tenditis ?" inquit.  
 " Quos alios muros, quæ jam ultra mœnia habetis ?

Unus homo, et vestris, o cives, undique septus  
 Aggeribus, tantas strages impune per urbem  
 Ediderit? juvenum primos tot miserit Orco?  
 Non infelicis patriæ, veterumque deorum,  
 Et magui Æneæ segnes miseretque pudetque?"  
 Talibus accensi firmantur, et agmine denso  
 Consistunt. Turnus paulatim excedere pugna,  
 Et fluvium petere, ac partem quæ cingitur amni. 790  
 Acrius hoc Teucris clamore incumbere magno,  
 Et glomerare manum: ceu sævum turba leonem  
 Quum telis premit infensis; at territus ille,  
 Asper, acerba tuens, retro redit; et neque terga  
 Ira dare aut virtus patitur, nec tendere contra,  
 Ille quidem hoc cupiens, potis est per tela virosque.  
 Haud aliter retro dubius vestigia Turnus  
 Improperata refert, et mens exæstuat ira.  
 Quin etiam bis tum medios invaserat hostes;  
 Bis confusa fuga per muros agmina vertit. 800  
 Sed manus e castris propere coit omnis in unum.  
 Nec contra vires audet Saturnia Juno  
 Sufficere; æriam cœlo nam Jupiter Irim  
 Demisit, germanæ haud mollia jussa ferentem:  
 Ni Turnus cedat Teucrorum mœnibus altis.  
 Ergo nec clipeo juvenis subsistere tantum,  
 Nec dextra valet: injectis sic undique telis  
 Obruitur. Strepit assiduo cava tempora circum  
 Tinnitu galea, et saxis solida æra fatiscunt;  
 Discussæque jubæ capiti; nec sufficit umbo 810  
 Ictibus; ingeminant hastis et Troës et ipse  
 Fulmineus Mnestheus. Tum toto corpore sudor  
 Liquitur, et piceum—nec respirare potestas—  
 Flumen agit; fessos quatit acer anhelitus artus.  
 Tum demum præceps saltu sese omnibus armis  
 In fluvium dedit. Ille suo cum gurgite flavo  
 Accepit venientem, ac mollibus extulit undis;  
 Et lætum sociis abluta cæde remisit.



P. VIRGILII MARONIS

Æ N E I D O S

LIBER DECIMUS.



PANDITUR interea domus omnipotentis Olympi,  
Conciliumque vocat divum pater atque hominum rex  
Sideream in sedem : terras unde arduus omnes,  
Castraque Dardanidum aspectat, populosque Latinos.  
Considunt tectis bipatientibus. Incipit ipse :

“ Cœlicolæ magni, quianam sententia vobis  
Versa retro, tantumque animis certatis iniquis ?  
Abnueram bello Italiam concurrere Teucris.  
Quæ contra vetitum discordia ? quis metus aut hos,  
Aut hos arma sequi, ferrumque lacescere suasit ? 10  
Adveniet justum pugnæ, ne arcessite, tempus,  
Quum fera Carthago Romanis arcibus olim  
Exitium magnum atque Alpes immittet apertas :  
Tum certare odiis, tum res rapuisse licebit.  
Nunc sinite ; et placitum læti componite fœdus.”

Jupiter hæc paucis ; at non Venus aurea contra  
Pauca refert :

“ O Pater, o hominum divumque æterna potestas,—  
Namque aliud quid sit, quod jam implorare queamus ?—  
Cernis ut insultent Rutuli ; Turnusque feratur 20  
Per medios insignis equis, tumidusque secundo  
Marte ruat ? Non clausa tegunt jam mœnia Teucros.  
Quin intra portas atque ipsis prælia miscent  
Aggeribus mærorum ; et inundant sanguine fossæ.

Æneas ignarus abest. Nunquamne levare  
 Obsidione sines? Muris iterum imminet hostis  
 Nascentis Trojæ, nec non exercitus alter;  
 Atque iterum in Teucros Ætolis surgit ab Arpis  
 Tydides. Equidem credo, mea vulnera restant,  
 Et tua progenies mortalia demoror arma! 30  
 Si sine pace tua atque invito numine Troës  
 Italiam petiere,—luant peccata; neque illos  
 Jueris auxilio: sin tot responsa secuti,  
 Quæ superi manesque dabant,—cur nunc tua quisquam  
 Vertere jussa potest? aut cur nova condere fata?  
 Quid repetam exustas Erycino in litore classes?  
 Quid tempestatum regem, ventosque furentes  
 Æolia excitos? aut actam nubibus Irim?  
 Nunc etiam manes—hæc intentata manebat  
 Sors rerum—movet, et superis immissa repente 40  
 Allecto, medias Italum bacchata per urbes.  
 Nil super imperio moveor: speravimus ista,  
 Dum fortuna fuit: vincant, quos vincere mavis.  
 Si nulla est regio, Teucris quam det tua conjux  
 Dura: per eversæ, genitor, fumantia Trojæ  
 Excidia obtestor: liceat dimittere ab armis  
 Incolumem Ascanium, liceat superesse nepotem.  
 Æneas sane ignotis jactetur in undis,  
 Et, quaecumque viam dederit fortuna, sequatur:  
 Hunc tegere, et diræ valeam subducere pugnæ. 50  
 Est Amathus, est celsa mihi Paphus, atque Cythera,  
 Idaliæque domus: positis inglorius armis  
 Exigat hic ævum. Magna ditione iubeto  
 Carthago premat Ausoniam: nihil urbibus inde  
 Obstabit Tyriis. Quid pestem evadere belli  
 Juvit, et Argolicos medium fugisse per ignes,  
 Totque maris vastæque exhausta pericula terræ,  
 Dum Latium Teucris recidivaque Pergama quærunt?  
 Non satius, cineres patriæ insedisce supremos,  
 Atque solum quo Troja fuit? Xanthum et Simoënta 60

Redde, oro, miseris ; iterumque revolvere casus  
 Da, pater, Iliacos Teucris." Tum regia Juno  
 Acta furore gravi : " Quid me alta silentia cogis  
 Rumpere, et obductum verbis vulgare dolorem ?  
 Ænean hominum quisquam divumque subegit  
 Bella sequi, aut hostem regi se inferre Latino ?  
 Italiam fati petiit auctoribus—esto—  
 Cassandra impulsus furiis. Num linquere castra  
 Hortati sumus aut vitam committere ventis ?  
 Num puero summam belli, num credere muros ?  
 Tyrrhenamve fidem aut gentes agitare quietas ?  
 Quis deus in fraudem, quæ dura potentia nostri  
 Egit ? Ubi hic Juno, demissave nubibus Iris ?  
 Indignum est, Italos Trojam circumdare flammis  
 Nascentem, et patria Turnum consistere terra,  
 Cui Pilumnus avus, cui diva Venilia mater.  
 Quid, face Trojanos atra vim ferre Latinis ?  
 Arva aliena jugo premere, atque advertere prædas ?  
 Quid, soceros legere, et gremiis abducere pactas ?  
 Pacem orare manu, præfigere puppibus arma ?  
 Tu potes Ænean manibus subducere Graium,  
 Proque viro nebulam et ventos obtendere inanes ;  
 Et potes in totidem classem convertere nymphas :  
 Nos aliquid Rutulos contra juvisse, nefandum est ?  
 Æneas ignarus abest : ignarus et absit.  
 Est Paphus, Idaliumque tibi, sunt alta Cythera :  
 Quid gravidam bellis urbem et corda aspera tentas ?  
 Nosne tibi fluxas Phrygiæ res vertere fundo  
 Conamur ? nos ? an miseros qui Troas Achivis  
 Objecit ? quæ causa fuit, consurgere in arma  
 Europamque Asiamque, et fœdera solvere furto ?  
 Me duce Dardanius Spartam expugnavit adulter ?  
 Aut ego tela dedi, fovive Cupidine bella ?  
 Tum decuit metuisse tuis ; nunc sera querelis  
 Haud justis assurgis, et irrita jurgia jactas."

Talibus orabat Juno : cunctique fremebant

Cœlicolæ assensu vario. Ceu flamina prima  
 Quum deprensa fremunt silvis, et cæca volutant  
 Murmura, venturos nautis prodentia ventos.  
 Tum Pater omnipotens, rerum cui summa potestas, 100  
 Infit. Eo dicente deûm domus alta silescit;  
 Et tremefacta solo tellus; silet arduus æther;  
 Tum zephyri posuere; premit placida æquora pontus.  
 "Accipite ergo animis atque hæc mea figite dicta.  
 Quandoquidem Ausonios conjungi fœdere Teucris  
 Haud licitum; nec vestra capit discordia finem:  
 Quæ cuique est fortuna hodie, quam quisque secat spem,  
 Tros Rutulusve fuat, nullo discrimine habebō;  
 Seu fatis Italum castra obsidione tenentur,  
 Sive errore malo Trojæ monitisque sinistris. 110  
 Nec Rutulos solvo. Sua cuique exorsa laborem  
 Fortunamque ferent. Rex Jupiter omnibus idem.  
 Fata viam inveniunt." Stygii per flumina fratris,  
 Per pice torrentes atraque voragine ripas  
 Annuit, et totum nutu tremefecit Olympum.  
 Hic finis fandi. Solio tum Jupiter aureo  
 Surgit, cœlicolæ medium quem ad limina ducunt.  
 Interea Rutuli portis circum omnibus instant  
 Sternere cæde viros, et mœnia cingere flammis.  
 At legio Æneadum vallis obsessa tenetur; 120  
 Nec spes ulla fugæ. Miseri stant turribus altis  
 Nequidquam, et rara muros cinxere corona:  
 Asius Inbrasides, Hicetaoniusque Thymœtes,  
 Assaracique duo, et senior cum Castore Thymbris,  
 Prima acies. Hos germani Sarpedonis ambo,  
 Et Clarus et Themon, Lycia comitantur ab alta.  
 Fert ingens toto connixus corpore saxum,  
 Haud partem exiguum montis, Lyrnessius Acmon,  
 Nec Clytio genitore minor, nec fratre Menestheo.  
 Hi jaculis, illi certant defendere saxis, 130  
 Molirique ignem, nervoque aptare sagittas.  
 Ipse inter medios, Veneris justissima cura,

Dardanius caput ecce puer detectus honestum,  
Qualis gemma micat, fulvum quæ dividit aurum,  
Aut collo decus aut capiti ; vel quale per artem  
Inclusum buxo, aut Oricia terebintho,  
Lucet ebur ; fusos cervix cui lactea crines  
Accipit et molli subnectens circulus auro.

Te quoque magnanimæ viderunt, Ismare, gentes  
Vulnera dirigere et calamos armare veneno,  
Mæonia generose domo : ubi pingua culta  
Exercentque viri, Pactolusque irrigat auro.  
Affuit et Mnestheus, quem pulsi pristina Turni  
Aggere mœrorum sublimem gloria tollit,  
Et Capys : hinc nomen Campanæ ducitur urbi.

140

Illi inter sese duri certamina belli  
Contulerant : media Æneas freta nocte secabat.  
Namque ut ab Evandro castris ingressus Etruscis  
Regem adit, et regi memorat nomenque genusque,  
Quidve petat, quidve ipse ferat ; Mezentius arma  
Quæ sibi conciliet, violentaque pectora Turni,  
Edocet ; humanis quæ sit fiducia rebus  
Admonet, immiscetque preces. Haud fit mora ; Tarchon  
Jungit opes, foedusque ferit ; tum libera fati  
Classem conscendit jussis gens Lydia divum,  
Externo commissa duci. Æneia puppis  
Prima tenet, rostro Phrygios subjuncta leones :  
Imminet Ida super, profugis gratissima Teucris.  
Hic magnus sedet Æneas, secumque volutat  
Eventus belli varios ; Pallasque sinistro  
Affixus lateri jam quærit sidera, opacæ  
Noctis iter, jam quæ passus terraque marique.

150

160

Pandite nunc Helicon, deæ, cantusque movete,  
Quæ manus interea Tuscis comitetur ab oris  
Ænean, armetque rates, pelagoque vehatur.

Massicus ærata princeps secat æquora tigri :  
Sub quo mille manus juvenum, qui mœnia Clusi,  
Quique urbem liquere Cosas : queis tela, sagittæ

Gorytique leves humeris et letifer arcus.  
 Una torvus Abas : huic totum insignibus armis 170  
 Agmen, et aurato fulgebat Apolline puppis.  
 Sexcentos illi dederat Populonia mater  
 Expertos belli juvenes ; ast Ilva trecentos  
 Insula, inexhaustis Chalybum generosa metallis.  
 Tertius, ille hominum divumque interpret Asylas,  
 Cui pecudum fibræ, cœli cui sidera parent,  
 Et linguæ volucrum, et præsagi fulminis ignes,  
 Mille rapit densos acie atque horrentibus hastis.  
 Hos parere jubent Alphææ ab origine Pisæ,  
 Urbs Etrusca solo. Sequitur pulcherrimus Astur, 180  
 Astur equo fidens et versicoloribus armis.  
 Tercentum adjiciunt, mens omnibus una sequendi,  
 Qui Cærete domo, qui sunt Minionis in arvis,  
 Et Pyrgi veteres, intempestæque Graviscæ.

Non ego te, Ligurum ductor fortissime bello,  
 Transierim, Cinyra, et paucis comitate Cupavo,  
 Cujus olorinæ surgunt de vertice pennæ :  
 Crimen amor vestrum, formæque insigne paternæ.  
 Namque ferunt, luctu Cycnum Phaëthontis amati, 190  
 Populeas inter frondes umbramque sororum  
 Dum canit, et mæstum Musa solatur amorem,  
 Canentem molli pluma duxisse senectam,  
 Linquentem terras, et sidera voce sequentem.  
 Filius, æquales comitatus classe catervas,  
 Ingentem remis Centaurum promovet ; ille  
 Instat aquæ, saxumque undis immane minatur  
 Arduus, et longa sulcat maria alta carina.

Ille etiam patriis agmen ciet Ocnus ab oris,  
 Fatidicæ Mantus et Tusci filius amnis,  
 Qui muros matrisque dedit tibi, Mantua, nomen,— 200  
 Mantua, dives avis : sed non genus omnibus unum.  
 Gens illi triplex, populi sub gente quaterni :  
 Ipsa caput populis : Tusco de sanguine vires.  
 Hinc quoque quingentos in se Mezentius armat,

Quos patre Benaco velatus arundine glauca  
Mincius infesta ducebat in æquora pinu.

It gravis Aulestes, centenaque arbore fluctus  
Verberat assurgens : spumant vada marmore verso.  
Hunc vehit immanis Triton et cærulea concha  
Exterrens freta : cui laterum tenuis hispida nanti 210  
Frons hominem præfert, in pristin desinit alvus ;  
Spumea semifero sub pectore murmurat unda.  
Tot lecti procures ter denis navibus ibant  
Subsidio Trojæ, et campos salis ære secabant.

Jamque dies cælo concesserat, almaque curru  
Noctivago Phœbe medium pulsabat Olympum :  
Æneas, neque enim membris dat cura quietem,  
Ipse sedens clavumque regit velisque ministrat.  
Atque illi medio in spatio chorus ecce suarum  
Occurrit comitum : Nymphæ, quas alma Cybebe 220  
Numen habere maris, Nymphasque e navibus esse  
Jusserat, innabant pariter, fluctusque secabant,  
Quot prius æratæ steterant ad litora proræ.  
Agnoscunt longe regem, lustrantque choreis.  
Quarum, quæ fandi doctissima, Cymodocea  
Pone sequens dextra puppim tenet, ipsaque dorso  
Eminet, ac læva tacitis subremigat undis.  
Tum sic ignarum alloquitur : “ Vigilasne, deum gens,  
Ænea ? vigila, et velis immitte rudentes.

Nos sumus Idææ sacro de vertice pinus, 230  
Nunc pelagi Nymphæ, classis tua. Perfidus ut nos  
Præcipites ferro Rutulus flammaque premebat,  
Rupimus invitæ tua vincula, teque per æquor  
Quærimus. Hanc Genetrix faciem miserata refecit,  
Et dedit esse deas, ævumque agitare sub undis.  
At puer Ascanius muro fossisque tenetur  
Tela inter media atque horrentes Marte Latinos.  
Jam loca jussa tenent forti permixtus Etrusco  
Arcas eques. Medias illis opponere turmas,  
Ne castris jungant, certa est sententia Turno. 240

Surge age, et Aurora socios veniente vocari  
 Primus in arma jube, et clipeum cape, quem dedit ipse  
 Invictum ignipotens, atque oras ambiit auro.  
 Crastina lux, mea si non irrita dicta putaris,  
 Ingentes Rutulæ spectabit cædis acervos."

Dixerat: et dextra discedens impulit altam,  
 Haud ignara modi, puppim. Fugit illa per undas  
 Ocior et jaculo et ventos æquante sagitta.

Inde aliæ celerant cursus. Stupet inscius ipse  
 Tros Anchisiades; animos tamen omine tollit. 250

Tum breviter supera aspectans convexa precatur:  
 "Alma parens Idæa deum, cui Dindyma cordi,  
 Turrigeræque urbes, bijugique ad frena leones;  
 Tu mihi nunc pugnae princeps, tu rite propinques  
 Augurium, Phrygibusque adsis pede, diva, secundo."  
 Tantum effatus: et interea revoluta ruebat  
 Matura jam luce dies, noctemque fugarat.

Principio sociis edicit, signa sequantur,  
 Atque animos aptent armis, pugnaeque parent se.  
 Jamque in conspectu Teucros habet et sua castra, 260

Stans celsa in puppi: clipeum quum deinde sinistra  
 Extulit ardentem. Clamorem ad sidera tollunt  
 Dardanidæ e muris; spes addita suscitât iras;  
 Tela manu jaciunt. Quales sub nubibus atris  
 Strymonia dant signa grues, atque æthera tranant  
 Cum sonitu, fugiuntque notos clamore secundo.

At Rutulo regi ducibusque ea mira videri  
 Ausoniis; donec versas ad litora puppes  
 Respiciunt, totumque allabi classibus æquor.  
 Ardet apex capiti, cristisque a vertice flamma 270

Funditur, et vastos umbo vomit aureus ignes:  
 Non secus ac liquida si quando nocte cometæ  
 Sanguinei lugubre rubent, aut Sirius ardor:  
 Ille sitim morbosque ferens mortalibus ægris  
 Nascitur, et lævo contristat lumine cælum.

Haud tamen audaci Turno fiducia cessit



Litora præcipere, et venientes pellere terra.

[Ultero animos tollit dictis, atque increpat ultro :]

“Quod votis optastis adest, perfringere dextra.

In manibus Mars ipse, viri. Nunc conjugis esto 280

Quisque suæ tectique memor ; nunc magna referto  
Facta, patrum laudes. Ultero occurramus ad undam,  
Dum trepidi, egressique labant vestigia prima.  
Audentes fortuna juvat.”

Hæc ait, et secum versat, quos ducere contra,

Vel quibus obsessos possit concedere muros.

Interea Æneas socios de puppibus altis

Pontibus exponit. Multi servare recursus

Languentis pelagi, et brevibus se credere saltu ;

Per remos alii. Speculatus litora Tarchon, 290

Qua vada non spirant, nec fracta remurmurat unda,

Sed mare inoffensum crescenti allabitur æstu,

Advertit subito proras, sociosque precatur :

“Nunc, o lecta manus, validis incumbite remis :

Tollite, ferte rates ; inimicam findite rostris

Hanc terram, sulcumque sibi premat ipsa carina.

Frangere nec tali puppim statione recuso,

Arrepta tellure semel.” Quæ talia postquam

Effatus Tarchon, socii consurgere tonsis,

Spumantesque rates arvis inferre Latinis ; 300

Donec rostra tenent siccum, et sedere carinæ

Omnes innocuæ : sed non puppis tua, Tarchon.

Namque inflicta vadis dorso dum pendet iniquo,

Anceps sustentata diu, fluctusque fatigat :

Solvitur, atque viros mediis exponit in undis ;

Fragmina remorum quos et fluitantia transtra

Impediunt, retrahitque pedem simul unda relabens.

Nec Turnum segnis retinet mora : sed rapit acer

Totam aciem in Teucros, et contra in litore sistit.

Signa canunt. Primus turmas invasit agrestes 310

Æneas, omen pugnæ, stravitque Latinos,

Occiso Therone, virum qui maximus ultro

Æneam petit ; huic gladio perque ærea suta,  
 Per tunicam squalentem auro, latus haurit apertum.  
 Inde Lichan ferit, exsectum jam matre peremta,  
 Et tibi, Phœbe, sacrum, casus evadere ferri  
 Quod licuit parvo. Nec longe, Cissea durum  
 Immanemque Gyan, sternentes agmina clava,  
 Dejecit leto : nihil illos Herculis arma,  
 Nec validæ juvere manus, genitorque Melampus, 320  
 Alcidiæ comes, usque graves quum terra labores  
 Præbuit. Ecce Pharo, voces dum jactat inertes,  
 Intorquens jaculum clamanti sistit in ore.  
 Tu quoque, flaventem prima lanugine malas  
 Dum sequeris Clytium infelix, nova gaudia, Cydon,  
 Dardanea stratus dextra, securus amorum,  
 Qui juvenum tibi semper erant, miserande jaceres :  
 Ni fratrum stipata cohors foret obvia, Phorci  
 Progenies, septem numero, septenaque tela  
 Conjiciunt : partim galea clipeoque resultant 330  
 Irrita ; deflexit partim stringentia corpus  
 Alma Venus. Fidum Æneas affatur Achaten :  
 " Suggere tela mihi—non ullum dextera frustra  
 Torserit in Rutulos,—steterunt quæ in corpore Graium  
 Iliacis campis." Tum magnam corripit hastam,  
 Et jacit : illa volans clipei transverberat æra  
 Mæonis, et thoraca simul cum pectore rumpit.  
 Huic frater subit Alcanor, fratremque ruentem  
 Sustentat dextra : trajecto missa lacerto  
 Protinus hasta fugit, servatque cruenta tenorem ; 340  
 Dexteraque ex humero nervis moribunda pependit.  
 Tum Numitor, jaculo fratris de corpore raptō,  
 Ænean petiit ; sed non et figere contra  
 Est licitum, magnique femur perstrinxit Achatæ.  
 Hic Curibus, fidens primævo corpore, Clausus  
 Advenit, et rigida Dryopem ferit eminus hasta  
 Sub mentum, graviter pressa, pariterque loquentis  
 Vocem animamque rapit trajecto gutture ; at ille

Fronte ferit terram, et crassum vomit ore cruorem.  
 Tres quoque Threïcios Boreæ de gente suprema, 350  
 Et tres, quos Idas pater et patria Ismara mittit,  
 Per varios sternit casus. Accurrit Halesus,  
 Auruncæque manus; subit et Neptunia proles,  
 Insignis Messapus equis. Expellere tendunt  
 Nunc hi, nunc illi; certatur limine in ipso  
 Ausoniæ. Magno discordes æthere venti  
 Prælia ceu tollunt animis et viribus æquis;  
 Non ipsi inter se, non nubila, non mare cedunt;  
 Anceps pugna diu; stant obnixi; omnia contra.  
 Haud aliter Trojanæ acies aciesque Latinæ 360  
 Concurrunt; hæret pede pes, densusque viro vir.

At parte ex alia, qua saxa rotantia late  
 Impulerat torrens arbustaque diruta ripis,  
 Arcadas, insuetos acies inferre pedestres,  
 Ut vidit Pallas Latio dare terga sequaci;  
 Aspera queis natura loci dimittere quando  
 Suasit equos: unum quod rebus restat egenis,  
 Nunc prece, nunc dictis virtutem accendit amaris:  
 "Quo fugitis, socii? per vos et fortia facta,  
 Per ducis Evandri nomen, devictaque bella, 370  
 Spemque meam, patriæ quæ nunc subit æmula laudi,  
 Fidite ne pedibus. Ferro rumpenda per hostes  
 Est via. Qua globus ille virum densissimus urget,  
 Hac vos et Pallanta ducem patria alta reposcit.  
 Numina nulla premunt; mortali urgemur ab hoste  
 Mortales; totidem nobis animæque manusque.  
 Ecce, maris magna claudit nos objice pontus;  
 Deest jam terra fugæ: pelagus Trojanne petemus?"  
 Hæc ait, et medius densos prorumpit in hostes.  
 Obvius huic primum, fatis adductus iniquis, 380  
 Fit Lagus: hunc, magno vellit dum pondere saxum,  
 Intorto figit telo, discrimina costis  
 Per medium qua spina dabat; hastamque receptat  
 Ossibus hærentem. Quem non super occubat Hisbo,

Ille quidem hoc sperans : nam Pallas ante ruentem,  
 Dum furit, incautum crudeli morte sodalis,  
 Excipit, atque ensem tumido in pulmone recondit.  
 Hinc Sthenelum petit, et Rhœti de gente vetusta  
 Anchemolum, thalamos ausum incestare novercæ.  
 Vos etiam gemini Rutulis cecidistis in arvis, 390  
 Daucia, Laride Thymberque, simillima proles,  
 Indiscreta suis gratusque parentibus error ;  
 At nunc dura dedit vobis discrimina Pallas :  
 Nam tibi, Thymbre, caput Evandrius abstulit ensis ;  
 Te decisa suum, Laride, dextera quærit,  
 Semianimesque micant digiti, ferrumque retractant.  
 Arcadas accensos monitu, et præclara tuentes  
 Facta viri, mixtus dolor et pûdor armat in hostes.  
 Tum Pallas bijugis fugientem Rhœtea præter  
 Trajicit. Hoc spatium, tantumque moræ fuit Ilo ; 400  
 Ilo namque procul validam direxerat hastam,  
 Quam medius Rhœteus intercipit, optime Teuthra,  
 Te fugiens, fratremque Tyren ; curruque volutus  
 Cædit semianimis Rutulorum calcibus arva.  
 Ac velut, optato ventis æstate coortis,  
 Dispersa immittit silvis incendia pastor ;  
 Correptis subito mediis, extenditur una  
 Horrida per latos acies Vulcania campos ;  
 Ille sedens victor flammæ despectat ovantes :  
 Non aliter socium virtus coit omnis in unum, 410  
 Teque juvat, Palla. Sed bellis acer Halesus  
 Tendit in adversos, seque in sua colligit arma.  
 Hic mactat Ladona, Pheretaque, Demodocumque :  
 Strymonio dextram fulgenti deripit ense  
 Elatam in jugulum ; saxo ferit ora Thoantis,  
 Ossaque dispersit cerebro permixta cruento.  
 Fata canens silvis genitor celarat Halesum,  
 Ut senior leto canentia lumina solvit :  
 Injecere manum Parcæ, telisque sacrarunt  
 Evandri. Quem sic Pallas petit ante precatus : 420

"Da nunc, Thybri pater, ferro, quod missile libro,  
 Fortunam atque viam duri per pectus Halesi.  
 Hæc arma exuviasque viri tua quercus habebit."  
 Audiit illa deus: dum texit Imaona Halesus,  
 Arcadio infelix telo dat pectus inermum.  
 At non cæde viri tanta perterrita Lausus,  
 Pars ingens belli, sinit agmina: primus Abantem  
 Oppositum interimit, pugnae nodumque moramque.  
 Sternitur Arcadiæ proles: sternuntur Etrusci;  
 Et vos, o Graiis imperdita corpora, Teucri.  
 Agmina concurrunt ducibusque et viribus æquis.  
 Extremi addensent acies: nec turba moveri  
 Tela manusque sinit. Hinc Pallas instat et urget,  
 Hinc contra Lausus, nec multum discrepat ætas,  
 Egregii formæ; sed queis fortuna negarat  
 In patriam reditus. Ipsos concurrere passus  
 Haud tamen inter se magni regnator Olympi:  
 Mox illos sua fata manent majore sub hoste.

430

Interea soror alma monet succurrere Lauso  
 Turnum, qui volucris curru medium secat agmen.  
 Ut vidit socios: "Tempus desistere pugnae;  
 Solus ego in Pallanta feror; soli mihi Pallas  
 Debetur; cuperem ipse parens spectator adesset."  
 Hæc ait; et socii cesserunt æquore jusso.  
 At Rutulum abscessu, juvenis tum jussa superba  
 Miratus stupet in Turno, corpusque per ingens  
 Lumina volvit, obitque truci procul omnia visu;  
 Talibus et dictis it contra dicta tyranni:  
 "Aut spoliis ego jam raptis laudabor opimis,  
 Aut leto insigni. Sorti pater æquus utrique est.  
 Tolle minas." Fatus medium procedit in æquor.  
 Frigidus Arcadibus coit in præcordia sanguis.  
 Desiluit Turnus bijugis; pedes apparat ire  
 Cominus. Utque leo, specula quum vidit ab alta  
 Stare procul campis meditantem in prælia taurum,  
 Advolat; haud alia est Turni venientis imago.

440

450

Hunc ubi contiguum missæ fore credidit hastæ,  
Ire prior Pallas, si qua fors adjuvet ausum  
Viribus imparibus, magnumque ita ad æthera fatur :  
“ Per patris hospitium, et mensas quas advena adisti, 460  
Te precor, Alcide, cœptis ingentibus adsis.  
Cernat semineci sibi me rapere arma cruenta,  
Victoremque ferant morientia lumina Turni.”  
Audiit Alcides juvenem, magnumque sub imo  
Corde premit gemitum, lacrimasque effudit inanes.  
Tum Genitor natum dictis affatur amicis :  
“ Stat sua cuique dies ; breve et irreparabile tempus  
Omnibus est vitæ : sed famam extendere factis,  
Hoc virtutis opus. Trojæ sub mœnibus altis 470  
Tot nati cecidere deum ; quin occidit una  
Sarpedon, mea progenies. Etiam sua Turnum  
Fata vocant, metasque dati pervenit ad ævi.”  
Sic ait, atque oculos Rutulorum rejicit arvis.  
At Pallas magnis emittit viribus hastam,  
[Vaginaque cava fulgentem deripit ense.]  
Illa volans, humeris surgunt qua tegmina summa,  
Incidit, atque viam clipei molita per oras,  
Tandem etiam magno strinxit de corpore Turni.  
Hic Turnus ferro præfixum robur acuto  
In Pallanta diu librans jacet, atque ita fatur : 480  
“ Aspice, num mage sit nostrum penetrabile telum.”  
Dixerat ; at clipeum, tot ferri terga, tot æris  
Quum pellis totiens obeat circumdata tauri,  
Vibranti medium cuspis trausverberat ictu,  
Loricæque moras et pectus perforat ingens.  
Ille rapit calidum frustra de vulnere telum :  
Una eademque via sanguis animusque sequuntur.  
Corruit in vulnus ; sonitum super arma dedere ;  
Et terram hostilem moriens petit ore cruento.  
Quem Turnus super adsistens : 490  
“ Arcades, hæc,” inquit, “ memores mea dicta referte  
Evandro : Qualem meruit, Pallanta remitto.

Quisquis honos tumuli, quidquid solamen humandi est,  
 Largior. Haud illi stabunt Æneia parvo  
 Hospitia." Et lævo pressit pede talia fatus  
 Exanimem, rapiens immania pondera baltei,  
 Impressumque nefas—una sub nocte jugali  
 Cæsa manus juvenum fœde, thalamique cruenti,—  
 Quæ Clonus Eurytides multo cælaverat auro :  
 Quo nunc Turnus ovat spolio gaudetque potitus. 500  
 Nescia mens hominum fati sortisque futuræ,  
 Et servare modum, rebus sublata secundis !  
 Turno tempus erit, magno quum optaverit emtum  
 Intactum Pallanta, et quum spolia ista diemque  
 Oderit. At socii multo gemitu lacrimisque  
 Impositum scuto referunt Pallanta frequentes.  
 O dolor atque decus magnum rediture parenti !  
 Hæc te prima dies bello dedit, hæc eadem aufert,  
 Quum tamen ingentes Rutulorum linquis acervos !

Nec jam fama mali tanti, sed certior auctor 510  
 Advolat Æneæ, tenui discrimine leti  
 Esse suos : tempus, versis succurrere Teucris.  
 Proxima quæque metit gladio, latumque per agmen  
 Ardens limitem agit ferro ; te, Turne, superbum  
 Cæde nova quærens. Pallas, Evander, in ipsis  
 Omnia sunt oculis ; mensæ, quas advena primas  
 Tunc adiit, dextræque datæ. Sulmone creatos  
 Quatuor hic juvenes ; totidem, quos educat Ufens,  
 Viventes rapit, inferias quos immolet umbris,  
 Captivoque rogi perfundat sanguine flammæ. 520  
 Inde Mago procul infensam contenderat hastam.  
 Ille astu subit ; at tremebunda supervolat hasta ;  
 Et genua amplexens effatur talia supplex :  
 " Per patrios manes, per spes surgentis Iuli,  
 Te precor, hanc animam serves natoque patrique.  
 Est domus alta ; jacent penitus defossa talenta  
 Cælati argenti ; sunt auri pondera facti  
 Infectique mihi. Non hic victoria Teucrum

Vertitur ; aut anima una dabit discrimina tanta."

Dixerat. Æneas contra cui talia reddit :

530

" Argenti atque auri memoras quæ multa talenta,

Natis parce tuis. Belli commercia Turnus

Sustulit ista prior jam tum Pallante perempto.

Hoc patris Anchisæ manes, hoc sentit Iulus."

Sic fatus galeam læva tenet, atque reflexa

Cervice orantis capulo tenus applicat ensem.

Nec procul Hæmonides, Phœbi Triviæque sacerdos,

Infula cui sacra redimibat tempora vitta,

Totus collucens veste atque insignibus armis :

Quem congressus agit campo, lapsumque superstans 540

Immolat, ingentique umbra tegit ; arma Serestus

Lecta refert humeris, tibi, rex Gradive, tropæum.

Instaurant acies Vulcani stirpe creatus

Cæculus et veniens Marsorum montibus Umbro.

Dardanides contra furit. Anxuris ense sinistram

Et totum clipei ferro dejecerat orbem ;—

Dixerat ille aliquid magnum, vimque affore verbo

Crediderat, cœloque animum fortasse ferebat,

Canitiemque sibi et longos promiserat annos ;—

Tarquitus exsultans contra fulgentibus armis, 550

Silvicolæ Fauno Dryope quem nympha crearat,

Obvius ardenti sese obtulit. Ille reducta

Loricam clipeique ingens onus impedit hasta.

Tum caput orantis nequidquam, et multa parantis

Dicere, deturbat terræ, truncumque tepentem

Provolvens, super hæc inimico pectore fatur :

" Istic nunc, metuende, jace. Non te optima mater

Condet humi, patriove onerabit membra sepulcro :

Alitibus linquere feris ; aut gurgite mersum

Unda feret, piscesque impasti vulnera lambent." 560

Protenus Antæum et Lucam, prima agmina Turni,

Persequitur, fortemque Numam, fulvumque Camertem,

Magnanimo Volscente satum, ditissimus agri

Qui fuit Ausonidum, et tacitis regnavit Amyclis.



Ægeon qualis, centum cui brachia dicunt  
 Centenasque manus, quinquaginta oribus ignem  
 Pectoribusque arsisse, Jovis quum fulmina contra  
 Tot paribus streperet clipeis, tot stringeret enses :  
 Sic toto Æneas desævit in æquore victor,  
 Ut semel intepuit mucro. Quin ecce Niphæi 570  
 Quadrijuges in equos adversaque pectora tendit :  
 Atque illi longe gradientem et dira frementem  
 Ut videre, metu versi retroque ruentes  
 Effunduntque ducem, rapiuntque ad litora currus.  
 Interea bijugis infert se Lucagus albis  
 In medios, fraterque Liger ; sed frater habenis  
 Flectit equos, strictum rotat acer Lucagus ensem.  
 Haud tulit Æneas tanto fervore furentes :  
 Irruit, adversaque ingens apparuit hasta.  
 Cui Liger : 580  
 “ Non Diomedis equos, nec currus cernis Achilli,  
 Aut Phrygiæ campos : nunc belli finis et ævi  
 His dabitur terris.” Vesano talia late  
 Dicta volant Ligeri : sed non et Troïus heros  
 Dicta parat contra ; jaculum nam torquet in hostem.  
 Lucagus ut pronus pendens in verbera telo  
 Admonuit bijugos ; projecto dum pede lævo  
 Aptat se pugnæ ; subit oras hasta per imas  
 Fulgentis clipei, tum lævum perforat inguen ;  
 Excussus curru moribundus volvitur arvis. 590  
 Quem pius Æneas dictis affatur amaris :  
 “ Lucage, nulla tuos currus fuga segnis equorum  
 Prodidit, aut vanæ vertere ex hostibus umoræ :  
 Ipse rotis saliens juga deseris.” Hæc ita fatus  
 Arripuit bijugos. Frater tendebat inermes  
 Infelix palmas. curru delapsus eodem :  
 “ Per te, per qui te talem genuere parentes,  
 Vir Trojane, sine hanc animam, et miserere precantis.”  
 Pluribus oranti Æneas : “ Haud talia dudum  
 Dicta dabas. Morere, et fratrem ne desere frater.” 600

Tum latebras animæ, pectus mucrone recludit.  
 Talia per campos edebat funera ductor  
 Dardanius, torrentis aquæ vel turbinis atri  
 More furens. Tandem erumpunt, et castra relinquunt  
 Ascanius puer et nequidquam obsessa juvenus.

Junonem interea compellat Jupiter ultro :

“O germana mihi atque eadem gratissima conjux,  
 Ut rebare, Venus—nec te sententia fallit—  
 Trojanas sustentat opes : non vivida bello  
 Dextra viris, animusque ferox, patiensque pericli.” 610  
 Cui Juno submissa : “Quid, o pulcherrime conjux,  
 Sollicitas ægram et tua tristia dicta timentem ?  
 Si mihi, quæ quondam fuerat, quamque esse decebat,  
 Vis in amore foret ; non hoc mihi namque negares,  
 Omnipotens, quin et pugnæ subducere Turnum,  
 Et Dauno possem incolumem servare parenti.  
 Nunc pereat, Teucrisque pio det sanguine pœnas.  
 Ille tamen nostra deducit origine nomen,  
 Pilumnusque illi quartus pater ; et tua larga  
 sæpe manu multisque oneravit limina donis.” 620

Cui rex ætherii breviter sic fatur Olympi :  
 “Si mora præsentis leti tempusque caduco  
 Oratur juveni, meque hoc ita ponere sentis :  
 Tolle fuga Turnum, atque instantibus eripe fati.  
 Hactenus indulsisse vacat. Sin altior istis  
 Sub precibus venia ulla latet, totumque moveri  
 Mutarive putas bellum : spes pascis inanes.”  
 Et Juno allacrimans : “Quid si, quod voce gravaris,  
 Mente dares ; atque hæc Turno rata vita maneret ?  
 Nunc manet insontem gravis exitus : aut ego veri 630  
 Vana feror. Quod ut o potius formidine falsa  
 Ludar, et in melius tua, qui potes, orsa reflectas ?”  
 Hæc ubi dicta dedit, cœlo se protenus alto  
 Misit, agens hiemem nimbo succincta per auras ;  
 Iliacamque aciem et Laurentia castra petivit.  
 Tum dea nube cava tenuem sine viribus umbram

In faciem Æneæ, visu mirabile monstrum,  
 Dardaniis ornat telis; clipeumque júbisque  
 Divini assimulat capitis; dat inania verba;  
 Dat sine mente sonum, gressusque effingit euntis: 640  
 Morte obita quales fama est volitare figuras,  
 Aut quæ sopitos deludunt somnia sensus.  
 At primas læta ante acies exsultat imago,  
 Irritatque virum telis, et voce lacescit.  
 Instat cui Turnus, stridentemque eminus hastam  
 Conjicit; illa dato vertit vestigia tergo.  
 Tum vero Ænean aversum ut cedere Turnus  
 Credidit, atque animo spem turbidus hausit inanem:  
 "Quo fugis, Ænea? thalamos ne desere pactos:  
 Hac dabitur dextra tellus quæsitæ per undas." 650  
 Talia vociferans sequitur, strictumque coruscat  
 Mucronem; nec ferre videt sua gaudia ventos.  
 Forte ratis celsi conjuncta crepidine saxi  
 Expositis stabat scalis, et ponte parato;  
 Qua rex Clusinis advectus Osinius oris.  
 Huc sese trepida Æneæ fugientis imago  
 Conjicit in latebras; nec Turnus segnior instat;  
 Exsuperatque moras, et pontes transilit altos.  
 Vix proram attigerat: rumpit Saturnia funem,  
 Avulsamque rapit revoluta per æquora navem. 660  
 Illum autem Æneas absentem in prœlia poscit;  
 Obvia multa virum demittit corpora morti.  
 Tum levis haud ultra latebras jam quærit imago,  
 Sed sublime volans nubi se immiscuit atræ:  
 Quum Turnum medio interea fert æquore turbo.  
 Respicit ignarus rerum, ingratusque salutis,  
 Et duplices cum voce manus ad sidera tendit:  
 "Omnipotens genitor, tanton' me crimine dignum  
 Duxisti, et tales voluisti expendere pœnas?  
 Quo feror? unde abii? quæ me fuga, quemve reducet? 670  
 Laurentisne iterum muros aut castra videbo?  
 Quid manus illa virum, qui me meaque arma secuti?

Quosne, nefas! omnes infanda in morte reliqui?  
 Et nunc palantes video, gemitumque cadentium  
 Accipio. Quid ago? aut quæ jam satis ima dehiscat  
 Terra mihi? vos o potius miserescite, venti,  
 In rupes, in saxa—volens vos Turnus adoro—  
 Ferte ratem, sævisque vadis immittite Syrtis,  
 Quo neque me Rutuli, nec conscia fama sequatur.”  
 Hæc memorans, animo nunc huc, nunc fluctuat illuc; 680  
 An sese mucrone ob tantum dedecus amens  
 Induat, et crudum per costas exigit ensem;  
 Fluctibus an jaciat mediis, et litora nando  
 Curva petat, Teucrumque iterum se reddat in arma.  
 Ter conatus utramque viam: ter maxima Juno  
 Continuit; juvenemque animi miserata repressit.  
 Labitur alta secans fluctuque æstuque securdo;  
 Et patris antiquam Dauni defertur ad urbem.

At Jovis interea monitis Mezentius ardens  
 Succedit pugnae, Teucrosque invadit ovantes. 690  
 Concurrunt Tyrrhenæ acies, atque omnibus uni,  
 Uni odiisque viro telisque frequentibus instant.  
 Ille, velut rupes vastum quæ prodit in æquor,  
 Obvia ventorum furiis, expostaque ponto,  
 Vim cunctam atque minas perfert cœlique marisque,  
 Ipsa immota manens: prolem Dolichaonis Hebrum  
 Sternit humi, cum quo Latagum, Palmumque fugacem:  
 Sed Latagum saxo atque ingenti fragmine montis  
 Occupat os faciemque adversam; poplite Palmum  
 Succiso volvi segnem sinit; armaque Lauso 700  
 Donat habere humeris, et vertice figere cristas.  
 Nec non Evanthen Phrygium, Paridisque Mimanta  
 Æqualem comitemque: una quem nocte Theano  
 In lucem genitori Amyco dedit, et face prægnans  
 Cisseis regina Parin: Paris urbe paterna  
 Occubat; ignarum Laurens habet ora Mimanta.  
 Ac velut ille canum morsu de montibus altis  
 Actus aper, multos Vesulus quem pinifer annos

Defendit, multosve palus Laurentia, silva  
 Pastus arundinea, postquam inter retia ventum est, 710  
 Substitit, infremuitque ferox, et inhorruit armos :  
 Nec cuiquam irasci propiusve accedere virtus,  
 Sed jaculis tutisque procul clamoribus instant :  
 Ille autem impavidus partes cunctatur in omnes,  
 Dentibus infrendens, et tergo decutit hastas :  
 Haud aliter, justæ quibus est Mezentius iræ,  
 Non ulli est animus stricto concurrere ferro ;  
 Missilibus longe et vasto clamore lacesunt.  
 Venerat antiquis Corythi de finibus Acron,  
 Graius homo, infectos linquens profugus hymenæos : 720  
 Hunc ubi miscentem longe media agmina vidit,  
 Purpureum penuis et pactæ conjugis ostro :  
 Impastus stabula alta leo ceu sæpe peragrans—  
 Suadet enim vesana fames—si forte fugacem  
 Conspexit capream, aut surgentem in cornua cervum,  
 Gaudet, hians immane, comasque arrexit, et hæret  
 Visceribus super incumbens ; lavit improba teter  
 Ora cruor :  
 Sic ruit in densos alacer Mezentius hostes.  
 Sternitur iufelix Acron, et calcibus atram 730  
 Tundit humum exspirans, infractaque tela cruentat.  
 Atque idem fugientem haud est dignatus Orodem  
 Sternere, nec jacta cæcum dare cuspidem vulnus :  
 Obvius adversoque occurrit, seque viro vir  
 Contulit, haud furto melior, sed fortibus armis.  
 Tum super abjectum posito pede nixus et hasta :  
 Pars belli haud temnenda, viri, jacet altus Orodes.  
 Conclamant socii lætum pæana secuti.  
 Ille autem exspirans : “ Non me, quicumque es, inulto,  
 Victor, nec longum lætabere : te quoque fata 740  
 Prospectant paria, atque eadem mox arva tenebis.”  
 Ad quem subridens mixta Mezentius ira :  
 “ Nunc morere. Ast de me divum pater atque hominum rex  
 Viderit.” Hæc dicens eduxit corpore telum.

Olli dura quies oculos et ferreus urget  
 Somnus ; in æternam clauduntur lumina noctem.  
 Cædicus Alcathoum obtruncat, Sacratôr Hydaspem ;  
 Partheniumque Rapo et prædurum viribus Orsen :  
 Messapus Cloniumque Lycaoniumque Ericeten ;  
 Illum infrenis equi lapsu tellure jacentem,  
 Hunc peditem pedes. Et Lycius processerat Agis,  
 Quem tamen haud expers Valerus virtutis avitæ  
 Dejicit ; at Thronium Salius, Saliūque Nealces,  
 Insignis jaculo et longe fallente sagitta.

750

Jam gravis æquabat luctus et mutua Mavors  
 Funera ; cædebant pariter pariterque ruebant  
 Victores victique ; neque his fuga nota, neque illis.  
 Di Jovis in tectis iram miserantur inanem  
 Amborum, et tantos mortalibus esse labores ;  
 Hinc Venus, hinc contra spectat Saturnia Juno.  
 Pallida Tisiphone media inter millia sævit.  
 At vero ingentem quatiens Mezentius hastam  
 Turbidus ingreditur campo. Quam magnus Orion,  
 Quum pedes incedit medii per maxima Nerei  
 Stagna viam scindens, humero supereminet undas ;  
 Aut, summis referens annosam montibus ornum,  
 Ingrediturque solo et caput inter nubila condit :  
 Talis se vastis infert Mezentius armis.

760

Huic contra Æneas, speculatus in agmine longo,  
 Obvius ire parat. Manet imperterritus ille,  
 Hostem magnanimum opperiens, et mole sua stat ;  
 Atque oculis spatium emensus, quantum satis hastæ :  
 "Dextra, mihi deus, et telum, quod missile libro,  
 Nunc adsint ; voveo prædonis corpore raptis  
 Indutum spoliis ipsum te, Lause, tropæum  
 Æneæ." Dixit ; stridentemque eminus hastam  
 Injicit ; illa volans clipeo est excussa, proculque  
 Egregium Antoren latus inter et ilia figit :  
 Herculis Antoren comitem, qui missus ab Argis  
 Hæserat Evandro, atque Itala consederat urbe.

770

780

Sternitur infelix alieno vulnere, cœlumque  
 Aspicit, et dulces moriens reminiscitur Argos.  
 Tum pius Æneas hastam jacet : illa per orbem  
 Ære cavum triplici, per lineâ terga, tribusque  
 Transiit intextum tauris opus, imaque sedit  
 Inguine ; sed vires haud pertulit. Ocius ensem  
 Æneas, viso Tyrrheni sanguine lætus,  
 Eripit a femine, et trepidanti fervidus instat.  
 Ingemuit cari graviter genitoris amore,  
 Ut vidit, Lausus ; lacrimæque per ora volutæ. 790  
 Hic mortis duræ casum tuaque optima facta,  
 Si qua fidem tanto est operi latura vetustas,  
 Non equidem, nec te, juvenis memorande, silebo.  
 Ille pedem referens, et inutilis, inque ligatus  
 Cedebat, clipeoque inimicum hastile trahebat.  
 Prorupit juvenis, seseque immiscuit armis ;  
 Jamque assurgentis dextra plagamque ferentis  
 Æneæ subiit mucronem, ipsumque morando  
 Sustinuit ; socii magno clamore sequuntur,  
 Dum genitor nati parma protectus abiret ; 800  
 Telaque conjiciunt, proturbantque eminus hostem  
 Missilibus. Furit Æneas, tectusque tenet se.  
 Ac velut, effusa si quando grandine nimbi  
 Præcipitant, omnis campis diffugit arator,  
 Omnis et agricola, et tuta latet arce viator  
 Aut amnis ripis aut alti fornice saxi,  
 Dum pluit in terris ; ut possint, sole reducto,  
 Exercere diem : sic obrutus undique telis  
 Æneas nubem belli, dum detonet, omnem  
 Sustinet, et Lausum increpitat, Lausoque minatur : 810  
 “ Quo moriture ruis, majoraque viribus audes ?  
 Fallit te incautum pietas tua.” Nec minus ille  
 Exsultat demens : sævæ jamque altius iræ  
 Dardanio surgunt ductori, extremaque Lauso  
 Parcæ fila legunt : validum namque exigit ensem  
 Per medium Æneas juvenem, totumque recondit :

Transiit et parmam mucro, leviam arma minacis,  
 Et tunicam, molli mater quam neverat auro;  
 Implevitque sinum sanguis; tum vita per auras  
 Concessit mæsta ad manes, corpusque reliquit. 820  
 At vero ut vultum vidit morientis et ora,  
 Ora modis Anchisiades pallentia miris,  
 Ingemuit miserans graviter, dextramque tetendit;  
 Et mentem patriæ strinxit pietatis imago.  
 "Quid tibi nunc, miserande puer, pro laudibus istis,  
 Quid pius Æneas tanta dabit indole dignum?  
 Arma, quibus lætatus, habes tua; teque parentum  
 Manibus et cineri, si qua est ea cura, remitto.  
 Hoc tamen infelix miseram solabere mortem:  
 Æneæ magni dextra cadis." Increpat ultro 830  
 Cunctantes socios, et terra sublevat ipsum,  
 Sanguine turpantem comtos de more capillos.

Interea genitor Tiberini ad fluminis undam  
 Vulnera siccat lymphis, corpusque levabat  
 Arboris acclinis trunco. Procul ærea ramis  
 Dependet galea, et prato gravia arma quiescunt.  
 Stant lecti circum juvenes: ipse æger, anhelans,  
 Colla fovet, fusus propexam in pectore barbam;  
 Multa super Lauso rogitat, multumque remittit,  
 Qui revocent, mæstique ferant mandata parentis. 840  
 At Lausum socii exanimem super arma ferebant  
 Flentes, ingentem, atque ingenti vulnere victum.  
 Agnovit longe gemitum præsaga mali mens.  
 Canitiem multo deformat pulvere, et ambas  
 Ad cælum tendit palmas, et corpore inhæret.  
 "Tantane me tenuit vivendi, nate, voluptas,  
 Ut pro me hostili paterer succedere dextræ,  
 Quem genui? Tuane hæc genitor per vulnera servor,  
 Morte tua vivens? Heu, nunc misero mihi demum  
 Exsilium infelix! nunc alte vulnus adactum! 850  
 Idem ego, nate, tuum maculavi crimine nomen,  
 Pulsus ob invidiam solio sceptrisque paternis.



Debueram patriæ poenas odiisque meorum :  
 Omnes per mortes animam sontem ipse dedissem !  
 Nunc vivo ! neque adhuc homines lucemque relinquo !  
 Sed linquam." Simul hoc dicens attollit in ægrum  
 Se femur ; et, quamquam vis altò vulnere tardat,  
 Haud dejectus equum duci jubet. Hoc decus illi,  
 Hoc solamen erat ; bellis hoc victor abibat  
 Omnibus. Alloquitur mærentem, et talibus infit : 860  
 " Rhœbe, diu—res si qua diu mortalibus ulla est—  
 Viximus. Aut hodie victor spolia illa cruenta  
 Et caput Æneæ referes, Lausique dolorum  
 Ultor eris mecum : aut, aperit si nulla viam vis,  
 Occumbes pariter. Neque enim, fortissime, credo,  
 Jussa aliena pati et dominos dignabere Teucros."  
 Dixit, et exceptus tergo consueta locavit  
 Membra, manusque ambas jaculis oneravit acutis,  
 Ære caput fulgens, cristaque hirsutus equina.  
 Sic cursum in medios rapidus dedit. Æstuat ingens 870  
 Uno in corde pudor, mixtoque insania luctu,  
 [Et Furiis agitatus amor, et conscia virtus ;]  
 Atque hic Ænean magna ter voce vocavit.  
 Æneas—agnovit enim—lætusque precatur :  
 " Sic pater ille deum faciat, sic altus Apollo !  
 Incipias conferre manum."  
 Tantum effatus, et infesta subit obuius hasta.  
 Ille autem : " Quid me erepto, sævissime, nato  
 Terres ? hæc via sola fuit, qua perdere posses.  
 Nec mortem horremus, nec divum parcimus ulli. 880  
 Desine : jam venio moriturus, et hæc tibi porto  
 Dona prius." Dixit, telumque intorsit in hostem ;  
 Inde aliud super atque aliud figitque, volatque  
 Ingenti gyro : sed sustinet aureus umbo.  
 Ter circum adstantem lævos equitavit in orbes,  
 Tela manu jaciens ; ter secum Troïus heros  
 Immanem ærato circumfert tegmine silvam.  
 Inde ubi tot traxisse moras, tot spicula tædet

Vellere, et urgetur pugna congressus iniqua :  
Multa movens animo, jam tandem erumpit, et inter 890  
Bellatoris equi cava tempora conjicit hastam.  
Tollit se arrectum quadrupes, et calcibus auras  
Verberat, effusumque equitem super ipse secutus  
Implicat, ejectoque incumbit cernuus armo.  
Clamore incendunt cœlum Troësque Latinique.  
Advolat Æneas, vaginaque eripit ensem,  
Et super hæc : “ Ubi nunc Mezentius acer, et illa  
Effera vis animi ?” Contra Tyrrhenus, ut auras  
Suspiciens hausit cœlum, mentemque recepit :  
“ Hostis amare, quid increpitas, mortemque minaris ? 900  
Nullum in cæde nefas ; nec sic ad prælia veni ;  
Nec tecum meus hæc pepigit mihi fœdera Lausus.  
Unum hoc, per, si qua est victis venia hostibus, oro :  
Corpus humo patiare tegi. Scio acerba meorum  
Circumstare odia : hunc, oro, defende furorem,  
Et me consortem nati concede sepulcro.”  
Hæc loquitur, juguloque haud inscius accipit ensem,  
Undantique animam diffundit in arma cruore.

P. VIRGILII MARONIS

Æ N E I D O S

LIBER UNDECIMUS.



OCEANUM interea surgens Aurora reliquit.  
Æneas, quamquam et sociis dare tempus humanis  
Præcipitant curæ, turbataque funere mens est,  
Vota deum primo victor solvebat Eoo.  
Ingentem quercum decisis undique ramis  
Constituit tumulo, fulgentiaque induit arma,  
Mezenti ducis exuvias ; tibi, magne, tropæum,  
Bellipotens : aptat rorantes sanguine cristas,  
Telaque trunca viri, et bis sex thoraca petitem  
Perfossumque locis : clipeumque ex ære sinistrae  
Subligat, atque ensem collo suspendit eburnum.  
Tum socios, namque omnis eum stipata tegebat  
Turba ducum, sic incipiens hortatur ovantes :  
“ Maxima res effecta, viri ; timor omnis abesto,  
Quod superest ; hæc sunt spolia, et de rege superbo  
Primitiæ ; manibusque meis Mezentius hic est.  
Nunc iter ad regem nobis murosque Latinos.  
Arma parate animis, et spe præsumite bellum,  
Ne qua mora ignaros, ubi primum vellere signa  
Annuerint superi pubemque educere castris,  
Impediat, segnisve metu sententia tardet.  
Interea socios inhumataque corpora terræ  
Mandemus : qui solus honos Acheronte sub imo est.  
Ite,” ait ; “ egregias animas, quæ sanguine nobis  
Hanc patriam peperere suo, decorate supremis

10

20

Muneribus ; mæstamque Evandri primus ad urbem  
Mittatur Pallas, quem non virtutis egentem  
Abstulit atra dies, et funcre mersit acerbo."

Sic ait illacrimans, recipitque ad limina gressum :

Corpus ubi exanimi positum Pallantis Accætes 30

Servabat senior, qui Parrhasio Evandro

Armiger ante fuit ; sed non felicibus æque

Tum comes auspiciis caro datus ibat alumno.

Circum omnis famulumque manus Trojanaque turba

Et mæstum Iliades crinem de more solutæ.

Ut vero Æneas foribus sese intulit altis,

Ingentem gemitum tunsis ad sidera tollunt

Pectoribus, mæstoque immugit regia luctu.

Ipse caput nivei fultum Pallantis et ora

Ut vidit, levique patens in pectore vulnus 40

Cuspidis Ausoniæ, lacrimis ita fatur obortis :

"Tene," inquit, "miserande puer, quum læta veniret,

Invidit fortuna mihi, ne regna videres

Nostra, neque ad sedes victor veherere paternas ?

Non hæc Evandro de te promissa parenti

Discedens dederam : quum me complexus euntem

Mitteret in magnum imperium, metuensque moneret

Acres esse viros, cum dura prælia gente.

Et nunc ille quidem spe multum captus inani

Fors et vota facit, cumulatque altaria donis ; 50

Nos juvenem exanimum, et nil jam cœlestibus ullis

Debentem, vano mæsti comitamur honore.

Infelix, nati funus crudele videbis !

Hi nostri reditus, exspectatique triumphi ?

Hæc mea magna fides ? At non, Evandre, pudendis

Vulneribus pulsum aspicias : nec sospite dirum

Optabis nato funus pater. Hei mihi, quantum

Præsidium Ausonia, et quantum tu perdis, Iule !"

Hæc ubi deflevit, tolli miserabile corpus

Imperat, et toto lectos ex agmine mittit 60

Mille viros, qui supremum comitentur honorem,

Intersintque patris lacrimis : solatia luctus  
 Exigua ingentis, misero sed debita patri.  
 Haud segnes alii crates et molle feretrum  
 Arbuteis texunt virgis et vimine querno,  
 Exstructosque toros obtentu frondis inumbrant.  
 Hic juvenem agresti sublimem stramine ponunt ;  
 Qualem virgineo demessum pollice florem  
 Seu mollis violæ, seu languentis hyacinthi,  
 Cui neque fulgor adhuc, nec dum sua forma recessit ; 70  
 Non jam mater alit tellus, viresque ministrat.  
 Tunc geminas vestes auroque ostroque rigentes  
 Extulit Æneas, quas illi læta laborum  
 Ipsa suis quondam manibus Sidonia Dido  
 Fecerat, et tenui telas discreverat auro.  
 Harum unam juveni supremum mæstus honorem  
 Induit, arsurasque comas obnubit amictu ;  
 Multaque præterea Laurentis præmia pugnae  
 Aggerat, et longo prædam jubet ordine duci.  
 Addit equos et tela, quibus spoliaverat hostem. 80  
 Vinxerat et post terga manus, quos mitteret umbris  
 Inferias, cæso sparsuros sanguine flammam ;  
 Indutosque jubet truncos hostilibus armis  
 Ipsos ferre duces, inimicaque nomina figi.  
 Ducitur infelix ævo confectus Acætes,  
 Pectora nunc fœdans pugnis, nunc unguibus ora ;  
 Sternitur, et toto projectus corpore terræ.  
 Ducunt et Rutulo perfusos sanguine currus.  
 Post bellator equus, positus insignibus, Æthon  
 It lacrimans, guttisque humectat grandibus ora. 90  
 Hastam alii galeamque ferunt ; nam cetera Turnus  
 Victor habet. Tum mæsta phalanx Teucrique sequuntur,  
 Tyrrhenique duces, et versis Arcades armis.  
 Postquam omnis longe comitum processerat ordo,  
 Substitit Æneas, gemituque hæc addidit alto :  
 “ Nos alias hinc ad lacrimas eadem horrida belli  
 Fata vocant. Salve æternum mihi, maxime Palla,

Æternumque vale." Nec plura effatus ad altos  
Tendebat muros, gressumque in castra ferebat.

Jamque oratores aderant ex urbe Latina, 100  
Velati ramis oleæ, veniamque rogantes :

Corpora, per campos ferro quæ fusa jacebant,  
Redderet, ac tumulo sinceret succedere terræ ;  
Nullum cum vietis certamen et æthere cassis ;  
Parceret hospitibus quondam socerisque vocatis.  
Quos bonus Æneas, haud aspernanda precantes,  
Prosequitur venia, et verbis hæc insuper addit :

"Quænam vos tanto fortuna indigna, Latini,  
Implicuit bello, qui nos fugiatis amicos ? 110  
Pacem me exanimis et Martis sorte peremtis  
Oratis ? equidem et vivis concedere vellem.

Nec veni, nisi fata locum sedemque dedissent ;  
Nec bellum cum gente gero : rex nostra reliquit  
Hospitia, et Turni potius se credidit armis.

Æquius huic Turnum fuerat se opponere morti.

Si bellum finire manu, si pellere Teucros  
Apparat, his mecum decuit concurrere telis ;  
Vixet, cui vitam deus aut sua dextra dedisset.  
Nunc ite, et miseris supponite civibus ignem."

Dixerat Æneas. Olli obstupuerunt silentes ; 120  
Conversique oculos inter se atque ora tenebant.

Tum senior semperque odiis et crimine Drances  
Infensus juveni Turno sic ore vicissim

Orsa refert : " O fama ingens, ingentior armis,  
Vir Trojane, quibus cœlo te laudibus æquem ?  
Justitiæne prius mirer, belline laborum ?

Nos vero hæc patriam grati referemus ad urbem ;  
Et te, si qua viam dederit fortuna, Latino  
Jungemus regi. Quærat sibi fœdera Turnus.

Quin et fatales murorum attollere moles, 130  
Saxaque subvectare humeris Trojana juvabit."

Dixerat hæc, unoque omnes eadem ore fremebant.  
Bis senos pepigere dies, et pace sequestra

Per silvas Teucri, mixtique impune Latini,  
Erravere jugis. Ferro sonat icta bipenni  
Fraxinus; evertunt actas ad sidera pinus;  
Robora nec cuneis et olentem scindere cedrum,  
Nec plaustris cessant vectare gementibus ornos.

Et jam Fama volans, tanti prænuncia luctus,  
Evandrum Evandrique domos et mœnia complet, 140  
Quæ modo victorem Latio Pallanta ferebat.

Arcades ad portas ruere, et de more vetusto  
Funereas rapuere faces. Lucet via longo  
Ordine flammarum, et late discriminat agros.  
Contra turba Phrygum veniens plangentia jungunt  
Agmina. Quæ postquam matres succedere tectis  
Viderunt, mæstam incendunt clamoribus urbem.  
At non Evandrum potis est vis ulla tenere;  
Sed venit in medios. Feretro Pallanta reposito  
Procubuitsuper, atque hæret lacrimansque gemensque, 150  
Et via vix tandem voci laxata dolore est:

“ Non hæc, o Palla, dederas promissa parenti.  
Cautius ut sævo velles te credere Marti!  
Haud ignarus eram, quantum nova gloria in armis,  
Et prædulce decus primo certamine posset.  
Primitiæ juvenis miseræ! bellicque propinqui  
Dura rudimenta! et nulli exaudita deorum  
Vota precesque meæ! tuque, o sanctissima conjux,  
Felix morte tua, neque in hunc servata dolorem!  
Contra ego vivendo vici mea fata, superstes 160  
Restarem ut genitor. Troum socia arma secutum  
Obruerent Rutuli telis! animam ipse dedissem,  
Atque hæc pompa domum me, non Pallanta, referret!  
Nec vos arguerim, Teucri, nec fœdera, nec quas  
Junximus hospitio dextras; sors ista senectæ  
Debita erat nostræ. Quod si immatura manebat  
Mors natum, cæsis Volscorum millibus ante,  
Ducentem in Latium Teucros cecidisse juvabit.  
Quin ego non alio digner te funere, Palla,

Quam pius Æneas, et quam magni Phryges et quam 170  
 Tyrrhenique duces, Tyrrhenum exercitus omnis.  
 Magna tropæa ferunt, quos dat tua dextera leto ;  
 Tu quoque nunc stares immanis truncus in armis ;  
 Esset par ætas, et idem si robur ab annis,  
 Turne. Sed infelix Teucros quid demoror armis ?  
 Vadite, et hæc memores regi mandata referte :  
 Quod vitam moror invisam, Pallante peremto,  
 Dextera causa tua est ; Turnum natoque patrique  
 Quam debere vides. Meritis vacat hic tibi solus  
 Fortunæque locus. Non vitæ gaudia quæro, 180  
 Nec fas : sed nato manes perferre sub imos."

Aurora interea miseris mortalibus almam  
 Extulerat lucem, referens opera atque labores.  
 Jam pater Æneas, jam curvo in litore Tarchon  
 Constituere pyras : huc corpora quisque suorum  
 More tulere patrum ; subjectisque ignibus atris  
 Conditur in tenebras altum caligine cœlum.  
 Ter circum accensos, cincti fulgentibus armis,  
 Decurrere rogos ; ter mæstum funeris ignem 190  
 Lustravere in equis ; ululatusque ore dedere.  
 Spargitur et tellus lacrimis, sparguntur et arma.  
 It cœlo clamorque virum clangorque tubarum.  
 Hinc alii spolia occisis derepta Latinis  
 Conjiciunt igni, galeas, ensesque decoros,  
 Frenaque, ferventesque rotas ; pars munera nota,  
 Ipsorum clipeos, et non felicia tela.  
 Multa boum circa mactantur corpora Morti ;  
 Sætigerosque sues raptasque ex omnibus agris  
 In flammam jugulant pecudes. Tum litore toto  
 Ardentes spectant socios, semiustaque servant 200  
 Busta ; neque avelli possunt, nox humida donec  
 Invertit cœlum stellis fulgentibus aptum.

Nec minus et miseri diversa in parte Latini  
 Innumeras struxere pyras ; et corpora partim  
 Multa virum terræ infodiunt, avectaque partim



Finitimos tollunt in agros, urbique remittunt :  
 Cetera, confusæque ingentem cædis acervum,  
 Nec numero nec honore cremant ; tunc undique vasti  
 Certatim crebris collucent ignibus agri.  
 Tertia lux gelidam cœlo dimoverat umbram : 210  
 Mærentes altum cinerem et confusa ruebant  
 Ossa focis, tepidoque onerabant aggere terræ.  
 Jam vero in tectis prædivitis urbe Latini  
 Præcipuus fragor, et longi pars maxima luctus.  
 Hic matres, miseræque nurus, hic cara sororum  
 Pectora mærentum, puerique parentibus orbi,  
 Dirum exsecrantur bellum Turnique hymenæos ;  
 Ipsum armis, ipsumque jubent decernere ferro,  
 Qui regnum Italiæ et primos sibi poscat honores.  
 Ingravat hæc sævus Drances, solumque vocari 220  
 Testatur, solum posci in certamina Turnum.  
 Multa simul contra variis sententia dictis  
 Pro Turno ; et magnum reginæ nomen obumbrat ;  
 Multa virum meritis sustentat fama tropæis.  
 Hos inter motus, medio in flagrante tumultu,  
 Ecce, super mæsti magna Diomedis ab urbe  
 Legati responsa ferunt : nihil omnibus actum  
 Tantorum impensis operum ; nil dona, neque aurum,  
 Nec magnas valuisse preces ; alia arma Latinis  
 Quærenda, aut pacem Trojano ab rege petendam. 230  
 Deficit ingenti luctu rex ipse Latinus.  
 Fatalem Ænean manifesto numine ferri,  
 Admonet ira deûm, tumulique ante ora recentes.  
 Ergo concilium magnum, primosque suorum  
 Imperio accitos, alta intra limina cogit.  
 Olli convenere, fluuntque ad regia plenis  
 Tecta viis. Sedet in mediis et maximus ævo,  
 Et primus sceptris, haud læta fronte, Latinus.  
 Atque hic legatos Ætola ex urbe remissos,  
 Quæ referant, fari jubet, et responsa reposit 240  
 Ordine cuncta suo. Tum facta silentia linguis.

Et Venulus dicto parens ita farier infit :

“ Vidimus, o cives, Diomedem Argivæque castra,

Atque iter emensi casus superavimus omnes ;

Contigimusque manum, qua concidit Iliæ tellus.

Ille urbem Argypriam, patriæ cognominæ gentis,

Victor Gargani condebat Iapygis arvis.

Postquam introgressi, et coram data copia fandi :

Munera præferimus, nomen patriamque docemus ;

Qui bellum intulerint, quæ causa attraxerit Arpos. 250

Auditis ille hæc placido sic reddidit ore :

‘ O fortunatæ gentes, Saturnia regna,

Antiqui Ansonii, quæ vos fortuna quietos

Sollicitat, suadetque ignota lacescere bella ?

Quicumque Iliacos ferro violavimus agros,—

Mitto ea, quæ muris bellando exhausta sub altis,

Quos Simois premat ille viros,—infanda per orbem

Supplicia et scelerum pœnas expendimus omnes,

Vel Priamo miseranda manus ; scit triste Minervæ

Sidus, et Euboicæ cautes, ultorque Caphereus. 260

Militia ex illa diversum ad litus adacti,

Atrides Protei Menelaus adusque columnas

Exsulat ; Ætnæos vidit Cyclopos Ulixes.

Regna Neoptolemi referam, versosque penates

Idomenei ? Libycone habitantes litore Locros ?

Ipsæ Mycenæus magnorum ductor Achivum

Conjugis infandæ prima intra limina dextra

Oppetiit ; devictam Asiam subsedit adulter.

Invidisse deos, patriis ut redditus aris

Conjugium optatum et pulchram Calydonæ viderem ? 270

Nunc etiam horribili visu portenta sequuntur,

Et socii amissi petierunt æthera pennis,

Fluminibusque vagantur aves, heu dira meorum

Supplicia ! et scopulos lacrimosis vocibus implent.

Hæc adeo ex illo mihi jam speranda fuerunt

Tempore, quum ferro cœlestia corpora demens

Appetii, et Veneris violavi vulnere dextram.

Ne vero, ne me ad tales impellite pugnas.  
 Nec mihi cum Teucris ullum post eruta bellum  
 Pergama; nec veterum memini lætorve malorum. 280  
 Munera, quæ patriis ad me portatis ab oris,  
 Vertite ad Ænean. Stetimus tela aspera contra,  
 Contulimusque manus: experto credite, quantus  
 In clipeum assurgat, quo turbine torqueat hastam.  
 Si duo præterea tales Idæa tulisset  
 Terra viros, ultro Inachias venisset ad urbes  
 Dardanus, et versis lugeret Græcia fatis.  
 Quidquid apud duræ cessatum est mœnia Trojæ,  
 Hectoris Æneæque manu victoria Graium  
 Hæsit, et in decimum vestigia retulit annum. 290  
 Ambo animis, ambo insignes præstantibus armis;  
 Hic pietate prior. Coëant in fœdera dextræ;  
 Qua datur: ast, armis concurrant arma, cavete.  
 Et responsa simul quæ sint, rex optime, regis  
 Audisti, et quæ sit magno sententia bello."

Vix ea legati; variusque per ora cucurrit  
 Ausonidum turbata fremor: ceu saxa morantur  
 Quum rapidos amnes, fit clauso gurgite murmur,  
 Vicinæque fremunt ripæ crepitantibus undis.  
 Ut primum placati animi, et trepida ora quierunt, 300  
 Præfatus divos solio rex infit ab alto:

"Ante equidem summa de re statuisset, Latini.  
 Et vellem, et fuerat melius; non tempore tali  
 Cogere concilium, quum muros assidet hostis.  
 Bellum importunum, cives, cum gente deorum,  
 Invictisque viris gerimus, quos nulla fatigant  
 Prælia, nec victi possunt absistere ferro.  
 Spem si quam adscitis Ætolum habuistis in armis,  
 Ponite. Spes sibi quisque: sed hæc quam angusta videtis.  
 Cetera qua rerum jaceant perculsa ruina, 310  
 Ante oculos interque manus sunt omnia vestras.  
 Nec quemquam incuso. Potuit quæ plurima virtus  
 Esse, fuit. Toto certatum est corpore regni.

Nunc adeo, quæ sit dubiæ sententia menti,  
 Expediam, et paucis—animos adhibete—docebo.  
 Est antiquus ager Tusco mihi proximus amni,  
 Longus in occasum, fines super usque Sicanos ;  
 Aurunci Rutulique serunt, et vomere duos  
 Exercent colles, atque horum asperrima pascunt.  
 Hæc omnis regio, et celsi plaga pinea montis,  
 Cedat amicitiae Teucrorum ; et foederis æquas  
 Dicamus leges, sociosque in regna vocemus ;  
 Considerant, si tantus amor, et mœnia condant.  
 Sin alios fines aliamque capessere gentem  
 Est animus, poscuntque solo decedere nostro ;  
 Bis denas Italo texamus robore naves,  
 Seu plures complere valent : jacet omnis ad undam  
 Materies : ipsi numerumque modumque carinis  
 Præcipiant ; nos æra, manus, navalia demus.  
 Præterea, qui dicta ferant et fœdera firment,  
 Centum oratores prima de gente Latinos  
 Ire placet, pacisque manu prætere ramos ;  
 Munera portantes auri que eborisque talenta  
 Et sellam regni trabeamque insignia nostri.  
 Consulite in medium, et rebus succurrite fessis.”

320

330

Tum Drances, idem infensus, quem gloria Turni  
 Obliqua invidia stimulisque agitabat amaris,  
 Largus opum et lingua melior, sed frigida bello  
 Dexterâ, consiliis habitus non futilis auctor,  
 Seditione potens—genus huic materna superbum  
 Nobilitas dabat, incertum de patre ferebat—  
 Surgit, et his onerat dictis atque aggerat iras :

340

“ Rem nulli obscuram, nostræ nec vocis egentem,  
 Consulis, o bone rex. Cuncti se scire fatentur,  
 Quid fortuna ferat populi ; sed dicere mussant.  
 Det libertatem fandi, flatusque remittat,  
 Cujus ob auspiciu infaustum moresque sinistros—  
 Dicam equidem, licet arna mihi mortemque minetur—  
 Lumina tot cecidisse ducum, totamque videmus

Consedisſe urbem luctu, dum Troia tentat  
 Caſtra, fugæ fidens, et cœlum territât armis. 350  
 Unum etiam donis iſtis, quæ plurima mitti  
 Dardanidis dicique jubet, unum, optime regum,  
 Adjicias ; nec te ullius violentia vincat,  
 Quin natam egregio genero dignisque hymenæis  
 Des, pater, et pacem hanc æterno fœdere jungas.  
 Quod ſi tantus habet mentes et pectora terror,  
 Ipſum obteſtemur, veniamque oremus ab ipſo ;  
 Cedat, juſ proprium regi patriæque remittat.  
 Quid miſeros toties in aperta pericula cives 360  
 Projiciſ, o Latio caput horum et cauſa malorum ?  
 Nulla ſaluſ bello : pacem te poſcimus omnes,  
 Turne, ſimul pacis ſolum inviolabile pignuſ.  
 Primuſ ego, inuiſum quem tu tibi fingiſ, et eſſe  
 Nil moror, en ſupplex venio. Miſerere tuorum,  
 Pone animoſ, et pulſuſ abi. Sat funera fuſi  
 Vidimuſ, ingenteſ et deſolavimuſ agroſ.  
 Aut ſi fama movet, ſi tantum pectore robur  
 Concipiſ, et ſi adeo dotaliſ regia cordi eſt ;  
 Aude, atque adverſum fidens fer pectuſ in hoſtem. 370  
 Scilicet, ut Turno contingat regia conjux,  
 Noſ, animæ vileſ, inhumata inſſetaque turba,  
 Sternamur campis. Et jam tu, ſi quæ tibi viſ,  
 Si patrii quid Martiſ habet, illum aſpice contra,  
 Qui vocat.”

Talibuſ exarſit dictiſ violentia Turni ;  
 Dat gemituſ, rumpitque haſ imo pectore voceſ :  
 “ Larga quidem, Drance, ſemper tibi copia fandi  
 Tum, quum bella manuſ poſcunt ; patribuſque vocatiſ  
 Primuſ adeſ. Sed non replenda eſt curia verbis, 380  
 Quæ tuto tibi magna volant, dum diſtinet hoſtem  
 Agger mœroruſ, nec inundant ſanguine foſſæ.  
 Proinde tona eloquio,—ſolituſ tibi ; meque timoriſ  
 Argue tu, Drance, quando tot ſtragibꝰ acervuſ  
 Teucroruſ tua dextra dedit, paſſimque tropæiſ

Insignis agros. Possit quid vivida virtus,  
 Experiare licet: nec longe scilicet hostes  
 Quærendi nobis; circumstant undique muros.  
 Imus in adversos? quid cessas? an tibi Mavors  
 Ventosa in lingua pedibusque fugacibus istis 390  
 Semper erit?  
 Pulsus ego? aut quisquam merito, fœdissime, pulsum  
 Arguet, Iliaco tumidum qui crescere Thybrim  
 Sanguine, et Evandri totam cum stirpe videbit  
 Procubuisse domum, atque exutos Arcadas armis?  
 Haud ita me experti Bitias et Pandarus ingens,  
 Et quos mille die victor sub Tartara misi,  
 Inclusus muris hostilique aggere septus.  
 Nulla salus bello. Capiti cane talia demens  
 Dardanio, rebusque tuis. Proinde omnia magno 400  
 Ne cessa turbare metu, atque extollere vires  
 Gentis bis victæ; contra premere arma Latini.  
 Nunc et Myrmidonum proceres Phrygia arma tremiscunt,  
 Nunc et Tydides, et Larissæus Achilles;  
 Amnis et Hadriacas retro fugit Aufidus undas.  
 Vel quum se pavidum contra mea jurgia fingit  
 Artificis scelus, et formidine crimen acerbat.  
 Nunquam animam talem dextra hac—absiste moveri—  
 Amittes; habitet tecum, et sit pectore in isto.  
 Nunc ad te, et tua magna, pater, consulta revertor. 410  
 Si nullam nostris ultra spem ponis in armis,  
 Si tam deserti sumus, et semel agmine verso  
 Funditus occidimus, neque habet fortuna regressum;  
 Oremus pacem, et dextras tendamus inertes.  
 Quanquam o, si solitæ quidquam virtutis adesset,  
 Ille mihi ante alios fortunatusque laborum,  
 Egregiusque animi, qui, ne quid tale videret,  
 Procubuit moriens, et humum semel ore momordit.  
 Sin et opes nobis, et adhuc intacta juvenus,  
 Auxilioque urbes Italæ populique supersunt; 420  
 Sin et Trojanis cum multo gloria venit

Sanguine ; sunt illis sua funera, parque per omnes  
 Tempestas ; cur indecores in limine primo  
 Deficimus ? cur ante tubam tremor occupat artus ?  
 Multa dies variique labor mutabilis ævi  
 Retulit in melius ; multos alterna revisens  
 Lusit et in solido rursus fortuna locavit.  
 Non erit auxilio nobis Ætolus et Arpi :

At Messapus erit, felixque Tolumnius, et quos  
 Tot populi misere duces ; nec tarda sequetur 430  
 Gloria delectos Latio et Laurentibus agris.  
 Est et Volscorum egregia de gente Camilla,  
 Agmen agens equitum et florentes ære catervas.  
 Quod si me solum Teucri in certamina poscunt,  
 Idque placet, tantumque bonis communibus obsto ;  
 Non adeo has exosa manus victoria fugit,  
 Ut tanta quidquam pro spe tentare recusem.  
 Ibo animis contra : vel magnum præstet Achillem,  
 Factaque Vulcani manibus paria induat arma  
 Ille licet. Vobis animam hanc soceroque Latino 440  
 Turnus ego, haud ulli veterum virtute secundus,  
 Devovi. Solum Æneas vocat : et, vocet, oro.  
 Nec Drances potius, sive est hæc ira deorum,  
 Morte luat ; sive est virtus et gloria, tollat."

Illi hæc inter se dubiis de rebus agebant  
 Certantes : castra Æneas aciemque movebat.  
 Nuncius ingenti per regia tecta tumultu  
 Ecce ruit, magnisque urbem terroribus implet :  
 Instructos acie Tiberino a flumine Teucros  
 Tyrrhenamque manum totis descendere campis. 450  
 Extemplo turbati animi, concussaque vulgi  
 Pectora, et arrectæ stimulis haud mollibus iræ.  
 Arma manu trepidi poscunt ; fremit arma juvenus ;  
 Flent mæsti mussantque patres. Hic undique clamor  
 Dissensu vario magnus se tollit in auras :  
 Haud secus atque alto in luco quum forte catervæ  
 Consedere avium, piscosove amne Padusæ

Dant sonitum rauci per stagna loquacia cyeni.

"Immo," ait, "o cives," arrepto tempore Turnus,

"Cogite concilium, et pacem laudate sedentes :

460

Illi armis in regna ruant." Nec plura locutus

Corripuit sese et tectis citus extulit altis.

"Tu, Voluse, armari Volscorum edice maniplis ;

Duc," ait, "et Rutulos. Equitem, Messapus, in armis,

Et cum fratre Coras, latis diffundite campis.

Pars aditus urbis firment turresque capessant :

Cetera, qua jusso, mecum manus inferat arma."

Ilicet in muros tota discurritur urbe.

Concilium ipse pater et magna incepta Latinus

Deserit, ac tristi turbatus tempore differt ;

470

Multaque se incusat, qui non acceperit ultro

Dardanium Ænean, generumque adsciverit urbi.

Præfodiunt alii portas, aut saxa sudesque

Subvectant. Bello dat signum rauca cruentum

Buccina. Tum muros varia cinxere corona

Matronæ puerique ; vocat labor ultimus omnes.

Nec non ad templum summasque ad Palladis arces

Subvehitur magna matrum regina caterva,

Dona ferens ; juxtaque comes Lavinia virgo,

Causa mali tanti, oculos dejecta decoros.

480

Succedunt matres, et templum thure vaporant,

Et mæstas alto fundunt de limine voces :

"Armipotens, præses belli, Tritonia virgo,

Frangere manu telum Phrygii prædonis, et ipsum

Pronum sterne solo, portisque effunde sub altis."

Cingitur ipse furens certatim in prælia Turnus.

Jamque adeo Rutulum thoraca indutus ahenis

Horrebat squamis, surasque incluserat auro,

Tempora nudus adhuc ; laterique accinxerat ensem ;

Fulgebatque alta decurrens aureus arce ;

490

Exsultatque animis, et spe jam præcipit hostem.

Qualis ubi abruptis fugit præsepia vinclis

Tandem liber equus, campoque potitus aperto



Aut ille in pastus armentaque tendit equarum,  
 Aut assuetus aquæ perfundi flumine noto  
 Emicat, arrectisque fremit cervicibus alte  
 Luxurians ; luduntque jubæ per colla, per armos.  
 Obvia cui, Volscorum acie comitante, Camilla  
 Occurrit, portisque ab equo regina sub ipsis  
 Desiluit ; quam tota cohors imitata relictis 500  
 Ad terram defluxit equis ; tum talia fatur :  
 “ Turne, sui merito si qua est fiducia forti,  
 Audeo et Æneadum promitto occurrere turmæ,  
 Solaque Tyrrhenos equites ire obvia contra.  
 Me sine prima manu tentare pericula belli :  
 Tu pedes ad muros subsiste, et mœnia serva.”  
 Turnus ad hæc, oculos horrenda in virgine fixus :  
 “ O decus Italiæ virgo, quas dicere grates,  
 Quasve referre parem ? sed nunc, est omnia quando  
 Iste animus supra, mecum partire laborem. 510  
 Æneas, ut fama fidem missique reportant  
 Exploratores, equitum levia improbus arma  
 Præmisit, quatercent campos ; ipse ardua montis  
 Per deserta jugo superans adventat ad urbem.  
 Furta paro belli convexo in tramite silvæ,  
 Ut bivias armato obsidam milite fauces.  
 Tu Tyrrhenum equitem collatis excipe signis ;  
 Tecum acer Messapus erit, turmæque Latinæ,  
 Tiburnique manus : ducis et tu concipe curam.”  
 Sic ait, et paribus Messapum in prœlia dictis 520  
 Hortatur sociosque duces, et pergit in hostem.  
 Est curvo anfractu valles, accommoda fraudi  
 Armorumque dolis, quam densis frondibus atrum  
 Urget utrimque latus ; tenuis quo semita ducit,  
 Angustæque ferunt fauces aditusque maligni.  
 Hanc super in speculis summoque in vertice montis  
 Planities ignota jacet, tutique receptus ;  
 Seu dextra lævaque velis occurrere pugnæ,  
 Sive instare jugis, et grandia volvere saxa.

Huc juvenis nota fertur regione viarum,  
Arripuitque locum, et silvis insedit iniquis.

Velocem interea superis in sedibus Opim,  
Unam ex virginibus sociis sacraque caterva,  
Compellabat, et has tristes Latonia voces  
Ore dabat: "Graditur bellum ad crudele Camilla,  
O virgo, et nostris nequidquam cingitur armis,  
Cara mihi ante alias." Neque enim novus iste Dianæ  
Venit amor, subitaque animum dulcedine movit.

Pulsus ob invidiam regno viresque superbas  
Priverno antiqua Metabus quum excederet urbe, 540

Infantem fugiens media inter prœlia belli  
Sustulit exsilio comitem, matrisque vocavit  
Nomine Casmillæ, mutata parte, Camillam.  
Ipse, sinu præ se portans, juga longa petebat  
Solorum nemorum; tela undique sæva premebant,  
Et circumfuso volitabant milite Volsci.

Ecce, fugæ medio summiis Amasenus abundans  
Spumabat ripis; tantus se nubibus imber  
Ruperat. Ille, innare parans, infantis amore  
Tardatur, caroque oneri timet. Omnia secum 550  
Versanti subito vix hæc sententia sedit:

Telum immaue, manu valida quod forte gerebat  
Bellator, solidum nodis et robore cocto;  
Huic natam, libro et silvestri subere clausam,  
Implicat, atqueabilem mediæ circumligat hastæ,  
Quam dextra ingenti librans ita ad æthera fatur:  
"Alma, tibi hanc, nemorum cultrix, Latonia virgo,  
Ipse pater famulam voveo; tua prima per auras  
Tela tenens supplex hostem fugit. Accipe, testor,  
Diva tuam, quæ nunc dubiis committitur auris." 560

Dixit, et adducto contortum hastile lacerto  
Immittit: sonuere undæ; rapidum super amnem  
Infelix fugit in jaculo stridente Camilla.

At Metabus, magna propius jam urgente caterva,  
Dat sese fluvio, atque hastam cum virgine victor

Gramineo donum Triviæ de cespite vellit.  
 Non illum tectis ullæ, non mœnibus urbes  
 Accepere, neque ipse manus feritate dedisset ;  
 Pastorum et solis exegit montibus ævum.  
 Hic natam in dumis interque horrentia lustra 570  
 Armentalis equæ mammis et lacte ferino  
 Nutribat, teneris immulgens ubera labris.  
 Utque pedum primis infans vestigia plantis  
 Institerat, jaculo palmas oneravit acuto,  
 Spiculaque ex humero parvæ suspendit et arcum.  
 Pro crinali auro, pro longæ tegmine pallæ,  
 Tigridis exuviæ per dorsum a vertice pendent.  
 Tela manu jam tum tenera puerilia torsit,  
 Et fundam tereti circum caput egit habena,  
 Strymoniamque gruem, aut album dejecit olorem. 580  
 Multæ illam frustra Tyrrhena per oppida matres  
 Optavere nurum : sola contenta Diana,  
 Æternum telorum et virginitatis amorem  
 Intemerata colit. “ Vellem haud correpta fuisset  
 Militia tali, conata lacescere Teucros ;  
 Cara mihi comitumque foret nunc una mearum.  
 Verum age, quandoquidem fatis urgetur acerbis,  
 Labere, Nympha, polo, finesque invise Latinos,  
 Tristis ubi infausto committitur omine pugna.  
 Hæc cape, et ultricem pharetra deprome sagittam : 590  
 Hac, quicumque sacrum violarit vulnere corpus,  
 Tros Italusve, mihi pariter det sanguine pœnas,  
 Post ego nube cava miserandæ corpus et arma  
 Inspoliata feram tumulo, patriæque reponam.”  
 Dixit : at illa leves cœli delapsa per auras  
 Insonuit, nigro circumdata turbine corpus.  
 At manus interea muris Trojana propinquat,  
 Etruscique duces, equitumque exercitus omnis,  
 Compositi numero in turmas. Fremit æquore toto  
 Insultans sonipes, et pressis pugnat habenis 600  
 Huc obversus et huc ; tum late ferreus hastis

Horret ager, campique armis sublimibus ardent.  
 Nec non Messapus contra, celeresque Latini,  
 Et cum fratre Coras, et virginis ala Camillæ,  
 Adversi campo apparent, hastasque reductis  
 Protendunt longe dextris, et spicula vibrant ;  
 Adventusque virum fremitusque ardescit equorum.  
 Jamque intra jactum teli progressus uterque  
 Substiterat : subito erumpunt clamore, frementesque  
 Exhortantur equos ; fundunt simul undique tela 610  
 Crebra nivis ritu, cœlumque obtexitur umbra.  
 Continuo adversis Tyrrhenus et acer Aconteus  
 Connixi incurrunt hastis, primique ruinam  
 Dant sonitu ingenti, perfractaque quadrupedantum  
 Pectora pectoribus rumpunt. Excussus Aconteus  
 Fulminis in morem, aut tormento ponderis acti,  
 Præcipitat longe, et vitam dispergit in auras.  
 Extemplo turbatæ acies, versique Latini  
 Rejiciunt parmas, et equos ad mœnia vertunt.  
 Troës agunt ; princeps turmas inducit Asylas. 620  
 Jamque propinquabant portis, rursusque Latini  
 Clamorem tollunt, et mollia colla reflectunt ;  
 Hi fugiunt, penitusque datis referuntur habenis.  
 Qualis ubi alterno procurrens gurgite pontus  
 Nunc ruit ad terras, scopulosque superjacet undam  
 Spumeus, extremamque sinu perfundit arenam ;  
 Nunc rapidus retro, atque æstu revoluta resorbens  
 Saxa fugit, litusque vado labente relinquit.  
 Bis Tusci Rutulos egere ad mœnia versos :  
 Bis rejecti armis respectant terga tegentes. 630  
 Tertia sed postquam congressi in prælia, totas  
 Implicuere inter se acies, legitque virum vir :  
 Tum vero et gemitus morientum, et sanguine in alto  
 Armaque, corporaque, et permixti cæde virorum  
 Semanimes volvuntur equi ; pugna aspera surgit.  
 Orsilochus Remuli, quando ipsum horrebat adire,  
 Hastam intorsit equo, ferrumque sub aure reliquit :

Quo sonipes ictu furit arduus, altaque jactat  
 Vulneris impatiens arrecto pectore crura.  
 Volvitur ille excussus humi. Catillus Iollan,  
 Ingentemque animis, ingentem corpore et armis  
 Dejicit Herminium; nudo cui vertice fulva  
 Cæsaries, nudique humeri; nec vulnera terrent;  
 Tantus in arma patet. Latos huic hasta per armos  
 Acta tremit, duplicatque virum transfixa dolore.  
 Funditur ater ubique cruor: dant funera ferro  
 Certantes pulchramque petunt per vulnera mortem.

640

At medias inter cædes exsultat Amazon,  
 Unum exserta latus pugnæ, pharetrata Camilla:  
 Et nunc lenta manu spargens hastilia denset,  
 Nunc validam dextra rapit indefessa bipennem.  
 Aureus ex humero sonat arcus et arma Dianæ.  
 Illa etiam, si quando in tergum pulsa recessit,  
 Spicula converso fugientia dirigit arcu.  
 At circum lectæ comites, Larinaque virgo,  
 Tullaque, et æratam quatiens Tarpeia securem,  
 Italides; quas ipsa decus sibi dia Camilla  
 Delegit, pacisque bonas bellicque ministras.  
 Quales Threïciæ quum flumina Thermodontis  
 Pulsant, et pictis bellantur Amazones armis:  
 Seu circum Hippolyten, seu quum se Martia curru  
 Penthesilea refert, magnoque ululante tumultu  
 Feminea exsultant lunatis agmina peltis.  
 Quem telo primum, quem postremum, aspera virgo  
 Dejicis? aut quot humi morientia corpora fundis?  
 Eunæum Clytio primum patre: cujus apertum  
 Adversi longa transverberat abiete pectus.  
 Sanguinis ille vomens rivos cadit, atque cruentam  
 Mandit humum, moriensque suo se in vulnere versat.  
 Tum Lirim, Pagasumque super: quorum alter habenas  
 Suffosso revolutus equo dum colligit, alter  
 Dum subit, ac dextram labenti tendit inermem,  
 Præcipientes pariterque ruunt. His addit Amastrum

650

660

670

Hippotaden ; sequiturque incumbens eminus hasta  
 Tereaque, Harpalycumque, et Demophoonta, Chromimque ;  
 Quotque emissa manu contorsit spicula virgo,  
 Tot Phrygii cecidere viri. Procul Ornytus armis  
 Ignotis et equo venator Iapyge fertur ;  
 Cui pellis latos humeros crepta juvenco  
 Pugnatori operit ; caput ingens oris hiatus 680  
 Et malæ texere lupi cum dentibus albis,  
 Agrestisque manus armat sparus. Ipse catervis  
 Vertitur in mediis, et toto vertice supra est.  
 Hunc illa exceptum, neque enim labor agmine verso,  
 Trajicit, et super hæc inimico pectore fatur :  
 " Silvis te, Tyrrhene, feras agitare putasti ?  
 Advenit qui vestra dies muliebribus armis  
 Verba redarguerit. Nomen tamen haud leve patrum  
 Manibus hoc referes, telo cecidisse Camillæ."  
 Protenus Orsilochem et Buten, duo maxima Teucrum 690  
 Corpora : sed Buten aversum cuspide fixit  
 Loricam galeamque inter, qua colla sedentis  
 Lucent, et lævo dependet parma lacerto ;  
 Orsilochem, fugiens magnumque agitata per orbem,  
 Eludit gyro interior, sequiturque sequentem ;  
 Tum validam perque arma viro perque ossa securim,  
 Altior exurgens, oranti et multa precanti  
 Congeminat : vulnus calido rigat ora cerebro.  
 Incidit huic, subitoque aspectu territus hæsit  
 Appenninicolæ bellator filius Auni, 700  
 Haud Ligurum extremus, dum fallere fata sinebant  
 Isque, ubi se nullo jam cursu evadere pugnae  
 Posse, neque instantem reginam avertere cernit,  
 Consilio versare dolos ingressus et astu,  
 Incipit hæc : " Quid tam egregium, si femina forti  
 Fidis equo ? dimitte fugam, et te cominus æquo  
 Mecum crede solo, pugnaque accinge pedestri ;  
 Jam nosces, ventosa ferat cui gloria laudem."  
 Dixit : at illa furens, acrique accensa dolore.

Tradit equum comiti, paribusque resistit in armis,  
Ense pedes nudo, puraque interrita parma.

710

At juvenis, vicisse dolo ratus, avolat ipse,  
Haud mora, conversisque fugax aufertur habenis,  
Quadrupedemque citum ferrata calce fatigat.

"Vane Ligus, frustra que animis elate superbis,  
Nequidquam patrias tentasti lubricus artes;  
Nec fraus te incolumem fallaci perferet Auno."

Hæc fatur virgo, et pernicibus ignea plantis  
Transit equum cursu, frenisque adversa prehensis  
Congreditur pœnasque inimico ex sanguine sumit.

720

Quam facile accipiter saxo sacer ales ab alto  
Consequitur pennis sublimem in nube columbam,  
Comprehensamque tenet, pedibusque eviscerat uncis;  
Tum cruor et vulsæ labuntur ab æthere plumæ.

At non hæc nullis hominum sator atque deorum  
Observans oculis summo sedet altus Olympo.

Tyrrhenum genitor Tarchonem in prælia sæva  
Suscitat, et stimulis haud mollibus injicit iras.

Ergo inter cædes cedentiaque agmina Tarchon  
Fertur equo, variisque instigat vocibus alas,

730

Nomine quemque vocans, reficitque in prælia pulsos.

"Quis metus, o nunquam dolituri, o semper inertes  
Tyrrheni, quæ tanta animis ignavia venit?"

Femina palantes agit, atque hæc agmina vertit?

Quo ferrum, quidve hæc gerimus tela irrita dextris?

At non in Venerem segnes, nocturna que bella,

Aut, ubi curva choros indixit tibia Bacchi,

Exspectare dapes, et plenæ pocula mensæ:

Hic amor, hoc studium; dum sacra secundus haruspex

Nunciet, ac lucos vocet hostia pinguis in altos."

740

Hæc effatus, equum in medios moriturus et ipse

Concitatur, et Venulo adversum se turbidus infert,

Dereptumque ab equo dextra complectitur hostem,

Et gremium ante suum multa vi concitus aufert.

Tollitur in cælum clamor; cunctique Latini

Convertere oculos. Volat igneus æquore Tarchon,  
Arma virumque ferens; tum summa ipsius ab hasta  
Defringit ferrum, et partes rimatur apertas,  
Qua vulnus letale ferat: contra ille repugnans 750  
Sustinet a jugulo dextram, et vim viribus exit.  
Utque volans alte raptum quum fulva draconem  
Fert aquila, implicuitque pedes, atque unguibus hæsit:  
Saucius at serpens sinuosa volumina versat,  
Arrectisque horret squamis, et sibilat ore  
Arduus insurgens: illa haud minus urget obunco  
Luctantem rostro; simul æthera verberat alis:  
Haud aliter prædam Tiburtum ex agmine Tarchon  
Portat ovans. Ducis exemplum eventumque secuti  
Mæonidæ incurrunt. Tum fatis debitis Arruns 760  
Velocem jaculo et multa prior arte Camillam  
Circuit, et, quæ sit fortuna facillima, tentat.  
Qua se cumque furens medio tulit agmine virgo,  
Hac Arruns subit, et tacitus vestigia lustrat:  
Qua victrix redit illa, pedemque ex hoste reportat,  
Hac juvenis furtim celeres detorquet habenas.  
Hos aditus, jamque hos aditus, omnemque pererrat  
Undique circuitum; et certam quatit improbus hastam.  
Forte sacer Cybelæ Chloreus, olimque sacerdos,  
Insignis longè Phrygiis fulgebat in armis,  
Spumantemque agitabat equum: quem pellis ahenis 770  
In plumam squamis auro conserta tegebat.  
Ipse, peregrina ferrugine clarus et ostro,  
Spicula torquebat Lycio Gortynia cornu;  
Aureus ex humeris sonat arcus, et aurea vati  
Cassida; tum croccam chlamydemque sinusque crepantes  
Carbaseos fulvo in nodum collegerat auro,  
Pictus acu tunicas, et barbara tegmina crurum.  
Hunc virgo, sive ut templis præfigeret arma  
Troïa, captivo sive ut se ferret in auro,  
Venatrix unum ex omni certamine pugnae 780  
Cæca sequebatur; totumque incauta per agmen



Femineo prædæ et spoliorum ardebat amore :  
 Telum ex insidiis quum tandem tempore capto  
 Concitat, et superos Arruns sic voce precatur :  
 " Summe deum, sancti custos Soractis Apollo,  
 Quem primi colimus, cui pineus ardor acervo  
 Pascitur, et medium freti pietate per ignem  
 Cultores multa premimus vestigia pruna ;  
 Da, Pater, hoc nostris aboleri dedecus armis,  
 Omnipotens. Non exuvias, pulsæve tropæum 790  
 Virginis, aut spolia ulla peto : mihi cetera laudem  
 Facta ferent : hæc dira meo dum vulnere pestis  
 Pulsa cadat, patrias remeabo inglorius urbes."  
 Audiit, et voti Phœbus succedere partem  
 Mente dedit ; partem volucres dispersit in auras.  
 Sterneret ut subita turbatam morte Camillam,  
 Annuit oranti : reducem ut patria alta videret,  
 Non dedit ; inque notos vocem vertere procellæ.  
 Ergo, ut missa manu sonitum dedit hasta per auras,  
 Convertere animos acres oculosque tulere 800  
 Cuncti ad reginam Volsci. Nihil ipsa neque auræ  
 Nec sonitus memor, aut venientis ab æthere teli :  
 Hasta sub exsertam donec perlata papillam  
 Hæsit, virgineumque alte bibit acta cruorem.  
 Concurrunt trepidæ comites, dominamque ruentem  
 Suscipiunt. Fugit ante omnes exterritus Arruns,  
 Lætitia mixtoque metu ; nec jam amplius hastæ  
 Credere, nec telis occurrere virginis audet.  
 Ac velut ille, prius quam tela inimica sequantur,  
 Continuo in montes sese avius abdidit altos, 810  
 Occiso pastore, lupus, magnove juvenco,  
 Conscius audacis facti, caudamque remulcens  
 Subjecit pavitantem utero, silvasque petivit :  
 Haud secus ex oculis se turbidus abstulit Arruns,  
 Contentusque fuga mediis se immiscuit armis.  
 Illa manu moriens telum trahit : ossa sed inter  
 Ferreus ad costas alto stat vulnere mucro.

Labitur exsanguis; labuntur frigida leto  
 Lumina; purpureus quondam color ora reliquit.  
 Tum sic expirans Accam, ex æqualibus unam, 820  
 Alloquitur, fida ante alias quæ sola Camillæ,  
 Quicum partiri curas; atque hæc ita fatur:  
 "Hactenus, Acca soror, potui; nunc vulnus acerbum  
 Conficit, et tenebris nigrescunt omnia circum.  
 Effuge, et hæc Turno mandata novissima perfer:  
 Succedat pugnae Trojanosque arceat urbe.  
 Jamque vale." Simul his dictis linquebat habenas,  
 Ad terram non sponte fluens. Tum frigida toto  
 Paulatim exsolvit se corpore, lentaque colla  
 Et captum leto posuit caput, arma relinquens; 830  
 Vitaque cum gemitu fugit indignata sub umbras.  
 Tum vero immensus surgens ferit aurea clamor  
 Sidera; dejecta crudescit pugna Camilla;  
 Incurrunt densi simul omnis copia Teucrum,  
 Tyrrhenique duces, Evandrique Arcades alæ.  
 At Triviæ custos jamdudum in montibus Opis  
 Alta sedet summis, spectatque interrita pugnas.  
 Utque procul medio juvenum in clamore furentum  
 Prospexit tristi multatam morte Camillam,  
 Ingemuitque deditque has imo pectore voces: 840  
 "Heu nimium virgo, nimium crudele luisti  
 Supplicium, Teucros conata lacessere bello!  
 Nec tibi desertæ in dumis coluisse Dianam  
 Profuit, aut nostras humero gessisse pharetras.  
 Non tamen indecorem tua te regina reliquit  
 Extrema jam in morte; neque hoc sine nomine letum  
 Per gentes erit, aut famam patieris inultæ.  
 Nam quicumque tuum violavit vulnere corpus,  
 Morte luet merita." Fuit ingens monte sub alto  
 Regis Dercenni terreno ex aggere bustum 850  
 Antiqui Laurentis, opacaque ilice tectum;  
 Illic dea se primum rapido pulcherrima nisu  
 Sistit, et Arruntem tumulo speculatur ab alto.

Ut vidit fulgentem armis, ac vana tumentem,  
 "Cur," inquit, "diversus abis? huc dirige gressum;  
 Huc periture veni: capias ut digna Camillæ  
 Præmia. Tune etiam telis moriere Dianæ?"

Dixit, et aurata volucrem Threïssa sagittam  
 Depromsit pharetra, cornuque infensa tetendit,  
 Et duxit longe, donec curvata coïrent 860

Inter se capita, et manibus jam tangeret æquis,  
 Læva aciem ferri, dextra nervoque papillam.  
 Extemplo teli stridorem aurasque sonantes  
 Audiit una Arruns, hæsitque in corpore ferrum.  
 Illum expirantem socii atque extrema gementem  
 Obliti ignoto camporum in pulvere linqunt;  
 Opis ad ætherium pennis aufertur Olympum.

Prima fugit, domina amissa, levis ala Camillæ;  
 Turbati fugiunt Rutuli; fugit acer Atinas;  
 Disiectique duces desolatique manipuli 870

Tuta petunt, et equis aversi ad mœnia tendunt.  
 Nec quisquam instantes Teucros letumque ferentes  
 Sustentare valet telis, aut sistere contra:

Sed laxos referunt humeris languentibus arcus;  
 Quadrupedumque putrem cursu quatit ungula campum.  
 Volvitur ad muros caligine turbidus atra

Pulvis, et e speculis percussæ pectora matres  
 Feminæ clamorem ad cœli sidera tollunt.  
 Qui cursu portas primi irrupere patentes, 880

Hos inimica super mixto premit agmine turba;  
 Nec miseram effugiunt mortem, sed limine in ipso,  
 Mœnibus in patriis, atque inter tuta domorum,

Confixi expirant animas. Pars claudere portas;  
 Nec sociis aperire viam, nec mœnibus audent  
 Accipere orantes; oriturque miserrima cædes

Defendentum armis aditus, inque arma ruentum.  
 Exclusi, ante oculos lacrimantumque ora parentum,  
 Pars in præcipites fossas, urgente ruina,

Volvitur; immissis pars cæca et concita frenis

Arietat in portas et duros objice postes.  
 Ipsæ de muris summo certamine matres—  
 Monstrat amor verus patriæ—ut videre Camillam,  
 Tela manu trepidæ jaciunt; ac robore duro  
 Stipitibus ferrum sudibusque imitantur obustis  
 Præcipites, primæque mori pro mœnibus ardent.

890

Interea Turnum in silvis sævissimus implet  
 Nuncius, et juveni ingentem fert Acca tumultum:  
 Deletas Volscorum acies, cecidisse Camillam,  
 Ingruere infensos hostes, et Marte secundo  
 Omnia corripuisse: metum jam ad mœnia ferri.

900

Ille furens—et sæva Jovis sic numina poscunt—  
 Deserit obsessos colles, nemora aspera linquit.  
 Vix e conspectu exierat, campumque tenebat,  
 Quum pater Æneas, saltus ingressus apertos,  
 Exsuperatque jugum, silvaque evadit opaca.  
 Sic ambo ad muros rapidi totoque feruntur  
 Agmine, nec longis inter se passibus absunt;  
 Ac simul Æneas fumantes pulvere campos  
 Prospexit longe, Laurentiaque agmina vidit;  
 Et sævum Ænean agnovit Turnus in armis,  
 Adventumque pedum flatusque audivit equorum.  
 Continuoque incant pugnas et prælia tentent:  
 Ni roseus fessos jam gurgite Phœbus Hiberno  
 Tingat equos, noctemque die labente reducat.  
 Considunt castris ante urbem, et mœnia vallant.

910

P. VIRGILII MARONIS

Æ N E I D O S

LIBER DUODECIMUS.



TURNUS ut infractos adverso Marte Latinos  
Defecisse videt, sua nunc promissa reposci,  
Se signari oculis ; ultro implacabilis ardet,  
Attollitque animos. Pœnorum qualis in arvis,  
Saucius ille gravi venantum vulnere pectus,  
Tum demum movet arma leo, gaudetque comantes  
Excutiens cervice toros, fixumque latronis  
Impavidus frangit telum, et fremit ore cruento :  
Haud secus accenso gliscit violentia Turno.  
Tum sic affatur regem, atque ita turbidus infit : 10  
“ Nulla mora in Turno ; nihil est quod dicta retractent  
Ignavi Æneadæ ; nec quæ pepigere, recusent.  
Congredior. Fer sacra, pater, et concipe fœdus.  
Aut hac Dardanium dextra sub Tartara mittam,  
Desertorem Asiæ,—sedeant spectentque Latini—  
Et solus ferro crimen commune refellam :  
Aut habeat victos ; cedat Lavinia conjux.”

Olli sedato respondit corde Latinus :  
“ O præstans animi juvenis, quantum ipse feroci  
Virtute exsuperas, tanto me impensius æquum est 20  
Consulere, atque omnes metuentem expendere casus.  
Sunt tibi regna patris Dauni, sunt oppida capta  
Multa manu ; nec non aurumque animusque Latino est ;  
Sunt aliæ innuptæ Latio et Laurentibus agris,  
Nec genus indecores. Sine me hæc haud mollia fatu

Sublatis aperire dolis; simul hoc animo hauri.  
 Me natam nulli veterum sociare procorum  
 Fas erat, idque omnes divique hominesque canebant.  
 Victus amore tui, cognato sanguine victus  
 Conjugis et mæstæ lacrimis, vincla omnia rupi: 30  
 Promissam eripui genero; arma impia sumsi.  
 Ex illo qui me casus, quæ, Turne, sequantur  
 Bella, vides; quantos primus patiare labores.  
 Bis magna victi pugna vix urbe tuemur  
 Spes Italas; recalent nostro Tiberina fluenta  
 Sanguine adhuc, campique ingentes ossibus albert.  
 Quo referor toties? quæ mentem insania mutat?  
 Si Turno extincto socios sum adscire paratus:  
 Cur non incolumi potius certamina tollo?  
 Quid consanguinei Rutuli, quid cetera dicet 40  
 Italia, ad mortem si te—Fors dicta refutet!—  
 Prodiderim, natam et connubia nostra petentem?  
 Respice res bello varias; miserere parentis  
 Longævæ, quem nunc mæstum patria Ardea longe  
 Dividit.” Haudquaquam dictis violentia Turni  
 Flectitur: exsuperat magis, ægrescitque medendo.  
 Ut primum fari potuit, sic institit ore:  
 “Quam pro me curam geris, hanc precor, optime, pro me  
 Deponas, letumque sinas pro laude pacisci.  
 Et nos tela, pater, ferrumque haud debile dextra 50  
 Spargimus, et nostro sequitur de vulnere sanguis.  
 Longe illi dea mater erit, quæ nube fugacem  
 Feminea tegat, et vanis sese occulat umbris.”  
 At regina, nova pugnae conterrita sorte,  
 Flebat, et ardentem generum moritura tenebat:  
 “Turne, per has ego te lacrimas, per si quis Amatae  
 Tangit honos animum—spes tu nunc una, senectæ  
 Tu requies miseræ; decus imperiumque Latini  
 Te penes; in te omnis domus inclinata recumbit—  
 Unum oro: desiste manum committere Teucris. 60  
 Qui te cumque manent isto certamine casus,

Et me, Turne, manent: simul hæc invisâ relinquam  
 Lumina, nec generum Ænean captivâ videbo."  
 Accepit vocem lacrimis Lavinia matris  
 Flagrantes perfusa genas: cui plurimus ignem  
 Subjecit rubor, et calefacta per ora cucurrit.  
 Indum sanguineo veluti violaverit ostro  
 Si quis ebur, aut mixta rubent ubi lilia multa  
 Alba rosa: talis virgo dabat ore colores.  
 Illum turbat amor, figitque in virgine vultus: 70  
 Ardet in arma magis, paucisque affatur Amatam:  
 "Ne, quæso, ne me lacrimis, neve omine tanto  
 Prosequere in duri certamina Martis euntem,  
 O mater: neque enim Turno mora libera mortis.  
 Nuncius hæc Idmon Phrygio mea dicta tyranno  
 Haud placitura refer: Quum primum crastina cœlo  
 Puniceis invecta rotis Aurora rubescit,  
 Non Teucros agat in Rutulos: Teucrum arma quiescant  
 Et Rutulum: nostro dirimamus sanguine bellum:  
 Illo quærat conjux Lavinia campo." 80

Hæc ubi dicta dedit, rapidusque in tecta recessit,  
 Poscit equos, gaudetque tuens ante ora frementes,  
 Pilumno quos ipsa decus dedit Orithyia;  
 Qui candore nives anteirent, cursibus auras.  
 Circumstant properi aurigæ, manibusque lacesunt  
 Pectora plausa cavis, et colla comantia pectunt.  
 Ipse dehinc auro squalentem alboque orichalco  
 Circumdat lorica humeris; simul aptat habendo  
 Ensemque clipeumque et rubræ cornua cristæ,—  
 Ensem, quem Dauno ignipotens deus ipse parenti 90  
 Fecerat, et Stygia candentem tinxerat unda.  
 Exin, quæ mediis ingenti adnixa columnæ  
 Ædibus adstabat, validam vi corripit hastam,  
 Actoris Aurunci spoliū; quassatque trementem,  
 Vociferans: "Nunc, o nunquam frustrata vocatus  
 Hasta meos, nunc tempus adest; te maximus Actor,  
 Te Turni nunc dextra gerit. Da sternere corpus,

Loricamque manu valida lacerare revulsam  
 Semiviri Phrygis, et fœdare in pulvere crines  
 Vibratos calido ferro, myrrhaque madentes.”  
 His agitur furiis : totoque ardentis ab ore  
 Scintillæ absistunt ; oculis micat acribus ignis.  
 Mugitus veluti quum prima in prælia taurus  
 Terrificos ciet, atque irasci in cornua tentat,  
 Arboris obnixus trunco, ventosque lacessit  
 Ictibus, et sparsa ad pugnam proludit arena.

100

Nec minus interea maternis sævus in armis  
 Æneas acuit Martem, et se suscitatur ira,  
 Oblato gaudens componi fœdere bellum,  
 Tum socios mæstique metum solatur Iuli,  
 Fata docens ; regique jubet responsa Latino  
 Certa referre viros, et pacis dicere leges.

110

Postera vix summos spargebat lumine montes  
 Orta dies ; quum primum alto se gurgite tollunt.  
 Solis equi, lucemque elatis naribus efflant :  
 Campum ad certamen magnæ sub mœnibus urbis  
 Dimensi Rutulique viri Teucrique parabant ;  
 In medioque focos et dis communibus aras  
 Gramineas. Alii fontemque ignemque ferebant,  
 Velati limo, et verbena tempora vincti.  
 Procedit legio Ausonidum, pilataque plenis  
 Agmina se fundunt portis. Hinc Troïus omnis  
 Tyrrhenusque ruit variis exercitus armis ;  
 Haud secus instructi ferro, quam si aspera Martis  
 Pugna vocet. Nec non mediis in millibus ipsi  
 Ductores auro volitant ostroque decori,  
 Et genus Assaraci Mnestheus, et fortis Asylas,  
 Et Messapus equum domitor, Neptunia proles.  
 Utque dato signo spatia in sua quisque recessit,  
 Refigunt tellure hastas, et scuta reclinant.  
 Tum studio effusæ matres, et vulgus inermum,  
 Invalidique senes, turres et tecta domorum  
 Obsedere ; alii portis sublimibus adstant.

120

130



At Juno e summo, qui nunc Albanus habetur,—  
 Tum neque nomen erat, nec honos, aut gloria monti—  
 Prospiciens tumulo campum aspectabat, et ambas  
 Laurentum Troumque acies urbemque Latini.  
 Extemplo Turni sic est affata sororem,  
 Diva deam, stagnis quæ fluminibusque sonoris  
 Præsidet; hunc illi rex ætheris altus honorem 140  
 Jupiter erepta pro virginitate sacravit:

“Nympha, decus fluviorum, animo gratissima nostro.  
 Scis, ut te cunctis unam, quæcumque Latinæ  
 Magnanimi Jovis ingratum ascendere cubile,  
 Prætulerim, cœlique lubens in parte locarim:  
 Disce tuum, ne me incuses, Juturna, dolorem.  
 Qua visa est fortuna pati, Parcæque sinebant  
 Cedere res Latio, Turnum et tua mœnia texi:  
 Nunc juvenem imparibus video concurrere fatis,  
 Parcarumque dies et vis inimica propinquat. 150  
 Non pugnam aspicere hanc oculis, non fœdera possum.  
 Tu, pro germano si quid præsentius audes,  
 Perge; decet. Forsan miseros meliora sequentur.”  
 Vix ea: quum lacrimas oculis Juturna profudit,  
 Terque quaterque manu pectus percussit honestum.  
 “Non lacrimis hoc tempus,” ait Saturnia Juno:  
 “Accelera, et fratrem, si quis modus, eripe morti;  
 Aut tu bella cie, conceptumque excute fœdus.  
 Auctor ego audendi.” Sic exhortata reliquit  
 Incertam, et tristi turbatam vulnere mentis. 160

Interea reges, ingenti mole Latinus  
 Quadrijugo vehitur curru, cui tempora circum  
 Aurati bis sex radii fulgentia cingunt,  
 Solis avi specimen: bigis it Turnus in albis,  
 Bina manu lato crispans hastilia ferro.  
 Hinc pater Æneas, Romanæ stirpis origo,  
 Sidereo flagrans clipeo et cœlestibus armis,  
 Et juxta Ascanius, magnæ spes altera Romæ,  
 Procedunt castris, puraque in veste sacerdos

Sætigeri fetum suis, intonsamque bidentem 170  
 Attulit, ammovitque pecus flagrantibus aris.  
 Illi ad surgentem conversi lumina solem  
 Dant fruges manibus salsas, et tempora ferro  
 Summa notant pecudum, paterisque altaria libant.  
 Tum pius Æneas stricto sic ense precatur :  
 "Esto nunc Sol testis et hæc mihi Terra vocanti,  
 Quam propter tantos potui perferre labores,  
 Et Pater omnipotens, et tu Saturnia Juno,  
 Jam melior, jam, diva, precor, tuque inclyte Mavors,  
 Cuncta tuo qui bella, pater, sub numine torques ; 180  
 Fontesque, Fluviosque voco, quæque Ætheris alti  
 Religio, et quæ cæruleo sunt numina ponto.  
 Cesserit Ausonio si fors victoria Turno,  
 Convenit, Evandri victos discedere ad urbem ;  
 Cedet Iulus agris ; nec post arma ulla rebelles  
 Æneadæ referent, ferrove hæc regna lacescent.  
 Sin nostrum annuerit nobis Victoria Martem,—  
 Ut potius reor, et potius di numine firment—  
 Non ego nec Teucris Italos parere jubebo,  
 Nec mihi regna peto : paribus se legibus ambæ 190  
 Invictæ gentes æterna in fœdera mittant.  
 Sacra deosque dabo ; socer arma Latinus habeto ;  
 Imperium solemne socer : mihi mœnia Teucris  
 Constituent, urbique dabit Lavinia nomen."  
 Sic prior Æneas ; sequitur sic deinde Latinus  
 Suspiciens cælum, tenditque ad sidera dextram :  
 "Hæc eadem, Ænea, Terram, Mare, Sidera, juro,  
 Latonæque genus duplex, Janumque bifrontem,  
 Vimque deum infernam et duri sacraria Ditis ;  
 Audiat hæc Genitor, qui fœdera fulmine sancit ; 200  
 Tango aras ; medios ignes et numina testor :  
 Nulla dies pacem hanc Italis, nec fœdera rumpet,  
 Quo res cumque cadent ; nec me vis ulla volentem  
 Avertet ; non, si tellurem effundat in undas,  
 Diluvio miscens, cælumque in Tartara solvat :

Ut sceptrum hoc (dextra sceptrum nam forte gerebat)  
 Nunquam fronde levi fundet virgulta neque umbras,  
 Quum semel in silvis imo de stirpe recisum  
 Matre caret, posuitque comas et brachia ferro ;  
 Olim arbos—nunc artificis manus ære decoro 210  
 Inclusit, patribusque dedit gestare Latinis.”  
 Talibus inter se firmabant fœdera dictis,  
 Conspectu in medio procerum. Tum rite sacratas  
 In flammam jugulant pecudes, et viscera vivis  
 Eripiunt, cumulantque oneratis lancibus aras.

At vero Rutulis impar ea pugna videri  
 Jamdudum, et vario misceri pectora motu ;  
 Tum magis, ut propius cernunt non viribus æquis.  
 Adjuvat incessu tacito progressus et aram  
 Suppliciter venerans demisso lumine Turnus, 220  
 Tabentesque genæ, et juvenali in corpore pallor.  
 Quem simul ac Juturna soror crebrescere vidit  
 Sermonem, et vulgi variare labantia corda :  
 In medias acies, formam assimilata Camerti—  
 Cui genus a proavis ingens, clarumque paternæ  
 Nomen erat virtutis, et ipse acerrimus armis—  
 In medias dat sese acies, haud nescia rerum,  
 Rumoresque serit varios, ac talia fatur :  
 “ Non pudet, ô Rutuli, pro cunctis talibus unam  
 Objectare animam ? numerone, an viribus æqui 230  
 Non sumus ? En, omnes et Troës, et Arcades, hi sunt,  
 [Fatalisque manus, infensa Etruria Turno.]  
 Vix hostem, alterni si congregiamur, habemus.  
 Ille quidem ad superos, quorum se devovet aris,  
 Succedet fama, vivusque per ora feretur :  
 Nos, patria amissa, dominis parere superbis  
 Cogemur, qui nunc lenti consedimus arvis.”  
 Talibus incensa est juvenum sententia dictis  
 Jam magis atque magis ; serpitque per agmina murmur.  
 Ipsi Laurentes mutati, ipsique Latini : 240  
 Qui sibi jam requiem pugnae rebusque salutem

Sperabant, nunc arma volunt, fœdusque precantur  
 Infectum, et Turni sortem miserantur iniquam.  
 His aliud majus Juturna adjungit, et alto  
 Dat signum cœlo; quo non præsentiùs ullum  
 Turbavit mentes Italas, monstroque fefellit.  
 Namque volans rubra fulvus Jovis ales in æthra  
 Litoreas agitabat aves turbamque sonantem  
 Agminis aligeri; subito quum lapsus ad undas  
 Cycnum excellentem pedibus rapit improbus uncis. 250  
 Arrexere animos Itali, cunctæque volucres  
 Convertunt clamore fugam, mirabile visu,  
 Ætheraque obscurant pennis, hostemque per auras  
 Facta nube premunt: donec vi victus, et ipso  
 Pondere defecit, prædamque ex unguibus ales  
 Projecit fluvio, penitusque in nubila fugit.  
 Tum vero augurium Rutuli clamore salutant,  
 Expediuntque manus; primusque Tolumnius augur,  
 "Hoc erat, hoc votis," inquit, "quod sæpe petivi:  
 Accipio, agnoscoque deos: me, me duce ferrum 260  
 Corripite, o miseri, quos improbus advena bello  
 Territat, invalidas ut aves et litora vestra  
 Vi populat. Petet ille fugam, penitusque profundo  
 Vela dabit. Vos unanimi densate catervas  
 Et regem vobis pugna defendite raptum."  
 Dixit, et adversos telum contorsit in hostes  
 Procurrens; sonitum dat stridula cornus, et auras  
 Certa secat. Simul hoc, simul ingens clamor, et omnes  
 Turbati cunei, calefactaque corda tumultu.  
 Hasta volans, ut forte novem pulcherrima fratrum 270  
 Corpora constiterant contra, quos fida crearat  
 Una tot Arcadio conjux Tyrrhena Gylippo,  
 Horum unum ad medium, teritur qua sutilis alvo  
 Balteus, et laterum juncturas fibula mordet,  
 Egregium forma juvenem et fulgentibus armis,  
 Transadigit costas, fulvaque effundit arena.  
 At fratres, animosa phalanx accensaque luctu,

Pars gladios stringunt manibus, pars missile ferrum  
 Corripiunt, cæcique ruunt. Quos agmina contra  
 Procurrunt Laurentum : hinc densi rursus inuudant 280  
 Troës Agyllinique et pictis Arcades armis.  
 Sic omnes amor unus habet decernere ferro.  
 Diripuerè aras ; it toto turbida cœlo  
 Tempestas telorum, ac ferreus ingruit imber ;  
 Craterasque focosque ferunt. Fugit ipse Latinus  
 Pulsatos referens infecto fœdere divos.  
 Infrenant alii currus, aut corpora saltu  
 Subjiciunt in equos, et strictis ensibus adsunt.  
 Messapus regem, regisque insigne gerentem,  
 Tyrrhenum Aulesten, avidus confundere fœdus, 290  
 Adverso proterret equo : ruit ille recedens,  
 Et miser oppositis a tergo involvitur aris  
 In caput inque humeros. At fervidus advolat hasta  
 Messapus, teloque orantem multa trabali  
 Desuper altus equo graviter ferit, atque ita fatur :  
 Hoc habet ; hæc melior magnis data victima divis.  
 Concurrunt Itali, spolianteque carentia membra.  
 Obvius ambustum torrem Corynæus ab ara  
 Corripit, et venienti Ebuso plagamque ferenti  
 Occupat os flammis : olli ingens barba reluxit, 300  
 Nidoremque ambusta dedit : super ipse secutus  
 Cæsariem læva turbati corripit hostis,  
 Impressoque genu nitens terræ applicat ipsum ;  
 Sic rigido latus ense ferit. Podalirius Alsum  
 Pastorem, primaque acie per tela ruentem,  
 Ense sequens nudo superimminet : ille securi  
 Adversi frontem mediam mentumque reducta  
 Disjicit, et sparso late rigat arma cruore.  
 Olli dura quies oculos et ferreus urget  
 Somnus ; in æternam clauduntur lumina noctem. 310  
 At pius Æneas dextram tendebat inermem  
 Nudato capite, atque suos clamore vocabat :  
 “ Quo ruitis ? quæve ista repens discordia surgit ?

O cohibete iras! ictum jam fœdus, et omnes  
 Compositæ leges; mihi jus concurrere soli;  
 Me sinite, atque auferte metus. Ego fœdera faxo  
 Firma manu; Turnum jam debent hæc mihi sacra."  
 Ilas inter voces, media inter talia verba,  
 Ecce, viro stridens alis allapsa sagitta est,  
 Incertum, qua pulsa manu, quo turbine adacta; 320  
 Quis tantam Rutulis laudem, casusne deusne,  
 Attulerit. Pressa est insignis gloria facti;  
 Nec sese Æneæ jactavit vulnere quisquam.

Turnus, ut Ænean cedentem ex agmine vidit  
 Turbatosque duces, subita spe fervidus ardet;  
 Poscit equos atque arma simul, saltuque superbus  
 Emicat in currum, et manibus molitur habenas.  
 Multa virum volitans dat fortia corpora leto;  
 Semineces volvit multos, aut agmina curru  
 Proterit, aut raptas fugientibus ingerit hastas. 330  
 Qualis apud gelidi quum flumina concitus Hebrî  
 Sanguineus Mavors clipeo increpat, atque furentes  
 Bella movens immittit equos, illi æquore aperto  
 Ante notos zephyrumque volant; gemit ultima pulsu  
 Thraca pedum; circumque atræ Formidinis ora,  
 Iræque, Insidiæque, dei comitatus, aguntur.  
 Talis equos alacer media inter prælia Turnus  
 Fumantes sudore quatit, miserabile cæsis  
 Hostibus insultans; spargit rapida ungula rores  
 Sanguineos, mixtaque cruor calcatur arena. 340  
 Jamque neci Sthenelumque dedit, Thamyrimque, Pho-  
 lumque

Hunc congressus et hunc; illum eminus; eminus ambo  
 Imbrasidas, Glaucum atque Laden, quos Imbrasmus ipse  
 Nutrierat Lycia, paribusque ornaverat armis,  
 Vel conferre manum, vel equo prævertere ventos.  
 Parte alia media Eumedes in prælia fertur,  
 Antiqui proles bello præclara Dolonis,  
 Nomine avum referens, animo manibusque parentem:

Qui quondam, castra ut Danaum speculator adiret,  
Ausus Pelidæ pretium sibi poscere currus. 350

Illum Tydides alio pro talibus ausis

Affecit pretio ; nec equis aspirat Achillis.

Hunc procul ut campo Turnus prospexit aperto,

Ante levi jaculo longum per inane secutus,

Sistit equos bijuges, et curru desilit, atque

Semianimi lapsoque supervenit, et pede collo,

Impresso dextræ mucronem extorquet, et alto

Fulgentem tingit jugulo ; atque hæc insuper addit :

“ En, agros et, quam bello, Trojane, petisti,

Hesperiam metire jacens : hæc præmia, qui me 360

Ferro ausi tentare, ferunt : sic mœnia condunt.”

Huic comitem Asbuten conjecta cuspide mittit,

Chloreaque, Sybarimque, Daretaque, Thersilochumque,

Et sternacis equi lapsum cervice Thymœten.

Ac velut Edoni Boreæ quum spiritus alto

Insonat Ægæo, sequiturque ad litora fluctus,

Qua venti incubuere, fugam dant nubila cœlo :

Sic Turno, quacumque viam secat agmina cedunt,

Conversæque ruunt acies ; fert impetus ipsum,

Et cristam adverso curru quatit aura volantem. 370

Non tulit instantem Phegeus animisque frementem :

Objecit sese ad currum, et spumantia frenis

Ora citatorum dextra detorsit equorum.

Dum trahitur, pendetque jugis, hunc lata reiectum

Lancea consequitur, rumpitque infixâ bilicem

Loricam, et summum degustat vulnere corpus.

Ille tamen clipeo objecto conversus in hostem

Ibat, et auxilium ducto mucrone petebat :

Quum rota præcipitem et procursu concitus axis

Impulit, effunditque solo ; Turnusque secutus 380

Imam inter galeam summi thoracis et oras

Abstulit ense caput, truncumque reliquit arenæ.

Atque ea dum campis victor dat funera Turnus,

Interea Ænean Mnestheus et fidus Achates

Ascaniusque comes castris statuere cruentum,  
 Alternos longa nitentem cuspide gressus.  
 Sævitur, et infracta luctatur arundine telum  
 Eripere, auxilioque viam, quæ proxima, poscit :  
 Ense secent lato vulnus, telique latebram  
 Rescindant penitus, seseque in bella remittant. 390  
 Jamque aderat Phœbo ante alios dilectus lapis  
 Iasides : acri quondam cui captus amore  
 Ipse suas artes, sua munera, lætus Apollo  
 Augurium citharamque dabat celeresque sagittas.  
 Ille, ut depositi proferret fata parentis,  
 Scire potestates herbarum usumque medendi  
 Maluit, et mutas agitare inglorius artes.  
 Stabat acerba fremens, ingentem nixus in hastam,  
 Æneas, magno juvenum et mærentis Iuli  
 Concursu, lacrimis immobilis. Ille retorto 400  
 Pæonium in morem senior succinctus amictu,  
 Multa manu medica Phœbique potentibus herbis  
 Nequidquam trepidat, nequidquam spicula dextra  
 Sollicitat, prensatque tenaci forcipe ferrum.  
 Nulla viam fortuna regit ; nihil auctor Apollo  
 Subvenit ; et sævus campis magis ac magis horror  
 Crebrescit, propiusque malum est. Jam pulvere cœlum  
 Stare vident ; subeuntque equites, et spicula castris  
 Densa cadunt mediis. It tristis ad æthera clamor  
 Bellantum juvenum, et duro sub Marte cadentum. 410  
 Hic Venus, indigno nati concussa dolore,  
 Dictamnum genetrix Cretæa carpit ab Ida,  
 Puberibus caulem foliis et flore comantem  
 Purpureo : non illa feris incognita capris  
 Gramina, quum tergo volucres hæserent sagittæ.  
 Hoc Venus, obscuro faciem circumdata nimbo,  
 Detulit ; hoc fusum labris splendentibus amnem  
 Inficit, occulte medicans ; spargitque salubres  
 Ambrosiæ sucos, et odoriferam panaceam.  
 Fovit ea vulnus lymphæ longævus Iapis 420



Ignorans ; subitoque omnis de corpore fugit  
 Quippe dolor ; omnis stetit imo vulnere sanguis.  
 Jamque secuta manum, nullo cogente, sagitta  
 Excidit, atque novæ rediere in pristina vires.  
 "Arma citi properate viro ! quid statis ?" lapis  
 Conclamat, primusque animos accendit in hostem.  
 "Non hæc humanis opibus, non arte magistra  
 Proveniunt, neque te, Ænea, mea dextera servat ;  
 Major agit deus, atque opera ad majora remittit."  
 Ille avidus pugnae suras incluserat auro 430  
 Hinc atque hinc, oditque moras, hastamque coruscat.  
 Postquam habilis lateri clipeus loricaque tergo est,  
 Ascanium fuis circum complectitur armis,  
 Summaque per galeam delibans oscula fatur :  
 "Disce, puer, virtutem ex me verumque laborem ;  
 Fortunam ex aliis. Nunc te mea dextera bello  
 Defensum dabit, et magna inter præmia ducet.  
 Tu facito, mox quum matura adoleverit ætas,  
 Sis memor, et te, animo repetentem exempla tuorum,  
 Et pater Æneas, et avunculus excitet Hector." 440

Hæc ubi dicta dedit, portis sese extulit ingens,  
 Telum immane manu quatiens : simul agmine denso  
 Antheusque Mnestheusque ruunt ; omnisque relictis  
 Turba fluit castris. Tum cæco pulvere campus  
 Miscetur, pulsuque pedum tremit excita tellus.  
 Vidit ab adverso venientes aggere Turnus,  
 Videre Ausonii, gelidusque per ima cucurrit  
 Ossa tremor. Prima ante omnes Juturna Latinos  
 Audiit agnovitque sonum, et tremefacta refugit.  
 Ille volat, campoque atrum rapit agmen aperto : 450  
 Qualis ubi ad terras abrupto sidere nimbus  
 It mare per medium : miseris, heu, præscia longe  
 Horrescunt corda agricolis ; dabit ille ruinas  
 Arboribus, stragemque satis ; ruet omnia late ;  
 Ante volant, sonitumque ferunt ad litora venti :  
 Talis in adversos ductor Rhœtæius hostes

Agmen agit; densi cuneis se quisque coactis  
Agglomerant. Ferit ense gravem Thymbræus Osirim,  
Archetium Mnæstheus, Epulonem obtruncat Achates,  
Ufentemque Gyas; cadit ipse Tolumnius augur, 460  
Primus in adversos telum qui torserat hostes.  
Tollitur in cælum clamor, versique vicissim  
Pulverulenta fuga Rutuli dant terga per agros.  
Ipse neque aversos dignatur sternere morti;  
Nec pede congressos æquo, nec tela ferentes  
Insequitur: solum densa in caligine Turnum  
Vestigat lustrans, solum in certamina poscit.  
Hoc concussa metu mentem Juturna virago  
Aurigam Turni media inter lora Metiscum  
Excutit, et longe lapsum temone relinquit: 470  
Ipsa subit, manibusque undantes flectit habenas,  
Cuncta gerens, vocemque et corpus et arma Metisci.  
Nigra velut magnas domini quum divitis ædes  
Pervolat et pennis alta atria lustrat hirundo,  
Pabula parva legens, nidisque loquacibus escas;  
Et nunc porticibus vacuis, nunc humida circum  
Stagna sonat: similis medios Juturna per hostes  
Fertur equis, rapidoque volans obit omnia curru;  
Jamque hic germanum, jamque hic ostentat ovantem;  
Nec conferre manum patitur; volat avia longe. 480  
Haud minus Æneas tortos legit obviis orbes,  
Vestigatque virum, et disjecta per agmina magna  
Voce vocat. Quoties oculos coniecit in hostem,  
Alipedumque fugam cursu tentavit equorum;  
Aversos toties currus Juturna retorsit.  
Heu, quid agat? Vario nequidquam fluctuat æstu,  
Diversæque vocant animum in contraria curæ.  
Huic Messapus, uti læva duo forte gerebat  
Lenta, levis cursu, præfixa hastilia ferro,  
Horum unum certo contorquens dirigit ictu. 490  
Substitit Æneas, et se collegit in arma,  
Poplite subsidens: apicem tamen incita summum

Hasta tulit, summasque excussit vertice cristas.  
 Tum vero assurgunt iræ; insidiisque subactus,  
 Diversos ubi sensit equos currumque referri,  
 Multa Jovem et læsi testatur foederis aras;  
 Jam tandem invadit medios, et Marte secundo  
 Terribilis sævam nullo discrimine cædem  
 Suscitât, irarumque omnes effundit habenas.

Quis mihi nunc tot acerba deus, quis carmine cædes 500  
 Diversas, obitumque ducum, quos æquore toto  
 Inque vicem nunc Turnus agit, nunc Troïus heros,  
 Expediat? tanton' placuit concurrere motu,  
 Jupiter, æterna gentes in pace futuras!  
 Æneas Rutulum Sacronem—ea prima ruentes  
 Pugna loco statuit Teucros—haud multa moratus  
 Excipit in latus, et, qua fata celerrima, crudum  
 Transadigit costas et crates pectoris ense.  
 Turnus equo dejectum Amycum, fratremque Diorem,  
 Congressus pedes, hunc venientem cuspide longa, 510  
 Hunc mucrone ferit; curruque abscisa duorum  
 Suspendit capita, et rorantia sanguine portat.  
 Ille Talon Tanaimque neci fortemque Cethegum,  
 Tres uno congressu, et mæstum mittit Onyten,  
 Nomen Echionium, matrisque genus Peridiæ;  
 Hic fratres Lycia missos et Apollinis agris,  
 Et juvenem exosum nequidquam bella Menœten  
 Arcada: piscosæ cui circum flumina Lernæ  
 Ars fuerat, pauperque domus; nec nota potentum  
 Limina; conductaque pater tellure serebat. 520  
 Ac velut immissi diversis partibus ignes  
 Arentem in silvam et virgulta sonantia lauro;  
 Aut ubi decursu rapido de montibus altis  
 Dant sonitum spumosi amnes, et in æquora currunt,  
 Quisque suum populatus iter: non segnius ambo  
 Æneas Turnusque ruunt per prælia; nunc, nunc  
 Fluctuat ira intus; rumpuntur nescia vinci  
 Pectora; nunc totis in vulnera viribus itur.

Murranum hic, atavos et avorum antiqua sonantem  
 Nomina, per regesque actum genus omne Latinos, 530  
 Præcipitem scopulo atque ingentis turbine saxi  
 Excutit, effunditque solo: hunc lora et juga subter  
 Provolvere rotæ: crebro super ungula pulsu  
 Incita, nec domini memorum proculcat equorum;  
 Ille ruenti Ilyllo, animisque immane frementi  
 Occurrit, telumque aurata ad tempora torquet:  
 Olli per galeam fixo stetit hasta cerebro.  
 Dexterâ nec tua te, Graium fortissime, Cretheu,  
 Eripuit Turno; nec di texere Cupencum  
 Ænea veniente sui; dedit obvia ferro 540  
 Pectora, nec misero clipei mora profuit ærei.  
 Te quoque Laurentes viderunt, Æole, campi  
 Oppetere, et late terram consternere tergo;  
 Occidis, Argivæ quem non potuere phalanges  
 Sternere, nec Priami regnorum eversor Achilles:  
 Hic tibi mortis erant metæ, domus alta sub Ida;  
 Lyrnessi domus alta, solo Laurente sepulcrum.  
 Totæ adeo conversæ acies, omnesque Latini,  
 Omnes Dardanidæ: Mnestheus, acerque Serestus,  
 Et Messapus equum domitor, et fortis Asylas, 550  
 Tuscorumque phalauX, Evandrique Arcades alæ:  
 Pro se quisque viri summa nituntur opum vi.  
 Nec mora, nec requies; vasto certamine tendunt.  
 Hic mentem Æneæ genetrix pulcherrima misit,  
 Iret ut ad muros, urbique adverteret agmen  
 Ocius, et subita turbaret clade Latinos.  
 Ille, ut vestigans diversa per agmina Turnum  
 Huc atque huc acies circumtulit, aspicit urbem  
 Immunem tanti belli, atque impune quietam.  
 Continuo pugnæ accendit majoris imago: 560  
 Mnesthea Sergestumque vocat fortemque Serestum,  
 Ductores, tumulumque capit, quo cetera Teucrum  
 Concurrit legio; nec scuta aut spicula densi  
 Deponunt. Celso medius stans aggere fatur:

" Ne qua meis esto dictis mora. Jupiter hac stat.  
 Neu quis ob inceptum subitum mihi segnior ito.  
 Urbem hodie, causam belli, regna ipsa Latini,  
 Ni frenum accipere et victi parere fatentur,  
 Eruam, et æqua solo fumantia culmina ponam.  
 Scilicet exspectem, libeat dum prælia Turno 570  
 Nostra pati, rursusque velit concurrere victus ?  
 Hoc caput, o cives, hæc belli summa nefandi.  
 Ferte faces propere, fœdusque reposcite flammis."  
 Dixerat, atque animis pariter certantibus omnes  
 Dant cuneum, densaque ad muros mole feruntur.  
 Scalæ improviso, subitusque apparuit ignis.  
 Discurrunt alii ad portas, primosque trucidant ;  
 Ferrum alii torquent, et obumbrant æthera telis.  
 Ipse inter primos dextram sub mœnia tendit  
 Æneas, magnaue incusat voce Latinum ; 580  
 Testaturque deos, iterum se ad prælia cogi ;  
 Bis jam Italos hostes ; hæc altera fœdera rumpi.  
 Exoritur trepidos inter discordia cives :  
 Urbem alii reserare jubent, et pandere portas  
 Dardanidis, ipsumque trahunt in mœnia regem ;  
 Arma ferunt alii, et pergunt defendere muros :  
 Inclusas ut quum latebroso in pumice pastor  
 Vestigavit apes, fumoque implevit amaro ;  
 Illæ intus trepidæ rerum per cerea castra  
 Discurrunt, magnisque acuunt stridoribus iras : 590  
 Volvitur ater odor tectis ; tum murmure cæco  
 Intus saxa sonant ; vacuas it fumus ad auras.  
 Accidit hæc fessis etiam fortuna Latinis,  
 Quæ totam luctu concussit funditus urbem.  
 Regina ut tectis venientem prospicit hostem,  
 Incessi muros, ignes ad tecta volare,  
 Nusquam acies contra Rutulas, nulla agmina Turni ;  
 Infelix pugnæ juvenem in certamine credit  
 Extinctum ; et, subito mentem turbata dolore,  
 Se causam clamat, crimenque, caputque malorum ; 600

Multaque per mæstum demens efflata furorem,  
 Purpureos moritura manu discindit amictus,  
 Et nodum informis leti trabe nectit ab alta.  
 Quam cladem miseræ postquam accepere Latinæ,  
 Filia prima manu flavos Lavinia crines  
 Et roseas laniata genas, tum cetera circum  
 Turba, furit: resonant late plangoribus ædes.  
 Hinc totam infelix vulgatur fama per urbem.  
 Demittunt mentes; it scissa veste Latinus,  
 Conjugis attonitus fatis, urbisque ruina,  
 Canitiem immundo perfusam pulvere turpans,  
 [Multaque se incusat, qui non acceperit ante  
 Dardanium Ænean, generumque adsciverit ultro.]

610

Interea extremo bellator in æquore Turnus  
 Palantes sequitur paucos, jam segnior, atque  
 Jam minus atque minus successu lætus equorum.  
 Attulit hunc illi cæcis terroribus aura  
 Commixtum clamorem, arrectasque impulit aures  
 Confusæ sonus urbis et illætabile murmur.

"Hei mihi! quid tanto turbantur mœnia luctu?

620

Quisve ruit tantus diversa clamor ab urbe?"

Sic ait, adductisque amens subsistit habenis.

Atque huic, in faciem soror ut conversa Metisci

Aurigæ currumque et equos et lora regibat,

Talibus occurrit dictis: "Hæc, Turne, sequamur

Trojugenas, qua prima viam victoria pandit;

Sunt alii, qui tecta manu defendere possint.

Ingruit Æneas Italis, et prælia miscet;

Et nos sæva manu mittamus funera Teucris.

Nec numero inferior, pugnae nec honore recedes."

630

Turnus ad hæc:

"O soror, et dudum agnovi, quum prima per artem

Fœdera turbasti, teque hæc in bella dedisti;

Et nunc nequidquam fallis dea: sed quis Olympo

Demissam tantos voluit te ferre labores?

An fratris miseri letum ut crudele videres?

Nam quid ago ? aut quæ jam spondet fortuna salutem ?  
 Vidi oculos ante ipse meos me voce vocantem  
 Murranum, quo non superat mihi carior alter,  
 Oppetere ingentem atque ingenti vulnere victum. 640  
 Occidit infelix, ne nostrum dedecus Ufens  
 Aspiceret ; Teucris potiuntur corpore et armis.  
 Exscindine domos, id rebus defuit unum,  
 Perpetiar ? dextra nec Drancis dicta refellam ?  
 Terga dabo ? et Turnum fugientem hæc terra videbit ?  
 Usque adeone mori miserum est ? vos o mihi Manes  
 Este boni : quoniam superis aversa voluntas.  
 Sancta ad vos anima, atque istius inscia culpæ  
 Descendam, magnorum haud unquam indignus avorum."

Vix ea fatus erat : medios volat ecce per hostes 650  
 Vectus equo spumante Saces, adversa sagitta  
 Saucius ora, ruitque implorans nomine Turnum :  
 "Turne, in te suprema salus ; miserere tuorum.  
 Fulminat Æneas armis, summasque minatur  
 Dejecturum arces Italum, excidioque daturum ;  
 Jamque faces ad tecta volant. In te ora Latini,  
 In te oculos referunt : mussat rex ipse Latinus,  
 Quos generos vocet, aut quæ sese ad fœdera flectat.  
 Præterea regina, tui fidissima, dextra  
 Occidit ipsa sua, lucemque exterrita fugit. 660  
 Soli pro portis Messapus et acer Atinas  
 Sustentant aciem. Circum hos utrimque phalanges  
 Stant densæ, strictisque seges mucronibus horret  
 Ferrea : tu currum deserto in gramine versas."  
 Obstupuit varia confusus imagine rerum  
 Turnus, et obtutu tacito stetit. Æstuat ingens  
 Uno in corde pudor, mixtoque insania luctu,  
 Et Furiis agitatus amor, et conscia virtus.  
 Ut primum discussæ umbræ, et lux reddita menti,  
 Ardentes oculorum orbes ad mœnia torsit 670  
 Turbidus, eque rotis magnam respexit ad urbem.  
 Ecce autem, flammis inter tabulata volutus

Ad cœlum undabat vertex, turrinque tenebat ;  
 Turrim, compactis trabibus quam eduxerat ipse,  
 Subdideratque rotas, pontesque instraverat altos.  
 " Jam jam fata, soror, superant ; absiste morari ;  
 Quo deus et quo dura vocat fortuna, sequamur.  
 Stat conferre manum Æneæ, stat, quidquid acerbi est,  
 Morte pati ; nec me indecorem, germana, videbis  
 Amplius. Hunc, oro, sine me furere ante furorem." 680  
 Dixit, et e curru saltum dedit ocus arvis ;  
 Perque hostes, per tela ruit ; mæstamque sororem  
 Deserit, ac rapido cursu media agmina rumpit.  
 Ac veluti montis saxum de vertice præceps  
 Quum ruit, avulsum vento, seu turbidus imber  
 Proluit, aut annis solvit sublapsa vetustas ;  
 Fertur in abruptum magno mons improbus actu,  
 Exsultatque solo, silvas, armenta, virosque  
 Involvens secum : disjecta per agmina Turnus  
 Sic urbis ruit ad muros, ubi plurima fuso 690  
 Sanguine terra madet, striduntque hastilibus auræ ;  
 Significatque manu, et magno simul incipit ore :  
 " Parcite jam, Rutuli ; et vos tela inhibete, Latini ;  
 Quæcumque est fortuna, mea est ; me verius unum  
 Pro vobis fœdus luere, et decernere ferro."  
 Discessere omnes medii, spatiumque dedere.

At pater Æneas, audito nomine Turni,  
 Deserit et muros, et summas deserit arces ;  
 Præcipitatque moras omnes ; opera omnia rumpit,  
 Lætitia exsultans, horrendumque intonat armis : 700  
 Quantus Athos, aut quantus Eryx, aut ipse coruscis  
 Quum fremit ilicibus quantus, gaudetque nivali  
 Vertice, se attollens pater Appenninus ad auras.  
 Jam vero et Rutuli certatim, et Troës, et omnes  
 Convertere oculos Itali, quique alta tenebant  
 Mœnia, quique imos pulsabant ariete muros ;  
 Armaque deposuere humeris. Stupet ipse Latinus,  
 Ingentes, genitos diversis partibus orbis,



Inter se coiisse viros, et cernere ferro.  
 Atque illi, ut vacuo patuerunt æquore campi, 710  
 Procursu rapido, coniectis eminus hastis,  
 Invadunt Martem clipeis atque ære sonoro.  
 Dat gemitum tellus : tum crebros ensibus ictus  
 Congeminant. Fors et virtus miscentur in unum.  
 Ac velut ingenti Sila summove Taburno  
 Quum duo conversis inimica in prælia tauri  
 Frontibus incurrunt, pavidì cessere magistri ;  
 Stat pecus omne metu mutum, mussantque juvencæ,  
 Quis nemori imperitet, quem tota armenta sequantur ;  
 Illi inter sese multa vi vulnera miscent, 720  
 Cornuaque obnixa infigunt, et sanguine largo  
 Colla armosque lavant ; gemitu nemus omne remugit :  
 Haud aliter Tros Æneas et Daunius heros  
 Concurrunt clipeis ; ingens fragor æthera complet.  
 Jupiter ipse duas æquato examine lances  
 Sustinet, et fata imponit diversa duorum,  
 Quem damnet labor, et quo vergat pondere letum.  
 Emicat hic, impune putans, et corpore toto  
 Alte sublatum consurgit Turnus in ensem,  
 Et ferit. Exclamant Troës trepidique Latini, 730  
 Arrectæque amborum acies. At perfidus ensis  
 Frangitur, in medioque ardentem deserit ictu :  
 Ni fuga subsidio subeat. Fugit ocior euro,  
 Ut capulum ignotum dextramque aspexit incrimem.  
 Fama est, præcipitem, quum prima in prælia junctos  
 Consceudebat equos, patrio mucrone relicto,  
 Dum trepidat, ferrum aurigæ rapuisse Metisci ;  
 Idque diu, dum terga dabant palantia Teuceri,  
 Suffecit : postquam arma dei ad Vulcania ventum,  
 Mortalis mucro, glacies ceu futilis, ictu 740  
 Dissiluit ; fulva resplendent fragmina arena.  
 Ergo amens diversa fuga petit æquora Turnus ;  
 Et nunc huc, inde huc incertos implicat orbes.  
 Undique enim densa Teuceri includere corona ;

Atque hinc vasta palus, hinc ardua mœnia cingunt.

Nec minus Æneas, quanquam tardata sagitta  
Interdum genua impediunt cursumque recusant,  
Insequitur, trepidique pedem pede fervidus urget :  
Inclusum veluti si quando flumine nactus

Cervum, aut puniceæ septum formidine pennæ, 750  
Venator cursu canis et latratibus instat ;

Ille autem, insidiis et ripa territus alta,  
Mille fugit refugitque vias : at vividus Umber  
Hæret hians, jam jamque tenet, similisque tenenti  
Increpuit malis, morsuque elusus inani est.

Tum vero exoritur clamor ; ripæque lacusque  
Responsant circa, et cœlum tonat omne tumultu.  
Ille simul fugiens, Rutulos simul increpat omnes,  
Nomine quemque vocans, notumque efflagitat ensem.

Æneas mortem contra, præsensque minatur 760

Exitium, si quisquam adeat ; terretque trementes,  
Excisurum urbem minitans, et caucius instat.  
Quinque orbes explent cursu, totidemque retexunt  
Huc illuc. Neque enim levia aut ludicra petuntur  
Præmia ; sed Turni de vita et sanguine certant.

Forte sacer Fauno foliis oleaster amaris  
Hic steterat, nautis olim venerabile lignum ;  
Servati ex undis ubi figere dona solebant  
Laurenti divo, et votas suspendere vestes.

Sed stirpem Teuceri nullo discrimine sacrum 770  
Sustulerant, puro ut possent concurrere campo.

Hic hasta Æneæ stabat : huc impetus illam  
Detulerat, fixam et lenta in radice tenebat.  
Incubuit voluitque manu convellere ferrum  
Dardanides, teloque sequi, quem prendere cursu  
Non poterat. Tum vero amens formidine Turnus,  
“ Faune, precor, miserere,” inquit ; “ tuque optima ferrum  
Terra tene : colui vestros si semper honores,  
Quos contra Æneadæ bello fecere profanos.”  
Dixit, opemque dei non cassa in vota vocavit. 780

Namque diu luctans, lentoque in stirpe moratus,  
 Viribus haud ullis valuit discludere morsus  
 Roboris Æneas. Dum nititur acer, et instat,  
 Rursus in aurigæ faciem mutata Metisci  
 Procurrit, fratrique ensem dea Daunia reddit.  
 Quod Venus audaci Nymphæ indignata licere  
 Accessit, telumque alta ab radice revellit.  
 Olli sublimes, armis animisque refectione,  
 Hic gladio fidens, hic acer et arduus hasta,  
 Adsistunt contra certamine Martis anhelant.

790

Juonem interea Rex omnipotentis Olympi  
 Alloquitur, fulva pugnans de nube tuentem :  
 “ Quæ jam finis erit, conjux ? quid denique restat ?  
 Indigetem Ænean scis ipsa, et scire fatearis,  
 Deberi cœlo, fatisque ad sidera tolli.  
 Quid struis ? aut qua spe gelidis in nubibus hæres ?  
 Mortalin’ decuit violari vulnere divum ?

Aut ensem—quid enim sine te Juturna valeret ?—  
 Ereptum reddi Turno, et vim crescere victis ?

Desine jam tandem, precibusque inflectere nostris ; 800  
 Nec te tantus edat tacitam dolor ; et mihi curæ  
 Sæpe tuo dulci tristes ex ore recurrant.

Ventum ad supremum est. Terris agitare vel undis  
 Trojanos potuisti ; infandum accendere bellum,  
 Deformare domum, et luctu miscere hymenæos :  
 Ulterius tentare veto.” Sic Jupiter orsus ;  
 Sic dea submisso contra Saturnia vultu :

“ Ista quidem quia nota mihi tua, magne, voluntas,  
 Jupiter : et Turnum et terras invita reliqui.

Nec tu me æria solam nunc sede videres 810

Digna indigna pati ; sed flammis cincta sub ipsam  
 Starem aciem, traheremque inimica in prælia Teucros.

Juturnam misero, fateor, succurrere fratri  
 Suasi, et pro vita majora audere probavi ;  
 Non ut tela tamen, non ut contenderet arcum ;  
 Adjuro Stygii caput implacabile fontis,

Una superstitio superis quæ reddita divis.  
 Et nunc cedo equidem, pugnasque exosa relinquo.  
 Illud te, nulla fati quod lege tenetur,  
 Pro Latio obtestor, pro majestate tuorum :  
 Quum jam connubiis pacem felicibus, esto,  
 Component, quum jam leges et fœdera jungent :  
 Ne vetus indigenas nomen mutare Latinos,  
 Neu Troas fieri jubeas, Teucrosque vocari ;  
 Aut vocem mutare viros, aut vertere vestes.  
 Sit Latium, sint Albani per sæcula reges ;  
 Sit Romana potens Italia virtute propago ;  
 Occidit, occideritque sinas cum nomine Troja."

820

Olli subridens hominum rerumque repertor :  
 " Et germana Jovis, Saturnique altera proles,  
 Irarum tantos volvis sub pectore fluctus ?  
 Verum age, et inceptum frustra submitte furorem.  
 Do, quod vis ; et me victusque volensque remitto.  
 Sermonem Ausonii patrium moresque tenebunt ;  
 Utque est, nomen erit ; commixti corpore tantum  
 Subsident Teuceri. Morem ritusque sacrorum  
 Adjiciam, faciamque omnes uno ore Latinos.  
 Hinc genus Ausonio mixtum quod sanguine surget,  
 Supra homines, supra ire deos pietate videbis ;  
 Nec gens ulla tuos æque celebrabit honores."  
 Annuit his Juno, et meutem lætata retorsit.  
 Interea excedit cœlo, nubemque relinquit.

830

840

His actis, aliud Genitor secum ipse volutat,  
 Juturnamque parat fratris dimittere ab armis.  
 Dicuntur geminæ pestes cognomine Diræ,  
 Quas et Tartaream Nox intempesta Megæram  
 Uno eodemque tulit partu, paribusque revinxit  
 Serpentum spiris, ventosasque addidit alas.  
 Hæ Jovis ad solium, sævique in limine regis,  
 Apparent, acuuntque metum mortalibus ægris,  
 Si quando letum horrifecum morbosque deum rex  
 Molitur, meritas aut bello territat urbes.

850

Harum unam celerem demisit ab æthere summo  
 Jupiter, inque omen Juturnæ occurrere jussit.  
 Illa volat, celerique ad terram turbine fertur:  
 Non secus ac nervo per nubem impulsa sagitta,  
 Armatam sævi Parthus quam felle veneni,  
 Parthus, sive Cydon, telum immedicabile, torsit,  
 Stridens et celeres incognita transilit umbras.  
 Talis se sata Nocte tulit, terrasque petivit. 860  
 Postquam acies videt Iliacas atque agmina Turni,  
 Alitis in parvæ subitam collecta figuram,  
 Quæ quondam in bustis aut culminibus desertis  
 Nocte sedens serum canit importuna per umbras;  
 Hanc versa in faciem Turni se pestis ob ora  
 Fertque refertque sonans, clipeumque everberat alis.  
 Illi membra novus solvit formidine torpor;  
 Arrectæque horrore comæ, et vox faucibus hæsit.  
 At procul ut Diræ stridorem agnovit et alas,  
 Infelix crines scindit Juturna solutos, 870  
 Unguibus ora soror fœdans, et pectora pugnīs:  
 "Quid nunc te tua, Turne, potest germana juvare?  
 Aut quid jam duræ superat mihi? qua tibi lucem  
 Arte morer? talin' possum me opponere monstro?  
 Jam jam linquo acies. Ne me terrete timentem,  
 Obscenæ volucres; alarum verbera nosco,  
 Letalemque sonum; nec fallunt jussa superba  
 Magnanimi Jovis. Hæc pro virginitate reponit?  
 Quo vitam dedit æternam? cur mortis ademta est  
 Conditio? possem tantos finire dolores 880  
 Nunc certe, et misero fratri comes ire per umbras.  
 Immortalis ego? aut quidquam mihi dulce meorum  
 Te sine, frater, erit? O quæ satis alta dehiscat  
 Terra mihi, manesque deam demittat ad imos?"  
 Tantum effata, caput glauco contextit amictu  
 Multa gemens, et se fluvio dea condidit alto.

Æneas instat contra, telumque coruscat  
 Ingens arboreum, et sævo sic pectore fatur:

"Quæ nunc deinde mora est? aut quid jam, Turne, retractas?  
 Non cursu, sævis certandum est cominus armis. 890  
 Verte omnes tete in facies; et contrahe, quidquid  
 Sive animis sive arte vales; opta ardua pennis  
 Astra sequi, clausumve cava te condere terra."  
 Ille caput quassans: "Non me tua fervida terrent  
 Dicta, ferox; di me terrent, et Jupiter hostis."  
 Nec plura effatus, saxum circumspicit ingens,  
 Saxum antiquum, ingens, campo quod forte jacebat,  
 Limes agro positus, litem ut discerneret arvis;  
 Vix illud lecti bis sex cervice subirent,  
 Qualia nunc hominum producit corpora tellus: 900  
 Ille manu raptum trepida torquebat in hostem,  
 Altior insurgens, et cursu concitus heros.  
 Sed neque currentem se, nec cognoscit euntem,  
 Tollentemve manu saxumque immane moventem:  
 Genua labant; gelidus concrevit frigore sanguis.  
 Tum lapis ipse viri, vacuum per inane volutus,  
 Nec spatium evasit totum, nec pertulit ictum.  
 Ac velut in somnis, oculos ubi languida pressit  
 Nocte quies, nequidquam avidos extendere cursus  
 Velle videmur, et in mediis conatibus ægri 910  
 Succidimus; non lingua valet, non corpore notæ  
 Sufficiunt vires, nec vox aut verba sequuntur:  
 Sic Turno, quacumque viam virtute petivit,  
 Successum dea dira negat. Tum pectore sensus  
 Vertuntur varii. Rutulos aspectat et urbem,  
 Cunctaturque metu, telumque instare tremiscit;  
 Nec quo se eripiat, nec qua vi tendat in hostem,  
 Nec currus usquam videt, aurigamve sororem.  
 Cunctanti telum Æneas fatale coruscat,  
 Sortitus fortunam oculis; et corpore toto 920  
 Eminus intorquet. Murali concita nunquam  
 Tormento sic saxa fremunt, nec fulmine tanti  
 Dissultant crepitus. Volat atri turbinis instar  
 Exitium dirum hasta ferens, orasque recludit

Loricæ, et clipei extremos septemplicis orbes ;  
 Per medium stridens transit femur. Incidit ictus  
 Ingens ad terram duplicato poplite Turnus.  
 Consurgunt gemitu Rutuli, totusque remugit  
 Mons circum, et vocem late nemora alta remittunt.  
 Ille humilis supplexque oculos dextramque precantem 930  
 Protendens, "Equidem merui, nec deprecor," inquit ;  
 "Utere sorte tua. Miseri te si qua parentis  
 Tangere cura potest, oro—fuit et tibi talis  
 Anchises genitor—Dauni miserere senectæ ;  
 Et me, seu corpus spoliatum lumine mavis,  
 Redde meis. Vicisti ; et victum tendere palmas  
 Ausonii videre ; tua est Lavinia conjux ;  
 Ulterius ne tende odiis." Stetit acer in armis  
 Æneas, volvens oculos, dextramque repressit ;  
 Et jam jamque magis cunctantem flectere sermo 940  
 Cœperat : infelix humero quum apparuit alto  
 Balteus, et notis fulserunt cingula bullis  
 Pallantis pueri ; victum quem vulnere Turnus  
 Straverat atque humeris inimicum insigne gerebat.  
 Ille, oculis postquam sævi monumenta doloris  
 Exuviasque hausit, furiis accensus, et ira  
 Terribilis : "Tunc hinc spoliis indute meorum  
 Eripiare mihi ? Pallas te hoc vulnere, Pallas  
 Immolat, et pœnam scelerato ex sanguine sumit."  
 Hoc dicens, ferrum adverso sub pectore condit 950  
 Fervidus. Ast illi solvuntur frigore membra,  
 Vitaque cum gemitu fugit indignata sub umbras.





P. VIRGILII MARONIS

UT VULGO FERTUR

CARMINA MINORA.



P. VIRGILII MARONIS

C U L E X

AD OCTAVIUM.



LUSIMUS, Octavi, gracili modulante Thalia,  
Atque, ut araneoli, tenuem formavimus orsum.  
Lusimus: hæc propter Culicis sint carmina dicta,  
Omnis ut historiæ per ludum consonet ordo  
Notitiæ: ducam voces, licet invidus adsit.  
Quisquis erit culpare jocos Musamque paratus,  
Pondere vel Culicis levior famaue feretur.  
Posterius graviore sono tibi Musa loquetur  
Nostra, dabunt quum securos mihi tempora fructus, 10  
Ut tibi digna tuo poliantur carmina sensu.

Latonæ magnique decus Jovis, aurea proles,  
Phœbus erit nostri princeps et carminis auctor,  
Et recinente lyra fautor, sive educat illum  
Alma Chimæreo Xanthus perfusa liquore,  
Seu nemus Asteriæ, seu qua Parnasia rupes  
Hinc atque hinc patula præpandit cornua fronte,  
Castaliæque sonans liquido pede labitur unda.  
Quare, Pierii laticis decus, ite, sorores  
Naiðes, et celebrate deum plaudente chorea.  
Et tibi, sancta Pales, ad quam ventura recurrit 20  
Agrestium bona cura, sequi sit cura tenentis  
Aëreos nemorum tractus silvasque virentes.  
Te cultrice vagus saltus feror inter et astra.

At tu, cui meritis oritur fiducia chartis,  
Octavi venerande, meis allabere cœptis,

Sancte puer : tibi namque canit non pagina bellum,  
 Phlegra Giganteo sparsa est quo sanguine tellus,  
 Nec Centaureos Lapithas compellit in enses ;  
 Urit Erichthonias Oriens non ignibus arces ;  
 Non perfossus Athos nec magno vincula Ponto 30  
 Jacta, meo quærent jam sera volumine famam ;  
 Non Hellespontus pedibus pulsatus equorum,  
 Græcia quum timuit venientes undique Persas :  
 Molliâ sed tenui percurrere carmina versu,  
 Viribus apta suis, Phœbo duce, ludere gaudet.  
 Et tu, sancte puer, venerabilis, et tibi certet  
 Gloria perpetuum lucis mansura per ævum ;  
 Et tibi sede pia maneat locus, et tibi sopes  
 Debita felices memoretur vita per annos,  
 Grata bonis lucens. Sed nos ad cœpta feramur. 40

Ignæus ætherias jam Sol penetrarat in arces,  
 Candidaque aurato quatiebat lumina curru,  
 Crinibus et roseis tenebras Aurora fugarat :  
 Propulit ut stabulis ad pabula læta capellas  
 Pastor, et excelsi montis juga summa petivit,  
 Lucida qua patulos velabant gramina colles.  
 Jam silvis dumisque vagæ jam vallibus abdunt  
 Corpora ; jamque omni celeres e parte vagantes  
 Scrupea desertæ perrepunt ad cava rupis.  
 Tondentur tenero viridantia gramina morsu, 50  
 Pendula projectis carpuntur et arbuta ramis,  
 Densaque virgultis avide labrusca petuntur.  
 Hæc suspensa rapit carpente cacumina morsu  
 Vel salicis lentæ, vel quæ nova nascitur alnus ;  
 Hæc teneras fruticum sentes rimatur ; at illa  
 Imminet in rivi præstantis imaginis undam.

O bona pastoris, si quis non pauperis usum  
 Mente prius docta fastidiat, et probet illis  
 Omnia luxuriæ pretiis incognita curis,  
 Quæ lacerant avidas inimico pectore mentes. 60  
 Si non Assyrio fuerint bis lauta colore,

Attaliciis opibus data vellera; si nitor auri  
 Sub laqueare domus animum non tangit avarum;  
 Picturæque decus, lapidum nec fulgor in ulla  
 Cognitus utilitate manet; nec pocula gratum  
 Alconis referent Bœtique toreuma; nec Indi  
 Conchea bacca maris pretio est: at pectore puro  
 Sæpe super tenero prosternit gramine corpus;  
 Florida quum tellus gemmantes picta per herbas  
 Vere notat dulci distincta coloribus arva; 70  
 Atque illum, calamo lætum recinente palustri,  
 Otiæque invidia degentem ac fraude remota,  
 Pollentemque sibi, viridi quum palmitè ludens  
 Tmolia pampineo subter coma velat amictu.  
 Illi sunt gratae rorantes lacte capellæ,  
 Et nemus, et fecunda Pales, et vallibus imis  
 Semper opaca novis manantia fontibus antra.  
 Quis magis optato queat esse beatior ævo,  
 Quam qui mente procul pura sensuque probando  
 Non avidas agnovit opes; non tristia bella, 80  
 Nec funesta timet validæ certamina classis;  
 Non, spoliis dum sancta deum fulgentibus ornet  
 Tempia vel evectus finem transcendat habendi,  
 Adversum sævis ultro caput hostibus offert.  
 Illi falce deus colitur, non arte politus;  
 Ille colit lucos; illi Panchaïa thura,  
 Floribus agrestes herbæ variantibus adsunt;  
 Illi dulcis adest requies et pura voluptas,  
 Libera simplicibus curis: huc imminet, omnes  
 Dirigit huc sensus, hæc cura est subdita cordi, 90  
 Quolibet ut requie victu contentus abundet,  
 Jucundoque liget languentia corpora somno.  
 O pecudes, o Panes, et o gratissima Tempe  
 Fontis Hamadryadum, quarum non divite cultu  
 Æmulus Ascræo pastor sibi quisque poëtæ  
 Securam placido traducit pectore vitam.  
 Talibus in studiis baculo dum nixus apricas

Pastor agit curas, et dum non arte canora  
 Compacta solitum modulatur arundine carmen :  
 Tendit inevectus radios Hyperionis ardor,  
 Lucidaque ætherio ponit discrimina mundo,  
 Qua jacet Oceanum flammæ in utrumque rapaces.

100

Et jam compellente vagæ pastore capellæ  
 Ima susurrantis repebant ad vada lymphæ,  
 Quæ subter viridem residebant cærula muscum.  
 Jam medias operum partes evectus erat sol,  
 Quum densas pastor pecudes cogebat in umbras,  
 Et procul aspexit luco residere virenti,  
 Delia diva, tuo : quo quondam victa furore  
 Venit Nyctelium fugiens Cadmeis Agave  
 Infandas scelerata manus e cæde cruenta :  
 Quæ gelidis bacchata jugis requievit in antro.  
 Posterius pœnam nati se morte futuram.  
 Hic etiam viridi ludentes Panes in herba  
 Et Satyri Dryadesque choros egere puellæ  
 Naiadum cœtu. Tantum non Orpheus Hebrum  
 Restantem tenuit ripis silvasque canendo,  
 Quantum te, Peneu, remorantem dia chorea,  
 Multa tibi læto fundentes gaudia vultu,  
 Ipsa loci natura domum resonante susurro  
 Queis dabat, et dulci fessas refovebat in umbra.  
 Nam primum prona surgebant valle patentes  
 Aëreæ platanus, inter quas impia lotos,  
 Impia, quæ socios Ithaci mærentis abegit,  
 Hospita dum nimia tenuit dulcedine captos.  
 At, quibus insigni curru projectus equorum  
 Ambustus Phaëthon luctu mutaverat artus,  
 Heliades teneris amplexæ brachia truncis  
 Candida fundebant tentis velamina ramis.  
 Posterius, cui Demophoon æterna reliquit  
 Perfidiam lamentandi mala, perfida multis.  
 Quam comitabantur fatalia carmina quercus,  
 Quercus ante datæ, Cereris quam semina, vitæ ;

110

120

130

Illas Triptolemi mutavit sulcus aristis.  
 Hic, magnum Argoæ navi decus, edita pinus  
 Proceras decorat silvas hirsuta per artus ;  
 Appetit aëreis contingere montibus astra  
 Illicis et nigræ species, et læta cupressus ;  
 Umbrosæque manent fagus, hederæque ligantes  
 Brachia, fraternos plangat ne populus ictus ;  
 Ipsæque excedunt ad summa cacumina lentæ,  
 Pinguntque aureolos viridi pallore corymbos ;  
 Queis aderat veteris myrtus non nescia fati.  
 At volucres patulis residentes dulcia ramis  
 Carmina per varios edunt resonantia cantus.  
 His suberat gelidis manans e fontibus unda,  
 Quæ levibus placidum rivis sonat orta liquorem ;  
 Et, quanquam geminas avium vox obstrepat aures,  
 Hanc querulæ referunt voces, queis nantia limo  
 Corpora lymphæ foveat. Sonitus alit aëris Echo,  
 Argutis et cuncta fremunt ardore cicadis.  
 At circa passim fessæ cubuere capellæ,  
 Excelsisque super dumis, quos leniter afflans  
 Aura susurrantis possit confundere venti.

Pastor, ut ad fontem densa requievit in umbra,  
 Mitem concepit projectus membra soporem,  
 Auxius insidiis nullis : sed lentus in herbis  
 Securo pressos somno mandaverat artus :  
 Stratus humi dulcem capiebat corde quietem :  
 Ni fors incertos jussisset ducere casus.  
 Nam solitum volvens ad tempus tractibus isdem  
 Immanis vario maculatus corpore serpens,  
 Mersus ut in limo magno subsideret æstu  
 Obvia vibranti carpens gravis aëra lingua,  
 Squamosos late torquebat motibus orbes.  
 Tollebant auræ venientis ad omnia visus.  
 Jam magis atque magis corpus revolubile volvens  
 Attollit nitidis pectus fulgoribus, et se  
 Sublimi cervice rapit ; cui crista superne

Edita purpureo lucens maculatur amictu, 170  
Aspectuque micant flammantia lumina torvo.  
Metabat late circum loca, quum videt ingens  
Adversum recubare ducem gregis. Acrior instat  
Lumina diffundens intendere, et obvia torvo  
Sapius arripiens infringere, quod sua quisquam  
Ad vada venisset : naturæ comparat arma ;  
Ardet mente, furit stridoribus, intonat ore ;  
Flexibus eversis torquetur corporis orbes ;  
Manant sanguineæ per tractus undique guttæ,  
Spiritus et rumpit fauces. Cui cuncta paranti 180  
Parvulus hunc prior humoris conterret alumnus,  
Et mortem vitare monet per acumina : namque  
Qua diducta genas pandebant lumina gemmis,  
Hac senioris erat naturæ pupula, telo  
Icta levi. Tum prosiluit furibundus, et illum  
Obtritum morti misit : cui dissitus omnis  
Spiritus excessit sensus. Tum torva tenentem  
Lumina respexit serpentem cominus : inde  
Impiger, exanimis, vix compos mente, refugit,  
Et validum dextra truncum detraxit ab orno : 190  
Qui casus sociaret opem, numenve Deorum.  
Namque illi dederitne viam casusve, deusve,  
Prodere sit dubium : voluit sed vincere tales  
Horrida squamosi volventia membra draconis :  
Atque reluctantis crebris fœdeque petentis  
Ictibus ossa ferit, cingunt qua tempora cristæ ;  
Et quæcâ erat tardus, somni languore remoto,  
Nescius aspiciens, timor obscæcaverat artus :  
Hoc minus implicuit dira formidine mentem.  
Quem postquam vidit cæsum languescere, sedit. 200  
Jam quatit et bijuges oriens Erebo cit equos Nox,  
Et piger aurato procedit Vesper ab Cæta,  
Quum grege compulso pastor, duplicantibus umbris,  
Vadit, et in fessos requiem dare comparat artus.  
Cujus ut intravit levior per corpora somnus,



Languidaque effuso requierunt membra sopore,  
Effigies ad eum Culicis devenit, et illi  
Tristis ab eventu cecinit convicia mortis.  
Inquit: "Quid meritus, ad quæ delatus acerbis  
Cogor adire vices? Tua dum mihi carior ipsa 210  
Vita fuit vita, rapior per inania ventis.  
Tu lentus refoves jucunda membra quiete,  
Ereptus tetris e cladibus: at mea manes  
Viscera Lethæas cogunt transnare per undas;  
Præda Charontis agor. Viden' ut flagrantia tædis  
Lumina collucent infestis omnia templis;  
Obvia Tisiphone, serpentibus undique comta,  
Et flammæ et sæva quatit mihi verbera pœnæ,  
Cerberus et diris flagrat latratibus ora,  
Anguibus hinc atque hinc horrent cui colla reflexis, 220  
Sanguineique micant ardorem luminis orbes.  
Heu! quid ab officio digressa est gratia, quum te  
Restitui superis leti jam limine ab ipso?  
Præmia sunt pietatis ubi, pietatis honores?  
In vanas abiere vices; et rure recessit  
Justitiæ prior illa fides. Instantia vidi  
Alterius, sine respectu mea fata relinquens;  
Ad pariles agor eventus; fit pœna merenti;  
Pœna fit exitium: modo sit dum grata voluntas!  
Exsistat par officium! Feror avia carpens, 230  
Avia Cimmerios inter distantia lucos,  
Quem circa tristes densentur in omnia pœnæ.  
Nam vinctus sedet immanis serpentibus Otos,  
Devinctum mæstus procul aspiciens Ephialten,  
Conati quum sint quondam rescindere mundum;  
Et Tityos, Latona, tuæ memor anxius iræ,—  
Implacabilis ira nimis—jacet alitis esca.  
Terreor ah tantis insistere, terreor, umbris,  
Ad Stygias revocatus aquas. Vix ultimus amni  
Restat, nectareas divum qui prodidit escas: 240  
Gutturis arenti revolutus in omnia sensu.

Quid, saxum procul adverso qui monte revolvit,  
Contempsisse dolor quem numina vincit acerbus,  
Otia quærentem frustra? Vos ite puellæ,  
Ite, quibus tædas accendit tristis Erinys,—  
Sicut Hymen præfata dedit connubia mortis,—  
Atque alias alio densat super agmine turmas,  
Impietate fera vecordem Colchida matrem  
Anxia sollicitis meditantem vulnera natis;  
Jam Pandionias miseranda prole puellas,  
Quarum vox Ityn, et Ityn, quod Bistonius rex  
Orbus epops mæret volucres evectus in auras.  
At discordantes Cadmeo sanguine fratres  
Jam truculenta ferunt infestaque vulnera corpus  
Alter in alterius: jamque aversatus uterque,  
Impia germani manat quod sanguine dextra.  
Eheu, mutandus nunquam labor! Auferor ultra  
In diversa magis: distantia limina cerno:  
Elysiam tranandus agor delatus ad undam.  
Obvia Persephone comites Heroïdas urget  
Adversas perferre faces. Alcestis ab omni  
Inviolata vacat cura, quod sæva mariti  
Ipsa suis fatis Admeti fata morata est.  
Ecce Ithaci conjux, semper decus, Icariotis  
Femineum incorrupta decus; manet et procul illa  
Turba ferox juvenum telis confixa procorum.  
Quin misera Eurydice tanto mærore recessit,  
Pœnaque respectus et nunc, Orpheu, manet in te.  
Audax ille quidem, qui mitem Cerberon unquam  
Credidit, aut ulli Ditis placabile numen,  
Nec timuit Phlegethonta furem ardentibus undis,  
Nec mæsta obtentu diro et ferrugine regna,  
Defossasque domos ac Tartara nocte cruenta  
Obsita, nec faciles Ditis sine judice sedes,  
Judice, qui vitæ post mortem vindicat acta.  
Sed fortuna valens audacem fecerat Orpheu.  
Jam rapidi steterant amnes, et turba ferarum

250

260

270

Blanda voce sequax regionem insederat Orphei ;  
 Jamque imam viridi radicem moverat alte  
 Quercus humo, steterantque amnes, silvæque sonoræ 280  
 Sponte sua cantus rapiebant cortice amara.  
 Labentes bijuges etiam per sidera Luna  
 Pressit equos ; et tu currentes, menstrua virgo,  
 Auditura lyram tenuisti nocte relicta.  
 Hæc eadem potuit Ditis te vincere conjux,  
 Eurydicenque ultro ducendam reddere. Non fas,  
 Non erat in vitam divæ exorabile numen.  
 Illa quidem, nimium manes experta severos,  
 Præceptum signabat iter ; nec retulit intus  
 Lumina, nec divæ corruptit munera lingua : 290  
 Sed tu crudelis, crudelis tu magis, Orpheu,  
 Oscula cara petens rupisti jussa deorum.  
 Dignus amor venia, parvum si Tartara nossent  
 Peccatum ignovisse. Sed et vos sede piorum,  
 Vos manet Heroum contra manus. Hic et uterque  
 Æacides : Peleus namque et Telamonia virtus  
 Per segura patris lætantur numina, quorum  
 Connubiis Venus et Virtus injunxit honorem.  
 Hunc rapuit serva : ast illum Nereïs amavit.  
 Assidet hac juvenis, sociat quem gloria, fortis, 300  
 Acer, inexcussus, referens a navibus ignes  
 Argolicis Phrygios torva feritate repulsos.  
 O quis non referat talis divortia belli,  
 Quæ Trojæ videre viri, videreque Graii,  
 Teucria quum magno manaret sanguine tellus,  
 Et Simois, Xanthique liquor ; Sigeaque præter  
 Litora, quum Troas sævi ducis Hectoris ira  
 Videre in classes inimica mente Pelasgas  
 Vulnera, tela, neces, ignes inferre paratos.  
 Ipsa jugis namque Ida, potens feritatis, et ipsa 310  
 Æqua faces altrix cupidis præbebat alumnis,  
 Omnis ut in cineres Rhœteï litoris ora  
 Classibus ambustis flamma superante daretur.

Hinc erat oppositus contra Telamonius heros,  
 Objectoque dabat clipeo certamina; et illinc  
 Hector erat, Trojæ summum decus,—acer uterque,  
 Fulminibus cœlo veluti fragor editus alto;—  
 Ignibus hic telisque super, si classibus Argos  
 Eripiat redivus: ille ut Vulcania ferro  
 Vulnera protectus depellere navibus instet.

320

Hoc erat Æacides alter lætatus honore:  
 Dardaniæque alter fuso quod sanguine campis  
 Hectoreo victor lustravit corpore Trojam.  
 Rursus acerba fremunt, Paris hunc quod letat, et hujus  
 Alma dolis Ithaci virtus quod concidit icta.

Huic gerit aversos proles Laërtia vultus,  
 Et jam Strymonii Rhesi victorque Dolonis,  
 Pallade jam lætatur ovans; rursusque tremiscit  
 Jam Ciconas, jam jamque horret Læstrygonas atrox.

330

Illum Scylla rapax canibus succincta Molossis,  
 Ætnæusque Cyclops; illum metuenda Charybdis,  
 Pallentesque lacus, et squalida Tartara terrent.  
 Hic et Tantalei generis decus, amplius Atrides,  
 Assidet, Argivum lumen, quo flamma regente  
 Doris Erichthonias prostravit funditus arces.  
 Reddidit heu! gravius pœnas tibi, Troja, ruenti,  
 Hellespontiacis obiturus reddidit undis.

Illa vices hominum testata est copia quondam,  
 Ne quisquam propriæ fortunæ munere dives  
 Iret inevectus cœlum super: omne propinquo  
 Frangitur invidiæ telo decus. Ibat in altum  
 Vis Argea petens patriam, ditataque præda  
 Arcis Erichthoniæ: comes huic erat aura secunda  
 Per placidum cursu pelagus; Nereis ad undas  
 Signa dabat, pars inflexis super acta carinis;  
 Quum seu cœlesti fato, seu sideris ortu  
 Undique mutatur cœli nitor, omnia ventis,  
 Omnia turbinibus suut anxia. Jam maris unda  
 Sideribus certat consurgere; jamque superne

340

Corruere et sol iis et sidera cuncta minantur,  
 Ac venit in terras cœli fragor. Hoc modo læta  
 Copia nunc miseris circumdatur anxia fatis,  
 Immoriturque super fluctus, et saxa Capharei,  
 Euboïcas et per cautes Heræaque late  
 Litora; quum Phrygiæ passim vaga præda peremtæ  
 Fluctuat omnis in æquoreo jam naufraga tractu.

350

Hic alii sidunt pariles virtutis honore  
 Heroës, mediisque siti sunt sedibus omnes,  
 Omnes Roma decus magni quos suscipit orbis.  
 Hic Fabii Decique, hic est et Horatia virtus,  
 Hic et fama vetus nunquam moritura Camilli;  
 Curtius et, mediis quem quondam sedibus urbis  
 Devotum bellis consumsit gurgitis haustus,  
 Mucius et prudens ardorem corpore passus,  
 Legitime cessit cui fracta potentia regis:

360

Hic Curius claræ socius virtutis, et ille  
 Flaminius, devota dedit qui corpora flammæ.  
 Jure igitur tales sedes pietatis honorat.  
 Illic Scipiadæque duces, devota triumphis  
 Mœnia quos rapidos Libycæ Carthaginis horrent.  
 Illi laude sua vigeant: ego Ditis opacos  
 Cogor adire lacus, viduos a lumine Phœbi,  
 Et vastum Phlegethonta pati, quo maxima Minos  
 Consclerata pia discernit vincula sede.

370

Ergo jam causam mortis me dicere vinctæ  
 Verberibus sævo cogunt ab iudice Pœnæ,  
 Quum mihi tu sis causa mali, nec conscius adsis,  
 Sed tolerabilibus curis hæc immemor audis;  
 Quæ tamen ut vanis dimittens omnia ventis,  
 Digredior nunquam rediturus; tu cole fontes  
 Et virides nemorum silvas et pascua lætus,  
 Et mea diffusas rapiantur dicta per auras."  
 Dixit, et extrema tristis cum voce recessit.

380

Hunc ubi sollicitum dimisit inertia vitæ,  
 Interius graviter mentem æger nec tulit ultra

Sensibus infusum Culicis de morte dolorem.  
Quantumcumque sibi vires tribuere seniles,  
(Queis tamen infestum pugnans devicerat hostem)  
Rivum propter aquæ, viridi sub fronde latentem  
Conformare locum capit impiger: hunc et in orbem 390  
Destinat, ac ferri capulum repetivit in usum,  
Gramineam ut viridi foderet de cespite terram.  
Jam memor inceptum peragens sibi cura laborem  
Congestum cumulavit opus, atque aggere multo  
Telluris tumulus formatum crevit in orbem:  
Quem circum lapidem lævi de marmore formans  
Conserit assiduæ curæ memor. Hic et acanthus,  
Et rosa purpureo crescit rubicunda colore,  
Et violæ genus omne; hic est et Spartica myrtus  
Atque hyacinthus, et hic Cilici crocus editus arvo, 400  
Laurus item Phœbi surgens decus; hic rhododaphne,  
Liliaque, et roris non avia cura marini,  
Herbaque thuris opes priscis imitata Sabina,  
Chrysanthusque, hederæque nitor pallente corymbo  
Et Bocchus Libyæ regis memor; hic amarantus,  
Bumastusque virens, et semper florida pinus.  
Non illinc Narcissus abest, cui gloria formæ  
Igne Cupidinea proprios exarsit in artus.  
Et quoscumque novant vernantia tempora flores,  
His tumulus super inseritur: tum fronte locatur 410  
Elogium, tacita format quod litera voce:  
*Parve Culex, pecudum custos tibi tale merenti  
Funeris officium vitæ pro munere reddit.*

P. VIRGILII MARONIS

C I R I S

AD MESSALAM.



ETSI me vario jactatum laudis amore,  
Irritaque expertum fallacis præmia vulgi,  
Cecropius suaves exspirans hortulus auras  
Florentis viridi Sophiæ complectitur umbra:  
Num mea quæret eo dignum sibi quærere carmen?  
Longe aliud studium atque alios accincta labores,  
Altius ad magni suspendit sidera mundi,  
Et placitum paucis ausa est ascendere collem:  
Non tamen absistam cœptum detexere munus,  
In quo jure meas utinam requiescere Musas,  
Et leviter blandum liceat deponere morem.  
[Quod si mirificum proferre valent genus omnes  
Mirificum sæcli, modo sit tibi velle libido;]  
Si me jam summa Sapientia pangeret arce,  
Quatuor antiquis quæ heredibus est data consors,  
Unde hominum errores longe lateque per orbem  
Despicere, atque humiles possem contemnere curas:  
Non ego te talem venerarer munere tali,  
Non equidem, quamvis interdum ludere nobis,  
Et gracilem molli liceat pede claudere versum;  
Sed magno intexens, si fas est dicere, peplo,  
Qualis Erechtheïs olim portatur Athenis,  
Debita quum castæ solvuntur vota Minervæ,  
Tardaque confecto redeunt Quinquatria lustro,

10

20

Quum levis alterno zephyrus concrebuit euro,  
 Et prono gravidum provexit pondere curram.  
 Felix ille dies, felix et dicitur annus,  
 Felices, qui talem annum videre, diemque.  
 Ergo Palladiæ texuntur in ordine pugnae:  
 Magna Giganteis ornantur pepla tropæis; 30  
 Horrida sanguineo pinguntur prælia cocco;  
 Additur aurata dejectus cuspide Typho,  
 Qui prius, Ossæis consternens æthera saxis,  
 Emathio celsum duplicabat vertice Olympum.  
 Tale deæ velum solemni in tempore portant:  
 Tali te vellem, juvenum doctissime, ritu  
 Purpureos inter soles et candida lunæ  
 Sidera, cæruleis orbem pulsantia bigis,  
 Naturæ rerum magnis intexere chartis;  
 Æternum Sophiæ conjunctum carmine nomen 40  
 Nostra tuum senibus loqueretur pagina sæclis.  
 Sed quoniam ad tantas nunc primum nascimur artes,  
 Nunc primum teneros firmamus robore nervos:  
 Hæc tamen interea, quæ possumus, in quibus ævi  
 Prima rudimenta et primos exegimus annos,  
 Accipe dona, meo multum vigilata labore,  
 Et præmissa tuis non magna exordia rebus:  
 Impia prodigiis ut quondam exterruit amplis  
 Scylla, novosque avium sublimis in aëre cœtus 50  
 Viderit, et tenui conscendens sidera penna  
 Cæruleis sua tecta supervolitaverit alis,  
 Hanc pro purpureo pœnam scelerata capillo,  
 Proque patris solvens excisa funditus urbe.  
 Complures illam et magni, Messala, poetæ—  
 Nam verum fateamur: amat Polyhymnia verum—  
 Longe alia perhibent mutatam membra figura,  
 Scyllæum monstra in saxum conversa vocari;  
 Illam esse, ærumnis quam sæpe legamus Ulixi  
 Candida succinctam latrantibus inguina monstris  
 Dulichias vexasse rates, et gurgite in alto 60



Deprensos nautas canibus lacerasse marinis.  
 Sed neque Mæoniæ hæc patiuntur credere chartæ,  
 Nec malus istorum dubiis erroribus auctor.  
 Namque alias alii vulgo finxere puellas,  
 Quæ Colophoniacæ Scyllæ dicantur Homero.  
 Ipsi seu Lamie mater sit, sive Cratæis,  
 Sive illam monstro genuit Persea biformi,  
 Sive est neutra parens: atque hoc in carmine toto  
 Inguinis est vitium et Veneris descripta libido;  
 Sive etiam est jactis speciem mutata venenis, 70  
 Infelix virgo: quid enim commiserat illa?  
 Ipse pater nudam sæva complexus arena  
 Conjugium caræ violaverat Amphitrites:  
 Attamen exegit longo post tempore pœnas,  
 Ut, quum cura sui veheretur conjugis alto,  
 Ipsa trucem multo misceret sanguine pontum.  
 Seu vero, ut perhibent, forma quum vinceret omnes,  
 Et cupidos quæstu passim spoliaret amantes,  
 Piscibus et canibus rabidis vallata repente,  
 Horribiles circum vidit se sistere formas. 80  
 Heu quoties mirata novos expalluit artus!  
 Ipsa suos quoties heu pertimuit latratus!  
 Ausa quod est mulier numen fraudare deorum,  
 Et dictam Veneri votorum vertere pœnam,  
 Quam, mala multiplici juvenum quod septa caterva  
 Dixerat atque animo meretrix jactata ferarum,  
 Infamem tali merito rumore fuisse,  
 Docta Palæphatia testatur voce papyrus.  
 Quidquid, et ut quisque est tali de clade locutus,  
 Omnia sint: potius liceat notescere Cirin, 90  
 Atque unam ex multis Scyllam non esse puellis.  
 Quare, quæ, cantus meditantî mittere certos,  
 Magna mihi cupido tribuistis præmia, divæ  
 Pierides,—quarum castos altaria postes  
 Munere sæpe meo inficiunt, foribusque hyacinthi  
 Deponunt flores, aut suave rubens narcissus,

Aut crocus alterna conjungens lilia caltha,  
 Sparsaque liminibus floret rosa,—nunc age, divæ,  
 Præcipue nostro nunc aspirate labori,  
 Atque novum æterno prætexite honore volumen. 100

Sunt Pandionis vicinæ sedibus urbes,  
 Actæos inter colles et candida Thesei  
 Purpureis late ridentia litora conchis,  
 Quarum non ulli fama concedere digna  
 Stat Megara, Actæi quondam munita labore  
 Alcathoi, Phœbique; deus namque affuit illi:  
 Unde etiam, citharæ voces imitatus acutas,  
 Sæpe lapis recrepat Cyllenia munera pulsus,  
 Et veterem sonitu Phœbi testatur honorem.  
 Hanc urbem, ante alios qui tum florebat in armis, 110  
 Fecerat infestam populator remige Minos,  
 Hospitio quod se Nisi Polyidos avito,  
 Carpathium fugiens et flumina Cæratea,  
 Texerat. Hunc bello repetens Gortynius heros  
 Attica Cretæa sternebat rura sagitta.

Sed neque tunc cives, neque tunc rex ipse veretur  
 Infesto ad muros volitantes agmine turmas  
 Ducere, et indomita virtute retundere mentes,  
 Responsum quoniam satis est meminisse deorum.  
 Nam capite a summo regis, mirabile dictu, 120  
 Candida cæsaries; florebant tempora lauro;  
 At roseus medio fulgebat vertice crinis,  
 Cujus quam servata diu natura fuisset,  
 Tam patriam incolumem Nisi regnumque futurum,  
 Concordes stabili firmarunt numine Parcæ.  
 Ergo omnis caro residebat cura capillo,  
 Aurea solemni comtum quoque fibula ritu  
 Mopsopio tereti nectebat dente cicadæ.

Nec vero hæc vobis custodia vana fuisset,  
 Nec fuerat, nisi Scylla, novo concepta furore, 130  
 Scylla, patris miseri patriæque inventa sepulcrum,  
 O nimium cupidis si non inhiasset ocellis!

Sed malus ille puer, quem nec sua flectere mater  
 Iratum potuit, quem nec pater atque avus idem  
 Jupiter, ille etiam Pœnos domitare leones  
 Et validas docuit vires mansuescere tigris,  
 Ille etiam divos, homines; sed dicere magnum est;  
 Idem tum tristes acuebat parvulus iras

Junonis magnæ, [cujus perjuria divæ  
 Olim se meminisse diu perjura puellæ 140

Non ulli liceat,] violaverat inscia sedem,  
 Dum sacris operata deæ lascivit, et extra  
 Proccedit longe matrum comitunque catervam,  
 Suspensam gaudens in corpore ludere vestem,  
 Et tumidos agitante sinus Aquilone relaxans.  
 Necdum etiam castos agitaverat ignis honores,  
 Necdum solemni lympha perfusa sacerdos  
 Pallentis foliis caput exornarat olivæ:

Quum lapsa e manibus fugit pila, quumque relapsa  
 Procurrit virgo: quo utinam ne prodita ludo 150

Aurea tam gracili solvisset corpora palla!  
 Omnia, quæ retinere gradum, cursumque morari  
 Possent, o tecum vellem tua semper haberes!  
 Non unquam violata manu sacraria divæ  
 Jurando infelix nequidquam jura piasses.

Et si quis nocuisse tibi perjuria credat,  
 Causa pia est: timuit fratri te ostendere Juno.

At levis ille deus, cui semper ad ulciscendum  
 Quæritur ex omni verborum injuria dicto, 160

Aurea fulgenti depromens tela pharetra,  
 Heu nimium tereti, nimium Tirynthia visu,  
 Virginis in tenera defixerat omnia mente.

Quæ simul ac venis hausit sitientibus ignem,  
 Et validum penitus concepit in ossa furorem;  
 Sæva velut gelidis Ciconum Bistonis in oris,  
 Ictave barbarico Cybeles antistita buxo,  
 Infelix virgo tota bacchatur in urbe,  
 Non styrace Idæo flagrantés picta capillos,

Cognita non teneris pedibus Sicyoniam servans,  
 Non niveo retinens baccata monilia collo. 170  
 Multum illi incerto trepidant vestigia cursu:  
 Sæpe redit patrios ascendere prodita muros,  
 Aëriasque facit causam se visere turres;  
 Sæpe etiam tristes volvens in nocte querelas  
 Sedibus ex altis cœli speculatur amorem,  
 Castraque prospectat crebris lucentia flammis.  
 Nulla colum novit: carum nec respicit aurum.  
 Non arguta sonant tenui psalteria chorda;  
 Non Libyco molles plauduntur pectine telæ.  
 Nullus in ore rubor: ubi enim rubor, obstat amori. 180  
 Atque ubi nulla malis reperit solatia tantis,  
 Talidulamque videt labi per viscera mortem:  
 Quo vocat ire dolor, subigunt quo tendere fata,  
 Fertur et horribili præceps impellitur æstro,  
 Ut patris, ah demens, crinem de vertice ferret  
 Furtim, atque arguto detonsum mitteret hosti,—  
 Namque hæc conditio miseræ proponitur una—  
 Sive illa ignorans: quis non bonus omnia malit  
 Credere, quam tanto scelere damnare puellam?  
 Heu tamen infelix—quid enim imprudentia prodest?— 190  
 Nise pater, cui, direpta crudeliter urbe,  
 Vix erit una super sedes in turribus altis,  
 Fessus ubi exstructo possis considerare nido.  
 Tu quoque, avis, moriere: dabit tibi filia pœnas.  
 Gaudete, o celeres, subnixæ nubibus altis,  
 Quæ mare, quæ virides silvas lucosque sonantes  
 Incolitis, gaudete, vagæ blandæque volucres;  
 Vosque adeo, humani mutatæ corporis artus,  
 Vos o crudeli factorum lege, puellæ  
 Dauliades, gaudete: venit carissima vobis 200  
 Cognatos augens reges numerumque suorum  
 Ciris, et ipse pater. Vos, o pulcherrima quondam  
 Corpora, cæruleas prævertite in æthera nubes,  
 Qua novus ad superûm sedes Calcheius, et qua

Candida concessos ascendat Ciris honores.

Jamque adeo dulci devinctus lumina somno  
Nisus erat, vigilumque procul custodia primis  
Excubias foribus studio jactabat inani :  
Quum furtim tacito descendens Scylla cubili  
Auribus arrectis nocturna silentia tentat,  
Et pressis tenuem singultibus aëra captat.  
Tum suspensa levans digitis vestigia primis  
Egreditur, ferroque manus armata bidenti  
Evolat : at demtæ subita in formidine vires.  
Cæruleas sua furta prius testatur ad umbras.  
Nam, qua se ad patrium tendebat semita limen,  
Vestibulo in thalami paulum remoratur, et altum  
Suspicit ad culti nutantia sidera mundi,  
Non accepta piis promittens munera divis.

210

Quam simul Ogygii Phœnicis filia Carme  
Surgere sensit anus,—sonitum nam fecerat illi  
Marmoreo æratus stridens in limine cardo—  
Corripit extemplo fessam languore puellam,  
Et simul, “O nobis sacrum caput,” inquit, “alumna,  
Non tibi nequidquam viridis per viscera pallor  
Ægrotas tenui suffudit sanguine venas ;  
Nec levis, hoc faceres (neque enim pote), cura subegit :  
Haud fallor, quod te potius Rhamnusia fallit.  
Nam qua te causa nec dulcis pocula Bacchi,  
Nec gravidos Cereris dicam contingere fetus ?  
Qua causa ad patrium solam vigilare cubile,  
Tempore quo fessas mortalia pectora curas,  
Quo rapidos etiam requiescunt flumina cursus ?  
Dic age nunc miseræ saltem, quod sæpe petenti  
Jurabas nihil esse mihi, quum mæsta parentis  
Formosos circum virgo morerere capillos ?  
Heu mihi, ne furor ille tuos invaserit artus,  
Ille, Arabis Myrrhæ quondam qui cepit ocellos,  
Ut scelere infando, quod nec sinit Adrastia,  
Lædere utrumque uno studeas errore parentem.

220

230

240

Quod si alio quovis animo jactaris amore,—  
 Nam te jactari, non est Amathusia nostri  
 Tam rudis, ut nullo possim cognoscere signo ;—  
 Si concessus amor nōto te macerat igne ;  
 Per tibi Dictynnæ præsentia numina juro,  
 Prima deūm quæ te mihi dulcem donat alumnam,  
 Omnia me potius digna atque indigna laborum  
 Millia visuram, quam te tam tristibus istis  
 Sordibus et scoria patiar tabescere tali.”

Hæc loquitur: mollique ut se velavit amictu, 250  
 Frigidulam injecta circumdat veste puellam,  
 Quæ prius in tenui steterat succincta corona.  
 Dulcia deinde genis rorantibus oscula figens,  
 Persequitur miseræ causas exquirere tabis ;  
 Nec tamen ante ullas patitur sibi reddere voces,  
 Marmoreum tremebunda pedem quam retulit intra.  
 Illa autem, “ Quid nunc me,” inquit, “ nutricula, torques ?  
 Quid tantum properas nostros novisse furores ?  
 Non ego consueto mortalibus uror amore,  
 Nec mihi notorum deflectunt lumina vultus, 260  
 Nec genitor cordi est : ultro namque odimus omnes.  
 Nil amat hic animus, nutrix, quod oportet amari,  
 In quo falsa tamen lateat pietatis imago :  
 Sed media ex acie mediis ex hostibus. Heu, heu,  
 Quid dicam ? quove ipsa malum hoc exordiar ore ?  
 Dicam equidem, quoniam quid tu tibi dicere, nutrix,  
 Non sinis ; extremum hoc munus morientis habeto.  
 Ille, vides, nostris qui mœnibus assidet hostis,  
 Quem pater ipse deum sceptri donavit honore,  
 Cui Parcæ tribuere nec ullo vulnere lædi,— 270  
 Dicendum est, frustra circumvehor omnia verbis—  
 Ille mea, ille idem oppugnat præcordia Minos.  
 Quod te per divum crebros obtestor amores,  
 Perque tuum memoris haustum mihi pectus alumnae,  
 Ut me, si servare potes, ne perdere malis.  
 Sin autem optatæ spes est incisa salutis,

Ne mihi, quam merui, inideas, nutricula, mortem.  
Nam nisi te nobis malus, o malus, optima Carme,  
Ante hunc conspectum casusve deusve tulisset,  
Aut ferro hoc (aperit ferrum quod veste latebat) 280  
Purpureum patris demsissem vertice crinem,  
Aut mihi præsentî peperissem vulnere letum."

Vix hæc ediderat, quum clade exterrita tristi

Intonsos multo deturpat pulvere crines,

Et graviter questu Carme complorat anili :

"O mihi nunc iterum crudelis reddite Minos,

O iterum nostræ Minos inimice senectæ,

Semper et aut olim nata, o te propter eundem,

Aut amor insanæ luctum portavit alumnae.

Tene ego tam longe capta atque avecta nequivi, 290

Tam grave servitium, tam duros passa labores,

Effugere, ut sistam exitium crudele meorum ?

Jam jam nec nobis ea, quæ senioribus, ullum

Copia vivendi vitæ genus. Ut quid ego amens

Te erepta, o Britomarti, meæ spes una salutis,

Te, Britomarti, diem potui producere vitæ ?

Atque utinam celeri ne tantum grata Dianæ

Venatus esses virgo sectata virorum

Gnosia neu Partho contendens spicula cornu

Dictæas ageres ad gramina nota capellas : 300

Nunquam, tam obnixe fugiens Minois amores,

Præceps aëreis specula de montibus isses,

Unde alii fugisse ferunt, et numina Aphææ

Virginis assignant : alii, quo notior esses,

Dictynnam dixere tuo de nomine Lunam.

Sint hæc vera velim : mihi certe, nata, peristi.

Nunquam ego te summo volitantem in vertice montis

Hyrcanos inter comites agmenque ferarum

Conspiciam, nec te redeuntem amplexa tenebo.

Verum hæc tum nobis gravia atque indigna fuere, 310

Tum, mea alumna, tui quum spes integra maneret ;

Et vox ista meas nondum violaverat aures.

Tene etiam fortuna mihi crudelis ademit,  
 Tene, o sola meæ vivendi causa senectæ ?  
 Sæpe tuo dulci nequidquam capta sopore,  
 Quum premeret natura, mori me velle negavi,  
 Ut tibi Corycio glomerarem flammea luto.  
 Quo nunc me, infelix, aut quæ me numina servant ?  
 An nescis, qua lege patris de vertice summo  
 Edita candentes prætexat purpura canos ? 320  
 Quæ tenui patriæ spes sit suspensa capillo ?  
 Si nescis, aliquam possum sperare salutem,  
 Inscia quandoquidem scelus es conata nefandum.  
 Sin est, quod metuo, per te, mea alumna, tuumque  
 Expertum multis miscræ mihi rebus amorem,  
 Per te, et sacra precor per flumina Ilithyïæ,  
 Ne tantum in facinus tam molli mente sequaris.  
 Non ego te incepto, fieri quod non pote, conor  
 Flectere amore, neque est cum dis contendere nostrum ;  
 Sed patris incolumi potius te nubere regno, 330  
 Atque aliquos tamen esse velis tibi, alumna, penates.  
 Hoc unum, exitio docta atque experta, monebo.  
 Quod si non alia poteris ratione parentem  
 Flectere,—sed poteris ; quid enim non unica possis ?—  
 Tunc potius tamen ipsa, pio quum jure licebit,  
 Quum facti causam tempusque doloris habebis,  
 Tunc potius conata tua atque incepta referto.  
 Meque, deosque tibi comites, mea alumna, futuros  
 Polliceor : nihil est, quod texas ordine, longum."

His ubi sollicitos animi relevaverat æstus 340  
 Vocibus, et blanda pectus spe vicerat ægrum,  
 Paulatim tremebunda genis obducere vestem  
 Virginis, et placidam tenebris captare quietem,  
 Inverso bibulum restinguens lumen olivo.  
 Incipit, ad crebros insani pectoris ictus  
 Ferre manum, assiduis mulcens præcordia palmis.  
 Noctem illam sic mæsta super morientis alumnae  
 Frigidulos cubito subnixa pependit ocellos.



Postera lux ubi læta diem mortalibus alnum,  
Et gelido veniens mani quatiebat ab Ceta, 350  
Quem pavidæ alternis fugitant optantque puellæ,—  
Hesperium vitant, optant ardescere solem,—  
Præceptis paret virgo nutricis, et omnes  
Undique conquirat nubendi sedula causas.  
Tentantur patriæ submissis vocibus aures,  
Laudanturque bonæ pacis bona : multus ineptæ  
Virginis insolito sermo novus errat in ore.  
Nunc tremere instantis belli certamina dicit  
Communemque timere deum, nunc regis amicos,  
(Namque ipso verita est orbari mæsta parente) 360  
Cum Jove communes qui quondam habuere nepotes ;  
Nunc etiam conficta dolo mendacia turpi  
Invenit, et divûm terret formidine cives ;  
Nunc alia ex aliis, nec desunt, omina quærit.  
Quin etiam castos ausa est corrumpere vates,  
Ut, quum cæsa pio cecidisset victima ferro,  
Essent, qui generum Minoa auctoribus extis  
Jungere, et ancipites suaderent tollere pugnas.

At nutrix, patula componens sulfura testa,  
Narcissum casiamque herbas incendit olentes ; 370  
Terque novena ligat triplici diversa colore  
Fila ; “ Ter in gremium mecum,” inquit, “ despue, virgo,  
Despue ter, virgo : numero deus impare gaudet.  
Inde Jovi geminat magno Stygialia sacra,  
Sacra nec Idæis senibus nec cognita Graiis ;  
Pergit, Amyclæo spargens altaria thallo,  
Regis Iolciacis animum defigere votis.  
Verum, ubi nulla movet stabilem fallacia Nisum,  
Nec possunt homines, nec possunt flectere divi,—  
Tanta est in parvo fiducia crine cavendi :—” 380  
Rursus ad inceptum sociam se adjungit alumnaë,  
Purpureumque parat rursus tondere capillum,  
Tam longo quod jam captat succurrere amorì :  
Non minus illa tamen, revehi quod mœnia crescant,

Gaudeat : et cineri patria est jucunda sepulto.

Ergo metu capiti Seylla est inimica paterno.

Tum coma Sidonio florens succiditur ostro ;

Tum capitur Megara, et divum responsa probantur ;

Tum suspensa novo ritu de navibus altis,

Per mare cæruleum trahitur Niseia virgo.

390

Complures illam nymphæ mirantur in undis ;

Miratur pater Oceanus, et candida Tethys,

Et cupidas secum rapiens Galatea sorores ;

Illa etiam, junctis magnum quæ piscibus æquor

Et glauco bipedum curru metitur equorum,

Leucothee, parvusque dea cum matre Palæmon.

Illi etiam, alternas sortiti vivere luces,

Cara Jovis suboles, magnum Jovis incrementum,

Tyndaridæ niveos mirantur virginis artus.

Has adeo voces atque hæc lamenta per auras

400

Fluctibus in mediis questuolvebat inani,

Ad cælum infelix ardentia lumina tollens,

Lumina : nam teneras arcebant vincula palmas.

“Supprimites o paulum turbati flamina venti,

Dum queror ; et divos, quanquam nil testibus illis

Profeci, extrema moriens tamen alloquor hora.

Vos ego, vos adeo, venti, testabor, et auræ,

Vos, matutina si qui de gente venitis,

Cernitis : illa ego sum cognato sanguine vobis

Scylla ; quod, ah ! salva liceat te dicere Procne ;

410

Illa ego sum Nisi pollentis filia quondam,

Certatim ex omni petiit quam Græcia regno,

Qua curvus terras amplectitur Hellespontus ;

Illa ego sum, Minos, sacrato fœdere conjux

Dicta tibi : tamen hæc, et si non accipis, audis.

Vinctane tam magni tranabo gurgitis undas ?

Vincta tot assiduas pendebam ex ordine luces ?

Non equidem me alio possum contendere dignam

Supplicio, quod sic patriam carosque penates

Hostibus immitique addixi ignara tyranno.

420

Verum esto. Hæc, Minos, illos scelerata putavi,  
 Si nostra ante aliquis nudasset fœdera casus,  
 Facturos, quorum direptis mœnibus urbis,  
 O ego crudelis, flamma delubra petivi:  
 Te vero victore prius vel sidera cursus  
 Mutatura suos, quam te mihi talia captæ  
 Facturum metui. Jam jam scelus omnia vincit.  
 Ten' ego plus patrio dilexi perdita regno?  
 Ten' ego, nec mirum, vultu decepta puella?  
 Ut vidi, ut perii! ut me malus abstulit error! 430  
 Non equidem ex isto speravi corpore posse  
 Tale malum nasci: forma vel sidere fallor.  
 Non me deliciis commovit regia dives,  
 Coralio fragili, ac electro lacrimoso,  
 Me non florentes æquali corpore nymphæ;  
 Non metus incensam potuit retinere decorum.  
 Omnia vincit amor: quid enim non vinceret ille?  
 Non mihi jam pingui sudabunt tempora myrrha,  
 Pronuba nec castos accendet pinus odores,  
 Nec Libys Assyrio sternetur lectulus ostro. 440  
 Magna queror: nec et illa quidem communis alumna  
 Omnibus injecta tellus tumulabit arena.  
 Mene inter comites ancillarumque catervas  
 Mene alias inter, famularum munere fungi,  
 Conjugis atque tuæ, quæcumque erit illa, beatæ  
 Non licuit gravidos penso devolvere fusos?  
 At belli saltem captivam lege necasses!  
 Jam fessæ tandem fugiunt de corpore vires,  
 Et caput inflexa lentum cervice recumbit,  
 Marmorea adductisque labascunt brachia nodis. 450  
 Æquoreæ pestes, immania corpora ponti,  
 Undique conveniunt, et glauco in gurgite circum  
 Verbere caudarum atque oris minitantur hiatu.  
 Jam tandem casus hominum, jam respice, Minos.  
 Sit satis hoc, tantum solam vidisse malorum:  
 Vel fato fuerit nobis hæc debita pestis,

Vel casu incepto, merita vel denique culpa.  
Omnia nam potius, quam te læsisse, putabo."

Labitur interea revoluta ab litore classis,  
Magna repentino sinuantur linthea Coro, 460  
Flectitur in viridi remus sale, languida fessæ  
Virginis in cursu moritur querimonia longo.  
Deserit angustis inclusum faucibus Isthmon.  
Cypselidæ magni florentia regna Corinthi ;  
Præterit abruptas Scironis protinus arces,  
Infestumque suis diræ testudinis exit  
Spelæum, multoque cruentas hospite cautes.  
Jamque adeo tutum longe Piræea cernit,  
Et notas secum, heu frustra, respectat Athenas.  
Jam procul e fluctu Minoïa respicit arva, 470  
Florentesque videt jam Cycladas, hinc Strophadasque ;  
Hinc sinus, hinc statio contra patet Hermionea.  
Linquntur ante alias longe gratissima Delos  
Nereïdum matri et Neptuno Ægæo.  
Prospicit incinctam spumanti litore Cythnon  
Marmoreamque Paron, viridemque allapsa Donusam  
Æginamque simul sementiferamque Seriphum.  
Fertur et incertis jactatur ad omnia ventis,  
Cymba velut magnas sequitur quum parvula classes,  
Afer et hiberno bacchatur in æquore turbo : 480  
Donec tale decus formæ vexavit, et ægros  
Non tulit, et miseros mutavit virginis artus,  
Cæruleo pollens conjux Neptunia regno.  
Sed tamen externam squamis vestire puellam,  
Infidosque inter teneram committere pisces  
Non statuit—nimium est avidum pecus Amphitrites ;—  
Aëreis potius sublimem sustulit alis,  
Esset ut in terris facti de nomine Ciris,  
Ciris Amyclæo formosior ansere Ledæ.  
Ac velut in niveo teneræ quum primitus ovo 490  
Effigies animantis et internodia membris  
Imperfecta novo fluitant concreta calore :

Sic liquido Scyllæ circumfusum æquore corpus  
 Semiferi incertis etiam nunc partibus artus  
 Undique mutabant, atque undique mutabantur.  
 Oris honos primum, et multis optata labella,  
 Et patulæ frontis species, concrecere in unum  
 Cœpere, et gracili mentum producere rostro.

Tum, qua se medium capitis discrimen agebat,  
 Ecce repente, velut patrios imitatus honores,  
 Purpuream concussit apex in vertice cristam:

509

At mollis varios intexens pluma colores  
 Marmoreum volucris vestivit tegmine corpus,  
 Lentaque perpetuas fuderunt brachia pennas.

Inde alias partes, minioque infecta rubenti  
 Crura, nova macies obduxit squalida pelli,  
 Et pedibus teneris unguis confixit acutos.

Et tamen hoc demum miseræ succurrere pacto  
 Vix fuerat placida Neptuni conjuge dignum.

Nunquam illam posthac oculi videre suorum  
 Purpureas flavo retinentem vertice vittas;

510

Non thalamus Tyrio fragrans accepit amomo,  
 Nullæ illam sedes. Quid jam cum sedibus illi?

Quæ simul ut sese cano de gurgite velox  
 Cum sonitu ad cœlum stridentibus extulit alis,  
 Et multum late dispersit in æquore rorem;

Infelix virgo nequidquam a morte recepta  
 Incultum solis in rupibus exigit ævum,  
 Rupibus et scopulis, et litoribus desertis.

Nec tamen hoc iterum pœna sine: namque deûm rex, 520  
 Omnia qui imperio terrarum millia versat,

Commotus talem ad superos volitare puellam,  
 Quum pater exstinctus cæca sub nocte lateret,  
 Illi pro pietate sua—nam sæpe tepenti

Sanguine taurorum supplex resperserat aras;  
 Sæpe deûm largo decorarat munere sedes—

Reddidit optatam mutato corpore vitam,  
 Fecit et in terris Haliæetus ales ut esset;

Quippe aquilis semper gaudet deus ille coruscus.  
 Huic vero miseræ, quoniam damnata deorum  
 530  
 Judicio natiq̃ue et conjugis ante fuisset,  
 Infesti apposuitque odium crudele parentis.  
 Namque, ut in ætherio signorum munere præstans,  
 Unum quem duplici stellarum sidere vidi,  
 Scorpius alternis clarum fugat Oriona :  
 Sic inter sese tristes Haliæetus iras  
 Et Ciris memori servant ad sæcula fato.  
 Quacumque illa levem fugiens secat æthera pennis,  
 Ecce inimicus atrox magno stridore per auras  
 Insequitur Nisus : qua se fert Nisus ad auras,  
 540  
 Illa levem fugiens raptim secat æthera pennis.

~~~~~

C O P A.

COPA Syrisca, caput Graia redimita mitella,  
 Crispum sub crotalo docta movere latus,  
 Ebria fumosa saltat lasciva taberna,  
 Ad cubitum raucos excutiens calamos.  
 Quid juvat æstivo defessum pulvere abesse,  
 Quam potius bibulo decubuisse toro ?  
 Sunt cupæ, calices, cyathi, rosa, tibia, chordæ,  
 Et trichila umbriferis frigida arundinibus ;  
 Est et, Mænalia quæ garrit dulce sub antro,  
 Rustica pastoris fistula more sonans ;  
 10  
 Est et vappa, cado nuper diffusa picato ;  
 Est strepitans rauco murmure rivus aquæ.  
 Sunt etiam croceo violæ de flore corollæ,  
 Sertaque purpurea lutea mixta rosa ;  
 Et quæ virgineo libata Acheloïs ab amne  
 Lilia vimineis attulit in calathis.

Sunt et caseoli, quos juncea fiscina siccant ;  
 Sunt auctumnali cerea pruna die,  
 Castaneæque nuces, et suave rubentia mala.  
 Est hic munda Ceres, est Amor, est Bromius. 20  
 Sunt et mora cruenta, et lentis uva racemis,  
 Est pendens junco cæruleus cucumis.  
 Est tugurî custos armatus falce saligna ;  
 Sed non et vasto est inguine terribilis.  
 Huc Calybita veni : fessus jam sudat asellus :  
 Parce illi ; vestrum delictum est asinus.  
 Nunc cantu crebro rumpunt arbusta cicadæ :  
 Nunc etiam in gelida sede lacerta latet.  
 Si sapis, æstivo recubans te prolue vitro ;  
 Seu vis crystallo ferre novos calices. 30  
 Eja age pampinea fessus requiesce sub umbra,  
 Et gravidum roseo nocte caput strophio ;  
 Candida formosæ decerpes ora puellæ.  
 Ah ! pereat, cui sunt prisca supercilia !  
 Quid cineri ingrato servas bene olentia sarta ?  
 Anne coronato vis lapide ista legi ?  
 Pone merum et talos. Pereant, qui crastina curant !  
 Mors aurem vellens, " Vivite," ait, " venio."

---

## M O R E T U M.

JAM nox hibernas bis quinque peregerat horas,  
 Excubitorque diem cantu prædixerat ales :  
 Simulus exigui cultor quum rusticus agri,  
 Tristia venturæ metuens jejunia lucis,  
 Membra levat sensim vili demissa grabato,  
 Sollicitaque manu tenebras explorat inertes,  
 Vestigatque focum, læsus quem denique sensit.

Parvulus exusto remanebat stipite fumus,  
 Et cinis obductæ celabat lumina prunæ.  
 Admovet his pronam, submissa fronte, lucernam, 10  
 Et producit acu stupas humore carentes,  
 Excitat et crebris languentem flatibus ignem.  
 Tandem concepto tenebræ fulgore recedunt,  
 Oppositaque manu lumen defendit ab aura,  
 Et reserat clausa, quæ prævidet, ostia clavi.

Fusus erat terra frumenti pauper acervus ;  
 Hinc sibi depromit, quantum mensura patebat  
 Quæ bis in octonas excurrit pondere libras.  
 Inde abit, adsistitque molæ, parvaque tabella, 20  
 Quam fixam paries illos servabat in usus,  
 Lumina fida locat ; geminos tunc veste lacertos  
 Liberat, et, cinctus villosæ tergo capræ,  
 Præverrit cauda silices gremiumque molarum.  
 Advocat inde manus operi, partitus utrimque :  
 Læva ministerio, dextra est intenta labori ;  
 Hæc rotat assiduis gyris et concitat orbem.  
 Tunsæ Ceres rapido silicem decurrit ab ictu.  
 Interdum fessæ succedit læva sorori,  
 Alternatque vices. Modo rustica carmina cantat, 30  
 Agrestique suum solatur voce laborem.  
 Interdum clamat Cybalen : erat unica custos,  
 Afra genus, tota patriam testante figura,  
 Torta comam, labroque tumens et fusca colorem,  
 Pectore lata, jacens mammis, compressior alvo,  
 Cruribus exilis, spatiosa prodiga planta ;  
 Continuis rimis calcanea scissa rigeabant.  
 Hanc vocat atque arsura focis imponere ligna  
 Imperat, et flamma gelidos adolere liquores.

Postquam implevit opus justum versatile finem,  
 Transfert iude manu fusas in cibra farinas 40  
 Et quatit. At remanent summo purgamina dorso ;  
 Subsedit sincera foraminibusque liquatur.  
 Emundata Ceres. Lævi tum protinus illam



Componit tabula, et tepidas super ingerit undas :  
Contrahit admixtos nunc fontes atque farinas ;  
Transversat durata manu, liquidoque coacto  
Interdum grumos spargit sale. Jamque subactum  
Lævât opus, palmisque suum dilatat in orbem,  
Et notat, impressis æquo discrimine quadris.

50

Infert inde foco—Cybale mundaverat aptum  
Ante locum—testisque tegit ; super aggerat ignes.  
Dumque suas peragit Vulcanus testaque partes,  
Simulus interea vacua non cessat in hora ;  
Verum aliam sibi quærit opem ; non sola palato  
Sit non grata Ceres, quas jungat, comparat escas.  
Non illi suspensa focum carnaria juxta,  
Durati sale terga suis truncique vacabant :  
Trajectus medium sparto sed caseus orbem,  
Et vetus adstricti fascis pendebat anethi.  
Ergo aliam molitur opem sibi providus heros.

60

Hortus erat junctus casulæ, quem vimina pauca  
Et calamo recidiva levi munibat arundo,  
Exiguus spatio, variis sed fertilis herbis.  
Non illi deerat, quod pauperis exigit usus.  
[Interdum locuples a paupere plura petebat :  
Non sumtus erat illud opus, sed regula curæ.]  
Si quando vacuum casula pluviæve tenebant  
Festave lux, si forte labor cessabat aratro :  
Horti opus illud erat. Varias deponere plantas  
Norat, et occultæ committere semina terræ,  
Vicinosque apte cura submittere rivos.

70

Hic olus, hic late fundentes brachia betæ,  
Fecundusque rumex malvæque inulæque virebant :  
Hic siser, et capiti nomen debentia porra ;  
Hic etiam nocuum capiti gelidumque papaver,  
Grataque nobilium requies lactuca ciborum,  
Et gravis in latum demissa cucurbita ventrem.  
Verum hic non domini—quis enim contractior illo ?—  
Sed populi proventus erat ; Nonisque diebus

Venales olerum fasces portabat in urbem ; 80  
 Inde domum cervice levis, gravis ære, redibat,  
 Vix unquam urbani comitatus merce macelli.  
 Cepa rubens sectique famem domat area porri,  
 Quæque trahunt acri vultus nasturtia morsu,  
 Intubaque, et Venerem revocans eruca morantem.

Tum quoque tale aliquid meditans intraverat hortum,  
 Ac primum, leviter digitis tellure refossa,  
 Quatuor educit cum spissis allia fibris ;  
 Inde comas apii graciles rutamque rigentem 90  
 Vellit, et exiguo coriandra trementia filo.  
 Hæc ubi collegit, lætum consedit ad ignem,  
 Et clara famulam poscit mortaria voce.  
 Singula tum capitum numeroso cortice nudat,  
 Et summis spoliât coriis, contemtaque passim  
 Spargit humi atque abicit. Servatum gramine bulbum  
 Tingit aqua, lapidisque cavum demittit in orbem.  
 Hinc salis inspergit micas ; sale durus adeso  
 Caseus adjicitur ; dictas super ingerit herbas ;  
 Et læva vestem sætosa sub inguina fulcit.  
 Dexterâ pistillo primum fragrantia mollit 100  
 Allia ; tum pariter mixto terit omnia suco.  
 It manus in gyrum ; paulatim singula vires  
 Deperdunt proprias ; color est e pluribus unus,  
 Nec totus viridis, quia lactea frusta repugnant,  
 Nec de lacte nitens, quia tot variatur ab herbis.  
 Sæpe viri nares acer jaculatur apertas  
 Spiritus, et simo damnat sua prandia vultu,  
 Sæpe manu summa lacrimantia lumina tergit,  
 Immeritoque furens dicit convicia fumo.  
 Procedebat opus : non jam salebrosus, ut ante, 110  
 Sed gravior lentos ibat pistillus in orbes.  
 Ergo Palladii guttas instillat olivi,  
 Exiguique super vires infundit aceti,  
 Atque iterum commiscet opus, mixtumque retractat  
 Tum demum digitis mortaria tota duobus

Circuit, inque globum distantia contrahit unum,  
Constet ut effecti species nomenque moreti.

Eruit interea Cybale quoque sedula panem,  
Quem lætus recipit manibus, pulsoque timore  
Jam famis inque diem securus Simulus illam  
Ambit crura ocreis paribus, tectusque galero  
Sub juga parentes cogit lorata juvencos,  
Atque agit in segetes, et terræ condit aratrum.

120

P. VIRGILII MARONIS

C A T. A L E C T A.

I. AD TUCCAM.

DELIA, Tucca, tibi venit; sed sæpe videre  
Non licet: occulitur limine clausa viri.  
Delia sæpe tibi, non venit adhuc mihi: namque  
Si occulitur, longe est, tangere quod nequeas.  
Venerit aut tibi; sed jam jam mihi nuncius iste  
Quid prodest? illi dicito, quæ rediit.

II. IN C. ANNIUM CIMBRUM RHETOREM.

Corinthiorum amator iste verborum,  
Iste iste rhetor! Namque quatenus totus  
Thucydides tyrannus Atticæ febris,  
Tau Gallicum spinæ ipsemet male illisit,  
Ista omnia, ista verba miscuit fratri.

## III. IN NOCTUINUM.

Socer, beate nec tibi nec alteri,  
 Generque Noctuine, putidum caput,  
 Tuone nunc puella talis, heu tuo  
 Stupore pressa rus abibit? Hei mihi!  
 Ut ille versus usquequaque pertinet:  
 Gener socerque, perdidistis omnia.

## IV. IN EUNDEM.

Superbe Noctuine, putidum caput,  
 Datur tibi puella, quam petis, datur;  
 Datur, superbe Noctuine, quam petis.  
 Sed, o superbe Noctuine, non vides  
 Duas habere filias Atilium,  
 Duas, et hanc, et alteram, tibi dari.  
 Adeste nunc, adeste, ducit, ut decet,  
 Superbus, ecce, Noctuinus herniam.  
 Thalassio! Thalassio! Thalassio!

## V. IN LUCIUM.

Jacere me, quod alta non possim, putas,  
 Ut ante, vectari freta;  
 Nec ferre durum frigus, aut æstum pati,  
 Neque arma victoris sequi.  
 Valent, valent mihi ira et antiquus furor  
 Et lingua, qua adsim tibi.  
 Et prostitutæ turpe contubernium  
 Sororis. O quid me incitas?  
 Quid, impudice, et improbande Cæsari?  
 Sed furta dicantur tua,  
 Et heluato sera patrimonio  
 In fratre parsimonia;  
 Vel acta puero cum viris convivia,  
 Udæque per somnum nates;

Et inscio repente clamatum super,  
 Thalassio, Thalassio.  
 Quid palluisti, femina? an joci dolent?  
 An facta cognoscis tua?  
 Non me vocabis pulchra per Cotyttia  
 Ad feriatos fascinos: 20  
 Nec dein movere lumbos in crocotulam  
 Prensus videbo altaribus;  
 Flavum prope Thybrim et olentes nauticum  
 Vocare, ubi appulsæ rates  
 Stant in vadis cœno retentæ sordido,  
 Macraque luctantes aqua.  
 Neque in culinam, et uncta compitalia,  
 Dapesque duces sordidas:  
 Quibus repletus ut salivosis aquis,  
 Obesam ad uxorem redis, 30  
 Et æstuantem docte solvis pantices,  
 Os usque lambis saviis.  
 Nunc læde, nunc lacesse, si quidquam vales!  
 Et nomen ascribo tuum.  
 Cinæde Luci, an te reliquerunt opes?  
 Fameque genuini crepant?  
 Videbo habentem præter ignavos nihil  
 Fratres et iratum Jovem,  
 Scissumque ventrem, et herniosi patrum  
 Pedes inedia turgidos. 40

VI. AD VENEREM.

Si mihi susceptum fuerit decurrere munus,  
 O Paphon, o sedes quæ colis Idalias,  
 Troïus Æneas Romana per oppida digno  
 Jam tandem ut tecum carmine vectus eat:  
 Non ego thure modo, aut picta tua templa tabella  
 Ornabo, et puris sertâ feram manibus:

Corniger hos aries humilis, et maxima taurus  
 Victima sacratos tinget honore focos:  
 Marmoreusque tibi, dea, versicoloribus alis  
 In morem picta stabit Amor pharetra.  
 Adsis, o Cytherea! tuus te Cæsar Olympo  
 Et Surrentini litoris ora vocat.

10

## VII. RELICTIS ALIIS STUDIIS PHILOSOPHIAM EPICUREAM AMPLECTITUR.

Ite hinc, inanes rhetorum manipuli,  
 Inflata rore non Achaico turba,  
 Et vos, Sile, Albuti, Arquitique, Varroque,  
 Scholasticorum natio madens pingui,  
 Ite hinc inanis cymbalon juventutis.  
 Tuque, o mearum cura, Sexte, curarum,  
 Vale, Sabine; jam valete formosi.  
 Nos ad beatos vela mittimus portus,  
 Magni petentes docta dicta Syronis,  
 Vitamque ab omni vindicabimus cura.  
 Ite hinc, Camenæ; vos quoque limite sævæ,\*  
 Dulces Camenæ; nam fatebimur verum,  
 Dulces fuistis. Et tamen meas chartas  
 Revisitote; sed pudenter, et raro.

10

## VIII. DE SABINO PARODIA CATULLIANA.

Sabinus ille, quem videtis, hospites,  
 Ait fuisse mulio celerrimus,  
 Neque ullius volantis impetum cisi  
 Nequisse præterire, sive Mantuam  
 Opus foret volare, sive Brixiam.  
 Neque hoc negat Tryphonis æmuli domus  
 Negare nobilem, insulamve cæruli:  
 Ubi iste, post Sabinus, ante Quinctio  
 Bidente dicit attondisse forfice

\* Corruptus versus.

Comata colla, nequa sordidum, jugo  
 Premente, dura vulnus ederet juba.  
 Cremona frigida, et lutosa Gallia,  
 Tibi hæc fuisse, et esse, cognitissima  
 Ait Sabinus: ultima ex origine  
 Tua stetisse dicit in voragine,  
 Tua in palude deposuisse sarcinas,  
 Et inde tot per orbitosa millia  
 Jugum tulisse; læva, sive dextera,  
 Strigare mulas, sive utrimque cœperat.  
 Neque ulla vota semitalibus deis  
 Sibi esse facta, propter hoc novissimum,  
 Paterna lora, proximumque pectinem.  
 Sed hæc prius fuere: nunc eburnea  
 Sedetque sede, seque dedicat tibi,  
 Gemelle Castor, et Gemelle Castoris.

10

20

IX. AD VARIUM.

Scilicet hoc sine fraude, Vari dulcissime, dicam:  
 Dispeream, nisi me perdidit iste putus.  
 Sin autem præcepta vetant me dicere; sane,  
 Non dicam. Sed me perdidit iste puer.

X. AD VILLAM SYRONIS.

Villula, quæ Syronis eras, et pauper agelle,  
 Verum illi domino tu quoque divitiæ:  
 Me tibi, et hos una mecum, et quos semper amavi,  
 Si quid de patria tristius audiero,  
 Commendo, in primisque patrem. Tu nunc eris illi,  
 Mantua quod fuerat, quodque Cremona prius.

XI. AD M. VALERIUM MESSALAM.

Pauca mihi, niveo sed non incognita Phœbo,  
 Pauca mihi, doctæ, dicite, Pegasides.

Victor adest, magni magnum decus ecce triumphi,  
 Victor, qua terræ, quaque patent maria ;  
 Horrida barbaricæ portans insignia pugnæ,  
 Magnus ut Cœnides, utque superbus Eryx ;  
 Nec minus idcirco nostros expromere cantus  
 Maximus, et sanctos dignus inire choros.  
 Hoc itaque insuetis jactor magis, optime, curis ;—  
 Quid de te possim scribere, quidve tibi.  
 Namque, fatebor enim, quæ maxima deterrendi  
 Debuit, hortandi maxima causa fuit.  
 Pauca tua in nostras venerunt carmina chartas,  
 Carmina cum lingua, tum sale Cecropio ;  
 Carmina, quæ Pylium, sæclis accepta futuris,  
 Carmina, quæ Pylium vincere digna senem.  
 Molliter hic viridi patulæ sub tegmine quercus  
 Mœris pastores et Melibœus erant ;  
 Dulcia jactantes alterno carmina versu,  
 Qualia Trinacriæ doctus amat juvenis.  
 Certatim ornabant omnes Heroïda divi ;  
 Certatim divæ munere quæque suo.  
 Felicem ante alias tanto scriptore puellam !  
 Altera non fama dixerit esse prior :  
 Non illa, Hesperidum ni munere capta fuisset,  
 Quæ volucrum cursu vicerat Hippomenem ;  
 Candida cycneo non edita Tyndaris ovo ;  
 Non supero fulgens Cassiopea polo ;  
 Non defensa diu volucrum certamine equorum,  
 Optabant Graiæ quam sibi quæque manus ;  
 Sæpe animam generi pro qua pater impius hausit,  
 Sæpe rubro Eleïs sanguine fluxit humus ;  
 Regia non Semele, non Inachis Acrisione,  
 Immitti exspectant fulmine et imbre Jovem :  
 Cujus et ob raptum pulsi liquere penates  
 Tarquinii patrios, filius atque pater ;  
 Illo, quo primum dominatus Roma superbos  
 Mutavit placidis tempore consulibus.

10

20

30



Multa, neque immeritis, donavit præmia alumnis,  
 Præmia Messalis maxima Poplicolis. 40  
 Nam quid ego immensi memorem studia ista laboris?  
 Horrida quid duræ tempora militiæ?  
 Castra foro solitos, urbi præponere castra,  
 Tam procul hoc nato, tam procul hac patria?  
 Immoderata pati jam frigora, jamque calores?  
 Stertere vel dura posse super silice?  
 Sæpe truce[m] adverso perlabi sidere Pontum?  
 Sæpe mare audendo vincere, sæpe hiemem?  
 Sæpe etiam densos immittere corpus in hostes,  
 Communem belli nec timuisse deum? 50  
 Nunc celeres Afros perituraque millia gentis,  
 Aurea nunc rapidi flumina adire Tagi?  
 Nunc aliam ex alia bellando quærere gentem?  
 Vincere et Oceani finibus ulterius?  
 Non nostrum est, inquam, tantas attingere laudes;  
 Quin ausim hoc etiam dicere, vix hominum est.  
 Ipsa, hæc ipsa ferent rerum monumenta per orbem;—  
 Ipsa sibi egregium facta decus parient.  
 Nos ea, quæ tecum finxerunt carmina divi,  
 Cynthius, et Musæ, Bacchus, et Aglaïe. 60  
 [Si laudes aspirem, humili sed adire Camena;]  
 Si patrio Graios carmine adire sales  
 Possumus: optatis plus jam procedimus ipsis.  
 Hoc satis est, pingui nil mihi cum populo.

## XII. IN POMPEIUM MAGNUM, VEL IN MITHRIDATEM.

Aspice, quem valido subnixum gloria regno  
 Altius et cœli sedibus extulerat!  
 Terrarum hic bello magnum concusserat orbem;  
 Hic reges Asiæ fregerat et populos.  
 Hic grave servitium tibi, jam tibi, Roma, ferebat;  
 Cetera namque viri cuspide conciderant;

Quum subito in medio rerum certamine præceps  
 Corruit, e patria pulsus in exsilium.  
 Tale deæ numen ; tali mortalia nutu  
 Fallax momento temporis hora dedit.

10

## XIII. AD ANTONIUM MUSAM.

Quocumque ire ferunt variæ nos tempora vitæ,  
 Tangere quas terras, quosque videre homines :  
 Dispeream, si te fuerit mihi carior alter.  
 Alter enim quis te dulcior esse potest ?  
 Cui Venus ante alios, divi, divûmque sorores,  
 Cuncta, neque indigno, Musa, dedere bona ;  
 Cuncta, quibus gaudet Phæbus, chorus ipseque Phæbi ;  
 Doctior o quis te, Musa, fuisse potest ?  
 O quis te in terris loquitur jucundior uno ?  
 Clio nam certe candida non loquitur.  
 Quare illud satis est, si te permittis amari ;  
 Non, contra ut sit amor mutuus inde mihi.

10

## XIV. IN OCTAVII MORTEM.

Quis deus, Octavi, te nobis abstulit ? an, quæ  
 Dicunt, an, nimio pocula dura mero ?  
 Vobis si culpa est bilis : sua quemque sequuntur  
 Fata : quod immeriti crimen habent cyathi ?  
 Scripta quidem tua nos multum mirabimur, et te  
 Raptum et Romanam flebimus historiam.  
 Sed tu nullus eris. Perversi, dicite, manes,  
 Hunc superesse patri quæ fuit invidia ?


XV. *Fragmenta ex Epistola, quam ad Augustum Cæsarem super Æneide sua scripsit.*


Ego vero frequentes a te literas accipio. *Et infra:* De Ænea quidem meo, si, me Hercules, jam dignum auribus haberem tuis, libenter mitterem. Sed tantum inchoata res est ; ut pæne vitio mentis tantum opus ingressus mihi videar ; quum præsertim, ut scis, alia quoque studia ad id opus, multoque potiora, impertiar.


## FASTI VIRGILIANI.

---

A.C.	A.U.C.	
70.	684.	Cn. Pompeio Magno et M. Licinio Crasso Coss., (mens. Oct.) P. Virgilius Maro natus.
55.	699.	Cn. Pompeio Magno II. et M. Licinio Crasso II. Coss., (mens. Oct.) virilem togam sumit.
41.	713.	P. Servilio Vatia Isaurico II. et L. Antonio Pietate Coss., in agraria largitione agros pater- nos amittit, sed postea recuperat.
41?	713?	<i>Ecloga I, IX.</i>
40?	714?	<i>Ecloga IV.</i>
39?	715?	<i>Ecloga VIII.</i>
37?	717?	<i>Ecloga X.</i>
35.	719.	<i>Georg. I.</i> ante hunc annum.
26.	728.	<i>Georg. IV.</i> post hunc annum.
24.	730.	Jam <i>Æneidem</i> scribit Virgilius.
23.	731.	C. Cæsare Augusto XI. et A. Terentio Varrone Murena Coss., M. Marcellus moritur, de quo vid. <i>Æn.</i> vi. 861—87.
19.	735.	C. Sentio Saturnino et Q. Lucretio Coss., mori- tur Virgilius, annos natus 50.







LL

V816  
1854

Virgil

Opera omnia. (1854)

590

# University of Toronto Library

---

**DO NOT  
REMOVE  
THE  
CARD  
FROM  
THIS  
POCKET**

---

Acme Library Card Pocket  
LOWE-MARTIN CO. LIMITED

